

বিদেশে

AMARBOI.COM

AMARBOI.COM

হঠাৎ ঘুম ভেঙে গেলে রাত দুপুরেই হোক আর দিন দুপুরেই হোক চট করে বলতে পারবেন না, আপনি যে হোটেলে শুয়ে আছেন সেটা কোন শহরে। টোকিও, ব্যাংকক, কলকাতা, কাবুল, রোম, কোপেনহাগেন যে কোন শহর হতে পারে। আসবাবপত্র, জানালার পর্দা, টেবিল ল্যাম্প যাবতীয় বস্তু এমনই এক ছাঁচে ঢালা যে স্বয়ং শার্লক হোমসকে পর্যন্ত তাঁরা সব-কটা পুরু পুরু অতসী কাচ মায়। তার জোরদার মাইক্রোস্কোপটি বের করে, ওয়াটসনকে কার্পেটের উপর ঘোড়া বানিয়ে, নিজে তাঁর পিঠে দাঁড়িয়ে, ছাতের উপর তাঁর স্বহস্তে নির্মিত আ লা হোমস স্প্রে ছড়িয়ে—বাকিটা থাক, ব্যামকেশ ফেলুদার কল্যাণে আজ ইন্সকল বয়'ও সেগুলো জানে—তবে বলবেন, “হয় মস্তে কার্লোর রেজিনা হোটেল নয় যোহানেসবেগের অল হোয়াইট হোটেল।” দূর-পাল্লার এ্যারোপ্লেনের বেলাও আজকের দিনে তাই। একবার তার গর্ভে ঢুকলে ঠাইর করতে পারবেন না, এটা সুইস এ্যার, লুফট হানজা, এ্যার ইন্ডিয়া না কে এল এম। তিমির পেটে ঢুকে নোয়া কি আর আমেজ-আন্দেশা করতে পেরেছিলেন এটা কোন জাতের কোন মুন্সুকের তিমি?

ইন্ডিয়ান মানেই নেটিভ, মানে রদ্দী। আস্তে আস্তে এ ধারণা কমছে। নইলে জরমানি এ-দেশের সেলাইয়ের কল, রুশ কলকাতার জুতো কিনবে কেন?

অভাব এ্যার ইন্ডিয়া কোম্পানির এ্যারোপ্লেনকে একটা চানস দিতেই বা আপত্তিটা কি? অন্য কোম্পানিগুলো তো প্রায় সব চেনা হয়ে গিয়েছে। অবশ্য আরেকটা কথা আছে। ঐ কোম্পানির এক ভদ্রলোক বুদ্ধি খাটিয়ে, তদ্বির-তদারক করে আমার সুখ-সুবিধার যাবতীয় ব্যবস্থা না করে দিলে হয়তো আমার যাওয়াই হত না। তাঁর নাম বলবো না। উপরওলা খবর পেলে হয়তো কৈফিয়ৎ তলব করে বসবেন, কোনো একজন ভি আই পি-কে সাহায্য না করে একটা থাড্ডা কেলাস “নেটিভ” রাইটারের পিছনে তিনি আপিসের মহামূল্যবান সময় নষ্ট করলেন কেন? তবে কি না তাঁর এক ভি আই পি মিত্রও আমাকে প্রচুরতম সাহায্য করেছিলেন। তাঁকে না হয় শিখণ্ডীরূপে খাড়া করবেন।

ভেবেছিলুম চুঙ্গী ঘরের (কাস্টমসের) উৎপাত থেকে এই দুই দোস্তো কতখানি বাঁচাতে পারবেন। ইতিমধ্যে এক কাস্টমিয়া আমার কাগজপত্র পড়ে আমার দিকে মিটমিটিয়ে তাকিয়ে শুধোলে, “আপনিই তো আপনার বইয়ে চুঙ্গীঘরের কর্মচারীদের এক হাত নিয়েছেন, না?”

খাইছে। এ যাত্রায় আমি হাজতে বাস না করে মানে মানে কলকাতা ফিরতে পারলে নিতান্তই পঞ্চপিতার আশীর্বাদেই সম্ভবে। কে জানে, এই কাস্টমিয়াই হয়তো হালে কয়েকজন ডাঙর ডাঙর ভি আই পি-কাম-সরকারী কর্মচারীকে বেআইনীতে মাল আনার জন্য নাজেহাল করেছিলেন।...একদিন জলের কল খুললে যে-রকম জল না বেরিয়ে শব্দ বেরতো সেই সময় আমার ব্লটিং পেপারের লাইনিংওলা গলা দিয়ে কথা না বেরিয়ে বেরল ঘস ঘস খস খস চোঁ ধরনের কি যেন একটা।

নাঃ। এ-লোকটির রসবোধ আছে কিংবা ঐর বাড়িতে মাসে একদিন জল আসে বলে

ঐ ভাষা বোঝাতে তিনি সূনীতি চাটুয্যে মশাইকে তাক লাগিয়ে উত্তম ধনিতস্ববাবদে কেতাব লিখতে পারবেন। বললেন, “নিশ্চিন্তমনে ঐ আরাম চেয়ারটায় বসুন। আমি সব ঠিক করে দিচ্ছি।” তারপর ডাইনে বাঁয়ে তাকিয়ে কী এক অশ্রুত টরে টক্কর সংকেত করলেন আর সঙ্গে সঙ্গে জনচারেক বাঙালি কাস্টমিয়া আমাকে ঘিরে যা আদর আপ্যায়ন আরম্ভ করলেন যে, হৃদয়ঙ্গম করলুম, দেবীর প্রসাদে মুক যে-রকম বাচাল হয়, আমি কেন, হরবোলাও মুক হতে পারে।

প্রতিজ্ঞা করলুম, চুঙ্গীঘর লেখাটা আমি ব্যান করে দেব। কার যেন দূশ টাকা ফাইন হয়েছে।

কিন্তু এত সব বাখানিয়া বলছি কেন?

গুনুন। জীবনে ঐ একদিন উপলব্ধি করলুম, সাহিত্যিক—তা সে আমার আটপৌরে সাহিত্যিক হওয়ার মধ্যেও একটা মর্যাদা আছে।

এসব যে বাখানিয়া বলছি তার আরো একটা কারণ আছে।

আমার নিজের বিশ্বাস, প্লেনের পেটের ভিতরকার তুলনায় এয়ারপোর্টে আজব আজব তাব্জব চিড়িয়া দেখতে পাওয়া যায় ঢের বেশী। পাসপোর্ট, কাস্টমস, হেলথ অফিসে, রেস্টুরাঁয় তাদের আচরণ কেউ বা সংকোচের বিহীনতায় অতীব স্রিয়মাণ, কেউ বা গড ড্যাম ডোন্টো কেয়ার ভাব—ওদিকে একটি বিগতযৌবনা মার্কিন মহিলা, এয়ারোপ্লেনে অর্থনিদ্রা যামিনী কাটিয়ে আলুখালু-বেশ, হত-পাউডার-রুজ,—এঞ্জিনের পিস্টন বেগে পলস্তুরা পলস্তুরা ক্রীম-পাউডার-রুজ মাখছেন, এদিকে তাঁর কৰ্তা প্লেনে সম্ভায় কেনা স্কচ স্যাঁট স্যাঁট করছেন; আর ঐ সুদূরতম প্রান্তে-দেখুন,—দেখুন বললুম বটে, কিন্তু দেখার উপায় নেই—কালো বোরখাপরা জড়োসড়ো গুণ্ডা দুই মক্কাতীর্থে হজ যাত্রিনীর গোষ্ঠ। এঁরা নিশ্চয়ই চলতি ফ্যাশানের ধার ধারেন না। বেশীর ভাগ আঁকড়ে ধরে আছেন পুটুলি—হ্যাঁ বেনের পুটুলি। গোরুর গাড়িতে গয়নার নৌকোয় ওঠার সময় যে-পুটুলি সঙ্গে নেন। ওঁরা ভাড়া বাবদ কয়েক হাজার টাকা দিয়েছেন নিশ্চয়ই! অনায়াসে হাঙ্কা স্যুটকেস কিনতে পারতেন। দু-একজনের ছিলও বটে। কিন্তু ওঁদের কাছে গোরুর গাড়ি যা, হাওয়াই জাহাজও তা—এঁদের মক্কা পৌঁছেলেই হল। হায়, এঁরা জানেন না, প্লেনে ভ্রমণ—তা সে যে-কোনো কোম্পানিই হোক না কেন—গরুর গাড়িতে মুসাফিরী করার তুলনায় ঢের বেশী তকলীফ দেয়। এমন কি প্লেনে এঁদের পক্ষে হায়া-শরম বাঁচিয়ে চলাও কঠিন। কলকাতার বস্তিতে কি হয় জানিনে, কিন্তু এঁদের যখন প্লেনে করে যাবার রেষ্ট আছে তখন এঁরা সেখানকার নন। আর গ্রামাঞ্চলে কেউ কখনো প্রাতঃকৃত্যের জন্য কিউ দেয় না। অথচ প্লেনে প্রাতঃকৃত্যের জন্য এঁদের কিউয়ে দাঁড়াতে হবে—মেয়েমন্দের লাইন বেঁধে। সে-কথা পরে হবে। তবে হজ যাত্রীদের জন্য স্পেশাল প্লেনে যদি স্পেশাল ব্যবস্থা থাকে তবে তার তথ্য জানিনে; কোনো কোম্পানি অপরাধ নেবেন না।

“শুভক্ষণে দুর্গা স্মরি প্লেন দিল ছাড়ি

দাঁড়িয়ে রহিল পোর্টে সব বেরাদরি শুদ্ধ চোখে।”

পূর্বেই নিবেদন করেছি, প্লেনের ভিতরে দেখবার কিছুটি নেই। থার্ডক্লাস ট্রেনে যা দেখতে পাওয়া যায় তার চেয়েও কম। আর সর্বক্ষণ আপনার চোখের তিন ফুট সামনে, সমুখের দুটো সীটে দুটো লোকের ঘাড়। তারো সামনে সারি সারি ঘাড়। দোস্ত আমার এ-প্লেনের ‘মালিক’। অতএব আমার জন্য উইন্ডো সীটের ব্যবস্থা করেছেন—অর্থাৎ

বাঁদিকে তাকালে বাইরের আকাশ দেখা যায়। বলতে গেলে পৃথিবীর কিছুই না। একে রাত্রি, তদুপরি আল্লায় মালুম, বিশ হাজার না পঁচিশ হাজার ফুট উপর দিয়ে প্লেনে যাচ্ছেন, কিছু দেখতে চাইলে ব্রিনয়নের প্রয়োজন। উপরেরটা হয়তো কিছু বা দেখতে পায়। তবে ভারতীয় প্লেনে একটা বড় আরাম আছে। যদিও অধিকাংশ যাত্রী ভারতীয় নয়। বিদেশী এবং প্রধানত ইয়োরোপীয়। তারা জানে, ইন্ডিয়ানরা বেলল্যাপনা পছন্দ করে না। কাজেই অতিরিক্ত কলরোল, এবং মাঝে মাঝে তদতিরিক্ত কলহরোল থেকে নিশ্চিন্ত মনে নিষ্কৃতি পাওয়া যায়।

এ-বাবদে এখানেই থাক। কারণ শ্রদ্ধেয় শ্রীযুত তারাশঙ্কর, সম্মানীয় শ্রীযুত বুদ্ধদেব, ভদ্র প্রবোধ ও অন্যান্য অনেকেই প্লেনের ভিতরকার হাল সবিস্তর লিখেছেন।

জাগরণ, তন্দ্রা, ঘুম সবই ভালো। কিন্তু তিনটেতে যখন গুবলেট পাকিয়ে যায় তখনই চিত্তির। এ-যেন জুরের ঘোরে দুদিন না তিনদিন কেটে গেল বোঝবার কোনো উপায় নেই।

চিৎকার চৈচামেচি। রোম! রোম!! রোম!!!

ক্যাথলিকদের তো কথাই নেই। প্রটেষ্টানদের ঈশ্বর সংযত কৌতূহল। বিশেষ করে মার্কিনদের। দেশে ফিরে বড়ফাটাই করতে হবে, “হ্যাঁ, তেমন কিছু না, তবে কি না, হ্যাঁ, দেয়ালের আর গম্বুজের ছবিগুলো ভালো। কী যেন নাম (ভামিনীর দিকে তাকিয়ে) মাইকেল-রাফাএল, না, হল না। লেওনার্দো দা বন্ডিচেল্লি। ও! সেটা বুঝি মোনালিসার লীনিং টাওয়ার।”

বললে পেতায় যাবেন না, আমি স্বকর্ণে শুনেছি, তাজমহলের সামনে বসে একই বেঞ্চে-বসা এক মার্কিনকে তার মিসিসের উদ্দেশ্যে শুধোতে শুনেছি, “কিন্তু আশ্চর্য, এই ইন্ডিয়ানরা এ-সব তৈরী করলো কি করে—ফরেন সাহায্য বিনা, অর্থাৎ, আমাদের সাহায্য না নিয়ে।”

রোমে নামতেই হল। সেখানে আমার এক বন্ধু বাস করেন। কিন্তু তার কোনো নাম্বার জানা ছিল না বলে যোগসূত্র স্থাপনা করা গেল না। একখানা পত্রাঘাত, তদরূপ স্ট্যাম্প যোগাড় করতে না করতেই এয়ার কোম্পানির লোক রাখাল ছেলে যে-রকম গোরু খেদিয়ে খেদিয়ে জড়ো করে গোয়ালে তোলে সেই কায়দায় প্যাসেঞ্জারদের প্লেনের গর্ভে ঢোকালে। প্যাসেঞ্জারদের গরুর সঙ্গে তুলনা করাটা কিছুমাত্র বেয়াদবী নয়। মোটা, পালটা ঠিক বয়স্ক গরুরই মত লাউঞ্জের মধ্যখানে একজোট হয়ে বসেছে বটে কিন্তু বাছুরের পাল, অর্থাৎ চ্যাংড়া চিংড়িয়া যে কে বোনদিকে ছিটকে পড়েছে তার জন্য ছলিয়া শমন বের করেও রক্তির ফায়দা নেই। কেউ গেছেন কিওরিওর দোকানে। কাইরোর মত এখানেও খাঁটি ভেজাল দুই বস্তাই সুলভ—এস্তের-পড়ে আছে—কিন্তু দুর্লভ, কলকাতার মাছের বাজারকেও হার মানায় গাহকের কান কাটতে। কেউ বা গেছেন বিনমার্শুলের (ট্যাক্স ফ্রী) দোকানে। হয়তো ইতালির নামকরা একখানা আস্ত ফিয়াৎ (মোটামুটি ফ্রা বিকেশন ইতালিয়ান Automobile Torino) এই আদ্যাক্ষর নিয়ে Fiat। টুরিনো সেই শহরের নাম যেখানে এ-গাড়ি তৈরী হয়) গাড়ি কিনে আসেন! একটি হাফাহাফি, আধা-আধি, অর্থাৎ পাতে দেওয়া চলে মার্কিন চিংড়ি ঐ হোথা বহু দূরে বার-এ বসে চুটিয়ে প্রেম করছেন একটি খাবসুরৎ ইতালিয়ন চ্যাংড়ার সঙ্গে। খাবসুরৎ বলতেই হবে—এই রোম শহরে ছবি ঐকে, মূর্তি গড়ে যিনি নাম করেছেন সেই মাইকেল

এঞ্জেলো যেন এই সদা একে গড়ে “চরে খাওগে, বাছা” বলে ছেড়ে দিয়েছেন। আর ইতালিয়ান যুবক-যুবতীর প্রতি মার্কিনিংরেজের যে-নীরিতি সেটা প্রায় বেহায়ামীর শামিল। চলে খাবে না কেন? সর্বশেষে বলতে হয়, ইতালির কিয়ান্তি মদ্য দুনিয়ার কুন্দ্রে সুধার সঙ্গে পান্না দেয়। সেটাও পাওয়া যাচ্ছে ফ্রী, গ্রেটিস অ্যান্ড ফর নাথিং। মুফৎমে।

প্লেনে ঢুকে দেখি, সত্যি সেটা গোয়ালঘর। মশা খেদাবার তরে গাঁয়ের চাচার বাড়িতে যে-রকম স্যাংসেঁতে ঝড়ে আগুন ধরানো হত এখানেও সেই প্রতিষ্ঠান। তবে হ্যাঁ, এটা বিজ্ঞানের যুগ। নানা প্রকারের ডিসিনফেকটেন্ট, ডিঅডরেন্ট স্প্রে করা হয়েছে প্রেমসে। সায়েবদের যা বী ও—বডি ওডার—গায়ের বোটকা দুর্গন্ধ।

সকাল বেলায় আলো দিব্য ফুটে উঠছে। ইতিমধ্যে প্লেনে পাক্সা সাড়ে পনেরো ঘণ্টা কেটেছে। দমদমা ছেড়েছি রাত নটায়; এখন সকাল আটটা। হওয়ার কথা তো এগারো ঘণ্টা! কি করে হল? বাড়ির কান্ধাবান্ধাদের শুধোন।

॥ ২ ॥

প্লেন যখন ছাড়ল তখন অপ্রশস্ত দিব্যালোক।

দিব্যালোকের সঙ্গে সময়ের সম্পর্ক আছে। যে-দেশে যাচ্ছি, সেই জার্মানির বাঘা দার্শনিক কান্ট নাকি বলেছেন কাল এবং স্থান ব্যক্তিগত অভিজ্ঞতার উপর নির্ভর করে না। (টাইম অ্যান্ড স্পেস আর আ প্রিয়রি কনসেপশন)।

কাজের বেলা কিন্তু দেখলুম, তত্বটা আদৌ সরল সহজ নয়।

বাইরের দিকে তাকিয়ে দেখি, যেন দেশের সকালবেলার সাতটা আটটা। কিন্তু হঠাৎ হাতঘড়ির দিকে নজর পড়াতে দেখি, সেটি দেখাচ্ছে সাড়ে বারোটা! কি করে হয়? আমার ঘড়িটি তো পয়লা নম্বরী এবং অটোমেটিক। অবশ্য এ-কথা আমার অজানা নয়, অটোমেটিক বেশী সময় কোন প্রকারের ঝাঁকুনি না খেলে মাঝে মধ্যে থেমে গিয়ে সময় চুরি করে। কিন্তু কাল রাতভর যা এ-পাশ ও-পাশ করেছি তার ফলে ওর তো দম খাওয়া হয়ে গেছে নিদেন দুদিনের তরে। আমার পাশের সীটে একটি চার-পাঁচ বছরের ছোট্ট মেয়ে। তার পরের সীটে এক বর্ষীয়সী—বাচ্চাটার ঠাকুরমা দিদিমার বয়সী। তাঁর দিকে ঝুঁকে শুধালুম, “মাদাম, বেজেছে কটা, ব্লীজ?” মাদামের এলোমেলো চুল, সকালবেলার “ওয়াশ”, মুখের চুনকাম, ঠোঁটের উপর উষার লালবাতি জ্বালান হয়নি। শুকনো মুখে যতখানি পারেন স্নান হাসি হেসে বললেন, “পার্দোঁ মসিয়ো, জ্ ন্ পার্ল পা লেদুঁস্থানী!” অর্থাৎ তিনি “হিন্দুস্থানী” বলতে পারেন না। ইয়াল্লা। সরলা ফরাসিনী ভেবেছেন, প্লেনটা যখন হিন্দুস্থানী, আমি হিন্দুস্থানে প্লেনে উঠেছি, চেহারাও তদ্বৎ। অতএব আমি নিশ্চয়ই হিন্দুস্থানীতে কথা বলেছি। আমি অবশ্য প্রস্তুতি শুধিয়ে ছিলুম আমার সর্বসত্ত্ব সংরক্ষিত অতিশয় নিজস্ব “বাঙাল” ইংরিজিতে। ওদিকে এ-তত্বও আমার সবিশেষ বিদিত যে ফরাসীরা নটোরিয়াস, একভাষী—ফরাসী ভিন্ন অন্য কোনো ভাষা শিখতে চায় না। তাদের উহা বক্তব্য তাবলোক যখন হৃদমুদ হয়ে ফ্রান্সে আসছে, বিশেষ করে কড়ির দেমাক, বন্দুক-কামানের দেমাক, চন্দ্রজয়ের দেমাকে ফাটো ফাটো মার্কিন জাত এস্টেক—ফরাসীর মত লাঞ্ছক জবান শেখবার ব্যর্থ চেষ্টায় হরহামেশা যাচ্ছে তখন ওদের আপন দেশে আপোসে তারা যে কিচির-মিচির করে সেগুলো শেখার জন্য খামোকা উত্তম

ফরাসী ওয়াইনে সুনির্মিত নেশাটি চটাবে কেন? তবু মহিলাটির উক্তি শুনে আমরা ঈষৎ নাজ মোটা হল। দূর-দূনিয়ার ভারতীয় প্লেন সার্ভিস না থাকলে মহিলাটি কি কল্পনা করতে পারতেন যে হিন্দুস্থানীও আন্তর্জাতিক ভাষা হতে চলেছে—মুসাফির যে-রকম অ্যার ফ্রাঞ্চে ফরাসী, কে এল এম-এ ডাচ, বি ও এ সি-তে ইংরিজির জন্য তৈরী থাকে।

তখন পুনরাপি আপন ঠুন অরিজিনাল ফরাসীতে প্রশ্নটির পুনরাবৃত্তি করলুম। “আ—আ—! বুঝেছি, বুঝেছি। কিন্তু এই সময় সমস্যাটি ভারী “কঁপ্লিকে” অর্থাৎ কম্প্লিকেটেড, জটিল। আমি ওটা নিয়ে মাথা ঘামাইনে।”

“তবু?”

“সব দেশ তো আর এক টাইম মেনে চলে না। “ভোয়ালা”—নয় কি? প্যারিসে যখন বেলা বারোটা তখন রেঙ্গুনে—আমি সেখানে বাস করি—বিক্রেল পাঁচটা ছটা। কিন্তু আপনাকে ফের বলছি, ওসব নিয়ে মাথা ঘামিয়ে কোনো লাভ নেই। আমি টাইম কত জেনে যাই আমার অতিশয় বিশ্বাসী মিনিস্ট্র দ্য লেটেরিয়রকে (হোম সেক্রেটারি, অর্থাৎ ভিতরকার “ইন্টেরিয়ের” “এতেরিয়র”-কে) শুধিয়ে। সোজা কথায় পেটটিকে। ওখানে লা-মাসেইয়েজ সঙ্গীত (বাংলায় পেটে যখন ছলধ্বনি) বেজে ওঠে তখন সেটা লাঞ্চের বা ডিনারের সময়। উপস্থিত আমার “এতেরিয়রিতে” সে-সঙ্গীত ফ্রেসেভতে (তার সপ্তকের পঞ্চমে)। তাই এখন রেঙ্গুনে নিশ্চয়ই দেড়টা দুটো।”

আমি সাবুনা দিয়ে বললুম, “তা এখনুনি বোধ হয় লাঞ্চ দেবে।”

মাদাম যদিও বলেছেন তিনি টাইম নিয়ে মাথা ঘামান না কিন্তু দেখলুম, তিনি প্র্যাকটিক্যাল দিকটা খাসা বোঝেন। আপত্তি জানিয়ে বললেন, “রেঙ্গুনে যখন লাঞ্চ তখন এই মিত্রোপাতে (মিৎ=মিডলা,—রোপ; ইয়োরোপো-র শেষাংশ অর্থাৎ মধ্য-ইয়োরোপে) ব্রেকফাস্ট। জাপানে যারা এ-প্লেনে উঠেছে, তাদের তো এখন ডিনারের সময় হয়-হয়। সুতরাং কোন্ যাত্রী কোথায় উঠেছে, কার পেট কখন ব্রেকফাস্ট/লাঞ্চ/ডিনারের জন্য কার্নাকাটি শুরু করে সে-হিসেবে তো আর কোম্পানি ঘড়ি ঘড়ি কাউকে লাঞ্চ কাউকে সাপার, কাউকে স্যানউইচসহ বিকলের চা দিতে পারে না। তবে কি না এরা ব্রেকফাস্টে যে পরিমাণ খেতে দেয় সেটা কলেবরে প্রায় লাঞ্চের সমান।...তাই বলছি, এসব টাইম-ফাইম নিয়ে মাথা ঘামাবেন না। ট্রেনেও যদি ঘড়ি ঘড়ি ঘড়িটার দিকে তাকান তবে সে জর্নি দীর্ঘতর মনে হয় না? আমি তো প্যারিসে পৌছতে পারলে বাঁচি। ‘বঁদিয়ো’ (দয়ালু ঈশ্বর) ঘন্টা দেড়েকের ভিতর পৌছিয়ে দেবেন। নাতনীটা নেতিয়ে গিয়েছে।”

মহিলাটি যে-ভাবে সবিস্তার গুছিয়ে বললেন সেটা খোপে টেকে কিনা বলতে পারবো না, কারণ আমি যত বার এসেছি গিয়েছি, আহালাদি পেয়েছি তখন ঘড়ি মিলিয়ে দেখিনি কোনটা লাঞ্চ কোনটা কি? এবং আজকের দিনে পৃথিবীর ভিন্ন ভিন্ন টাইমের সালঙ্কার সটীক ফিরিস্তি দেবার বিশেষ প্রয়োজন আছে বলে মনে করিনে। রেডিয়ো, ট্রানজিস্টারের কল্যাণে এখন বাড়ির খুকুমণি পর্যন্ত জ্ঞানগর্ভ উপদেশ দেয় বুঝিয়ে বলে গ্রীনিচ মীন টাইম. ষিটশ সামার টাইম, সেণ্ট্রাল ইউরোপীয়ান টাইম কোনটা কি? তবু যে এতখানি লিখলুম, তার কারণ ভিন্ন ভিন্ন দেশের ভিন্ন ভিন্ন টাইম যে কি ভাবে কসরৎ বিন মেহন্নৎ আয়ত্ত করতে হয় সেটা ফরাসী মহিলাটি আমাকে শিখিয়ে দিলেন অতি প্রাকটিকাল পদ্ধতিতে। সেটা কি? রাজা সলমন যেটা গুরুগম্ভীর ভাবে, ধর্মনীতি হিসেবে আণুবাক্য রূপে হাজার তিনেক বছর পূর্বে প্রকাশ করে গিয়েছেন ‘নো দাইসেলফ’ ‘নিজেকে চেনো

(চিনতে শেখো)’। শ বছর আগে লালন ফকীরও বলেছেন ‘আপন চিনলে খুদা চেনা যায়।’ ফরাসী মহিলাটিও সেই তত্ত্বটিই, অতিশয় সরল ভাষায় প্রকাশ করলেন, আপন পেটটিকে বিশ্বাস করো। তার থেকেই লোকাল টাইম, স্ট্যান্ডার্ড টাইম জানা হয়ে যাবে। ঐটেই মোক্ষমতম ক্রনোমিটার। বরঞ্চ ক্রনোমিটার মাঝে মধ্যে বিগড়ায়। আলবৎ, পেটও বিগড়ায়। কিন্তু বিগড়ানো অবস্থাতেও সে লাঞ্চ ডিনারের সময়টায় নিগেটিভ খবর জানিয়ে দেয় তার ক্ষিদে নেই।

ইতিমধ্যে ব্রেকফাস্ট না কি যেন এসে গেছে। মাদাম বলেছিলেন, “সেটা কলেবর”। আমি মনে মনে বললুম, “বপু।” এ্যাব্বড়া বড়া ভাজা সসিজ, পর্বত প্রমাণ ম্যাশট পাঁটাটো, টোসট-মাখন, মার্মলেড টমাটো ইত্যাদি কাঁচা জিনিস, আরো যেন কি কি। তখন দেখি, বেশ খাচ্ছি। অতএব পেটের ক্রনোমিটার বলছে, এটা লাঞ্চ, অর্থাৎ বেলা একটা দুটো। ঘড়ি মিথ্যেবাদী বলছে ন’টা!

॥ ৩ ॥

অজর্গাইয়া যেরকম ওয়াকিফ হবার চেষ্টা না দিয়েই ধরে নেয় দিল্লী মেলও তার ধেধেড়ে গোবিন্দপুর ফ্ল্যাগ ইসটিশানে দাঁড়াবে এবং চেপে বসে নিশ্চিন্দ মনে তামুক টানে, আমার বেলাও হয়েছিল তাই। আমার অপরাধ আরো বেশী। আমি জেনেগুনেই অপকর্মটি করেছিলুম। আমি ভালো করেই জানতুম যে প্লেনে যাচ্ছি সেটা যদিও জার্মানির উপর দিয়ে উড়ে যাবে, তবু সে-দেশের কোনো জায়গায় দানাপানির জন্যও নামবে না। অবশ্য এ্যার-ইন্ডিয়ার মুরুব্বী আমার, এক গাল হেসে আমায় বলেছিলেন, “এ প্লেনটা কিন্তু প্যারিসে নামে। আপনি সেখানে চলে যান। দু-চারদিন ফুর্তিফার্তি করে চলে যাবেন জার্মানি। খাচা একই। আর প্যারিসে—হেঁহেঁহেঁহেঁ—” সঙ্গে যে মিত্রটি ছিলেন তিনিও মৃদু হেসে সায় দিলেন। দুজনারই বয়স এই তিরিশ পঁয়ত্রিশ। মনে মনে বললুম, এখন কলকাতা দিল্লীর রাস্তাঘাটেই যা দেখতে পাওয়া যায় প্যারিসের নাইট ক্লাব-কাবারে তার চেয়ে বেশী আর কি ভেক্সিবাজি দেখাবে? তদুপরি বানপ্রস্থে যাবার বয়সও আমার বহুকাল হল তামাদি হয়ে গিয়েছে। এ বয়সে “নির্বাপনপে কিমু তৈলদানং?” তাই আখেরে হির হল আমি এ্যার-ইন্ডিয়া প্লেন থেকে সুইটজারল্যান্ডের জুরিচে (স্থানীয় ভাষায় ৎসুরাষি) নামবো। হেথায় চেষ্টা করে ভিন্ন প্লেনে মৌকামে পৌছব—অর্থাৎ জার্মানির কলোন শহরে। তাই সই।

ফরাসিনীকে বিস্তর বঁ ভোয়াইয়াজ (গুড জর্নি, গুড ফ্লাইট) বলে জুরিচের এ্যার পোর্টে নেমে পাসপোর্ট দেখালুম। তারপর গেলুম খবর নিতে কলোনে যাবার প্লেন কখন পাবো। উত্তর শুনে আমি স্তব্ধ, জড়। দেশে বলে,

“অল্প শোকে কাতর।

অধিক শোকে পাথর ॥”

তখন বেজেছে সকাল নটা। রামপণ্টক বলে কি না, কলোন যাবার প্লেন দ্বিপ্রহরে। বিগলিতার্থ আমাকে নিরেট তিনটি ঘন্টা এখানে বসে বসে আঙ্গুল চুষতে হবে।

শুনেছি, যে-রুগী দশ বৎসর ধরে পক্ষাঘাতে অসাড় অবশ সে নাকি মৃত্যুর সময় অকস্মাৎ বিকট মুখভঙ্গি করে, তার সর্বাস্থ খিচোতে থাকে, হঠাৎ দশ বৎসরের টান-টান-

হাঁটু যেন ইলেকট্রিক শক খেয়ে খাড়া হয়ে খুতনির দিকে গোস্তা মারতে চায় এবং মুখ দিয়ে অনর্গল কথা বেরতে থাকে।

আমার হল তাই। আমি হয়ে গিয়েছিলুম অচল অসাড়। “স্তম্ভিত” বললুম না, কারণ আজকের দিনের পয়লা নম্বরী এয়ারপোর্টে স্তম্ভ আদৌ থাকে না। যাই হোক যাই থাক, আমার মুখ দিয়ে বেরতে লাগল আতশবাজির ঝটকা, তুবড়ির পর তুবড়ির হিংস্র হিস্ হিস্ আর পটকা বোমার দুন্দাড় বোম্-বাম। আর হবেই না কেন? যে জুরিচের কাউন্টারের সামনে দাঁড়িয়ে কর্ণপটহবিদারক তথা নয়নাঙ্ককারক আতশবাজি ছাড়ছি সেই আতশবাজিকেই আপন জার্মান ভাষায় বলে “বেঙ্গলিশে বেলোয়েয়টুঙ” অর্থাৎ “বেঙ্গল রোনানী”; এবং এ-দেশের ফরাসী অংশে বলে “ফ্যদ্য বাঙাল” অর্থাৎ “ফায়ার অব বেঙ্গল”।^১ তদুপরি বিশেষভাবে লক্ষণীয় ফরাসী ভাষায় বঙ্গদেশকে বাঙ্গাল রূপে উচ্চারণ করে। আমি বাঙাল বঙ্গসন্তান। আমি আমার “জন্মনি, জন্মনি” অধিকার অর্থাৎ বার্থরাইট ছাড়বো কেন? ফায়ার ওয়ার্কস চালাবার যদি কারো হক থাকে তবে সে আমার। হুঙ্কার ছাড়লুম :

“কি বললে? ঝাড়া তিনটি ঘণ্টা আমাকে এই এয়ারপোর্টে বসে কলোনের প্লেনের জন্য তাজ্জিম মাজ্জিম করতে হবে? আমার দেশ যে ভারতবর্ষকে তোমরা অভয় ডিভালাপট কন্ট্রি—সাদামাটা ভাষায় অসভ্য দেশ—বলো সেখানেও তো তিন তিনটি ঘণ্টা অপেক্ষা করতে হয় না, কনেকশনের জন্য। হ্যাঁ, হ্যাঁ—আমি রেলগাড়ির কথাই বলছি। আমি যদি আজ ভারতের যে-কোনো ডাকগাড়িতে করে যে-কোনো জংশনে পৌঁছই তবে আধ ঘণ্টার ভিতর কনেকশন পেয়ে যাই। না পেলে—সেটাও সাতিশয় কালেকশ্বিনে—খবরের কাগজে জোর চেন্নাচেন্নি করি (মনে মনে বললুম—অশ্রদ্ধেনীয় রেলের কর্তারা তার থোড়াই কেয়ার করেন!) আরোপ্লেনের তো কথাই নেই। সে তো আরো তড়িঘড়ি কনেকশন দেয়। আমাকে যত তাড়াহড়ো করে মোকামে পৌঁছে দিতে পারে, ততই তার লাভ। অন্যত্র অন্য প্যাসেঞ্জারের সেবার্থে যেতে স্পারলে তার আরো দুপয়সা হয়।...অ! তোমাদের বিস্তর ধনদৌলৎ হয়ে গিয়েছে বলে তোমরা আর পয়সা কামাতে চাও না? আর শোনো ব্রাদার, এ তো হল ট্রেন-প্লেনের কাহিনী, গোরুর গাড়ির নাম শুনেছ? বুলক কার্ট? সেই গোরুর গাড়িতে করে যদি আমি দশ-বিশ মাইল যাই তবে সেখানে পৌঁছেও সঙ্গে সঙ্গে কনেকশন পাই। বোলপুর থেকে ইলামবাজার গিয়ে নদীর ওপারে তদন্তে অন্য গোরুর গাড়ির কনেকশন হামেহাল তৈরী। বস্তুত তখন ওপারের গাড়োয়ানরা গাহককে পাকড়াও করার জন্য যা হৈ-ছল্লোড় লাগায় তার সামনে আন্তর্জাতিক পাণ্ডা প্রতিষ্ঠানের জেরুজালেম-পাণ্ডারা পর্যন্ত নতমস্তক হন। এ-নিয়ে আমি অষ্টাদশ পর্ব

১। আমার এক সুপণ্ডিত মিত্র বহু গবেষণার পর স্থির করেছেন : এদেশে গুড় তৈরী হত বলে এর নাম গৌড় (এবং গুড় থেকে “রাম” মদ তৈরী হত বলে তার নাম গৌড়ী—মহাভারতেও এর উল্লেখ আছে—যেমন মধু থেকে মাধ্বী মদ)। এবং এই গুড় সর্বপ্রথম চীন দেশে রিফাইনড হয়েছিল বলে এর নাম চিনি (পরে মিশরে তৈরী চিনির নাম হল মিসরি বা মিথ্রী)। তাঁর মতে বারুদ প্রথম আবিষ্কৃত হয় বাঙলা দেশে—আতশবাজীর জন্য। চীনদেশে সেটা সর্বপ্রথম আগ্নেয়াস্ত্রে ব্যবহৃত হয় বলে চীনদেশকে বারুদের আবিষ্কারক বলা হয়—এবং সেটা ভুল।

মহাভারত—থুড়ি, পাঁচখানা ইলিয়াড দশখানা ফাউস্ট লিখতে পারি। কিন্তু উপস্থিত সেটা স্বগিত থাক। আমার শেষ কথা এইবারে শুনে নাও। এই যে আমি কন্টিনেন্টে এসেছি তার রিটার্ন টিকিটের জন্য কত ঝেড়েছি জানো? এক একটা টাকা যেন নাক ফুটো করে করে করে বেরিয়েছে—তোমরা যাকে বলো, পেইং থদি নোজ। রোজা ছ হাজার পাঁচশটি টাকা। তারপর ফরেন এক্সচেঞ্জ গয়রহ হিসেবে নিলে দাঁড়ায় প্রায় সাড়ে সাত হাজারের মত। এ ভূখণ্ডে থাকবো মাত্র তিনটি মাস। এইবারে হিসেব করো তো সে বসে বুঝি তোমার পেটে কত এলেম, এই যে কনেকশনের জন্য আমার তিনটি ঘণ্টা বরবাদ করলে তার মূলটা কি? সে না হয় গেল! কিন্তু সে-সময়টা যে বন্ধুবান্ধবীর সামিধ্য থেকে বঞ্চিত করলে তার জন্য তোমার হৃদয়বনে কোনো সন্তাপনল প্রজ্জ্বলিত হচ্ছে না? তারা—”

ইতিমধ্যে আমার চতুর্দিকে একটা মিনি মাস্ট্রির মধ্যখানের মিডি সাইজের ভিড় জমে গিয়েছে। ফ্রী এস্টারটেনমেন্ট। আমার সোলোতেসপারা কিংবা দ্রৌপদী যে-রকম রাজসভায় আত্মপক্ষ সমর্থন করেছিলেন সেই ধরনের যুক্তিজাল বিস্তার এদের হৃদয়বনে যেন মলয়বাতাসের হিল্লোল, দে দোল দোল খেলিয়ে গেল। এদের বেশীর ভাগই আমার বেদনাটা সহানুভূতিসহ প্রকাশ করছে। “য়া য়া”, “উই উই”, “সি সি” যাবতীয় ভাষায় আমাকে মিডি-সমর্থন জানাচ্ছে। আমি ফের তেড়ে এগুতে যাচ্ছি এমন সময়—

এমন সময় সর্বনাশ! একটি কুড়ি একুশ বছরের কিশোরী, আমি যাকে কেছে মুছে ইন্ট্রি মেরে ভাঁজ করে পকেটে ঢোকাতে যাচ্ছি, কাউন্টারের পিছনের কুঠরি থেকে বেরিয়ে এসে তাকে বললে, “আপনার টেলিফোন।” তন্মুহূর্তেই সেই মহাপ্রভু তেলব্যাজ না করে, যেন সসেমিরে দে ছুট দে ছুট। লোকটা নিশ্চয়ই রবীন্দ্রনাথের “আমারে ডাক দিলে কে ভিতর পানে” গানটি জানে।

কিশোরী একগাল হেসে আমাকে শুধোলে, “আপনার জন্য কি করতে পারি স্যার?” দুগুণের ছাই। আধ-ফোঁটা এই চিংড়ির সঙ্গে লড়াই দেব আমি।

“নাথিং বাট ইয়োর লভ্।” বলে দুমদুম করে লাউজের সুদূরতম প্রান্তে আসন নিলুম।

॥ ৪ ॥

সোফাটা মোলায়েম। সামনে ছোট্ট একটি টেবিল।

বেজার মুখে বসে আছি। এমন সময় দেখি একজন বয়স্ক ভদ্রলোক দুহাতে দুটি ভর্তি ওয়াইনগ্রাস নিয়ে আমার সামনে এসে দাঁড়ালেন। ঠিক যতখানি নিচু হয়ে অপরিচিতজনকে বাও করাটা কেতাদুরস্ত তাই করে শুধোলেন, “ভু পেরমেতে, মসিয়ো”—অর্থাৎ “আপনার অনুমতি আছে, স্যার?” “নিশ্চয়, নিশ্চয়।” যদিও সোফাটির যা সাইজ তাতে পাঁচজন কিংকং অনায়াসে বসতে পারে তবু ভদ্রতা দেখাবার জন্য ইঞ্চিটাক সরে বসলুম। ভদ্রলোক ফের কায়দামাফিক বললেন, “ন ভু দেৱাঁজে পা, জ ভু প্রী।” এর বাংলা অনুবাদ ঠিক কি যে হবে, অতখানি ফরাসী জানিনে, বাঙলাও না। মোটামুটি “না, না, বাস্তব হবেন না। ঠিক আছে, ঠিক আছে।” উর্দুতে বরঞ্চ খানিকটে বলা যায়, “তকল্লুফ ন্ কীজীয়ে” ঐ ধরনের কিছু একটা। “তকল্লুফ” কথাটা “তকলীফ”

(বাঙলায় কিছুটা চাল) অর্থাৎ “কষ্ট”। মোদা : “আপনাকে কোনো কষ্ট দিতে চাইনে।”

সেই দুটো গ্রাস টেবিলে রেখে একটা আমার দিকে এগিয়ে দিলেন। আরেকটা নিজের তুলে নিয়ে বললেন, “আপনার স্বাস্থ্যের মঙ্গলের জন্য।”

চেনাশোনা কিছুই নেই। খোদার খামোখা এ-লোকটা একটা ড্রিংক দিচ্ছে কেন? তবে কি লোকটা কনফিডেন্স ট্রিকস্টার? আমাদের হাওড়া শ্যালদাতে যার অভাব নেই। ভাবসাব (কনফিডেন্স) জমিয়ে বলবে, “দাদা, তা হলে আপনি টিকিট দুটো কিনে আনুন। এই নিন আমার লিলুয়ার পয়সা, আমি মালগুলো সামলাই।” ...টিকিট কেটে ফিরে এসে দেখলেন, ভোঁ ভোঁ। আপনার মালপত্র হাওয়া।

কিন্তু এ লোকটা আমার নেবে কি? সুকুমার রায় (?) একদা একটি ব্যঙ্গচিত্র আঁকেন। বিরাট ভুঁড়িওলা জমিদার টিঙ-টিঙে দারোয়ানকে শাসিয়ে শুধোচ্ছেন, “চোর ভাগা কি’ও?” দারওয়ান বললে, “মেরা এক হাতমে তলওয়ার দুসরেমে ঢাল। পকড়ে কৈসে?”—আমার এক হাতে তলওয়ার, অন্য হাতে ঢাল। ধরি কি করে?

আমার এক পাশে আমার মিত্রের দেওয়া এটাচি, অন্যদিকে এ্যার ইন্ডিয়ান দেওয়া ছোট্ট একটি বাক্সো। দুটোই তো বগলদাবা করে বসে আছি। লোকটাকে দেখে তো মনেও হচ্ছে না, ও স্বর্গত পি সি সরকার (এ স্থলে বলে রাখা ভালো সরকার কখনো এহেন অপকর্ম করতেন না) যে আমার দুটি বাস্তব সরিয়ে ফেলবে। এবং সবচেয়ে বড় কথা, এ-রকম রুচিসম্মত পোশাক-আশাক আমি একমাত্র ডিউক অব উইনডসরকে (উচ্চারণ নাকি উইনজার) পরতে দেখেছি—জীবনে একবার। ডিউকের জীবনে একবার নয়, আমার জীবনে একবার। সে বেশের বর্ণনা অন্যত্র দেব।

একখানা কার্ড এগিয়ে দিলেন। তাঁর নাম আঁদ্রে দ্যুপোঁ। তারপর এক গাল হেসে শুধোলেন, “যদি অপরাধ না নেন তবে একটি প্রশ্ন শুধাই, আপনি কি কস্টিঙে বিশেষজ্ঞ?”

আমি খতমত খেয়ে শুধোলুম, “কস্টিঙ? সে আবার কি?”

ভদ্রলোক আরো খতমত খেয়ে কিন্তু চট করে নিজেকে সামলে নিয়ে বললেন, “সে কি মশাই! এই মাত্র আপনার অনবদ্য লেকচারটি শুনলুম, আপনি ক’হাজার টাকা ঝেড়ে কলকাতা থেকে এ-দেশে আসার রিটার্ন টিকিট কেটেছেন, এবং কনেকশন না পেয়ে তিন ঘণ্টাতে আপনার কি পরিমাণ অর্থক্ষয় হল তার পুরো-পাক্কা, করেকটু টু দি লাস্ট্ সীতিম, ব্যালানস শীট। একেই তো বলে কস্টিঙ। আমি ব্যবসাবাগিন্জ্য করি। ঐ নিয়ে নিত্য নিত্য আমার ভাবনাচিন্তার অন্ত নেই। কিন্তু সে-কথা থাক। আমি আপনার কাছে এসেছি একটি প্রস্তাব নিয়ে। আপনার যখন তিন ঘণ্টা বরবাদ যাচ্ছে তখন এক কাজ করুন না? মিনিট পনেরো পরে এখান থেকে একটা প্লেন যাচ্ছে জিনীভা : আমি সে প্লেনে যাচ্ছি। আপনি চলুন আমার সঙ্গে জিনীভায়। আমার সামান্য একটি বাড়ি আছে সেখানে। আপনার খুব একটা অসুবিধে হবে না। বেড-রুম, বাথ-রুম, ডাইনিং-রুম, স্টাডি সব নিজস্ব পাবেন। (আমি মনে মনে মনকে শুধালুম একেই কি বলে “সামান্য একটি বাড়ি?”)। আমাদের সঙ্গে আহারাদি, দুদণ্ড রসলাপ করে জিরিয়ে জুরিয়ে নেবেন। তারপর আপনাকে আপনার মোকাম কলোনগামী প্লেনে তুলে দেব।” তারপর একটু ইতি-উতি করে বললেন, “কিছু মনে করবেন না। আমি এ-প্রস্তাবটা নিজের স্বার্থেই পাড়ছি। আমার একটি ছেলে আর দুটি মেয়ে। বোল, চোদ্দ, দশ। আপনার সঙ্গে আলাপচারী করে তারা সত্যি উপকৃত হবে। এদেশে চট করে একজন ইন্ডিয়ান পাওয়া

যায় না। পেলোও তিনি ফরাসী জ্ঞানেন না। আর আমার বীথী খাসা রাঁধতে পারেন—”

আমি বাধা দিয়ে বললুম, “কিন্তু এই দশ মিনিটের ভিতর আপনি আমার জন্য জিনীভার টিকিট পাবেন কি করে?”

মসিয়ো দ্যুপোঁ মুচকি হেসে বললেন, “সেই ফরমুলা, ‘ন ভু দেৱাঁজে পা’—আপনাকে চিন্তা করতে হবে না। এটা ওটা ম্যানেজ করার কিস্তি এলেম আমার পেটে আছে; নইলে ব্যবসা করি কি করে! কাচ্চাবাচ্চারা বড় আনন্দ পাবে। প্লেনের ভাড়টার কথা আপনি মোটেই চিন্তা করবেন না—”

আমি ফের বাধা দিয়ে বললুম, “আপনি ও বাবদে চিন্তা করবেন না। এয়ার-ইন্ডিয়ার আমার টিকিটটি অমনিবাস, অর্থাৎ যেখানে খুশী সেখানেই যেতে পারি; তার জন্য আমাকে ফালতো কুড়ি ঢালতে হবে না (পাঠক, এ ধরনের মোটর অমনিবাসকে কবিগুরু নাম দিয়েছেন বিশ্বম্বহ। এবং তদীয় অগ্রজ দ্বিজেন্দ্রনাথ মোটর গাড়ি, অটমবিলকে, যেটা আপন শক্তিতে চলে, তার নাম দিয়েছিলেন স্বতশ্চলশকট। অতএব এ স্থলে আমার যানবাহন প্লেনের টিকিটকে “স্বতশ্চল বিশ্বম্বহ মূল্য পত্রিকা” অনায়াসে বলা যেতে পারে)।”

একটু থেমে বললুম, “আমি এখনুনি আসছি।” অর্থাৎ সে-স্থলে যাচ্ছি, যেখানে রাজ্যধিরাজও ঘোড়ায় চড়ে যেতে পারেন না অর্থাৎ শৌচাগার।

সেদিকে যাইনি। যাচ্ছিলুম অন্য পথে। এ্যাটাচি বাক্সো সোফাতেই রেখে এসেছি। এ রকম সহৃদয় সজ্জনকে বিশ্বাস করে আমি বরঞ্চ ও দুটো হারাবো, অবিশ্বাস করতে ঘেন্না ধরে। গেলুম ‘বার’-এ। সেখানে মসিয়ো যে ওয়াইন এনেছিলেন তারই দুগ্লাস কিনে ফিরে এলুম সোফায়। একটা গ্লাস তাঁর দিকে এগিয়ে দিয়ে তাঁর স্বাস্থ্য কামনা করে বললুম, “আপনার আন্তরিক আমন্ত্রণের জন্য আমার অসংখ্য ধন্যবাদ। কিন্তু আমার একটা বড়ই অসুবিধে আছে। কলোন এয়ারপোর্টে আমার বন্ধুবান্ধবরা অপেক্ষা করছে। তারা খবর নিয়ে নিশ্চয়ই বুঝে গিয়েছে, আমি তিন ঘণ্টা পরে কনেকশন পাবো। আমি আপনার সঙ্গে জিনীভা গেলে বড্ড দেরি হয়ে যাবে। তারা বড় দুশ্চিন্তাগ্রস্ত হবে।”

আর মনে মনে ভাবছি, ইহ সংসারে, এমন কি ইয়োরোপেও সেই বাগদাদের আবু হোসেনও আছে যারা রাত্তায় অতিথির সন্মানে দাঁড়িয়ে থাকে। সে একা একা যেতে পারে না।

মসিয়ো বড্ডই দুঃখিত হয়ে প্রথম বললেন, “কিন্তু আপনি আবার আমার জন্য ড্রিংক আনলেন কেন? এ কি দেনা-পাওনা!”

আমি মাথা নিচু করলুম। দ্যুপোঁ বললেন, “তা হলে দেশে ফিরে যাবার সময়ে আমার ওখানে আসবেন?”

তাঁর একটি পকেট-বই বের করে বললেন, “কিছু একটা লিখে দিন। ছেলেমেয়েরা খুশী হবে।” আমি তৎক্ষণাৎ লিখলুম :

“কত অজ্ঞানারে জানাইলে তুমি

কত ঘরে দিলে ঠাই

দূরকে করিলে নিকট বন্ধু,

পরকে করিলে ভাই।”

হায়! ফেরার পথেও দ্যুপোঁর বাড়িতে যেতে পারিনি।

জুরিকের মত বিরাট এয়ারপোর্টে কী করে মানুষ একে অন্যকে খুঁজে পায় সেটা বোঝবার চেষ্টা করে ফেল মেরেছি। তাহলে নিশ্চয়ই স্বীকার করতে হবে এখানকার কর্মচারীদের পেটেপিঠে এলেম আছে। তাদেরই একজন আমার সামনে এসে বললে, “আপনার জন্য একটা মেসেজ আছে, স্যার।” আমি সত্যিই বিস্মিত হলাম। আমাকে এই সাহারা ভূমিতে চেনে কে? বললাম, “ভুল করেননি তো”; “এশ্বে না। আমি জানি—” সঙ্গে সঙ্গে ছোকরা আমার পুরো নামটি বলে দিল। যদিও সে এদেশেরই লোক তবু আমার মনে হল সে “দেশ” পত্রিকার “পঞ্চতন্ত্র” নিত্য সপ্তাহে পড়ে এবং তারই মারফত আমার তোলা নামটি পুরো পাক্ষা রপতো করে নিয়েছে। হয়তো ডাকনামটাও জানে। হয়তো “ভোম্বল” “কাবলা” জাতীয় আমার সেই বিদ্যুটে ডাকনামটা সে পাঞ্চজন্যে শঙ্খধ্বনিতে প্রকাশ করতে চায় না। কিন্তু এসব ভাববার চেয়ে ঢের বেশী জানতে চাই, কে আমাকে স্মরণ করলেন।

অ। ফ্রান্সাইন ফ্রিডি বাওমান! কিন্তু ইনি জানলেন কি প্রকারে যে আমি আজ সকালে এখানে পৌঁছছি। তাঁর মেসেজ খুলে জিনিসটে পরিষ্কার হল। কলকাতা ছাড়ার পূর্বে এয়ার ইন্ডিয়ার ইয়াররা শুধিয়েছিলেন, জুরিকে আমার কোন পরিচিতজন আছেন কিনা, কেননা ওখানে আমাকে কনেকশনের জন্য খানিকক্ষণ অপেক্ষা করতে হবে। খবর পাঠালে ওঁরা হয়তো এয়ারপোর্টে এসে আমাকে সঙ্গসুখ দেবেন। আমি উত্তরে বলেছিলুম, জুরিকে নেই, তবে সেখান থেকে ত্রিশ চল্লিশ মাইল দূরে লুৎসেন শহরে একটি পরিচিতা মহিলা আছেন এবং তাঁর নাম ঠিকানা দিয়েছিলুম। এ কথাটা ভুলে গিয়েছিলুম বেবাক। “দুয়ারে প্রস্তুত গাড়ি” “ওড়ের পাটালি; কিছু বুনা নারিকেল; দুই ভাও সরিষার তেল; আমসব্দ আমচুর—” এর মাঝখানে কবিগুরু যদি তাঁর প্রিয়া কন্যাকে ভুলে যান তবে সাতাশটা হাবিজাবির মাঝখানে আমি যে এটা মনে রাখিনি তার জন্য সদয় পাঠক রাগত হবেন না।

কিন্তু এই সুবাদে সেই খাঁটি জাত-সুইস মহিলাটির সঙ্গে আপনাদের পরিচয় করে দিতে চাই। ফ্রিডি বাওমান। ১৯৪২/৪৩-এ ইনি সেই মহারাজা সয়ার্জী রাওয়ের বরোদা প্রাসাদে প্রবেশ করেন। আজকের দিনে ক্রিকেট কিংবা/এবং পলিটিকসের সঙ্গে যাদেরই সামান্যতম পরিচয় আছে তাঁরাই জানেন বরোদার শ্রীযুত ফতেহ সিংরাও গায়কোয়াড়কে। এই ফ্রিডির হাতেই তিনি পৃথিবীতে পদার্পণ করেন। অথবা মস্তকাবতীর্ণ করেন। কিন্তু তার উপর আমি জোর দিচ্ছি। রাজা মহারাজা ভিখিরি আতুর পৃথিবীতে সবাই নামেন একই পদ্ধতিতে।

আসল কথা, ফতেহ সিং রাও মানুষ হন ফ্রিডির হাতে। তিনি অসাধারণ শিক্ষিতা রমণী—সেই ছাব্বিশ বছর বয়সেই। জার্মান, ফরাসী, স্প্যানিশ, ইংরিজি সব-কটাই বড় সুন্দর জানতেন। এ-দেশে এসেছিলেন বেকারীর জন্য নয়। রোমান্টিক হৃদয়; ইন্ডিয়াটা দেখতে চেয়েছিলেন। গ্যোটে তাঁর প্রিয় কবি। গ্যোটে'র ভারতপূজা তাঁর মনে গভীর দাগ কেটেছিল। ওদিকে তাঁর উত্তম উত্তম পুস্তক পড়ার অভ্যাস চিরকালের। রাজপ্রাসাদের কাজকর্মও গুরুভার নয়। অতি অল্প সময়ের মধ্যেই তিনি যে কি করে তাঁর প্রিয়সাধক

শ্রীরামকৃষ্ণ ও বিবেকানন্দের বাণীর মর্মস্থলে পৌছে গেলেন সেটা বুঝলুম যেদিন তিনি আমাকে বললেন যে ছেলেবেলা থেকেই তিনি সেন্ট ফ্রানসিস আসিসির ভক্ত। এবং সকলেই জানেন, এই সন্তুটির সঙ্গেই ভারতীয় শ্রমণ সন্ন্যাসী, সাধুসন্তের সবচেয়ে বেশী সাদৃশ্য। একদিকে যেমন দরিদ্রনারায়ণের সেবা, অন্যদিকে ঠিক তেমনি পরমাত্মার ধ্যানে মগ্ন হয়ে প্রভু স্বস্তের সঙ্গে একাত্মবোধ করাতে তিনি এ-দেশের মরমীয়া সাধক, ইরান-আরব-ভারতের সুফীদের সঙ্গে এমনই হরিহরাত্মা যে অনেক সময় বোঝা কঠিন কার জীবনবৃত্তান্ত পড়ছি। ষ্ট্রানের, ভক্তের না সুফীর?

কিন্তু আমার কী প্রগল্ভতা যে আমি তাঁর জীবনীর সংক্ষিপ্ততম ইতিহাসও লিখতে পারি। “দেশ” পত্রিকার প্রিয়তম লেখক শ্রীযুক্ত ফাদার দ্যতিয়েন যদি বাঙলায় তাঁর জীবনী লেখেন তবে গৌড়জ্ঞান তাহা আনন্দে করিবে পান সুধা নিরবধি।

কুমারী ফ্রিডির কথা পুনরায় লিখব। কন্টিনেন্ট সেরে, দেশে ফেরার পথে, লুৎসেন শ্রীমতীর বাড়িতে সপ্তাহাধিককাল ছিলুম—সেই সুবাদে। উপস্থিত ফ্রিডি লিখেছেন, তিনি আমার (এয়ার ইন্ডিয়া মারফৎ) টেলেক্স পেলেন কাল রাত্রে। সঙ্গে সঙ্গে তিনি জুরিকের এয়ারপোর্টে ট্রাঙ্ক-কল করে জানালেন, আমি জুরিকে নেবেই যেন তাঁকে ট্রাঙ্ক-কল করি। বরাবর তিনি বাড়িতেই থাকবেন।

মনে হয় কত সোজা। কিন্তু যাঁরা দেশ-বিদেশ ঘুরে বেড়াতে চান তাঁদের উপকারার্থে এ-স্থলে কিঞ্চিৎ নিবেদন করে রাখি।

প্রথমত আমাকে টেলিফোন বুথ থেকে ফোন করতে হবে। সে বুথ আবার সদ্ব্যবস্থা। আপন দেশজ খাদ্য ভিন্ন অন্য খাদ্য খান না। অর্থাৎ তাঁর বাস্ত্বে আপনাকে ছাড়তে হবে এদেশের আপন সুইস মুদ্রা। অতএব গো-খোঁজা করুন, সে সাহায্যে, কোথায় সে পুণ্যভূমি যেখানে আপনার ডলার বা পৌন্ডের বদলে সুইস মুদ্রা দেবে। সবাই তো ইংরিজি বোঝে না। ভুল বুঝে অনেকেই। তারা কেউ বলে ঐ তো হোথায়, কেউ বলবে তার জন্য তো শহরে যেতে হবে। শেষটায় পেলেন সেই কাউন্টার পুণ্যভূমি—আমি অতি, অতি সংক্ষেপে সারছি। পেলেন সুইস বস্তু। তখন আবার ভুল করে যেন শুধু কাগজের নোট না নেন। কারণ ফোন বুথ কাগজার্থ্যাশী নন; তিনি চান মুদ্রা। সেই মুদ্রা আবার ঐ সাইজের হওয়া চাই। ঠ্যাঙ্কস ঠ্যাঙ্কস করে চলুন ফের ঐ পুণ্যভূমিতে। আরো বহুবিধ ফাঁড়াগর্দিশ আছে। বাদ দিচ্ছি।

আহা! কী আনন্দ!!! কী আনন্দ!!!

“কে বলছেন? আমি ফ্রিডি।”

“আমি সৈয়দ।”

॥ ৬ ॥

ঐ-যা! ট্রাঙ্ক লাইন কেটে গেল! পাবলিক বুথ থেকে ট্রাঙ্ক-কল করা এক গব্বয়স্তুনা, আমি যে দুটি মুদ্রা মেসিনে ফেলে লুৎসেন পেয়েছিলুম, তার ম্যাদ ফুরিয়ে গিয়েছে। সঙ্গে সঙ্গে আর দুটো না ফেলার দরুণ লাইন কাট অফফ। ফের ঢালো কড়ি।

অতি অবশ্য সত্য, ফোন যন্ত্রের বাকসে সুইটজারল্যান্ডে প্রচলিত তিন-তিনটি

ভাষা—ফরাসী, জার্মান এবং ইতালীয়—লেখা আছে কোন শুষ্ক সরল পদ্ধতিতে যন্ত্রটি ব্যবহার করতে হয়। লেখা তো অনেক কিছুই থাকে। ধর্মগ্রন্থে তো অনেক কিছুই লেখা থাকে। সেগুলো পড়লেই বুঝি মোক্ষলাভ হয়! জিমনাস্টিকের কেতাব পড়লেই বুঝি কিংকড় সিঙ-এর মত মাসল্ গজায়! প্র্যাকটিস করতে হয়। এবং তার জন্য খেসারতিও দিতে হয়। উপযুক্ত গুরু বিনা যোগাভ্যাস করতে গিয়ে বিস্তর লোক পাগল হয়ে যায়। ...আমি ইতিমধ্যে প্রায় দেড় টাকার মত খেসারতি দিয়ে “হ্যালো হ্যালো” করছি। আর, এ খেসারতির কোনো আন্তর্জাতিক মূল্য নেই। কারণ জার্মানি, ফ্রান্স, ইংলন্ড প্রায় প্রত্যেক দেশই আপন আপন কায়দায় আপন আপন মেসিন চালায়। আর সেখানেই কি শেষ? তিন মাস পরে যখন ফের সুইটজারল্যান্ডে আসবো, তখন দেখব, বাবুরা এ ব্যবস্থা পালটে দিয়েছেন। নূতন কোন্ এক আবিষ্কারের ফলে যন্ত্রটার ব্যবহার নাকি “সরলতর” করেছেন। “সরলতর” না কচু! তাই যাঁরা এসব ব্যাপারে ওয়াকিফ-হাল নন, যাঁরা এই হয়তো পয়লাবারের মত কন্টিনেন্ট যাচ্ছেন তাঁদের প্রতি আমার “সরলতম” উপদেশ, বিনগুরু এসব যন্ত্রপাতি ঘাঁটাতে যাবেন না। অবশ্য গুরু পাওয়া সর্বত্রই কঠিন; এখানে আরো কঠিন। যে যার ধান্দা নিয়ে উর্ধ্বশ্বাসে হস্তদন্ত। কে আপনাকে নিয়ে যাবে সেই বৃথ-গুহায়, শিবিয়ি দেবে সে-গুহায় নিহিতং ধর্মস্য তত্ত্ব!

যাক! ফের পাওয়া গিয়েছে লাইন।

“তুমি লুৎসেন কখন আসছো?”

“অপরাধ নিয়ো না। আমি উপস্থিত যাচ্ছি কলোন। তারপর হামবুর্গ ইত্যাদি। তারপর লন্ডন নটিংহাম। সেখান থেকে ফেরার পথে লুৎসেন। তুমি খেদিয়ে না দেওয়া পর্যন্ত তোমার বাড়িতে।”

“দ্যৎ! কিন্তু তদ্দিনে এখানে যে বড় শীত জমে যাবে। গরম জামা-কাপড় এনেছো তো? মাখট্ নিফট্ (নেভার মাইন্ড—আসে যায় না)। আমার কাছে আছে।”

“তুমি এখনো ফ্রানসিস আসিসীরই শিষ্য রয়ে গিয়েছ—কী করে কাতর জনকে মদৎ করতে হয়, সে-ই তোমার প্রধান চিন্তা। আমি কি তোমার স্টার্ট ব্লাউজ পরে রাস্তায় বেরবো? সে-কথা থাক। আমাকে এয়ারপোর্টে আরো তিন ঘণ্টাটাক বসে থাকতে হবে। চলে এসো না এখানে। আজ তো রববার। তোমাকে আফিস দফতর করতে হবে না।”

“রববার! সেই তো বিপদ। বাড়ি থেকে যেতে হবে লুৎসেন স্টেশন। সেখান থেকে ট্রেনে করে জুরিক। পঁয়ত্রিশ মাইল। সেখান থেকে বাস-এ করে তোমার এয়ারপোর্টে। রববার বলে আজ ঢের কম সার্ভিস। সব কটা উঠতি নাবতিতে টায় টায় কোথায় পাবো কনেকশন—” আমি মনে মনে বললুম, “ঈঃ। ফের সেই কনেকশন। ইলামবাজার রামপুরহাট।” ফ্রিডি বললে, “আচ্ছা দেখি”।

আমি বললুম, “কতকাল তোমাকে দেখিনি।”

ফ্রিডি যদি এখানে আসে-ই তবে তার বাস দাঁড়ায় কোথায়? আমি বসে আমি ট্রানজিট প্যাসেঞ্জারের খোঁয়াড়ে। এখানে তো ফ্রিডির প্রবেশ নিষেধ। অবশ্য সে এদেশের রীতিমত সম্মানিত নাগরিক (সংস্কৃত অর্থে নয়) সিট্জেন্। কাজেই সে স্পেশাল পারমিট যোগাড় করতে পারবে। তবে সেটা যোগাড় করতে করতে কতক্ষণ লাগবে কে জানে? আম আনতে দুধ না ফুরিয়ে যায়। ততক্ষণে হয়তো আমার কলোন-গামী প্রেনের সময় হয়ে যাবে।

বাসস্ট্যান্ডে যেতে হলে আমাকে খোঁয়াড় থেকে বেরোতে হয়। কিন্তু আমাকে বেরুতে দেবে কি? খোঁয়াড়ের বাইরেই স্বাধীন, মুক্ত সুইটজারল্যান্ড। তার জন্য ভিজার প্রয়োজন। আমার সেটা নেই। তবু চেষ্টা করে দেখাই যাক না, কি হয় না হয়। সুকুমার রায় বলেছেন, “উৎসাহে কি না হয়, কি না হয় চেষ্টায়।” সেইটি পড়ে আমার এক সখা ডাকপিয়নকে বলেছিল, “আমার কোনো চিঠি নেই? কি যে বলছো? ফের খুঁজে দেখো।” “উৎসাহে কি না হয়, কি না হয় চেষ্টায়।”

খোঁয়াড়ের গেটে গিয়ে সেখানকার উদীপরা তদারকদারকে অতিশয় সবিনয় নিবেদন করলুম, “সার! আমি কি একটু বাইরে ঐ বাসস্ট্যান্ডে যেতে পারি?”

“আপনি তো ট্রানজিট। না?”

আমি সরাসরি উত্তর না দিয়ে বললুম, “বাস-এ করে লুৎসেন থেকে আমার একটি বাস্‌বী—” হয় পাঠক, তুমি সেই তদারকদের প্রতিক্রিয়া যদি তখন দেখতে। “বাস্‌বী! বাস্‌বী!! সেরতেন্‌মা (সার্টনলি) চের্‌মানতে (ইতালিয়ানে, সার্টনলি)” এবং তার পর জার্মানে “জিয়ার জিয়ার” (শিওর, শিওর) এবং সর্বশেষে যদি কূল না পায়, মার্কিন ভাষায় “শিয়ৌর শিয়ৌর”।

আমি জানতুম, আমি যদি বলতুম, আমার বন্ধু আসছেন, সে বলতো, “নো”। যদি বলতুম আমার বীবি, উত্তর হত তদ্বৎ। যদি বলতুম, বৃদ্ধা মাতা তখনো হত “না”—হয়তো কিঞ্চিৎ খতমত করে। কিন্তু বাস্‌বী! আমার সাতখুন মাপ!

॥ ৭ ॥

কলোনের নাম কে না শুনেছে? বিশেষ করে হেন ফ্যাশনেবল মহিলা আছেন কি যিনি কস্মিনকালেও প্রসাধনার্থে ও-দ্য-কলোন—জার্মানের ক্যালনিশ ভাষায়—কলনের জল ব্যবহার করেননি। বিশ্বজোড়া খ্যাতি এই তরল সুগন্ধটির। ‘৪৭১১’ এবং ‘মারিয়া ফারীনা’ এই দুটিকেই সবচেয়ে সেরা বলে ধরা হয়। এ-দেশেও কলোন জল তৈরি হয় কিন্তু ওটা বানাতে হলে যে সাত আট রকমের সুগন্ধি ফুলের প্রয়োজন, তার কয়েকটি এদেশে পাওয়া যায় না—সর্বোপরি ‘প্রাকপ্রণালী’ তো আছেই। বিলেতেও কলোন জলের এতই আদর যে, হিটলারের সঙ্গে দেখা করার জন্য চেস্‌বারলেন যখন সপরিষদ কলোন থেকে মাইল বিশেক দূরে গডেসবের্গ-এর মুখোমুখি, রাইন নদীর ওপারে যে বাড়িতে ওঠেন, তার প্রতি ঘরে কলোন জল, কলোন জলের সুগন্ধ দিয়ে নির্মিত গায়ে মাখার সাবান, দাড়ি কামাবার সাবান, ক্রীম, পাউডার—বস্তুত প্রসাধনের তাবৎ জিনিস—রাখা হয়েছিল। হিটলারের আদেশে। চেস্‌বারলেন এই সূক্ষ্ম বিদগ্ধ আতিথেয়তা লক্ষ্য করেছিলেন কি না জানিনে। কারণ তখন তাঁর শিরঃপীড়া তাঁর এ-অভিসার তাঁর দেশবাসী কি চোখে দেখবে। তাঁর আপন ফরেন অফিস যে সেটা নেকনজরে দেখছে না, সেটা তিনি জানতেন, কারণ ইতিমধ্যেই তারা একটা প্যারডি নির্মাণ করে ফেলেছে :

“ইফ এট ফার্সট ইউ কানট সাকসীড/ফ্লাই ফ্লাই এগেন।”

বলা বাহুল্য চেস্‌বারলেন ফ্লাই করে গিয়েছিলেন। আর আমি তো সেই গডেসবের্গ-এর উপর দিয়ে কলোন পানে ফ্লাই করে যাচ্ছিই। সেই সুবাদে প্যারডিটি মনে পড়ল।

জুরিচে ফ্রিডির সঙ্গে মাত্র কুড়ি মিনিট কথা বলার সুযোগ পেয়েছিলুম। মনটা খারাপ হয়ে গেছে।

কলোন শহরের সঙ্গে আমার চল্লিশ বছরের পরিচয়।

এখান থেকে প্রায় চোদ্দ মাইল দূরে বন। সেখানে যৌবনে পড়াশুনা করেছিলুম। ট্রামে, বাস-এ, ট্রেনে, জাহাজে করে এখানে আসা অতি সহজ। আমার একাধিক সতীর্থ কলোন থেকে বন ডেলিপ্যাসেঞ্জারী করতো। তাদের সঙ্গে বিস্তর উইকএন্ড করেছি। খুঁটিয়ে খুঁটিয়ে শহরটাকে দেখেছি।

সে-সব সবিস্তর লিখতে গেলে পাঠকের ধৈর্যচ্যুতি হবে। আর লিখতে যাবোই বা কেন? জার্মান ট্যুরিস্ট ব্যুরো যদি আমাকে কিঞ্চিৎ “ব্রান্সন-বিদায়” করতো তবে না হয়—

যদি নিতান্তই কিছু বলতে হয়, তবে প্রথম নম্বর সম্বন্ধে বলি যে, সেটি আপনি চান কি না চান, কিছুতেই এড়াতে পারবেন না। কলোনের বিরাট গগনস্পর্শী গির্জা। প্যারিসে যে-রকম যেখানেই যান না কেন, এ্যাফ্যাল টাওয়ারটা এড়াতে পারবেন না, কলোনের এই কেথিড্রেলটির বেলাও তাই। তবে এ্যাফ্যাল স্তম্ভ বদখদ, কিন্তু কলোনের গির্জাচূড়ো তয়ঙ্গী সুন্দরী। যেন মা-ধরণী উর্ধ্বপানে দুবাধ বাড়ায়ে পরমেশ্বরকে তাঁর অনন্ত অবিচ্ছিন্ন নমস্কার জানাচ্ছেন!

এ গির্জা আবার আমাদের কাছে নবীন এক গৌরব নিয়ে ধরা দিয়েছে।

বছর দুস্তিন পূর্বে কলোনবাসী প্রায় শ-দুই তুর্কী ও অন্যান্য মুসলমান ঐ গির্জার প্রধান বিশপকে গিয়ে আবেদন জানান, “এ-বছরে ঈদের নামাজ শীতকালে পড়েছে। বাইরে বরফ; সেখানে নামাজ পড়ার উপায় নেই। হজুর যদি আপনাদের ঐ গির্জের ভিতরে আমাদের নামাজ পড়তে দেন, তবে আমরা আপনাকে আশীর্বাদ করবেন।” বিশপের হৃদয়কন্দরে কণামাত্র আপত্তি ছিল না—কিন্তু...? এ শহরের লোক খৃস্টান। তাদেরই বিস্ত দিয়ে, গরীবের কড়ি দিয়ে এ-গির্জা সাতশ বছর আগে গড়া হয়েছে। এখনো ওদেরই পয়সাতে এ-মন্দিরের তদারকী দেখভাল চলে। সেও কিছু কম নয়। এরা যদি আপত্তি করে? কিন্তু ঐ বিশপটি ছিলেন বড়ই সন্তুপ্রকৃতির সম্ভ্রম। এবং তার চেয়েও বড় কথা : সাহসী। তিনি অনুমতি দিয়ে দিলেন। মা-মেরী মালিক। তিনি সর্বসম্মতের মাতা।

কিমাশ্চর্যমতঃপরম। তাঁর কাছে কোনো প্রতিবাদপত্র এল না। খবরের কাগজেও ঐ অভাবনীয় ব্যবস্থার বিরুদ্ধে কোনো অভিযোগ বেরোল না। অবিশ্বাস্য! অবিশ্বাস্য!! অবিশ্বাস্য!!!

কিন্তু মার্কিন “টাইম” কাগজে বেরিয়েছে ও বিলেতেও বেরিয়েছে। তারপর সন্দ করে কোন্ পিচেশ!

কলোন এয়ারপোর্টে নেমে দেখি, দুটো স্যুটকেসের একটা আমার নেই। ছুট ছুট দে ছুট,—সেই ঘরের দিকে যেখানে “হারানো-প্রাপ্তি-নিরুদ্ধেশ” সম্বন্ধে তড়িঘড়ি করিয়া দ জানাতে হয়। নইলে চিন্তির। অবশ্য এরা নিজের থেকেই হয়তো দু-পাঁচ দিনের ভিতরেই আমার বেওয়ারিশ জাদুকে খুঁজে পাবেন, কিন্তু আমি কোন্ মোকামে আস্তানা গাড়বো, তার ঠিকানাটা এদের না দিলে মাল হস্তগত হবে কি করে? সেটা তখন তার মালিককে

হারাবে! কোন এক গ্রীক দার্শনিক নাকি বলেছেন, “একই নদীতে তুমি দুবার আঙুল ডোবাতে পারবে না, একই শিখায় দুবার আঙুল পোড়াতে পারবে না। কারণ প্রত্যেকটি বস্তু প্রতি মুহূর্তে পরিবর্তিত হচ্ছে।” মানলুম। কিন্তু একই স্যুটকেস নিশ্চয়ই দুবার, দুবার কেন দুশবার হারাতে কোনো বাধা নেই। অতি অবশ্য কবিশুক্র বলেছেন, “তোমায় নতুন করে পাব বলেই হারাই ক্ষণেক্ষণে/ও মোর ভালবাসার ধন।” কিন্তু প্রশ্ন, এটা কি হারানো বাকসের বেলাও খাটে?

আপিস ঘরটি প্রমাণ সাইজের চেয়েও বৃহদায়তন। ভিতরে একটি ফুটফুটে মেমসাহেব বসে আছেন। আমার লাগেজ টিকিট দেখাতেই তিনি মুচকি হেসে বললেন, “নিশ্চিত থাকুন, ওটা খোওয়া যাবে না। কিন্তু বলুন তো, ওটার ভিতর কি কি আছে?”

সর্বনাশ! সে কি আমি জানি? প্যাকিং করেছে আমার এক তালেবর ভাতিজা মুখুয্যে। তার বাপ প্রতি বৎসর নিদেন তিনবার ইয়রোপ-আমেরিকা যেতেন। সে নিখুঁত প্যাকিং করে দিত। আমার বেলা এ-বারে করেছে—নিখুঁততর। কোন্ বাকসে কি মাল রেখেছে কি করে জানবো!

কিন্তু মিসি বাবা সদয়া। পীড়াপিড়ি করলেন না। আমার ঠিকানাটি টুকে নিলেন। আর ইতিমধ্যে বার বার বলছেন, “এয়ার ইন্ডিয়া বলুন, লুফট-হানজা বলুন, সুইস-এয়ার বলুন কোনো লাইনেই কোনো লাগেজ খোওয়া যায় না। আপনি পেয়ে যাবেনই যাবেন।”

আমি মনে মনে বললুম, “বট্টো!” বেরবার সময় তাকে বিস্তর ধন্যবাদ জানিয়ে সবিনয়ে বললুম, “প্লেডিংস ফ্রলাইন (সদয়া কুমারী)! একটি প্রশ্ন শুধোতে পারি কি?”

সুমধুর হাস্যসহ, “নিশ্চয়, নিশ্চয়।”

আমি বললুম, “তাবৎ হারানো মালই যদি ফিরে পাওয়া যায়, তবে এ-হেন বিরাট আপিস আপনারা করেছেন কেন? আমি তো শুনেছি, কলোন এয়ারপোর্টের প্রতিটি ইঞ্চির জন্য দশ বিশ হাজার টাকা ছাড়তে হয়।”

প্রত্যুত্তরের প্রতীক্ষা না করেই একলক্ষের দফতর থেকে বেরিয়ে মালসামান নিয়ে উঠলুম বিরাট এক বাস-এ।

বাঁচলুম বাবা, বাঁচলুম। প্লেনের গর্ভ থেকে বেরিয়ে খোলামেলায় এসে বাঁচলুম। বাসটি যদিও পর্বতপ্রমাণ, সাগর করিবে গ্রাস হয় অনুমান তবু চলছে যেন রোলস রইস—রইস খানদানী গদিতে, মৃদু মধুরে। কবিশুক্র গেয়েছিলেন, “কাঁদালে তুমি মোরে ভালোবাসার ঘায়ে”—আমি গাইলুম, “বাঁচালে তুমি মোরে ভালো বাস-এর ছায়ে।”

আহা কী মধুর অপরাহ্নের সূর্যরশ্মি। কখনো মেঘমায়ায় কখনো আলোছায়ায়। দুদিকের গাছপাতার উপর সে-রশ্মি কভু বা মেঘের ভিতর দিয়ে আলতো আলতো হাত বুলিয়ে যায়, কভু বা রুদ্রদীপ্ত হয়ে প্রচণ্ড আলিঙ্গন করে। ঐ হোথায় দেখছি, বুড়ো চাষা ঘাসের উপর শুয়ে আছে, চোখের উপর টুপি রেখে। তার সবুজ পাতলুন যেন ঘাসের ঝিলিঝিলির সঙ্গে “এক তালে যায় মিলি”। এদেশের নবান্ন হতে এখনো বেশ কিছুদিন বাকি আছে। চতুর্দিকে অল্পবিস্তর ফসল কাটা হচ্ছে। আজ রববার। রাইনল্যান্ডের লোক বেশির ভাগই ক্যাথলিক। তাদের অধিকাংশই সেদিন সর্বকর্ম ক্ষান্ত দেয়। তাই ক্ষেত-খামারে তেমন ভিড় নেই। আমিও মোকামে পৌছতে পারলে বাঁচি। ইংরিজিতে প্রবাদ : “এ সিনার হাজ্জ নো সনডে”। “পাপীর রববার নেই”। আমি তো তেমন পাপিষ্ঠ নই।

বাস মাঝে মাঝে ছোট ছোট গ্রামের ভিতর দিয়ে যায়। সেখানে রাস্তা নির্জন। বাচ্চাকাচ্চারা কোথায়? তারা তো ক্লাইপে বা সুখালয়ে যায় না—সেখানে অবশ্যই আজ জোর কারবার, বেজায় ভিড়। আমার পাশের সীটে এক বৃদ্ধ ভদ্রলোক বসেছিলেন। তাঁকে অভিবাদন জানিয়ে বললুম, “স্যর, ত্রিশ চল্লিশ বছর আগে আমি এসব গ্রামের ভিতর দিয়ে গিয়েছি। তখন তো ছেলেমেয়েরা রাস্তার উপর রোল-স্কেটিং করতো, দড়ি নিয়ে নাচতো, এমন কি ফুটবলও খেলতো। ওরা সব গেল কোথায়?”

বৃদ্ধ বেশ কিছুক্ষণ চিন্তা করে বললেন, “একাধিক উত্তর হয়তো আছে। চট করে যেটা মনে আসছে সেটা বলতে গেলে বলি, বৃদ্ধ ঘরে টেলিভিশন দেখছে।”

আমি একটু ঘাড় চুলকে বললুম, “কিছু যদি অপরাধ না নেন, স্যর, তবে শুধবো, এটা কি সর্বাংশে ভালো? ফার্সীতে একটি দোহা আছে :—

হব্ চে কুনী, ব্ খুদ কুনী
খা খুব্ কুনী, খা বদ কুনী ॥

যা করবে স্বয়ং করবে
ভালো করো কিংবা মন্দই করো ॥

এই যে প্যাসিভ ভাবে বসে বসে টেলি দেখা, তার চেয়ে রাস্তায় অ্যাকটিভ ভাবে খেলাধুলো করা কি অনেক বেশী কাম্য নয়?”

গুণী এবারে চিন্তা না করেই বললেন, “নিশ্চয়ই। অবশ্য ব্যতায়ও আছে। যেমন মনে করুন, আমরা যখন মোৎসার্ট বা শপা শুনি তখন তো আমরা প্যাসিভ। আর তা-ই বা বলি কি করে? বেটোফেনকে গ্রহণ করা তো প্যাসিভ নয়। ভেরি ভেরি অ্যাকটিভ কর্ম! কী পরিমাণ কনসানট্রেশন তখন করতে হয়, চিন্তা করুন তো। কিন্তু বাচ্চাদের কথা বাদ দিন—কটা বয়স্ক লোকই সে জিনিস করে?”

বুঝলুম লোকটি চিন্তাশীল। একে খুঁচিয়ে আরো অনেক তত্ত্বকথা জেনে নিই। বললুম, “তা টেলিতে কি ভালো প্রোগ্রাম কিছুই দেয় না?”

“তা হলে শুনুন, আপনাকে পুরো ফিরিস্তি দিচ্ছি। যদিও আমি ঐ যন্ত্রটির পূজোরী নই। পুরনো ফিল্ম, নয়া থিয়েটার, গর্ভপাতের সেমিনার-আলোচনা, পাদ্রিদের বক্তৃতা (এ দুটো তিনি ঠিক পর পর বলেছিলেন সেটা আমার এখনো স্পষ্ট মনে আছে), রাজনৈতিকদের সঙ্গে ইন্টারভ্যু, খেলা, কাবারে, ইটালি ভ্রমণ, চন্দ্রাভিযান, ভিয়েটনাম থেকে প্রত্যক্ষদর্শীর প্রতিবেদন, পার্লামেন্টে হ্যার ভিলি ব্রান্ট ও হ্যার শেলের বক্তৃতা—এবং সপ্তাহের পর সপ্তাহ ধরে ঐ একই কেচ্ছা, একই অন্তহীন খাড়া বড়ি খোড় খোড় বড়ি খাড়া (তিনি জরমনে বলেছিলেন “একই ইতিহাস”—ডী জেলবে গেশিঘটে—)। সর্ববস্তু কুচি কুচি করে পরিবেশন। পরের দিনই ভুলে যাবেন, আগের দিন কি দেখেছিলেন—মনের উপর কোনো দানা কাটে না। পক্ষান্তরে দেখুন, বই পড়ার ব্যাপারে আপনি আপনার রুচিমত বই বেছে নিচ্ছেন।”

ইতিমধ্যে আমাদের বাস কতবার যে কত ট্রাফিক জ্যামে কত মিনিট দাঁড়িয়েছে তার

হিসেব আমি রাখিনি। অথচ এদেশে রিকশা, টালা, গোরুর গাড়ি এমন কোনো কিছুই নেই যে-সব হযবরল আমাদের কলকাতাতে নিত্য নিত্য ট্রাফিক জ্যাম জমাতে কখনো স্বেচ্ছায় কখনো অনিচ্ছায়—বিশ্ববিজয়ী প্রতিষ্ঠান।

ভদ্রলোক বাইরের দিকে আসুল তুলে বললেন, “ঐ দেখুন, আরেক উৎকট নেশা। মোটর, মোটর, মোটর। প্রত্যেক জরমনের একখানা মোটর গাড়ি চাই। জরমন মাত্রই মোটরের পূজারী।”

আমার কেমন যেন মনে হল, আমরা বোধ হয় বন শহরের উপকণ্ঠে পৌঁছে গিয়েছি। কিছুটা চেনা-চেনা ঠেকছে, আবার অচেনাও বটে। অথচ একদা এ শহর আমি আমার হাতের তেলোর চেয়ে বেশী চিনতুম। আমি ভদ্রলোককে আমার সমস্যা সমাধান করতে অনুরোধ জানালে তিনি বললেন, “এটা বনই বটে। তবে এ অঞ্চলটা গত যুদ্ধে এমনই বোমারু-মার খেয়েছিল যে এটাকে নতুন করে গড়া হয়েছে। তবে শহরের মধ্যখানটা প্রায় পূর্বেরই মত মেরামৎ করে বানানো। আসল কথা কি জানেন, বমিঙের ফলে ঘিঞ্জি পাড়াগুলো যে নষ্ট হয়ে গেল সেগুলোকে ভালো করে নতুন করে, প্ল্যান মার্ফিক বানাবার চাপটা আমরা মিস করেছি। তবে এই যে বললুম, শহরের মাঝখানটা মোটামুটি আগেরই মত—হাট অব দি সিটি—আর জানেন তো, পুরানো হার্টের জায়গায় নতুন হাট বসানো মুশকিল। এই ধরুন লুটভিষ্ ফান বেটোফেন—”

আমি বললুম, “ওই নামটার ঠিক উচ্চারণটা কি আমি আজো জানিনে।”

হেসে বললেন, “ঐ তো ফেললেন বিপদে। মাঝখানের Vanটা যে খাঁটি জার্মান নয় তা তো বুঝতেই পারছেন। ওঁরা প্রাচীন দিনের ফ্যামিশ। তখন তারা “ভান” না “ফান” উচ্চারণ করতো কে জানে—অন্তত আমি জানিনে—”

আমি বললুম, “থাক, থাক। এবারে যা বলছিলেন তাই বলুন।”

“সেই বেটোফেনের বাড়ি যদি বোমাতে চুরমার হয়ে যেত তবে সেখানে তো একটা পিরামিড গড়া যেত না।”

“এমন কি তাজমহলও না।”

দুম্ করে গাড়ি থেমে গেল। এ কি? ও। মোকামে পৌঁছে গিয়েছি। অর্থাৎ বন শহরে। এবং সবচেয়ে প্রাণাভিরাম নয়নানন্দদান দৃশ্য—যে পরিবারে উঠবো তারই একটি জোয়ান ছেলে উটরিষ্ উলানোফস্কি প্রবলবেগে হাত নাড়াচ্ছে। মুখে তিনগাল হাসি। পাশে দাঁড়িয়ে তাঁর ফুটফুটে বউ। সে রুমাল দুলোচ্ছে।

॥ ৯ ॥

লক্ষ্মী ছেলে উটরিষ্। তার মাঝারি সাইজের মোটরখানা এনেছে। আমার কোনো আপত্তি না শুনে বললে, “আমি মালপত্রগুলো তুলে নিচ্ছি। তুমি ততক্ষণ বউয়ের সঙ্গে দুটি কথা কয়ে নাও। ও তো তোমাকে চেনে না।” মেয়েটিকে বাড়ির কুশলাদি শুধোলুম। কিন্তু বড় লাজুক মেয়ে—কয়েকদিন আগে “দেশ” পত্রিকায় যে সিগারেট-মুখী “মর্ডান মেয়ের” ছবি বেরিয়েছে তার ঠিক উল্টোটি। কোনো প্রশ্ন শুধায় না। শুধু উত্তর দেয়। শেষটায় বোধ হয় সেটা আবছা-আবছা অনুভব করে একটিমাত্র প্রশ্ন শুধালে, “বন কি খুব বদলে গেছে? আমি অবশ্য প্রাচীন দিনের বন চিনি। আমার বাড়ি ছিল কোয়ানিষবের্গে।”

সর্বনাশ! এবং পাঠক সাবধান!

ক্যোনিষবের্গ শহরটি এখন বোধ হয় পোল্যান্ডের অধীনে। ঐসব অঞ্চল থেকে লক্ষ লক্ষ নরনারী বাস্তহারা সর্বহারা হয়ে পশ্চিম জার্মানিতে এসেছে। তাদের বেশীর ভাগই সে-সব দুঃখের কাহিনী ভুলে যেতে চায়। কাজেই সাবধান! ও-সব বাবদে ওদের কিছু জিজ্ঞেস করো না।

তবে এ তত্ত্বও অতিশয় সত্য যে মোকা-মারফিক দরদ-দিলে যদি আপনি কিছু শুনতে চান তখন অনেক লোকই, বিশেষ করে রমণীরা অনর্গল অবাধ গতিতে সবকিছু বলে ফেলে যেন মনের বোঝা নামাতে চায়। বিশেষ করে বিদেশীর সামনে। সে দুদিন বাদেই আপন দেশে চলে যাবে। ও যা বলেছিল সেটা নিয়ে খামোখা কোনো ঘোড়ালার সৃষ্টি হবে না। আমি তাই বেমানুম চেপে গিয়ে বললুম, “ও ক্যোনিষবের্গ!” যেখানে এ-যুগের শ্রেষ্ঠ দার্শনিক কান্ট জন্মেছিলেন! এবং শুনেছি তিনি নাকি ঐ শহরের বারো না চোদ্দ মাইলের বাইরে কখনো বেরোন নি। শহরটাকে এতই ভালোবাসতেন!”...ইতিমধ্যে ডীটারিষ্ স্টিয়ারিঙে বসে গেছে এবং আমার শেষ মন্তব্যটা শুনেছে। বললে, “ভালোবাসতেন না কচু। আসলে সব দার্শনিকই হাড়-আলসে।” আমি বললুম, “সে-কথা থাক। তোর বউ শুধোচ্ছিল, বন শহরটা কি খুব বদলে গেছে? তারই উত্তরটা দি। বদলেছে, বদলায়ও নি—”

“তুমি মামা, চিরকালই হেঁয়ালিতে কথা কও—”

আমি বললুম, “থাক, বাবা, থাক। বাস-এ এক বৃদ্ধ বিষয়টির অবতারণা করতে না করতেই মোকামে পৌঁছে গেলাম। আর এ-তাবৎ দেখেছিই বা কি?”

বন শহরের নাম করলেই দেশী-বিদেশী সবাই বেটোফেনের নাম সঙ্গে সঙ্গে স্মরণ করে বটে, কিন্তু এ বৎসরে বিশেষ করে। কারণ তাঁর দ্বিশতজন্মশতবার্ষিকী সম্মুখেই। ডিসেম্বর ১৯৭০-এ। এ-শহর তাঁকে এতই সম্মান করে যে তাঁর সুন্দর প্রতিমূর্তিটি তুলেছে তাদের বিরাটতম চত্বরে, তাদের বৃহত্তম এবং প্রাচীনতম না হলেও তারই কাছাকাছি প্রাচীন মুনসটার গির্জার পাশে। হয়তো তার অন্যতম কারণ, বেটোফেন ছিলেন সর্বান্তঃকরণে ঈশ্বরবিশ্বাসী। শুধু তাঁর সংগীতে নয়, তাঁর বাক্যলাপে চিঠিপত্রে সর্বত্রই তাঁর ঈশ্বরে পরিপূর্ণ বিশ্বাস, প্রভুর পদপ্রান্তে তাঁর ঐকান্তিক আত্ম-নিবেদন বার বার স্বপ্রকাশ।

সেখান থেকে কয়েক মিনিটের রাস্তা—ছোট্ট গলির ছোট্ট একটি বাড়ির ছোট্ট একটি কামরায় যেখানে তাঁর জন্ম হয়। বাড়ির নিচের তলায় বেটোফেন মিউজিয়াম। সেখানে তাঁর ব্যবহৃত অনেক কিছুই আছে, যেমন ইয়াসনা পলিয়ানাতে তলস্তুয়ের—বৃহত্তর, সম্পূর্ণতর, কারণ সেটা দেড়শ বছর পরের কথা এবং অসম্পূর্ণতম রবীন্দ্রনাথের উত্তরায়েণে যদ্যপি সেটা তলস্তুয়ের প্রায় অর্ধশতাব্দী পরে।...

কিন্তু সেখানে সবচেয়ে মর্মস্পর্শী বেটোফেনের কানের চোঙাগুলো। বত্রিশ বৎসর বয়স থেকেই তিনি ক্রমে ক্রমে কালা হতে আরম্ভ করলেন। বিধাতার এ কী লীলা! বীণাপাণির এই অংশাবতার আর তাঁর বীণা শুনতে পান না। তখন তিনি আরম্ভ করলেন ঐ-সব কানের চোঙা ব্যবহার করতে। পাঠক, দেখতে পাবে, তাঁর বধিরতা বয়সের সঙ্গে সঙ্গে যেমন যেমন বাড়তে লাগলো সঙ্গে সঙ্গে তাঁর চোঙার সাইজও বাড়তে লাগলো। তাতে করে তাঁর কোনো লাভ হয়েছিল কি না বলা কঠিন। তবে এটা জানি, তার

কিছুকাল পরে, যখন তাঁর সঙ্গীতপ্রেমী কোনো সহচর বলতেন, “বাঃ। কী মধুর সুরেলা বাঁশী বাজিয়ে যাচ্ছে রাখাল ছেলেটি”, আর তিনি কিছুই শুনতে পেতেন না তখন বেটোফেন বলতেন, তিনি তন্মুহুর্তেই আত্মহত্যা করতেন যদি না তাঁর বিশ্বাস থাকতো যে সঙ্গীতে এখনো তাঁর বহু কিছু দেবার আছে। আমাদের শ্রীরাধা ঘেরকম উদ্ধবকে বলেছিলেন, “যদি না আমার ‘বিশ্বাস’ থাকতো, প্রভু একদিন আমার কাছে ফিরে আসবেন, তাহলে বহু পূর্বেই আমার মৃত্যু হয়ে যেতো।” এবং সকলেই জানেন, বহু কাল। হয়ে যাওয়ার পরও বেটোফেন মনে মনে সঙ্গীতের রূপটি ধারণা করে বহুবিধ স্বর্গীয় রচনা করে গেছেন যেগুলো তিনি স্বকর্ণে শুনে যেতে পাননি। আমি যেন কোথায় পড়েছি, তিনি সৃষ্টিকর্তার উদ্দেশ্যে করুণ আবেদন জানাচ্ছেন, প্রভু যেন তাঁকে একবারের মত তাঁর শ্রুতিশক্তি ফিরিয়ে দেন যাতে করে তিনি মাত্র একবারের তরে আপন সৃষ্ট সঙ্গীত শুনে যেতে পান। তারপর তিনি সধন্যাস্তকরণে পরলোকে যেতে প্রস্তুত।

চিন্তাস্রোতে বাধা পড়লো। ডীটারিফ্ শুধলো, “মামা, কথা কইছ না যে!”

বললুম, “আমি ভাবছিলাম বেটোফেনের কানের চোঙাগুলোর কথা। ওগুলো সত্যি কি তাঁর কোনো কাজে লেগেছিল?”

ডীটারিফ্ বললে, “বলা শক্ত। কোনো কোনো আধাকাল। একখানা কাগজের টুকরো দুপাটি দাঁত দিয়ে চেপে ধরে কাগজের বেশীর ভাগটা মুখের বাইরে রাখে। ভাবে, ধনিতরঙ্গ ঐ কাগজকে ভাইব্রোট করে দাঁত হয়ে মগজে পৌঁছায়, কিংবা কান হয়ে। কেউ বা সামনের দুপাটির চারটে দাঁত দিয়ে লম্বা একটা পেনসিল কামড়ে ধরে থাকে। কি ফল হয় না হয় কে বলবে?...আচ্ছা মামু, তুমি নিশ্চয়ই লক্ষ্য করেছ, কী রকম অদ্ভুত, প্রিমিটিভ মিনি সাইজের যন্ত্র দিয়ে তিনি তাঁর বিচিত্র সঙ্গীত রচনা করেছিলেন? আমার কাছে ভারি আশ্চর্য লাগে!”

আমি বললুম, “কেন বৎস, ঐ যে তোমার ছোট পিসি, যার সঙ্গে আমার চল্লিশ বছরের বন্ধুত্ব, লীজেল—দেখেছো, ঝড়তি পড়তি কয়েক টুকরো লেটিসের পাতা, আড়াই ফোঁটা নেবুর রস আর তিন ফোঁটা তেল দিয়ে কি রকম সরেস স্যালাড তৈরি করতে পারে? মুখে দিলে যেন মাখম!...আর তোর আমার মত আনাড়ীকে যাবতীয় মশলা সহ একটা মোলায়েম মুগী দিলেও আমরা যা রাঁধবো সেটা তুইও খেতে পারবিনি, আমিও না। পিসি লীজেল কি বলবে, জানিনে। অথচ জানিস, ঐ অদ্ভুত মুগীটি তাঁকে তখন দিয়ে দে। তিনি সেটাকে ছোট ছোট টুকরো করে যাকে ফরাসীরা বলে রাগু ফ্যা, রা ফ্রিকাস, অর্থাৎ লম্বা লম্বা ফালি-ফালি করে কেটে, মুগীটাতে আমরা যে-সব বদ-রান্নার ব্যামো চাপিয়েছিলাম সেগুলো রাইনের ওপারে পাঠিয়ে এ্যামন একটি রান্না করে দেবেন যে, প্যারিসের শ্যাফতক আমরা আমরা বলতে বলতে তারিয়ে তারিয়ে খাবে।...প্রকৃত গুণীজন যা-কিছুর মাধ্যমে যা-কিছু সৃষ্টি করতে পারেন। আমাদের দেশে একরকম বাদ্যযন্ত্র আছে। “একতার” তার নাম। তাতে একটি মাত্র তার। তার দুদিকে দুটি ফ্রেকসিবল বাঁশের কৌশল আছে। সে দুটোতে কখনো জোর কখনো হাল্কা চাপ দিয়ে, আর মাঝখানের তারটাকে প্রাক করে নাকি বিয়াল্লিশ না বাহান্নোটা নোট বের করা যায়। তবেই দ্যাখ। বেটোফেনের মত কটা লোক পৃথিবীতে আসে—আমাদের দেশেও গুণায় গুণায় তানসেন জন্মায় না। যদিও আমাদের দেশ তাদের দেশের চেয়ে বিস্তর বিরাটতর,

এবং সেখানে কলাচর্যা আরম্ভ হয়েছিল অন্তত চার হাজার বছর পূর্বে। এবং আমাদের কলা-জগতে আমরা এখন সাহারাতে। এবং—”

ভীটরিষ বললে, “তুমি আমাদের পার্লামেন্ট হাউসটা দেখবে না। রাইনের পারে। আমি একটু ঘোরপথে যাচ্ছি। সোজা পথে গেলে দু-পাঁচ মিনিট আগে বাড়ি পৌঁছতুম।”

“দ্যাখ ভীটরিষ, তোর পিসি নিশ্চয়ই বিস্তর কেক, পেসট্রি আমাদের জন্ম বাণিয়ে বসে আছে—”

ভীটরিষের বউ বললে, “মামা, শুধু কেক পেসট্রি বললেন। ওদিকে পিসি কি কি বানিয়ে বসে আছেন, জানেন? ক্যানিঙসবেগের রূপসে (ক্যানিঙসগবেগ শহরের একরকম কোফ্‌তা), ফ্রাঙ্কফুর্টের সসিজ, হানোফারের ষাঁড়ের ন্যাজের গুরুয়া—”

আমি বাধা দিয়ে বললুম, “সে তো জানি। কিন্তু লীজেন পিসি আমার জন্যে কি কাঙার ন্যাজের গুরুয়া তৈরি করেছে?”

দুজনই তাচ্ছব। আমি বললুম, “ষাঁড়ের ন্যাজের ভিতরে থাকে চর্বি এবং মাংস। তার একটা বিশেষ স্বাদ থাকে। কিন্তু ষাঁড়ের ন্যাজ আর কতটুকু লম্বা? তার চেয়ে ক্যান্ডারুর ন্যাজ ঢের ঢের বেশী। ওটা যদি পাঁচজনকে খাওয়ানো যায় তবে বিস্তর কড়ি সাশ্রয় হয়।”

ঘ্যাচ করে গাড়ি থামলো।

“এটা কি রে? মনে হয়, গোটা আষ্টেক বিরাট বিস্কুটের টিন একটার উপর আরেকটা বসিয়ে দিয়েছে।” বললুম আমি।

ভীটরিষ বললে, “এটাই আমাদের পার্লামেন্ট।”

॥ ১০ ॥

যাকে বলে মর্ডান আর্ট, পিকাসসো উপস্থিত যার পোপস্য পোপ সেই পদ্ধতিটি জার্মানরা কখনো খুব পছন্দ করেনি। কাইজার দ্বিতীয় ভিলহেলম, যাকে এখনো মার্কিনিংরেজ প্রথম বিশ্বযুদ্ধের জন্য দায়ী করে তিনি ১৯০১ খৃষ্টাব্দে আর্ট এবং আর্টের আদর্শ সম্বন্ধে একটি বক্তৃতা দেন। তাঁর বক্তব্য ছিল : আর্ট হবে সুন্দর, আর্ট হবে সমাজসেবক, রাষ্ট্রসেবক, আর্ট মানুষের দুঃখদৈন্যের ছবি না এঁকে আঁকবে এমন ছবি, কম্পাজ করবে এমন সঙ্গীত, রচনা করবে এমন সাহিত্য যাতে মানুষ আপন পীড়াদায়ক পরিস্থিতি ভুলে গিয়ে আনন্দসায়রে নিমজ্জিত হবে। আজকের দিনে আমরা এটাকে নাম দিয়েছি এসকেপিজম—পলায়ন মনোবৃত্তি। বলা বাহুল্য জার্মান আর্টিস্ট—সাহিত্যিক সঙ্গীতপ্রস্তু—কাইজারের এই পথনির্দেশ খবরের কাগজে পড়ে স্তম্ভিত হন। তা হলে আর্টিস্টের কোনো স্বাধীন সত্তা নেই! সে তার আপন সুখ-দুঃখ, আপন বিচিত্র অভিজ্ঞতা আপন হৃদয়ে উপলব্ধ ভবিষ্যতের আশাবাদী চিত্র অঙ্কন করতে পারবে না! সে তা হলে রাষ্ট্রের ভাঁড়, ক্লাউন! তার একমাত্র কর্তব্য হল জনসাধারণকে কাতুকুতো দিয়ে হাসানো।

কিন্তু জার্মান জনসাধারণ কাইজারের কথাই মেনে নিল। এটা আমার ব্যক্তিগত মত নয়। এই পরিস্থিতিটা বোঝাতে গিয়ে প্রখ্যাত জার্মান সাংবাদিক, সাহিত্যিক, দার্শনিক শ্রীযুত যোখিম বেসার বলেছেন, জার্মান মাত্রই উপরের দিকে তাকায়; রাজা কি হুকুম দিলেন সেই অনুযায়ী কাব্যে চিত্রে সঙ্গীতে আপন রুচি নির্মাণ করে।

১৯১৮-এ কাইজার যুদ্ধে হেরে হল্যান্ডে পলায়ন করলেন।

তখন সত্য সত্য আরম্ভ হল “মর্ডান আর্টের” যুগ। যেন কাইজারকে বৃদ্ধাঙ্গুষ্ঠ প্রদর্শন করার জন্য আর্টিস্টরা আরম্ভ করলেন রঙ নিয়ে নিত্য নব উন্মাদ নৃত্য, ধ্বনি নিয়ে সঙ্গীতে তাণ্ডব একসপেরিমেন্ট, ভাস্কর্যে বিকট বিকট মূর্তি যার প্রত্যেকটাতেই থাকত একটা ফুটো (তার অর্থ বোঝাতে গেলে পুলিশ আমাকে জেলে পুরবে)। আমি ঐ সময়ে জন্মনিতে ছিলাম। মর্ডানদের পাল্লায় পড়ে একদিন একটা চাক্কলা প্রদর্শনী দেখতে গিয়ে একলক্ষে পুনরপি বেরিয়ে এসেছিলাম। একদা যে-রকম কোন্ এক জু-তে বোকা পাঁঠার খাঁচার সামনে থেকে বিদ্যুৎগতিতে পলায়ন করেছিলুম। বোটকা গন্ধে।

তার অর্থ অবশ্য এ নয় যে সেখানে উত্তম দ্রষ্টব্য কিছুই ছিল না। নিশ্চয়ই ছিল। রাস্তার ডাস্টবিন খুঁজলে কি আর খান দুই লুচি, একটা আলুর চপ পাওয়া যায় না? কিন্তু আমার এমন কি দায় পড়েছে!

এরপর ১৯৩৩-এ এলেন হিটলার। তাঁর কাহিনী সবাই জানেন। কিন্তু আর্ট সম্বন্ধে তাঁর অভিমত সবাই হয়তো জানেন না; তাই সংক্ষেপে নিবেদন করছি। হিটলার সর্বক্ষণ কাউজারকে অভিসম্পাত দিতেন। তাঁর বক্তব্য ছিল, কাইজার যদি কাপুরুষের মত হার না মেনে লড়ে যেতেন তবে জার্মানি প্রথম বিশ্বযুদ্ধে জয়লাভ করতোই করতো।...অথচ আর্ট সম্বন্ধে দেখা গেল, হিটলার কাইজার সম্পূর্ণ একমত পোষণ করেন। তিনি কঠিনতর কঠে উচ্চৈঃস্বরে বারংবার বলে যেতে লাগলেন, “আর্ট হবে সমাজের দাস, অর্থাৎ নাৎসিদের দাস। সুবিন্যাসে এই পৃথিবীতে তারা যে ন্যায়সম্মত আসন খুঁজছে, তারই সেবা করবে আর্টিস্টরা।”

কাইজারের চরম শত্রুও বলবে না, তিনি অসহিষ্ণু লোক ছিলেন। তাঁর আমলে তাঁর নির্দেশ সন্তোষে বাঁরা মর্ডান ছবি আঁকতো তাঁদের বিরুদ্ধে তিনি কোনো প্রকারেরই কোনো-কিছু করেননি।

কিন্তু হিটলার চ্যানসেলার হওয়ার পর আরম্ভ হল এঁদের উপর নির্ধাতন। উত্তম উত্তম ছবি, নব নব সঙ্গীত ব্যান করা হল। সেরা সেরা পুস্তক পোড়ানো হল—কারণ এগুলো নাৎসি সঙ্গীতের সঙ্গে এক সুরে এক গান গায় না। আমি দূর থেকে এরকম একটা অগ্নিবজ্র দেখেছিলাম। কাছে যাইনি। পাছে প্রভুরা আমার রঙ দেখে, আমাকে ইহুদী ঠাউরে আমার নাকটা না কেটে দেন। যদিও আমার নাকটি খাঁটি মসৌলীয়ন। খাটো, বেঁটে, হুদু! কিন্তু বলা তো যায় না।

হিটলার তাঁর সাধনোচিত ধামে গেছেন। এখন জার্মানরা উঠে পড়ে লেগেছেন “মর্ডান” হতে। চোদ্দতলা বাড়ি ভিন্ন অন্য কথা নয় না।

তাই এই বিস্কুটটিনপারা পার্লিমেন্ট।

উটরিয়াকে বললুম, “জানো, ভাগিনা, আমাদের দেশেও এ ধরনের স্থাপত্য দৃশ্য দৃশ্য করে আকাশপানে উঠছে। তারই এক আর্কিটেকট এসেছেন আমাদের সঙ্গে তাস খেলতে। ভদ্রলোক সিগার খান। বর্ষাকাল। সিগার গেছে মিইয়ে। ঘন ঘন নিভে যায়। ভদ্রলোক দেশলাই খোঁছেন।...খেলা শেষ হল। তখন কেন জানিনি তিনি তাঁর দেশলাই আর খুঁজে পান না? আমাদের এক রসিক বন্ধু বসে বসে খেলা দেখছিল। সে দরদী কঠে বললে, ‘দাদাদের কাছে আমার অনুরোধ, আর্কিটেকট মশয়ের মডেলটি তোমরা কেউ গাপ মোরা না। ঐ দেশলাইটির মডেল থেকেই তো তিনি হেথাহোথা সর্বত্র বিয়াল্লিশতলার বিলাড়ং হাঁকাচ্ছেন! ওটা গয়েব হলে ওঁয়ার রুটি মারা যাবে যে!’”

ডীটরিষ্ বলেন, “জানো মামু, আমাদের বিশ্বাস প্রাচ্যদেশীয়রা বড্ডই সীরিয়স। সর্বক্ষণ গুমড়া মুখ করে, লর্ড বুদ্ধের মত আসন নিয়ে শুধু আত্মচিন্তা মোক্ষানুসন্ধান করে। তারাও যে রসিকতা করে এ কথা ৯৯.৯% জর্মন কিছুতেই বিশ্বাস করবে না। অথচ তোমার এই বন্ধুটির রসিকতাটি শুধু যে রসিকতা তাই নয়, ওতে গভীর দর্শনও রয়েছে। মর্ডান আর্কিটেকচার সম্বন্ধে মাত্র ঐ একটি দেশলাই দিয়ে তিনি তাঁর তাজিল্য সিনিসিজম-সহ প্রকাশ করলেন কী সাতিশয় সূক্ষ্ম পদ্ধতিতে। ভদ্রলোক কি তোমার মত লেখেন-টেকেন—লিভেরাত্যোর?”

আমি বললুম, “তওবা, তওবা! ভদ্রলোক ছিলেন আমাদের ফরেন অফিসের ডেপুটি মিনিস্টার; পণ্ডিত নেহরুর সহকর্মী। খুব বেশী দিন কাজ করেননি। ঐ সব দার্শনিক সিনিক রসিকতা তিনি সর্বজন-সমক্ষে প্রকাশ করতেন তাঁর ভিন্ন ভিন্ন সহকর্মী মন্ত্রীদের সম্বন্ধে। ঠিক পপুলার হওয়ার পছা এটা নয়—কি বলো? কাজেই তিনি যখন ফরেন অফিস থেকে বিদায় নিলেন তখন আমি বলেছিলুম, তিনি মন্ত্রিমণ্ডলী থেকে নিষ্কৃতি পেয়ে বিদায় নেবার সময় উল্লাসে নৃত্য করলেন এবং মন্ত্রিমণ্ডলীও তাঁর থেকে নিষ্কৃতি পেয়ে উল্লাসে নৃত্য করলেন।”

ডীটরিষ্ চুপ। আমি একটু অবাক হ্লুম। সে তো সব সময়ই জুংমাফিক উত্তর দিতে পারে।

সে বললে, “আমার অবস্থাও তাই। যে আফিসে আমি কাজ করি সেটা থেকে বেরুতে পারলে আমিও খুশী হই; ওরা খুশী হয়।”

॥ ১১ ॥

ঐ তো সামনে গোডেস্বের্গ। ডীটরিষ্ শুধোলে, “মামু, পিসি বলছিল তুমি নাকি এই টাউনটাকে জার্মানির সর্ব জায়গার চেয়ে বেশী ভালোবাসো? কেন বলো তো?”

আমি মুচকি হেসে কইলুম, “যদি বলি তোর পিসির সঙ্গে হেথায় আমার প্রথম প্রণয় হয়েছিল বলে?”

ডী। “দ্যত! আমি ছেলেবেলা থেকেই লক্ষ্য করেছি, লীজেল পিসির ধ্যানধর্ম শুধু কাজ আর কাজ। ফাঁকে ফাঁকে বই পড়া। এবং সে বইগুলোও দারুণ সিরিয়স। বড় পিসি বরঞ্চ মাঝে মাঝে হাস্য জিনিস পড়তো। কিন্তু ছোট পিসি ওসবের ধার ধারতো না। সে যেতো প্রতি প্রভাতে ট্রামে চড়ে বন শহরে—যেখানে সে চাকরী করতো—”

আমি। “সেই সূত্রেই তো আমাদের পরিচয়। আমরা ঐ সকাল আটটা পনেরোর ট্রামে বন যেতুম। আমরা আর সবাই দু-তিনটে সিঁড়ি বেয়ে ট্রামে উঠতুম। আর লীজেল পিসি ডান হাতে একখানা বই আর বাঁ হাতে ট্রামের গায়ে সামান্যতম ভর করে সিঁড়িগুলোকে “তাচ্ছিলি” করে এক লাফে উঠতো ট্রামের পাটাতনে। উঠেই এক গাল হেসে ডাইনে বাঁয়ে সমুখ পানে তাকিয়ে বলতো, “গুটেন মরগেন” “সুপ্রভাত”। ওর লক্ষ্য মেরে ওঠার কৌশল দেখে আমি মনে মনে বলতুম, “একদম টম্ বয়!” ওর উচিত ছিল, মার্কিন মুল্লুকে ‘কাউ বয়’ হয়ে জন্ম নেবার। অথবা ‘ইহার চেয়ে হতেম যদি আরব বেদুঈন’—গুরুদেবের ভাষায়।

গোডেস্বের্গ তখন অতি ক্ষুদ্র শহর। সবাই সবাইকে চেনে। কিন্তু আসল কথা, ঐ

আটটা পনেরোর ট্রামে থাকতো পোনেরো আনা কাচ্চাবাচ্চা। ইস্কুলে যাচ্ছে বন শহরে। এরা সবাই জানতো যে লীজ্জেল পিসির, অবশ্য তখনো তিনি “পিসি” খেতাব পাননি, কাছে আছে লেবেনচুস, দু-একটা আপেল, হয়তো নবাগত মার্কিন চুঙ্গ গাম, মাঝে মাঝে চকলেট। কাজেই বাচ্চারা সমস্বরে, কোরাস কণ্ঠে বলতো অন্তত বার তিনেক “সুপ্রভাত, সুপ্রভাত—”। তার পর সবাই তার চার পাশ ঘিরে দাঁড়াতো। সবাই বলতো, “প্লীজ প্লীজ, এঙ্গে এঙ্গে, এই এখানে বসুন।”

আমি বললুম, ‘বুঝলি ডীটরিব্, তোর পিসি লীজ্জেল ছিল আমাদের হীরইন অব দ্য প্লে। তবে তুই ঠিকই বলেছিস ও কখনো প্রেম-ফ্রেমের ধার ধারতো না। আমি দু-একবার তার সঙ্গে হাফাফি ফ্লার্ট করতে গিয়ে চড় খেয়েছি। অথচ আমাদের মধ্যে প্রীতিবন্ধুত্ব ছিল গভীর। আমাকে কত কী না খাইয়েছে—ঐ অল্প বয়সেই বেশ দুপয়সা কামাতো বলে। তখনকার দিনে ছিল—এখনো নিশ্চয়ই আছে—একরকমের বেশ মোটা সাইজের চকলেট—ভিতরে কন্যাক্। বড্ড আক্ৰা। কিন্তু খেতে—ওঃ কী বলবো—মুখে ফেলে সামান্য একটু চাপ দাও। ব্যস, হয়ে গেল। ভিজে ভিজে চকলেট আর তরল কন্যা-কে মিশে গিয়ে, দ্যাখ তো না দ্যাখ, চলে গেল একদম পেটের পাতালে। কিন্তু যাবার সময় ঐ যে কন্যাক—তোরা যাকে বলিস ব্র্যান্ডভাইন, ইংরিজিতে ব্র্যান্ডি, নাড়িভুড়ির প্রতিটি মিলিমিটার মধুর মধুর চুলবুলিয়ে বুঝিয়ে দিতো, যাচ্ছেন কোন মহারাজ।...আর মনের মিলের কথা যদি তুলিস তবে বলবো, লীজ্জেল ছিল বড্ডই লিবরেল। তাই যদিও নাৎসিরা তখনো ক্ষমতা পায়নি। কিন্তু রাস্তাঘাটে দাবড়াতে আরম্ভ করেছে—পিসি সেটা আদৌ পছন্দ করতো না। আমিও না। কিন্তু সত্যি বলতে কি, ইংরেজ যে ইতিমধ্যেই হিটলার বাবদে সম্মত হয়ে উঠেছে সেটা আমার চিন্তে পুলক জাগাতো। পিসিও সেটা জানতো। ভারতবর্ষের পরাধীনতার কথা উঠলেই সে ব্যথা পেত। বলতো, ‘ও কথা থাক না।’ ওরকম দরদী মেয়ে চিনতে পারার সৌভাগ্য আমি ইহসংসারে অতি অল্পই পেয়েছি।”

হঠাৎ লক্ষ্য করলুম, ভাগিনা ডীটরিব্ কেমন যেন অন্যমনস্ক হয়ে গিয়েছে। শুধোলুম, “কি হল রে? তুই কি পরশুদিনের হাওয়া খেতে চলে গিয়েছিস?”

কেমন যেন বিষম কণ্ঠে ভেজা-ভেজা গলায় বললে, “মামা, তুমি বোধ হয় জানো না, আমার বাবা অপেক্ষাকৃত অল্প বয়সে ওপারে চলে গেল কি করে।”

ডীটরিব্‌র এখন যৌবনকাল। তার বাপ কেন, ঠাকুন্দাও বেঁচে থাকলে আশ্চর্য হবার মত কিছু ছিল না। বললুম, “আমি তো জানিনে, ভাই। কিন্তু আমার জানতে ইচ্ছে হচ্ছে, আবার ইচ্ছেও না। কারণ তোর গলাটা কি রকম যেন ভারী ভারী শোনাচ্ছে—”

“তুমি এইমাত্র বললে না, তুমি, পিসি দুজনারই নাৎসিদের পছন্দ করতে না। বস্তুত পিসি-পরিবারের কেউই নাৎসি ছিল না। যদিও আমি তোমার বাবাবীকে পিসি বলে পরিচয় দিয়েছি, আসলে তিনি আমার মাসি। তাঁরা তিন বোন। আমার মা সঙ্কলের ছোট। তিনি বিয়ে করলেন এক নাৎসিকে—কট্টর নাৎসিকে। কেন করলেন জানিনে। প্রেমের ব্যাপার। তবে হ্যাঁ, চিন্তাশীল ব্যক্তি ছিল। বাড়ি গিয়ে তোমাকে তার ডাইরিটি দেখাবো। আর চেহারাটি ছিল সুন্দর—”

বাধা দিয়ে বললুম, “সে তো তোর চেহারা থেকেই বোঝা যায়।”

“থ্যাক্সউ। আর বাবা ছিল বড্ডই সদয়-হৃদয়—”

“ভাগনা, কিছু মনে কোরো না। আমি মোটেই অবিশ্বাস করি না যে তোর পিতা অতিশয় করুণহৃদয় শান্তস্বভাব ধরতেন—তোর দুই মাসিই সে-কথা আমাকে বারংবার বলেছে। কিন্তু, আবার বলছি, কিছু মনে কোরো না, তাহলে তিনি নাৎসিদের কনসানট্রেশন ক্যাম্প সয়ে নিলেন কি করে?”

ডীটারিষ্ চূপ মেরে গেল। কোনো উত্তর দেয় না। আমি এবার, বহুব্যয়ের পর আবার বললুম যে আমি একটা আস্ত গাড়োল। এ-রকম একটা প্রশ্ন করাটা আমার মোটেই উচিত হয়নি। বললুম, “ভাগিনা, আমি মাফ চাইছি। আমি আমার প্রশ্নটার কোনো জবাব চাইনে। ওটা আমি ফিরিয়ে নিচ্ছি।”

ডীটারিষ্ বললে, “না, মামু। তুমি যা ভেবেছো তা নয়। আমি ভাবছিলুম, সত্যি তো, বাবা এগুলো বরদাস্ত করতো কি করে? এবং আরো লক্ষ লক্ষ জর্মণ? এই নিয়ে আমি অনেকবার বহু চিন্তা করেছি। তুমি জানো, মার্কিনিংরেজ রুশ-ফরাসী ব্যুরেনবেগ মোকদ্দমায় বার বার নাৎসিদের প্রশ্ন করেছে, ‘তোমরা কি জানতে না যে হিটলারের কনসানট্রেশন ক্যাম্পে লক্ষ লক্ষ ইহুদীকে খুন করেছে?’ উত্তরে সবাই গাঁইগুঁই করেছে। সোজা উত্তর কেউই দেয়নি। জানো তো, যুদ্ধের সময় কত সেনসর কত কড়াকড়ি। কে জানবে, কি হচ্ছে, না হচ্ছে। আমার মনে হয়, আবার বলছি জানিনে, বাবার কানে কিছু কিছু পৌঁছেছিল। কিন্তু বাবা তখন উন্মত্ত। তিনি চান জার্মানির সর্বাধিকার। তাঁর ডাইরিতে বার বার বহুব্যব লেখা আছে, ‘ইংরেজ কে? সে যে বিরাট বিশ্ব গুণে খেতে চায় তাতে তার হকো কি? হ্যাঁ, নিশ্চয়ই মানি, তারা যদি আমাদের কিংবা ফরাসীদের মত কলচরড জাত হত তবে আমরা এ-নিয়ে কলহ করতুম না। কিন্তু ইংরেজ জাতটাই তো বেনের জাত। তারা কলচরের কি বোঝে!’ ওদের না আছে মাইকেল এঞ্জেলো, না আছে বেটোফেন। আছে মাত্র শেকসপীয়র। ওদের না আছে হাপত, না আছে ভাস্কর্য, না আছে—” হঠাৎ বললো, “এ তো বাড়ি পৌঁছে গিয়েছি।”

॥ ১২ ॥

“ভু, হালুকে”

সোল্লাসে স্বহকারে রব ছাড়লো শ্রীমতী লীজেল। “তুই গুণ্ডা—”

আমরা যেরকম কোনো দুরন্ত ছোট বাচ্চাকে আদর করে “গুণ্ডা” বলে থাকি “হালুকে” তাই। শব্দটা চেক ভাষাতে জার্মনে প্রবেশ লাভ করেছে। গত চল্লিশ বছর ধরে দেখা হলেই লীজেল এইভাবেই আমাকে “অভ্যর্থনা” জানিয়েছে।

তারপর আমাকে জাবড়ে ধরে দুগালে দুটো চুমো খেল।

ডীটারিষ্ মারফত পাঠককে পূর্বেই বলেছি, লীজেল ছিল ন-সিকে “টম-বয়”, এবং দু-একবার তার সঙ্গে হাফহাফি ফ্লাট করতে গিয়ে চড় খেয়েছি। তবে এটা হল কি প্রকারে? গুচিবায়ুগ্রস্ত পদী পিসীরা ক্ষণতরে ধৈর্য ধরুন। বুঝিয়ে বলছি। এই ষাট বছর বয়সে তার কি আর “টমবয়ড” আছে? এখন আমাকে জাবড়ে ধরে আলিঙ্গন করতে সে শুধু তার অন্তরতম অভ্যর্থনা জানালো।

আমি মনে মনে বললুম চল্লিশ বছর ল্যাটে, চল্লিশ বছর ল্যাটে। এই আলিঙ্গন-চুম্বন চল্লিশ বছর পূর্বে দিলেই পারতে, সুন্দরী। পরে তাকে খুলেও বলেছিলুম।

ইতিমধ্যে জীটরিষ্ আমতা আমতা করে বললে, “আমরা তা হলে আসি। রাত্রের পাটিতে দেখা হবে।” ওরা পাশেই থাকে। তিন মিনিটের রাত্তা। ওদের ভাব থেকে বুঝলুম, ওরা মনে করছে বিদ্যা ও সুন্দর যখন বহু বৎসর পর সম্মিলিত হয়ে গেছেন তখন ওদের কেটে পড়াই ভালো। আমাদের প্রেমটি যে চিরকালই নির্জলা জল ছিল সেটি হয়তো তার গলা দিয়ে নাবাতে পারেনি—হজম করা তো দূরের কথা।

লীজেল আমাকে হাতে ধরে ড্রাইংরুমের দিকে নিয়ে চললো। আমি বললুম, “এ কি আদিখ্যেতা! চল্লিশ বছর ধরে যখনই এ-বাড়িতে এসেছি তখনই আমরা বসেছি বাবা, মা, বড়দি, তুমি, ছোড়দি রান্নাঘরে। অবিশ্যি মা রান্না নিয়ে ব্যস্ত থাকতেন। আজ কেন এ ব্যত্যয়? তদুপরি ঐ বিরাট ড্রাইংরুম! বাপস্। তুই যদি এক কোণে বসিস আর আমি অন্য কোণে, তা হলে একে অন্যকে দেখবার তরে জোরদার প্রাশান মিলিটারী দূরবীনের দরকার হবে; কথা কইতে হলে আমাদের দেশের ডাক-হরকরা, নিদেন একটি ট্রাঙ্ক-কল-ফোন ব্যবস্থা, আর—”

লীজেল সেই প্রাচীন দিনের মত বললে, “চোক্কোর চোক্কোর। তুই চিরকালই বড্ড বেশী বকর বকর করিস।”

গতি পরিবর্তন হল। আমরা শেষ পর্যন্ত রান্নাঘরেই গেলুম।

কিচেনের এক প্রান্তে টেবিল, চতুর্দিকে খান ছয় চেয়ার। অন্য প্রান্তে দুটো গ্যাস উনুন, তৃতীয়টা কয়লার (সেটা খুব সম্ভব প্রাচীন দিনের ঐতিহ্য রক্ষার্থে)। দুই প্রান্তের মাঝখানে অন্তত দশ কদম ফাঁকা। অর্থাৎ কিচেনটি তৈরি করা হয়েছে দরাজ হাতে। বস্তুত লীজেলের মা যখন রাঁধতেন তখন এ-প্রান্ত থেকে আমাকে কিছু বলতে হলে বেশ গলা উচিয়ে কথা কইতে হত।

লীজেল একটা চেয়ার দেখিয়ে বললে, “এটায় বস।”

সত্যি বলছি, আমার চোখে জল এল। কি করে লীজেল মনে রেখেছে যে, চল্লিশ বৎসর পূর্বে (তিনি গত হয়েছেন বছর আটত্রিশেক হবে) তার পিতা আমাকে ঐ চেয়ারটায় বসতে বলতেন। আমি জানতুম, কেন। জানলা দিয়ে, ঐ চেয়ারটার থেকে দূর-দূরান্তরের দৃশ্য সবচেয়ে ভালো দেখা যায়। পরে জানতে পেরেছিলুম, তিনি স্বয়ং ঐ চেয়ারটিতে বসে আপন ক্ষেত-খামারের দিকে এবং বিশেষ করে তাঁর বিরাট আপেল-বাগানের দিকে নজর রাখতেন (মুর্শিদাবাদ অঞ্চলে আমাদের যেরকম আমবাগান)। অবশ্যই তিনি প্রাকৃতিক সৌন্দর্য দেখতে ভালোবাসতেন। নইলে আমাকে তাঁর আপন আসন ত্যাগ করে, আপন অভ্যস্ত আসন ছেড়ে দিয়ে ওখানে বসতে বলবেন কেন? আমি তো সেখান থেকে তাঁর ক্ষেতখামার, আপেলবাগান তদারকি করতে পারবো না—যারা ঘোরাঘুরি করছে, তারা তাঁর আপন “মুনিষ” না ভিন-জন আমি ঠাহর করবো কি প্রকারে? আর প্রাকৃতিক সৌন্দর্য উপভোগ? সে দিকে আমার কোনো চিন্তাকর্ষণ নেই। একদিন ঐ শেষ কথাটি তাঁকে আস্তে আস্তে ক্ষীণ কণ্ঠে বলতে—যাতে অন্যেরা শুনতে না পায়—তিনি বেশ কিছুক্ষণ চিন্তা করে অতিশয় সুন্দর স্মিতহাস্যে বললেন, “তোমরা ইন্ডিয়ান। তোমাদের দেশে এখনো কল-কারখানা হয়নি। তোমরা এখনো আছে প্রকৃতির শিশু। শিশু কি মায়ের সৌন্দর্য বোঝে? না। সে শুধু তার মায়ের স্তনরস চায়—সেই স্তনদ্বয়ের সৌন্দর্য কি সে বোঝে? যেমন তার বাপ বোঝে? ঠিক ঐরকম তোমরা তোমাদের মা-জননী জন্মভূমিতে ক্ষেত-খামার করে খাদ্যরস আহারাতি সংগ্রহ করো।

তোমরা এখনো কী করে বুঝবে, নৈসর্গিক প্রাকৃতিক সৌন্দর্য বলতে কি বোঝায়? সেটা শুরু হয় যখন মানুষ কলকারখানার গোলাম হয়ে যায়। অর্থাৎ মাতৃদুগ্ধ থেকে বঞ্চিত হওয়ার পর, বড় হয়ে সে মাতৃদুগ্ধের মূল্য বুঝতে শেখে—”

আমি বললুম, “মানছি, কিন্তু দেখুন, গ্রীস, রোম এবং আমার দেশ ভারতবর্ষেও তো কলকারখানা নির্মিত হওয়ার বহু পূর্বে উত্তমোত্তম কাব্য রচিত হয়েছিল এবং সেগুলোতেও বিস্তারিত প্রাকৃতিক নৈসর্গিক বর্ণনা আছে। তবে কেন—?”

এসব কথাবার্তা যেন ঐ চেয়ারে বসে কানে গুনতে পাচ্ছি। কত বৎসর হয়ে গেছে। এমন সময় লীজেল আমার মাথায় মারলো একটা গাঁট্টা। আমার স্বপ্ন চূরমার হয়ে গেল। বিশেষ করে তার ঠাকুরমার ছবিটি।

“কি খাবে বলছিলে?”

আমি আশ্চর্য হয়ে উত্তর দিলুম, “আমি তো কিছুই বলিনি।”

“তবে চলো, তুমি যে সুপ পছন্দ করতে সেই সুপই করেছি—অর্থাৎ পী সুপ (কলাইগুঁটির সুপ)—এবারে বলো তুমি কি খাবে? তুমি যা খেতে চাও তার জন্য মাছ, মাংস, ক্রীম আছে।”

আমি বললুম, “দিদি, সুপ ছাড়া আমার অন্য কোনো জিনিসের প্রয়োজন নেই। আর এই জর্নিতে আমার সর্বাসঙ্গ অসাড়া।...তবে কিনা আমি বঙ্গসন্তান। হেথায় ডান পাশে রাইন নদী। সে নদীর উত্তম উত্তম মাছ খেয়েছি কত বৎসর ধরে। তারই যদি একটা কিছু—”

বেচারী লীজেল।

শুকনো মুখে বললে, “রাইনে তো আজকাল আর সে-মাছ নেই।”

আমি শুধোলাম, “কেন?”

বললে, “রাইন নদের জাহাজের সংখ্যা বড় বেশী বেড়ে গিয়েছে। তাদের পোড়ানো তেল তারা ঐ নদীতে ছাড়ে। ফলে নদীর জল এমনই বিষে মেশা হয়ে গিয়েছে যে, মাছগুলো প্রায় আর নেই। আমার কাছে যেসব মাছ আছে সেগুলো টিনের মাছ।”

আমি বললুম, “তা হলে থাক।”

॥ ১৩ ॥

বিনু যখন সোয়ামীর সঙ্গে ট্রেনে করে যাচ্ছিল তখন বললে, “আহা ওরা কেমন সুখে আছে।” আমরাও ভাবি ইংরেজ ফরাসী জর্মিন জাত কি রকম সুখে আছে। কিন্তু ওদেরও দুঃখ আছে। তবে আমাদের মতো ওদের দুঃখ ঠিক একই প্রকারের নয়। ওরা খেতে পায়, আশ্রয় আছে। তৎসত্ত্বেও ওদের দুঃখ আছে।

লীজেলদের বাড়ি প্রায় দুশো বছরের পুরোনো। সে আমলে স্টীল সিমেন্টের ব্যাপার ছিল না। বাড়িটা মোটামুটি কাঠের তৈরী। দুশো বছর পরে ছাদটা নেমে আসছে। এটাকে খাড়া রাখা যায় কি প্রকারে!

আমি জিজ্ঞেস করলুম, “লীজেল, এটাকে কি মেরামত করা যায় না?”

লীজেল দীর্ঘনিঃশ্বাস ফেলে বললে, “শুধু ছাদ নয়, দেয়ালগুলো ঝুরঝুরে হয়ে এসেছে। এ বাড়ি মেরামত করতে হলে কুড়ি হাজার মার্ক (আমাদের হিসাবে চল্লিশ

হাজার টাকারও বেশী) লাগবে। বাবা গেছেন, আমার কোনো ভাইও নেই। ক্ষেত-খামার দেখবে কে? আপেলবাগানটা পর্যন্ত বেচে দিয়েছি। তাই স্থির করেছি বাড়িটা সরকারকে দিয়ে দেবো। ওরা সব পুরোনো বাড়ির কিছু কিছু বাঁচিয়ে রাখতে চায়। কারণ এ বাড়িটির স্টাইল একেবারে ষাঁটি রইনল্যান্ডের।

আমি বললুম, “এটা মর্টগেজ করে টাকাটা তোলা না কেন?”

লীজেল বললে, “যে-টাকাটা কখনো শোধ করতে পারবো না সে-টাকা ধার করবো কি করে!”

আমার মনে গভীর দুঃখ হলো। বাড়িটা সত্যিই ভারী সুন্দর। শুধু বাড়িটি নয়, তার পেছনে রয়েছে ফল-ফুলের বাগান, তরিতরকারির ব্যবস্থা, কুমো, হ্যান্ডপাম্প দিয়ে জল তোলার ব্যবস্থা—গ্রামাঞ্চলে উত্তম ব্যবস্থা। ক্ষেত-খামার গেছে যাক। ওদের আপেল-বাগান এই অঞ্চলে বৃহত্তম ও শ্রেষ্ঠতমও ছিল। সেও গেছে যাক। কিন্তু এই সুন্দর বাড়িটা সরকারের হাতে তুলে দিতে হবে, এটা আমার মন কিছুতেই মেনে নিতে চাইল না।

ইতিমধ্যে লীজেলের ছোট বোন মারিয়ানা এল। তিন বোনের ঐ একমাত্র যার বিয়ে হয়েছিল। যে ডীটরিষ্ আমাকে নিয়ে যাবার জন্য বন-এ এসেছিল তার মা। ছেলের বাড়ি দু-মিনিটের রাস্তা। সেখানে বউ নিয়ে থাকে।

মারিয়ানা বিধবা। প্রায় সাতাশ বছর পূর্বে তার বিয়ে হয়। বরটি ছিল খাসা ছোকরা—কিন্তু...

এ বাড়ির তিন বোনের কেউই নাৎসি ছিল না। এরা সবাই ধর্মভীরু ক্যাথলিক। ইহুদীরা প্রভু খৃষ্টকে হয়তো ক্রুশবিদ্ধ করেছিল, হয়তো করেনি। যাই হোক, যাই থাক—তাই বলে দীর্ঘ সুদীর্ঘ সেই ঘটনার দু-হাজার বছর পর ওদের দোকান-পাট, ভজ্ঞনালয়, ওদের লেখা বইপত্র পুড়িয়ে দেবে (মহাকবি হাইনারিখ হাইনের কবিতাও বাদ যায়নি), ইহুদী ডাক্তার, উকীল প্র্যাকটিস করতে পারবে না—এটা ওরা গ্রহণ করতে পারে নি। এটা ১৯৩৪ সালের কথা। তখনো কনসানট্রেশন ক্যাম্প আরম্ভ হয়নি। যখন আরম্ভ হল তখন আমি দেশে। যুদ্ধ পুরোদমে শুরু হয়ে গিয়েছে। চিঠি-চাপাটির (১) গমনাগমন সম্পূর্ণ রুদ্ধ। কিন্তু আমার মনে কণামাত্র সন্দেহ ছিল না যে লীজেলদের পরিবার এ-প্রকারের নিষ্ঠুর নরহত্যা শুধু যে ঘণার চোখে দেখবে তাই নয়, এরা যে এর বিরুদ্ধে কিছুই করতে পারছে না সেটা তাদের মনকে বিকল করে দেবে।...এ সব শেষ হয়ে যাওয়ার পর আমি যখন জন্মনি যাই, তখন লীজেল আমাকে বলেছিল, “ডু হালুন্কে, তুই তো ভালো করেই চিনিস, আমাদের এই মুফেনডার্ষ গ্রাম। বিশ্বব্রহ্মাণ্ডের না হোক, জন্মনির ক্ষুদ্রতম গ্রাম। সেই হিসেবে আমার প্রখ্যাততম গ্রাম। এখানে মাত্র একটা দুটো ইহুদী পরিবার ছিল। দিদি সময়মত ওদেরকে সুইটজারল্যান্ডে পাচার করে দিয়েছিল। এবারে আরম্ভ হবে ট্রান্সজিডি।

১। আমার এক গুলী সখা আমাকে একদা বলেন, “সিপাহী বিদ্রোহের” সময় চাপাটি-রুটীর মারফৎ “বিদ্রোহী”রা একে অন্যকে খবর পাঠাতো বলে “চিঠিচাপাটি” সমাসটি নির্মিত হয়। কোনো এবং কিংবা একাধিক বিশ্বজ্ঞান যদি এ-বিষয়ে “দেশ” পত্রিকায় সবিস্তার আলোচনা করেন তবে এ-অজ্ঞজন উপকৃত হবে। কিন্তু দয়া করে আমাকে সরাসরি লিখবেন না। এটা পাণ্ডজ্ঞান। আমি ছাড়াও পাঁচজনের উপকারার্থে।

মারিয়ানা বড় সরলা। এ-সব ব্যাপার নিয়ে আদৌ মাথা ঘামাতো না। অবশ্য সেও ছিল আর দুই দিদির মত পরদুঃখ-কাতর।

বিয়ে করে বসলো এক প্রচণ্ড পাঁড় নাৎসিকে। কেন করলো, এ মূর্খকে শুধোবেন না। যেহেতু কেন কার প্রেমে পড়ে, কেন কাকে বিয়ে করে এ-নিগূঢ় তত্ত্ব দেবতারাত্তর আবিষ্কার করতে পারেননি।

তারপর যুদ্ধ লাগল। সেটা শেষ হল।

এইবারে মার্কিন ইংরেজদের কৃপায় দেশের শাসনভার পেলেন নাৎসি-বৈরীরা। এরা খুঁজে খুঁজে বের করলেন নাৎসিদের। তখন আরম্ভ হল তাদের উপর নির্যাতন। আজ ধরে নিয়ে যায়। তিন দিন তিন রাত্তির গারদে নির্জন কারাবাসের পর আপনাকে ছেড়ে দিল। আপনি ভাবলেন, যাক বাঁচা গেল। দশ দিন যেতে না যেতে আবার ভোর চারটেয় আপনাকে গ্রেফতার করে ঠাসলো গারদে। (এই যে আপনাকে ছেড়ে দিয়েছিল—সেটা শুধু আপনার পিছনে গোয়েন্দা রেখে ধরবার জন্য কারা কারা আপনার সহকর্মী ছিল; কারণ স্বভাবতই আপনি তাদেরই সন্ধানে বেরুবেন। দ্বিতীয়ত এরা আপনার দরদী বন্ধু। আপনার দৈন্য-দুর্দিনে একমাত্র তারাই আপনাকে সাহায্য করবে—অবশ্য যদি তাদের দু-পয়সা থাকে।...এটা কিছু নবীন ইতিহাস নয়। আমাদের এই স্বদেশী আন্দোলনের সময়, পরবর্তী যুগে “মহামান্য” টেগার্ট সাহেবের আমলে—

“বারে বারে সহস্র বার হয়েছে এই খেলা।

দারুণ রাহু ভাবে তবু হবে না মোর বেলা।”)

সর্বশেষে মারিয়ানার স্বামীর তিন বছরের জেল হল। সেখানে যক্ষ্মা। বেরিয়ে এসে ছ-মাসের পরই ওপারে চলে গেল।

পাঠক ভাববেন না, আমি নাৎসি-বৈরীদের দোষ দিচ্ছি।

বার বার শুধু আমার মনে আসছে :—

এদেশের লোক সবাই কৃশ্চান।

এদেশের প্রভু, প্রভু খৃষ্ট আদেশ দিয়েছেন, ক্ষমা, ক্ষমা, ক্ষমা।

জানি, মানুষ এত উঠতে উঠতে পারে না।

কিন্তু সেই চেষ্টাতেই তো তার খৃষ্টতার মনুষ্যত্ব।

॥ ১৪ ॥

হর্রে, হর্রে, হর্রে।

কোশোরে অবশ্য আমরা বলতুম, হিপ্‌স্‌ হিপ্‌স্‌ হর্রে।

পুরোপাক্ষা ক্রেডিট নিশ্চয়ই অ্যারাইভিয়া কোম্পানির।...দীর্ঘ হাওয়াই মুসাফিরীর পর অথোরে ঘুমিয়েছিলুম সকাল আটটা অবধি! নিচে নাবতেই লীজেল চৌচিয়ে বললে, “ডু হালুকে?”! তোর হারানো সুটকেস ফিরে পাওয়া গিয়েছে!”

“কি করে জানলি?”

“আমাদের তো টেলিফোন নেই। চল্লিশ বছর আগে এই গজেসবের্গের যে বাড়িতে তুই বাস করতিস তার টেলিফোন নম্বরটি তুই কলোনের “হারানো প্রাপ্তির” দফতরে

সুবুদ্ধিমানের মত দিয়ে এসেছিলি। আশ্চর্য! সে নম্বর তুই পুত-পুত করে এত বৎসর ধরে পুষে রেখেছিলি কি করে আর সেটা যে কলোনের সেই “হারানো প্রাপ্তির” দফতরে আপন স্মরণে এনে ওদের দিয়েছিলি সেটা আরও বিস্ময়জনক। তোর পেটে যে এত এলুম তা তো জানতুম না। আমি তো জানতুম তোর পশ্চাৎ দেশে টাইম বম রাখতে হয় (আমরা বাঙলায় বলি “পেটে বোমা না মারলে কথা বেরয় না”), ফিউজের হিসহিস শুনে তবে তোর বুদ্ধি খোলে। সে-কথা থাক। কলোনের দফতর সেই নম্বরে ফোন করে, আর তোর সেই প্রাচীন দিনের ল্যান্ডলেডির মেয়ে “আনা” সঙ্গে সঙ্গে বুঝে গেল তুই আমাদের বাড়িতে উঠেছিস। তা ছাড়া যাবি আর কোন্ চুলোয়। আনা-র বিয়ে হয়েছে এক যুগ আগে। ভাতার আর বাচ্চা দুটো রয়েছে। তাই সেখানে না উঠে আমাকে আপ্যায়িত করতে এসেছিস। ফের বলছি সে-কথা থাক। আনা কিন্তু বুদ্ধিমতী মেয়ে—”

আমি বাধা দিয়ে বললুম, “হবে না কেন? আমি ওদের বাড়িতে ঝাড়া একটি বছর ছিলুম। আমার সঙ্গ পেয়েছে বিস্তর।”

লীজেল আমার দিকে কটমটিয়ে তাকিয়ে কোনো মন্তব্য না করে বললে, “সে জানে আমাদের টেলিফোন নেই। কিন্তু আমাদের পাশের বাড়ির মহিলার আছে। তাকে ফোন করে জানিয়ে দিয়েছে যে তোর সূটকেসটি পাওয়া গিয়েছে এবং কলোন দফতরে জমা পড়েছে।”

আমি বললুম, “সর্বনাশ। আমাকে এখন ঠ্যাঙস ঠ্যাঙস করে যেতে হবে সেই খেড়খেড়-গোবিন্দপুর কলোনে? আধ-খানা দিন তাতেই কেটে যাবে। হেথায় এসেছি কদিনের তরে! তারও নিরেট চারটি ঘণ্টা মেরে দিয়েছে জুরিক। কনেকশন ছিল না বলে। আমি—”

লীজেল বাধা দিয়ে বললে, “চল্লিশ বৎসর পূর্বে প্রাথমিক পরিচয়ে তোকে যে একটা আকাট মূর্খ ঠাউরেছিলুম সেটা কিছু ভুল নয়; কলোনের দফতরে তোর প্র্যাকটিকাল বুদ্ধি ব্যতায়। অবশ্য আমি কখনো বলিনি, একসেপশন প্রভঞ্জ দি রুল। আমি বলি, রুল প্রভঞ্জ দি একসেপশন। তোর সূটকেস তারাই এখানে পৌঁছে দেবে।”

ওঃ। কী আনন্দ কী আনন্দ। কাল রাত্রে ভয়ে ভয়ে আমি আমার হারিয়ে না-যাওয়া সূটকেসটি খুলিনি। যদি দেখি, এদের এবং আমার অন্যান্য বন্ধুবান্ধবের জন্য ছোটখাটো যে-সব সওগাত এনেছি সেগুলো এই বড় সূটকেসটিতে নেই! এটাকেই নাকি বিদেশী ভাষায় বলে অসট্রিচ মনোবৃত্তি।

ইতিমধ্যে বাড়ির সদর দরজাতে ঘা পড়লো। লীজেল সেথায় গিয়ে কি যেন কথাবার্তা কইলে। মিনিট দুই পরে সেই হারিয়ে-যাওয়া-ফিরে-পাওয়া সূটকেসটি নিয়ে এসে আমার সামনে রেখে বললে, “তোদের এয়ার-কোম্পানি তো বেশ স্মার্ট : কমপিটেন্ট। এত তড়িঘড়ি হলিয়া ছেড়ে, বাস্কেটকে ঠিক ঠিক পকড় করে তোর কাছে পৌঁছে দিলে!” আমার ছাতি—সুদীর্ঘ পাঠক, ইঞ্জি ছয়—মাফ করবেন আজকাল নাকি তাবৎ মাপ সেন্টিমিটার মিলিমিটারে বলতে হয়—অর্থাৎ ১৫ মিলিমিটার (কিংবা সেন্টিমিটারও হতে পারে—আমার প্রিন্স অব ওয়েলস অর্থাৎ বড় বাবাজী যে ইসকেলখানা রেখে দিয়ে ঢাকা চলে গিয়েছেন সেটাতে তার হদীস মেলে না) ফুলে উঠলো।

বাক্সোটা খুলে দেখি, আমার মিত্র যে-সব বস্তু খাদী প্রতিষ্ঠান থেকে কিনে দিয়েছিল

তার সবই রয়েছে। (১) বারোখানা মুর্শিদাবাদী রেশমের স্কার্ফ, (২) উড়িষ্যায় মোষের শিঙে তৈরী ছটি হাতি, (৩) পূর্ববং ঐ দেশেরই তৈরী পিঠি চুলকনোর জন্য ইয়া লম্বা হাতল, (৪) দশ বাঙালি বিড়ি (এগুলো অবশ্য লীজেল পরিবারের জন্য নয়; এগুলো আমার অন্য বন্ধুর জন্য), (৫) ভিন্ন ভিন্ন গরম মশলা এবং আচার, (৬) বর্ধমানের রাজপরিবারের আমার একটি প্রিয় বান্ধবীর দেওয়া একখানি মাকড়সার জ্বালের মত সূক্ষ্ম স্কার্ফ (তার শর্ত ছিল সেটি যেন আমি আমার সর্বশ্রেষ্ঠা বান্ধবীকে দি), (৭) তিনটি ফার্স্টক্লাস বেনারসী রেশমের টাই, কাশ্মীরের ম্যাংগো ডিজাইনের শালের মত ওগুলো বর্ধমানেরই দেওয়া, (৮) দুই-পৌন্ড দক্ষিণ ভারতের কফি ও পূর্ববং ওজনে দাজিলিঙের চা।...এবং একখানা বই ঠাকুর রামকৃষ্ণ সম্বন্ধে—তার এক বিশেষ পুজারিণীর জন্য, তিনি বাস করেন সুইটজারল্যান্ডে। আর কি কি ছিল ঠিক ঠিক মনে পড়ছে না। বেশ কিছু কাসুন্দোও ছিল। এই ইয়োরোপীয়ানদের বড্ডই দেমাক, তাদের মাস্টার্ড নিয়ে। দস্তজ্ঞানিত আমার উদ্দেশ্য ছিল, এদেরকে দেখানো যে আমাদের বাংলাদেশের কাসুন্দো এ-লাইনে অনির্বচনীয়, অতুলনীয়। পাউডার দিয়ে তৈরী ওদের মাস্টার্ড দুদিন যেতে না যেতেই মসনে ধরে সবুজ হয়ে অখাদ্যে পরিবর্তিত হয়। আর আমাদের কাসুন্দো? মাসের পর মাস নির্বিকার ব্রস্মের মত অপরিবর্তনশীল।

লীজেলকে বললুম, “দিদি, এসব জিনিস ঐ বড় টেবিলটার উপর সাজিয়ে রাখ। আর খবর দে ডীটরিং ও তার বউকে। মারিয়ানা আর তুই তো আছিসই। যার যা পছন্দ তুলে নেবে।”

লীজেল বললে, “এটা কি ঠিক হচ্ছে? এখান থেকে তুই যাবি ডুসলডর্ফে—সেখানে তোরা বন্ধু পাউল আর তার বউ রয়েছে। তারপর যাবি হামবুর্গে; সেখানে তোরা বান্ধবীর (তিনি গত হয়েছেন) তিনটি মেয়ে রয়েছে। তারপর যাবি স্টুটগার্ট-এ। সেখানে রয়েছেন তোরা ফার্স্ট লভ। এখানেই যদি ভালো ভালো সওগাৎ বিলিয়ে দিস তবে ওরা পাবে কি?”

একেই বঙ্গভাষায় বলে, পাকা গৃহিণী। কোন্ গয়না কে পাবে জানে॥

॥ ১৫ ॥

গডেসবের্গ সভাই বড় সুন্দর। এ শহরের সৌন্দর্য আমাকে বার বার আহ্বান করেছে। রাস্তাগুলো খুবই নির্জন। এতই নির্জন যে পথে কারো সঙ্গে দেখা হলে, সে সম্পূর্ণ অচেনা হলেও, আপনাকে অভিবাদন জানিয়ে বলবে, “গুটেন টাংহ্”। আপনিও তাই বলবেন। রাস্তার দুপাশে ছোট ছোট গেরস্ত-বাড়ি। সবাই বাড়ির সামনে যেটুকু ফাঁকা জায়গা আছে তাতে ফুল ফুটিয়েছে। যদি কোন বাড়ির সামনে দাঁড়িয়ে আপনি ফুলগুলোর দিকে মুগ্ধনয়নে তাকিয়ে থাকেন তবে প্রায়ই বাড়ির কর্তা কিংবা গিন্নি কিংবা তাদের ছেলেমেয়েদের একজন বাড়ি থেকে বেরিয়ে আপনার সঙ্গে কথা জুড়ে বসবে। শেষটায় বলবে, “আপনিও আমাদেরই একজন; কিছু ফুলটুল চাই? বলুন না, কোনগুলো পছন্দ হয়েছে।” তারপর একগাল হেসে হয়ত বলবে, “প্রেমে পড়েছেন নাকি? তাহলে লাল ফুল। হাসপাতালে রুগী দেখতে যাচ্ছেন নাকি? তাহলে সাদা ফুল।” আমি একবার শুধিয়েছিলুম, “আর যদি আমার প্রিয়ার সঙ্গে ঝগড়া হয়ে থাকে, তাহলে কি ফুল

পাঠাব?” যাঁকে শুধিয়েছিলুম তিনি দুগাল হেসে বলেছিলেন, “সবুজ ফুল। সবুজ ঈর্ষার রং।” আমি আশ্চর্য হয়ে বললুম, “সবুজ ফুল তো এদেশে দেখিনি কখনো। আমাদের দেশেও সবুজ ফুল একেবারেই বিরল।” ভদ্রলোক বললেন, “আমাদের দেশেও। কিন্তু আমাদের এক প্রতিবেশীর বাড়িতে সবুজ ফুল আছে। আমি এখুনি এনে দিচ্ছি।” “ও মশাই, দাঁড়ান দাঁড়ান, আমার সবুজ ফুলের তেমন কোনো প্রয়োজন নেই—ও মশাই—”

কিন্তু কে বা শোনে কার কথা!

মিনিট দুই যেতে না যেতেই সেই মহাছার পুনরাবির্ভাব। হাতে একটি সবুজ গোলাপ। চোখে মুখে যে-আনন্দ তার থেকে মনে হলো তিনি যেন বাকিংহাম প্রাসাদ কিংবা কুতুবমিনার কিংবা উভয়ই কুড়িয়ে এনেছেন। আমি বিস্তর “ধন্যবাদ, ধন্যবাদ, ডাক্তার শোয়ান, ডাক্তার রেবুট শোয়ান” বলে অজস্র ধন্যবাদ জানালুম।

ইতিমধ্যে বাড়ির দরজা খুলে গেল। চল্লিশ-পঁয়তাল্লিশ বছরের একটি মহিলা ডেকে বললেন, “ওগো, তোমার কফি—”

হঠাৎ আমাকে দেখে কেমন যেন চুপসে গেলেন।

ভদ্রলোক বললেন, “চলুন না। এক পাত্র কফি—হেঁ হেঁ—”

আমি বললুম, “কিন্তু আপনার গৃহিণী—?”

“না, না, না,—আপনি চিন্তা করবেন না। আমার গৃহিণী খাণ্ডারিণী নয়। অবশ্য সে আপনাকে কখনো দেখেনি। চলুন চলুন।”

বসার ঘরে ঢুকে ভদ্রলোক আমাকে কফি টেবিলের পাশে সযত্নে বসিয়ে বললেন, “আপনাকে চল্লিশ বৎসর পূর্বে কত না দেখেছি। আমার বয়েস তখন চৌদ্দ-পনেরো। কিন্তু ভয়ে আপনার সঙ্গে পরিচয় করতে পারিনি—”

আমি বাধা দিয়ে বললুম, “সে কি?”

“এস্টে, আমি জানতুম, আপনি ইন্ডিয়ান। আর ইন্ডিয়ানরা সব ফিলসফার। তারা যত্নতর যার তার সঙ্গে কথা কয় না। তাই। আপনি ধীরে ধীরে পা ফেলে ফেলে যেতেন রাইন নদের পারে। আমি কত না দিন আপনার পিছন পিছন গিয়েছি—। আপনি একটি বেকিতে বসে রাইনের দিকে তাকিয়ে তাকিয়ে কি যেন ভাবতেন। তখন কি আর বিরক্ত করা যায়?”

আমি বললুম, “ব্রাদার, এটা বড় ভুল করেছ। তখন আমার সঙ্গে কথা কইলে বড্ডই খুশী হতুম।”

ইতিমধ্যে বাড়ির গৃহিণী কেক ইত্যাদি নিয়ে এসে আমাদের টেবিলে রাখলেন। তাঁর গাল-দুটো আরো লাল হয়ে গিয়েছে, ফোঁটা ফোঁটা ঘাম ঝরছে এবং তিনি হাঁপাচ্ছেন। অর্থাৎ এ-পাড়ায় কোনো কেকের দোকান নেই বলে তিনি কুড়ি মিনিটের রাস্তা ঠেঙিয়ে কেক টার্ট নিয়ে এসেছেন।

এস্থলে যে-কোনো ভদ্রসন্তান ব্যাপারটা বুঝতে পেরে মাফ চাইতো। বলতো, “এ-সবের কি প্রয়োজন ছিল?” কিন্তু আমি চাইনি। আমাকে বেয়াদব, মূর্খ, যা খুশী বলতে পারেন।

আমি শুধু আমার পকেট থেকে একটা রুমাল বের করে তাঁর কপালটি মুছে দিলুম।

হুম্বলট্‌ স্টিফটুঙ

ভ্রমণকাহিনী লিখতে লিখতে মানুষ আশকথা পাশকথার উত্থাপন করে। গুণীরা বলেন এটা কিছু দুষ্কর্ম নয়। সদর রাস্তা ছেড়ে পথিক যদি পথের ভুলে আশপথ পাশপথে না যায় তবে অচেনা ফুলের নয়। নয়া নয়া পাখির সঙ্গে তার পরিচয় হবে কি প্রকারে? কবিগুরুও বলেছেন,

“যে পথিক পথের ভুলে,
এল মোর প্রাণের কূলে—”

অর্থাৎ প্রণয় পর্যন্ত হতে পারে। তাই আমি যদি মাঝে মাঝে এদিক ওদিক ছিটকে পড়ি তবে সহৃদয় পাঠক অপরাধ নেবেন না।

আলেকজান্ডার ফন্‌ হুম্বলট্‌র নাম কে না শুনেছে? নেপোলিয়ন গ্যাটে শিলারের সমসাময়িক। দুই কবির সঙ্গে তাঁর ভাবের আদান-প্রদান হত। এবং অনেকেই বলেন, ঐ সময়ে পাশ্চাত্য মহাদেশগুলোতে নেপোলিয়নের পরেই ছিল হুম্বলট্‌র সূখ্যাতি। আসলে তিনি ছিলেন বৈজ্ঞানিক এবং পর্যটক—ওদিকে কাব্য দর্শন অলঙ্কার শাস্ত্রের সঙ্গেও সুপরিচিত।

কিন্তু তার পরিপূর্ণ পরিচয় দেওয়া আমার শক্তির বাইরে এবং সে উদ্দেশ্য নিয়ে আমি এ-লেখাটি আরম্ভও করিনি।

হুম্বলট্‌ গত হন ১৮৫৯ খৃষ্টাব্দে। যেহেতু তিনি ভিন্ন ভিন্ন দেশের মধ্যে বৈজ্ঞানিক, সাংস্কৃতিক যোগাযোগের জন্য (দক্ষিণ আমেরিকা থেকে ককেশাস সাইবীরিয়া পর্যন্ত) অতিশয় সযত্নবান ছিলেন তাই ১৯২৫ খৃষ্টাব্দে বার্লিনের জার্মান পররাষ্ট্র দফতরের উৎসাহে ঐ দেশের জনসাধারণ একটি প্রতিষ্ঠান—এন্‌ডাওমেন্ট দেবোস্তর, ব্রেন্ডোস্তর, ওয়াকফ, যা খুশী বলতে পারেন—নির্মাণ করলো : নাম আলেকজান্ডার ফন্‌ হুম্বলট্‌ স্টিফটুঙ। তাদের একমাত্র কর্ম তখন ছিল বিদেশী ছাত্রদের বৃত্তি দিয়ে জার্মানিতে পড়াশুনা করার ব্যবস্থা করে দেওয়া। আমার বড়ই বিস্ময় বোধ হয়, জার্মানির ঐ দুর্দিনে (ইনফ্লেশন সবে শেষ হয়েছে; তার খোঁয়ারী তখনো কাটেনি) সে কি করে এ-প্রতিষ্ঠান নির্মাণ করলো? আমরা বলি “আপনি পায় না খেতে—”। অনেক চিন্তা করে বুঝেছিলুম, দয়াদাক্ষিণ্য আর্থিক সচ্ছলতার উপর নির্ভর করে না। লক্ষপতি ভিথিরিকে একটা কানাকড়ি দেয় না, অথচ আমি আপন চোখে দেখেছি এক চক্ষুস্থান ভিথিরি এক অঙ্ক ভিথিরিকে আপন ভিক্ষালব্ধ দু-চার আনা থেকে দু-পয়সা দিতে। আমার এক চেলা এদানিং আমাকে জানালে গঙ্গাস্বরূপা ইন্দিরাজীও নাকি বলছেন, গরীবই গরীবকে মদৎ দেয়।

সে আমলে ইন্ডিয়া পেত মাত্র একটি স্কলারশিপ—আজ অনেক বেশী পায়।* সেটি পেলেন আমার বন্ধু সতীর্থ বাসুদেব বিশ্বনাথ গোখলে।** ইনি সর্বজনপূজ্য স্বাধীনতা সংগ্রামী প্রাতঃস্মরণীয় ঈশ্বর গোখলের ভ্রাতৃপুত্র। তার চার বৎসর পর পেলুম আমি।

* দয়া করে আমাকে প্রশ্ন শুধিয়ে চিঠি লিখবেন না, কি কৌশলে এ স্কলারশিপ পাওয়া যায়।

** দয়া করে “গোখল” উচ্চারণ করবেন না।

সে-কথা থাক। মাঝে মাঝে গাধাও রাজমুকুট পেয়ে যায়।...

গোডেস-বেগ শহরের রাস্তা দিয়ে যেতে যেতে হঠাৎ দেখি, একটি বাড়ির সম্মুখে মোটা মোটা হরফে লেখা,

আলেকজান্ডার কন

হম্বল্ট স্টিফটুঙ

আমারে তখন আর পায় কে? লম্বা লম্বা পা ফেলে তদুণেই সে বাড়িতে উঠলুম।
আমি অবশ্যই আশা করিনি যে সেই চল্লিশ বৎসর পূর্বকার লোক এ আপিস চালাবেন।

কিন্তু এনারাও ভদ্রলোক। অতিশয় ভদ্রভাবে শুধোলেন,

“আপনি কোন্ সালে হম্বল্ট বৃত্তি পেয়েছিলেন?”

“১৯২৯।”

ভদ্রলোক যেন সাপের ছোবল খেয়ে লম্ফ দিয়ে চেয়ার থেকে উঠে দাঁড়ালেন।

আমিও তাজ্জব বনে গিয়ে বললুম, “কি হল?”

“কী! চল্লিশ বছর পূর্বে!”

“এজ্ঞে হাঁ।”

“মাইন গট্ (মাই গড্), এত প্রাচীন দিনের কোনো স্কলারশিপ-হোল্ডারকে আমি তো কখনো দেখিনি!”

আমি একটুখানি সাহস পেয়ে বললুম, “ব্রাদার, ইহ-সংসারে তুমিও অনেক কিছু দেখোনি, আসো দেখিনি। তুমি কি আপন পিঠ কখনো দেখেছ? তাই কি সেটা নেই?”

যেহেতু আমি এ-বাড়িতে ঢোকার সময় আমার ভিজিটিং কার্ড পাঠিয়ে দিয়েছিলুম, তাই তারা ইতিমধ্যে চেক-আপ করে নিয়েছে, আমি সত্য সত্যই ১৯২৯-এ স্কলারশিপ পেয়ে এ-দেশে এসেছিলুম।

হঠাৎ ভদ্রলোকের মুখ উজ্জ্বল হয়ে উঠলো।

“অ—অ—অ। জ্ঞানেন, আপনি আমাদের প্রাচীনতম স্কলারশিপ-হোল্ডার?”

আমি সবিনয় বললুম, “তা হলে আমাকে আপনাদের প্রাচ্যদেশীয় যাদুঘরে পাঠিয়ে দিন। টুটেনখামের মমির পাশে কিংবা রানী নফ্রেটাত্তির পাশে আমাকে শুইয়ে দাও।”

॥ ১৭ ॥

সুইটজারল্যান্ড, জার্মনি, ডেনমার্ক, নরওয়ে, সুইডেনে টাকাকড়ির এমনই ছড়াছড়ি, সে কড়ি কি করে খরচ করবে যেন সেটা ভেবেই পায় না। বিশ্বময় সঠিক বলতে পারবো না, তবে বোধ হয় চীন এবং লৌহ-যবনিকার অন্তরালের দেশগুলো এখনও অপাংজ্জয়ে। গণ্ডায় গণ্ডায় স্কলারশিপ ছড়ানোর পরও হম্বল্ট ওয়াক্ফের হাতে বেশ-কিছু টাকা বেঁচে যায়।

তাই তারা প্রতি বৎসর একটা জব্বর পরব করে। তিন দিন ধরে। জার্মনিতে যে শত শত হম্বল্ট স্কলার ছড়িয়ে আছে এবং যারা একদা স্কলার ছিল, উপস্থিত জার্মনিতেই কাজকর্ম করে পয়সা কামাচ্ছে, তাদের সবাইকে তিন দিনের তরে বাড় গডেসবেগে

নেমস্তন্ন জানায়। যারা বিবাহিত, তাদের বউ কাচাবাচ্চা সহ;—বলা বাহুল্য ঐ উপরোক্ত সম্প্রদায়, যারা কাজকর্ম করে পয়সা কামায়। আসা-যাওয়ার ট্রেনভাড়া, হোটেলের খাইখাচা, তিন দিন ধরে নানাবিধ মীটিং পরব নৃত্যগীত অনুষ্ঠানে যাবার জন্য মোটর গাড়ি—এক কথায় সব—সব। প্রাচীন দিনে আমাদের দেশে যে-রকম জমিদার বাড়িতে বিয়ের সময় দশখানা গাঁয়ের বাড়িতে তিন দিন ধরে উনুন জ্বালানো হত না।

হার পাপেনফুস্ স্টিফটুঙের অন্যতম কর্তব্যাক্তি। আমাকে সনির্বন্ধ অনুরোধ জানিয়ে বললেন, “আপনার তুলনায় জর্মনিতে উপস্থিত যে-সব প্রাক্তন স্কলার আছেন তাঁরা নিতান্তই শিশু—”

আমি বললুম, “আমার হেঁটোর বয়স।”

পাপেনফুস্ ডুর কুঁচকে আমার দিকে তাকালেন। অর্থাৎ বুঝতে পারেননি। সব দেশের ইডিয়ম, প্রবাদ তো একই ছাঁচে তৈরী হয় না। আমি বুঝতে দেওয়ার পর বললুম, “আমাকে যে আপনাদের পরবে নিমন্ত্রণ করেছেন তার জন্য অনেক অনেক ধন্যবাদ। কিন্তু আপনাদের পরব আসছে সপ্তাহ তিনেক পরে। ওদিকে আমাকে যেতে হবে কলোন, ড্রাসল্ডর্ফ, হামবুর্গ, স্টুটগার্ট—এবং সর্বশেষে স্টুটগার্ট থেকে প্রায় ত্রিশ-চল্লিশ মাইল দূরে পাড়াগাঁয়ে আমার প্রাচীন দিনের এক বিধবা বান্ধবীর সঙ্গে দেখা করতে। আমরা এক-সঙ্গে পড়াশুনো করেছি। তার অর্থ আমার স্কলারশিপের মত তিনিও চল্লিশ বছরের পুরানো—প্লাস তাঁর বয়স।”

লক্ষ্য করলুম, যে তৃতীয় ব্যক্তি “সভাস্থলে” উপস্থিত ছিলেন তাঁর চোখে ঠোটে কেমন যেন একটুখানি মৃদু হাসি খেলে গেল। এর অর্থ হতে পারে :—

(১) এ তো বড় আশ্চর্য। যাট বছর বয়সের প্রাচীনা প্রিয়ার অভিসারে যাচ্ছে এই নাগর।

কিংবা

(২) এর এক-প্রিয়া-নিষ্ঠতাকে তো ধন্য মানতে হয়।

(রামচন্দ্রকে বলা হয় একদারনিষ্ঠ)।

ইতিমধ্যে কর্তা বললেন, “সে কি কথা। আপনি আসবেন না, সে তো হতেই পারে না। আপনার ভাষায়ই বলি, আপনার মত “মিউজিয়ম গীস” আমাদের কর্তব্যাক্তিদের গুণীজ্ঞানীদের দেখাতে পারবো না, সে কি একটা কাজের কথা হল? ওনাদের অনেকেই ভাবেন, আমাদের আলেকজান্ডার ফন্ হম্বল্ট স্টিফটুঙ বৃষ্টি পরশু দিনের বাচ্চা। অথচ আমাদের প্রতিষ্ঠানের গোড়াপত্তন করে সেই ১৯২৫ খৃষ্টাব্দে—অবশ্য যুদ্ধের ফলস্বরূপ জর্মনি যখন তছনছ হয়ে গেল তখন কয়েক বৎসর প্রতিষ্ঠান দেউলে হয়ে রইল। এঁদের আমি দোষ দিই নে—সব জর্মনিই তো ঐতিহাসিক মসজেন হয় না। অতএব চল্লিশ বছরের পূর্বেকার জলজ্যাত একজন বৃত্তিধারীকে যদি ওদের সামনে তুলে ধরতে পারি, তখন ছজুরদের পেত্যায় যাবে—”

আমি মনে মনে বললুম, “ঈশ্বর রক্ষতু। যাদুঘরে যে-রকম পেডেস্টালের উপর গ্রীক মূর্তি ঝাড়া করে রাখে, সে-রকম নয় তো। তা করুক, কিন্তু জামাকাপড় কেড়ে নিয়ে লজ্জা নিবারণার্থে কুন্নে একখানা ডুমুরপাতা পরিয়ে দিলেই তো চিন্তির—”

কর্তা বলে যেতে লাগলেন, “আপনি পরবের সময় কন্টিনেন্টে যেখানেই থাকুন না কেন আমরা সানন্দে আপনাকে একখানা রিটার্ন টিকিট পাঠিয়ে দেব। এখানে হোটেলের

ব্যবস্থা, যানবাহন সবই তো আমরা করে থাকি। তারপর আপনি ফিরে যাবেন আপন মোকামে।” বিষয় কঠে বললেন, “আপনি কি মাত্র তিনটি দিনও স্পেরায় করতে পারবেন না?...আচ্ছা, তবে এখন চলুন আমাদের সঙ্গে লাঞ্চ খেতে।”

বড্ডই নেমকহারামী হয়। তদুপরি এরা আমাকে আবার দুই যুগ পরে আবার নেমক দিতে চায়। একদা যে প্রতিষ্ঠান যে জার্মান জাত এই তরুণকে স্কলারশিপ-নেমক দিয়েছিলেন, সম্পূর্ণ অপ্রত্যাশিত ভাবে, তাদেরকে নিরাশ করি কি প্রকারে?

আমি সন্তোষ পরিশ্রুতি সম্মতি জানালুম।

রেস্তোরাঁটি সাদামাঠা, নিরিবিলা ছোটখাটো ঘরোয়া। ব্যান্ডবাদী, জ্যাজ্ ম্যুজিক, খাপসুর তরুণীদের ঝামেলা কোনো উৎপাতই নেই। বুঝতে কোনো অসুবিধা হল না যে এ-রেস্তোরাঁতে আসেন নিকটস্থ আপিস-দফতরের উচ্চপদস্থ কর্মচারীরা। তার অন্যতম প্রধান কারণ “মেনু” (খাদ্যানির্ঘণ্ট) দেখেই আমার চক্ষুস্থির। তড়িতেই হিসেব করে দেখলুম এখানে অতি সাধারণ লাঞ্চ খেতে হলেও নিদেন পনেরো মার্ক লাগবার কথা। আমাদের হিসেবে তিনখানা করকরে দশ টাকার নোট! অবশ্য গচ্ছাটা আমাকে দিতে হবে না। কারণ ওঁরা আমাকে নিমন্ত্রণ করে এনেছেন। এবং এ-দেশের রেস্তোরাঁতে যে ব্যক্তি অর্ডার দিল সে-ই পেমেন্ট করবে—যে খেলো তার কোনো দায় নেই।

কিন্তু এ-স্থলে সেটা তো কোনো কাজের কথা নয়।

যাঁরা আমাকে নিমন্ত্রণ করে এনেছেন তাঁরা আমাকে মেনু এগিয়ে দিয়ে বলেছেন, “কি খাবেন, বলুন।” আমি কি তখন তাদের ঘাড় মটকাবো!

আমি শুধোলুম, “আপনারা কি এই রেস্তোরাঁতেই প্রতিদিন লাঞ্চ খেতে আসেন?”

“এক্সে হ্যাঁ।”

“কি খান; মানে, কোন্ কোন্ পদ।”

“সুপ, মাংস আর পুডিং। কখনো বা আইসক্রীম—তবে সেটা বেশীর ভাগ গ্রীষ্মকালে। মাঝেমধ্যে শীতকালেও।”

আমি অবাক হয়ে শুধোলুম, “শীতকালে আইসক্রীম!”

তখন আমার মনে পড়লো, আমরাও তো দারুণ গরমের দিনে গরমোতর চা খাই। তবে এরাই বা শীতকালে আইসক্রীম খাবে না কেন?

আমি অতিশয় সাদামাঠা লাঞ্চ অর্ডার দিলাম। যে হাঁস সোনার ডিম পাড়ে তার গলা মটকাতে নেই।

॥ ১৮ ॥

আহারাদির কেছা শুরু হলেই আমি যে বে-এক্সেয়ার হয়ে যাই আমার সম্বন্ধে সে বদনাম এতই দীর্ঘকালের যে তার সাফাই এখন বেবাক তামাদি—ইংরিজি আইনের ভাষায় “টাইম-বার” না কি যেন বলে—হয়ে গিয়েছে। তাই পাঠক “ধর্মাবতারের” সমুখে করজোড়ে স্বীকার করে নিচ্ছি—“আমি দোষী, অপরাধ করেছি।”

কিন্তু আমি জাত-ক্রিমিনাল। আমার মিত্র এবং পৃষ্ঠপোষক জনৈক জেল-সুপারিনটেনডেন্ট তাঁর একাধিক প্রামাণিক পুস্তকে লিখেছেন, এই বঙ্গদেশে “জাত-

ক্রিমিনাল” হয় না। হঁ! আমি যে জাত-ক্রিমিনাল সেটা জানার পূর্বেই তিনি এসব দায়িত্বহীন “বাক্যবিন্যাস” করেছেন। তাই আমি আবার সেই লাঞ্ছের বর্ণনা পুনরায় দেব।

সুপ আমি বড্ড বেশী একটা ভালোবাসিনে।

এ বাবদে কিন্তু আমি সমুদ্রের বেলাভূমিতে সম্পূর্ণ একাকী নুড়ি নই। ডাচেস অব উইন্ডসর (উচ্চারণ নাকি “উইনজার”) অতি উত্তম রান্নাবান্না করতে পারেন। তা সে অনেকেই পারেন। কিন্তু তিনি আরেকটি ব্যাপারে অসাধারণ হনুরি। ভোজনটি কি প্রকারে “কমপোজ” করতে হবে—এ-তত্ত্বটি তিনি খুব ভালো করে জানেন।

অপরাধ নেবেন না। আমরা বাঙালী মাত্রই ভাবি, ভোজনে যত বেশী পদ দেওয়া হয় ততই তার খানদানীত্ব বেড়ে যায়। তিন রকমের ডাল, পাঁচ রকমের চচ্চড়ি, তিন রকমের মাছ, দু-তিন রকমের মাংস, চিনি-পাতা দই আর কত হরেক রকমের মিষ্টি তার হিসেব না-ই বা দিলুম।

আর প্রায় সব-কটাই অখাদ্য! কারণ, এতগুলো পদের জন্য তো এতগুলো উনুন করা যায় না, গোটা দশেক পাচক ডাকা যায় না। অতএব বেগুন ভাজা মেগনোলিয়ার আইসক্রিমের মত হিম, চিনি-পাতা দই পাঞ্জাব মেলের এনজিনের মত, গরম নুচি কুকুরের জিভের মত চ্যাপটা, লম্বা—খেতে গেলে রবারের মত। আজকাল আবার ফ্যাশন হয়েছে ঘি-ভাত বা পোলাউয়ের বদলে চীনা ফ্রাইড রাইস। চীনারা ‘র’ উচ্চারণ করতে পারে না। অতএব বলে “ফ্রাইড লাইস”—অর্থাৎ “ভাজা উকুন”! তা সে যে উচ্চারণই করুক আমার তাতে কানাকড়ি মাত্র আপত্তি নেই। শুনেছি, মহাকবি শেকসপীয়র বলেছেন, “গোলাপে যে-নামে ডাকো গন্ধ বিতরে।” তাই “ফ্রাইড রাইস” বলুন বা “ফ্রাইড লাইস”ই বলুন—সোওয়াদটি উত্তম হলেই হল। কিন্তু আজকালকার কেটারাররা (হে ভগবান, এই সম্প্রদায়কে বিনষ্ট করার জন্য আমি চেস্টিস খান হতে রাজী আছি) নেটিভ পাচক দিয়ে “ফ্রাইড লাইস” নির্মাণ করেন। সত্য সত্য তিন সত্য বলছি, সে মহামূল্য সম্পদ জিহ্বাগ্র স্পর্শ করার পূর্বেই আপনি বুঝে যাবেন এই অভূতপূর্ব বস্তু “উকুন ভাজা”। আলবৎ আমি নতমস্তকে স্বীকার করছি, “উকুন ভাজা” আমি এই কেটারার-সম্প্রদায়ের অবদান মেহেরবাণীর পূর্বে কখনো খাইনি। তাই গোড়াতেই বলেছি, আমরা মেনু কম্পোজ করতে জানিনে।

তা সে থাক, তা সে যাক। পরনিন্দা মহাপাপ। এখানেই ক্ষান্ত দি। বয়স যত বাড়ে মানুষ ততই খিটখিটে হয়ে যায়।

পুরনো কথায় ফিরে যাই। ডাচেস অব উইনজার নাকি তাঁর লাঞ্চ-ডিনারে নিমন্ত্রিতজনকে কখনো সুপ পরিবেশন করেন না। অতিশয় অভিজ্ঞতালব্ধ তাঁর বক্তব্য : “এই যে বাবুরা এখন ডিনার খেতে যাবেন তার আগে তেনারা গিলেছেন গ্যালন গ্যালন ককটেল, হুইস্কি। জালা জালা শেরি, পোর্ট। সঙ্কলেরই পেট তরল বস্তুতে টাইটমুর—হুয়লাপও বলতে পারেন। ডাচেসের দীর্ঘ অভিজ্ঞতাপ্রসূত সূচিক্তিত অভিমত : এর পরও যদি হজুররা তরল দ্রব্য সুপ পেটে ঢোকান তবে, তারপর আর রোস্ট ইত্যাদি নিরোট সলিড দ্রব্য খাবেন কি প্রকারে? তাই তাঁর ডিনারে “নো সুপ!” অবশ্য ডাচেস সহদয়া মহিলা। কাজেই যাঁরা নিতান্তই সুপাসক্ত তাঁদের জন্য সুপ আসে। ওদেরকে সঙ্গ দেওয়ার জন্য তিনিও মাঝে মাঝে দু-চার চামচ সুপ গলাতে ঢালেন।

অতএব আমাদেরও নিতান্ত সঙ্গ দেওয়ার জন্য হম্বলট্ স্টিফট্ প্রদত্ত লাঞ্চে কিঞ্চিৎ সুপ সেবন করতে হল।

বাঃ! উত্তম সুপ! ব্যাপারটা তা হলে ভালো করে বুঝিয়ে বলি।

যে সব দেশের কলোনি নেই—বিশেষ ভারত, সিংহল কিংবা ইন্ডোনেশিয়ার—তারা গরম মশলা পাবে কোথেকে? কেনার জন্য অত রেষ্ট কোথায়? শত শত বৎসর ধরে তাদের হোঁকহোঁকানি শুধু গোলমরিচের জন্য। শুনেছি, ভাস্কো দা গামা ঐ গোলমরিচের জন্য অশেষ ক্রেশ করে দক্ষিণ ভারতে এসেছিলেন। কোনো কোনো পণ্ডিত বলেন, কলমবসও নাকি ঐ একই মতলব নিয়ে সাপ খুঁজতে গিয়ে কেঁচো পেয়ে গেলেন—অর্থাৎ ভারতবর্ষ আবিষ্কার করতে গিয়ে আমেরিকায় পৌঁছে গেলেন। এর পর ইয়োরোপীয়রা দক্ষিণ আমেরিকায় ঝাল লাল লঙ্কা আবিষ্কার করলো, কিন্তু ওটা ওদের ঠিক পছন্দ হল না। যদিপি আমরা ভারতীয়রা সেটি পরমানন্দে আলিঙ্গন করে গ্রহণ করলুম।

ইতিহাস দীর্ঘতর করবো না।

ইতিমধ্যে জমনির এতই ধনদৌলত বেড়ে গিয়েছে যে, এখন সে শুধু কালা মরিচ কিনেই পরিতৃপ্ত নয়—এখন সে কেনে দুনিয়ার যত মশলা। বিশেষ করে “কারি পাউডার” আর লবঙ্গ, এলাচি, ধনে ইত্যাদির তো কথাই নেই। তবে কি না আমি কন্টিনেন্টের কুত্রাপি কাঁচা সবুজ ধনেপাতা দেখিনি। কিন্তু ভয় নেই, কিংবা ভয় হয়তো সেখানেই। যেদিন কন্টিনেন্টের কুবের সন্তানরা ধনে-পাতা-লঙ্কা-ঠেঁতুল-তেলের চাটনির সোয়াদটা বুঝে যাবেন, সেদিন হবে আমাদের সর্বনাশ। হাওয়াই জাহাজের কল্যাণে কুসে ধনে-পাতা হিম্মি-দিম্বী হয়ে চলে যাবেন কাঁহা কাঁহা মুম্বুকে। এটা তো এমন কিছু নয়। ভারত বাংলাদেশের বহু জায়গাতেই আজ আপনি আর চিংড়ি মাছ পাবেন না। টিনে ভর্তি হয়ে তাঁরা আপনার উদরে না এসে সাধনোচিত ধামে (অর্থাৎ কন্টিনেন্টে—যেখানে চিংড়ি মাছ কেন সর্ব ভারতীয় যুবকই যেতে চায়) প্রস্থান করেন। একমাত্র কোলা ব্যাঙ সম্বন্ধেই আমাদের কোনো দৃংখ নেই। যাক, যত খুশী যাক। ওটা ফরাসীদের বড়ই প্রিয় খাদ্য। তবে কিনা বাঙালোর থেকে তারস্বরে এক ভদ্রলোক প্রতিবাদ করেছেন, পাইকিরি হিসেবে এ-ভাবে কোলা ব্যাঙ বিদেশে রফতানী করার ফলে ঐ অঞ্চলে মশার উৎপাত দুর্দান্তরূপে বৃদ্ধি পেয়েছে; কারণ ঐ কোলা ব্যাঙরাই মশার ডিম খেয়ে তাদের বংশবৃদ্ধিতে বিঘ্নসৃষ্টি করতো।

এটা অবশ্যই সমস্যা—দুশ্চিন্তার বিষয়। কিন্তু আমার ভাবনা কি? আমার তো একটা মশারি আছে।

॥ ১৯ ॥

“গুরুমে” ভোজ্ঞনরসিকরা বলেন, সুইটজারল্যান্ডের জর্মন ভাষী অঞ্চলের খাদ্যই সবচেয়ে ভোঁতা। অথচ নেপোলিয়ন না কে যেন বলেছেন—“ইংরেজ এ নেশন অব্ শপকীপারজ্ (অবশ্য ১৯২৪ খৃষ্টাব্দে “সাকী” নামক ছদ্মনামের এক অতিশয় সুরসিক ইংরেজ লেখক বলেন, “আমরা এখন এ নেশন অব্ শপলিফটারজ্” অর্থাৎ আমরা এখন দোকানের ভিড়ে চটসে এটা-ওটা-সেটা চুরি করতে ওস্তাদ) এবং “সুইসরা এ নেশন অব্ হোটেলকীপারস”। এ-বিষয়ে কোনো সন্দেহ নেই যে তাবৎ ইয়োরোপে

সুইসরাই পরিচ্ছন্নতম হোটেল রাখে কিন্তু প্রশ্ন : তোমার হোটেল-রেস্তোরাঁ যতই সাফসুত্রে রাখো না কেন তোমার রেস্তোরার সুপে ব্রড, ক্রনেট, কালো চুল না পাওয়া গেলেও (দিনের পর দিন তিন রঙের চুল আবিষ্কার করতে করতে আমার এক মিত্র—সুইটজারল্যান্ডে নয়, অন্য এক নোংরা দেশের হোটেলে—একদিন মেনেজারকে শুধোলেন, “আপনার রান্নাঘরে তিনটি প্যাচিকা আছেন, না? একজনের চুল ব্রড, অন্যজনের ক্রনেট এবং তেসরা জনের কালো। নয় কি?” মেনেজার তো থা। এই ভদ্রলোকই কি তবে শার্লস হোমসের বড় ভাই মাইক্রফট হোমস? সবিনয়ে তথ্যটা স্বীকার করে শুধালে, “স্যার, আপনি জানলেন কি করে? আপনি তো আমাদের রসুইখানায় কখনো পদার্পণ করেন নি!” বন্ধু বললেন, “সুপে কোনো দিন ব্রড, কখনো বা ক্রনেট এবং প্রায়ই কালো চুল পাই—কালোটাই পাতলা সুপে চোখে পড়ে বেশী। এ তত্ত্বে পৌছবার জন্য তো দেকার্ট কান্ট-এর দর্শন প্রয়োজন হয় না। আমি বলছি ঐ কালো চুলউলীকে যদি দয়া করে বলে দেন, সে যেন আর পাঁচটা হোটেলের পাঁচজন পাচকের মাথায় যে রকম টাইট সাদা টুপি পরা থাকে ঐ রকম কোনো একটা ব্যবহার করে। আমার মনে হয় ওর মাথায় দুর্দান্ত খুসকি”—পাঠক অপরাধ নেবেন না, একেছাটা বলার প্রলোভন কিছুতেই সম্বরণ করতে পারলুম না। সুদুমাত্র সুইস হোটেলের সুপমধ্যে হরেকরকম চুল নেই বলেই যে দুনিয়ার লোক হৃদমুদ হয়ে সে-দেশে আসবে এও কি কখনো সম্ভবে? আমার সোনার দেশ পূর্বপচ্ছিমওতর বাঙলায় সুপ তৈরী হয় না। অতএব প্লাটিনাম ব্রড, সাদামাটা ব্রড, চেসনাট ব্রাউন, মোয়ায়েম ব্রাউন কালো মিশকালো কোনো রঙের কোনো চুলের কথাই ওঠে না। “মোটাই মা রাঁধে না, তার তপ্ত আর পাস্তা।” কিংবা বলতে পারেন, “হাওয়ার গোড়ায় রশি বাঁধার মত।” তাই বলে কি মার্কিন সুইস টুরিস্ট এ-দেশে আসে না?

“বিজনেস ইজ বিজনেস”—তাই সুইস এ পর্যন্ত তাদের রান্নাতে প্রাচ্য দেশীয় মশলা ব্যবহার করতে আরম্ভ করেছে।

আমার কাছে একখানা সুইস সাপ্তাহিক আসে। তার কলেবর প্রায় ষাট পৃষ্ঠা। একদা কেউ ল্যাটে এলে আমরা ঠাট্টা করে বলতুম, “কি বেরাদর, কেপ অব গুড হোপ হয়ে এলে নাকি?”—সুয়েজ কানাল যখন রয়েছে। এখন কিন্তু এটা আর মস্করা নয়। এয়ার মেলের কথা অবশ্য ভিন্ন। কিন্তু ষাটপৃষ্ঠা বপুধারী পত্রিকা তো আর এয়ার মেলে পাঠানো যায় না। খর্চা যা পড়বে সেটা সাপ্তাহিকের দাম ছাড়িয়ে যাবে। হিন্দীতে বলে—“লড়কে সে লড়কার গু ভারি”—বাচ্চাটার ওজনের চাইতে তার মলের ওজন বেশী।

সেই পত্রিকার একটি প্রমোক্তর বিভাগ আছে। কেউ শুধোল; “মাংস আলু তরকারি-সহ নির্মিত ভোজনের মেন ডিশ (পিয়েস দ্য রেজিস্তার্স) খাওয়ার পর যেটুকু তলানি সস (শুকনো শুকনো ঝোল, কলকান্তাইয়ারা কাইও বলে থাকে) পড়ে থাকে তার উপর পাঁউরুটি টুকরো টুকরো করে ফেলে দিয়ে, কাঁটা দিয়ে সেগুলো নাড়িয়ে-চাড়িয়ে চেটেপুটে খাওয়াটা কি প্রত্যোকোল-সম্মত—এটিকেট মার্কিফ, বেরাদরী ‘অভদ্রস্থতা’ নয় তো?”

উত্তর : “পৃথিবীতে এখন এমনই নিদারুণ খাদ্যাভাব যে ঐ সসটুকু ফেলে দেওয়ার কোনো যুক্তি নেই (অবশ্য তার সঙ্গে রুটির টুকরোগুলোও যে গেল সে বাবদে বিচক্ষণ উত্তরদাতা কোনো উচ্চবাচ্য করেন নি। কারণ রুটিটি পরের ভোজনেও কাজে লাগতো, কিংবা গরীব-দুঃখীকেও বিলিয়ে দেওয়া যেত—এটো প্লেটের তলানি সস তো পরবর্তী

ভোজনের জন্য বাঁচিয়ে রাখা যায় না, কিংবা গরীব-দুঃখীকেও বিলোনা যায় না—লেখক)।” তারপর তিনি বলেছেন, “কিন্তু আপনি যদি নিমন্ত্রিত হয়ে কোথাও যান তবে এই কার্পণ্যটি করবেন না।” তার মানে আপনার বাড়ির বাইরের এটিকেট যেন বাড়ির ভিতরের চেয়ে ভালো হয়। আমি কিন্তু সম্পূর্ণ ভিন্ন মত ধরি। আমার মতে বাড়ির এটিকেট, আদব-কায়দা যেন বাইরের চাইতে ঢের ঢের ভালো হয়।

প্রশ্ন : “কোহিনুর প্রস্তর কোন্ ভাষার শব্দ?”

উত্তর : “ফার্সী।”

(সম্পূর্ণ ভুল নয়। “কোহ”=পাহাড়—ফার্সীতে। যেমন কাবুলের উত্তর দিকে কোহীস্তান রয়েছে (আমার সখা আব্দুর রহমান ঐ কোহীস্তানের লোক)। কিন্তু কোহ-ই-নুরের “নুর” শব্দটি ‘ন’ সিকে আরবী খাঁটি ফার্সীতে যদি বলতেই হয় তবে “নূর”—এর বদলে “রওশন” বা “রোশনী” [বাঙলায় “রোশনাই”] ব্যবহার করে বলতে হয় কোহ-ই-রওশন। শুদ্ধ আরবীতে বলতে হলে “জবলুন (পাহাড়) নূর।”...কিন্তু এ রকম বর্ণসঙ্কর সমাস সর্বত্রই হয়ে থাকে। “দিল্লীশ্বর” ইত্যাদি।)

প্রশ্ন : “আমার বয়স বত্রিশ; আমি বিধবা। আমার ষোলো বছরের ছেলের একটি সতেরো বছরের ভেরি ডিমার ক্লাস ফ্রেন্ড প্রায়ই আমাদের এখানে আসে। কিন্তু কিছুদিন ধরে সে আমার সঙ্গে ভাব-ভালোবাসা জমাবার চেষ্টা করছে। আমি করি কি?”

উত্তর : “আপনি ওকে সঙ্গেপনে নিয়ে গিয়ে বলুন, ‘তুমি তোমার অল্পবয়সী মেয়েদের সঙ্গে প্রেমট্রেন করো। আমি তোমার মায়ের বয়সী। তোমার বয়সী মেয়ের তো কোন অভাব নেই।’ কিন্তু আমার মনে হয়, ছেলেটার বোধ হয় মাদার কমপ্লেক্স আছে—অতি অল্প বয়সেই তার মা গত হন। কাজেই সে একটি মায়ের সন্ধানে আছে।” তার পর আরো নানা প্রকারের হাবিজাবি ছিল।

এ-উত্তর যে-কোনো গোগর্ডভ দিতে পারতো।

কিন্তু এই প্রশ্নোত্তরমালা নিতান্তই অবতরণিকা মাত্র।

কয়েক মাস পূর্বে—মনে হল—একটি প্রাচীনপন্থী মহিলা—প্রশ্ন শুধালেন : “আজকালকার ছেলে-ছোকরারা এমন কি মেয়েরাও বড্ড বেশী মশলাদার খানা খাচ্ছে। আমি গ্রামাঞ্চলে থাকি। সেদিন বাধ্য হয়ে আমাকে শহরে যেতে হয়। যদি জানতুম, শহরের ‘মাই লর্ড’ রেস্তোরাঁওলারা কি জঘন্য ঝাল, মাস্টার্ড (আমাদের কাসুন্দো—লেখক), আর মা মেরীই জানেন কি সব বিদকুটে বিদকুটে বিজাতীয় মশলা দিয়ে যাবতীয় রান্না করেন, তবে কি আমি সে রেস্তোরাঁয় যেতুম। এক চামচ সুপ মুখে ঢালা মাত্রই আমার সর্বাঙ্গ শিহরিত হতে লাগলো। আমার কপালে, সেই শীতকালে, ঘাম জমতে লাগলো। মনে হলো, আমার জিভে যেন কেউ আগুন ঢেলে দিয়েছে। আমার চোখ থেকে যা জল বেরুতে আরম্ভ করলো সেটা দেখে আমার কাছেই একটি সহৃদয় প্রাইভিট গুদলো—‘মাদাম, আমি বহু দেশ-বিদেশ দেখেছি—যেখানে টিয়ার গ্যাস ছাড়া হয়; কিন্তু আমাদের এই সুইটজারল্যান্ডে তো কখনো দেখিনি। শোকাতুরা হয়ে কান্না করলে রমণীর চোখে যে অশ্রুজল বেরয় এটা তো তা নয়।’

একদা সুইস কাগজে প্রথম বেরলো : “এই যে আমরা প্রতিদিন আমাদের রান্নাতে মশলার পর মশলা বাড়িয়েই চলেছি এটা কি আমাদের স্বাস্থ্যের পক্ষে ভালো?”

সেই “সবজাস্তা” উত্তরিলো :

“মাত্রা মেনে খেলে কোনো আপত্তি নেই, কোনো বস্তুই বাড়াবাড়ি করতে নেই।” (মরে যাই! এই ধরনের মহামূল্যবান উপদেশ পাড়ার পদী পিসি, ইন্সকুল বয় সবাই দিতে পারে।—লেখক) তারপর সবজাস্তা বলছেন—“ডাক্তারদেরও আধুনিক অভিমত, ‘মেকদার-মাফিক মশলাদার খাদ্য ভোজনসম্পূর্ণ আহার-রুচি বৃদ্ধি করে। তদুপরি আরেকটা গুরুত্ববাহক তত্ত্ব আছে। আপনি যদি আপনার ভোজন ব্যাপারে সর্বক্ষণ এটা খাবো না ওটা ছোঁবো না এরকম পুতুপুতু করে আপনার ভোজন যন্ত্রটিকে ন’সিকে মোলায়েম করে তোলেন, (ইংরিজিতে একেই বলে ‘মলিকডল্’ করেন) তবে কি হবে? আপনি যতই চেষ্টা দিন না কেন, আপন বাড়িতে তৈরী মশলা বিবর্জিত রান্নামাত্রই খাবো তথাপি ইহসংসারে বহুবিশ ফাঁড়া গর্দিশ আছে যার কারণে আপনাকে হয়তো কোনো রেস্টোরীতে এক বেলা খেতে হল। কিংবা মনে করুন, আপনি নিমন্ত্রিত হলেন। শক্তসমস্ত জোয়ান আপনি। কি করে বলবেন আপনি ডায়েটে আছেন? ওদিকে রেস্টোরী বলুন, ইয়ার বখশীর বাড়িই বলুন সর্বত্রই সর্বজন শনৈঃ শনৈঃ গরম মশলার মাত্রা বাড়িয়ে যাচ্ছেন তো যাচ্ছেনই। পরের দিন আপনি কাৎ। অতএব”—আমাদের সবজাস্তা বলছেন, “কিছু কিছু মশলা খেয়ে নেওয়ার অভ্যাসটা করে ফেলাই ভালো।”

কিন্তু মশলা পুরাণ এখানেই সমাপ্ত নয়। সেটা পরে হবে। ইতিমধ্যে আমি দুম করে প্রেমে পড়ে গেলুম।

কবিগুরু গেয়েছেন :—

যদি পুরাতন প্রেম

ঢাকা পড়ে যায় নব প্রেম জালে

তবু মনে রেখো।

কিন্তু এ-আশা রাখেন নি, সেই প্রথম প্রিয়ই পুরনায় তাঁর কাছে ফিরে আসবে। আমার কপাল ভালো।

লাঞ্চ সেরে মৃদুমুহুরে যখন বাড়ি ফিরছি তখন বাসস্ট্যান্ডের বেঞ্চিতে বসেই দেখি বেঞ্চির অন্য প্রান্তে যে-মেয়েটি বসেছিল সে জ্বল-জ্বল করে আমার দিকে তাকাচ্ছে। আমার দৃশ্যমনরা তো জ্ঞানেনই, এন্তেক দোস্তরাও জ্ঞানেন, আমি কন্দর্পকিউপিডের সৌন্দর্য নিয়ে জন্মাইনি। তদুপরি বয়স যা হয়েছে তার হিসেব নিতে গেলে কাঠাকালি বিয়েকালি বিস্তর আঁক কবাকবি করতে হয়। সর্বশেষে সেটা ভগ্নাংশে না ত্রৈলোক্যে দিতে হবে তার জন্য প্র্যাংশে মারফৎ ঈশ্বর সুকুমার রায়কে নন্দনকানন থেকে এই যবনভূমিতে নামাতে হবে।

অবশ্য লক্ষ্য করেছিলুম, আমি ওর দিকে তাকালেই সে ঝটতি ঘাড় ফিরিয়ে নেয়।

রোমান্টিক হবার চেষ্টাতে বলেছিলুম, “মেয়েটি”। কিন্তু তার বয়স হবে নিদেন চল্লিশ, পর্যায়ান্ত্রি এমন কি পঞ্চাশও হতে পারে। কিন্তু তাতে কি যায় আসে! বিদগ্ধ পাঠকের অতি অবশ্যই স্মরণে আসবে, বৃদ্ধ চাটুয্যে মশাই যখন প্রেমের গল্প অবতারণা করতে

যাচ্ছেন তখন এক চ্যাংড়া বক্সোস্তি করে বলেছিল [১] চাটুয্যে মশাই প্রেমের কীই বা জ্ঞানেন। মুখে আর যে-কটা দাঁত যাবো-যাচ্ছি যাবো-যাচ্ছি করছে তাই নিয়ে প্রেম।

চাটুয্যে মশাই দারুণ চটিতং হয়ে যা বলেছিলেন তার মোদ্দা : ওরে মূর্খ, প্রেম কি চিবিযে খাবার বস্তু যে দাঁতের খবর নিচ্ছিস!

প্রেম হয় হৃদয়ে!...একদম খাঁটি কথা। ভলতের, গ্যোটে, আনাতোল ফ্রাঁস, হাইনে আমৃত্যু বিস্তরে বিস্তর যারা ফট ফট করে নয়া নয়া হরী পরীর সঙ্গে প্রেমে পড়েছেন। এই সোনার বাঙলাতেও দু-একটি উত্তম দৃষ্টান্ত আছে। তা হলে আমিই বা এমন কি ব্রাহ্মহত্যা করেছি যে ছট করে প্রেমে পড়বো না।

বললে পেতায় যাবেন না, অকস্মাৎ একই মুহূর্তে একে অন্যকে চিনে গেলুম। যেন “আকাশে বিদ্যুৎ বহি পরিচয় গেল লেখি।”

সে চোঁচালে “হার সায়েড!”

এক সঙ্গে আমি চোঁচালুম “লটে।”

তারপর চরম নির্লজ্জার মত সেই প্রশস্ত দিবালোকে সর্বজন সমক্ষে আমাকে জাবড়ে ধরে দুই গালে ঝপাঝপ এক হৃদর বা দুই টন চুমো খেল।

সুশীল পাঠক, সচ্চরিত্রা পাঠিকা, আমার দেশের মরালিটি-রক্ষিণী বিধবা পদীপিসি এতক্ষণে এক বাক্যে নিশ্চয়ই নাসিকা কুণ্ঠিত করে “ছ্যা ছ্যা” বলতে আরম্ভ করেছেন। আমি দোষ দিচ্ছি। এহুলে আশ্মো তাই করতুম—যদি না নাটকের হেরোজিন আমার প্রিয়া লটে (তোলা নাম “সারলট”) হত। বাকিটা খুলে কই। ওর বয়স যখন নয়-দশ আমার বয়স ছাব্বিশ আমি বাস করতুম ছোট গোডেসবের্গ টাউনের উত্তরতম প্রান্তে লটেদের বাড়ির ঠিক মুখোমুখি। ওদের পাশে থাকতো দুই বোন গ্রেটে ক্যাটে। আরো গোটা পাঁচেক মেয়ে—তাদের বাড়ির পরে। কারোরই বয়স বারো-তেরোর বেশী নয়।

লটে ছিল সবচেয়ে ছোট,

আমার জীবনের প্রথমা প্রিয়া।

আর সবকটা মেয়ে এ তথ্যটা জানতো এবং হয়তো অতি সামান্য কিছুটা হিংসে-হিংসে ভাব পোষণ করতো। ওদের আশ্চর্য বোধ হত, যে লটে তো ওদের তুলনায় এমন-কিছু গুলে-বাকাওলী নয় যে সাত সমুদ্র তেরো নদী পেরিয়ে এসে আমি এরই “প্রেমে মজে যাবো।” এটা অবশ্য আমি বাড়িয়ে বলছি। “প্রেমে মজার” কোনো প্রশ্নই ওঠে না। আমার বয়স ছাব্বিশ ওর নয় কি দশ।

আসলে ব্যাপারটি কি জ্ঞানেন? জার্মানদের ভিতর যে-চুল অতিশয় বিরল, লটের ছিল সেই চুল। দাঁড়াকের মত মিশমিশে কালো একমাথা চুল। ঠিক আমার মা-বোনদের চুলের মত। ওর চুলের দিকে তাকালেই আমার মা-বোনদের কথা, দেশের কথা মনে পড়তো। আর লটে ছিল আমার বোনদের মত সতাই বড় লাজুক। সকলের সামনে নিজের থেকে আমার সঙ্গে কখনো কথা বলতো না।

আমাদের বাড়ির সামনে ছিল এক চিলতে গলি। সেখানে রোজ দুপুর একটা দুটোয় আমরা ফুটবল খেলতুম। আমার বিশ্বাস তুমি পাঠক, আমাদের সে টিমের নাম জানো না।

(১) বইখানা আমার চুরি গেছে। কাজেই উল্টোসুল্টো হয়ে গেলে পাঠক অপরাধ নেবেন না।

আমিও অপরাধ নেবো না। আমরা যে আই এফ এ শীল্ডে লড়াই দেবার জন্য সে-আমলে ভারতবর্ষে আসিনি তার মাত্র দুটি কারণ ছিল। পয়লা : অতখানি জাহাজ ভাড়ার রেন্ট আমাদের ছিল না এবং দোসরা : আমাদের “কাইজার টীমে” পুরো এগারো জন মেম্বর ছিলেন না। আমরা ছিলুম মাত্র আঠো জন। তৃতীয়ত যেটা অবশ্য আমাদের ফেভারেই যায়, আমাদের ফুটবলটি ছিল অনেকটা বাতাবী নেবুর মত। ওরকম ফুটবল দিয়ে কি সমদ, কি জুয়া খান কখখনো প্যাটান-উইভিং ড্রিবলিং ডজিং, ডাকিঙের সুযোগ পাননি।

হায়, হায়। এ-জীবনটা শুধু সুযোগের অবহেলা করে করেই কেটে যায়।

এসব আত্মচিন্তা যে তখন করেছিলুম তা নয়।

চল্লিশ বছর পর পুনরায়, এই প্রথম আমাদের পুনর্মিলন। লটে হঠাৎ শুধুলো, “হার সায়েড! তুমি বিয়ে করেছো?”

শুনেছি, ইহুদীরা নিতান্ত গঙ্গাযাত্রার জ্যাস্ত মড়া না হলে কোনো প্রশ্নের উত্তর না দিয়ে পাশ্চাৎ প্রশ্ন শুধিয়ে শাক দিয়ে মাছ ঢাকা দেয়। আমি শুধলুম, “তুই?”

খল খল করে হেসে উঠলো।

“কেন? আমার আঙ্গুলে এনগেজমেন্ট রিং, বিয়ের আংটি দুটোই এখনো তোমার চোখে পড়েনি। আমি তো দিদিমা হয়ে গিয়েছি। চলো আমাদের বাড়ি।”

আমি সাক্ষাৎ যমদর্শনের ন্যায় ভীতচকিত সন্ত্রাসগত হয়ে প্রায় চিৎকার করে উঠলুম, “সে যদি আমায় ঠ্যাঙায়।”

দুটি মিষ্টি মধুর ঠোঁটের উপর অতিশয় নির্মল মৃদু হাসি ঐকে নিয়ে বললে, “বটে! আমার জীবনের প্রথম প্রিয়কে সে প্যাদাবে! তাহলে সেই হালুঙ্কেটাকে আমি ডিভোর্স করবো না।”

তওবা, তওবা!

॥ ২১ ॥

লটে ছেলেবেলায় কথা কইত কমই। এখন দেখি মুখে খই ফুটছে, তবে সেই বাল্য বয়সের শাস্ত ভাবটি যায়নি। আমি বললুম, চলো না “কাফে স্নাইডারে”। এক পট কফি আর আপফেল টার্ট (এপল টার্ট)—পঞ্চাশ বছরের কোনো মহিলা যদি বাসস্ট্যান্ডের পেভমেন্টে বসে হঠাৎ হাততালি দেয় তবে সবাই একটু বাঁকা নয়নে তাকায়। লটে বেপরোয়া। হাততালি দিয়ে উল্লাসভরে বললে, “তুমি ডিয়ার, সেই প্রাচীন দিনের ডিয়ারই রয়ে গেছ। কাফে স্নাইডার অতি উৎকৃষ্ট আপফেল টার্ট বানাতো সে তোমার এখনো মনে আছে।”

আমি বললুম, “সোওয়ার্দটি এখনো জিভে লেগে আছে...অবশ্য তোমাকে যদি নিতান্তই ট্রাম ধরতে হয় তবে দীর্ঘশ্বাস ফেলতে ফেলতে মুফেনডার্ক—”

“মুফ্রিকা বলো। ঐ অজ পাড়াগাঁটা এমনই প্রোহিস্টরিয (প্রাগৈতিহাসিক) যে আমরা ওটাকে আফ্রিকার সঙ্গে এক কাতারে ফেলে মুফ্রিকা নাম দিয়েছিলুম—ভুলে গেছ?”

আমি তীব্র প্রতিবাদ করে বললুম, “আমি এখনো লীজেলকে মুফ্রিকানরিন (মুফ্রিকাবাসিনী) ডাকি। সে আমায় ডাকে ‘হালুঙ্কে’ (গুণ্ডা)—তুমি যে রকম এইমাত্র ঐ নামে তোমার বেটার-না-ওয়ার্স ৫০%-কে রেফার করলে। তুমিও আমার মত অপরিবর্তনশীল।”

লটে বিষণ্ণ কণ্ঠে বললে, “উপায় কি বলো। এই ধরো না, কাফে স্নাইডারের আপফেল টার্ট। ওটা কেন এত মধুর হতো জানো। ওটা বানাতো সম্পর্কে আমার এক মাসী। আর তোমার মনে আছে কি আমার ঠাকুদার বাবা যখন একশ বছর বয়সে পা দিলেন তখন মা পরবের দিন আপফেল টার্ট বানিয়েছিল,—মাসীর চেয়েও ভালো। কার বুদ্ধিতে জানো? থাক! আমি বড্ড লাজুক ছিলাম; তাই তোমাকে কিছু বলিনি। তুমি তো খাও চড়ুই পাখির হাফ রেশন। তাই তুমি যখন পুরো দুপীস খেলে তখন আমার ভারি আনন্দ হয়েছিল। ওমা! তারপর সবাই চলে যাওয়ার পর বাড়ির লোক আমাকে যা ক্ষ্যাপালে। এস্তেক ঠাকুদার বাবা। ওঁর কথা তখন জড়িয়ে যেত। জন্মদিনের বিশেষ সিগারে দম দিয়ে তাঁর খাস প্যারা ছেলেকে—বয়স তখন তাঁর সত্তর—বললেন, ‘আমাদের লটে বাঁচলে হয়’। তবে হ্যাঁ আমার ঠাকুমা লটের চেয়েও মর্ডান ছিলেন। নব্বই বছর বয়সে প্রথম প্রেম করেন। সে হল গে ১৭৫০ কিংবা তারই কাছে পিঠে। এবং জানো, সেই দজ্জাল ছুঁড়ি আখেরে সেই ছোকরাকেই বিয়ে করে।”

আমি বাধা দিয়ে বললুম, “দ্যৎ! ন-দশ বছরে আবার প্রেম! তবে কি না, দেবতা শ্রীকৃষ্ণ নাকি ঐ বয়সেই ভাব-ভালবাসা করেছিলেন।”

“আখেরে ঠাকুরমার ঠাকুমার মত ঐ মেয়েটিকে বিয়ে করেছিলেন?”

আমি বললুম, “না। উনি বিবাহিত ছিলেন।”

“তাঁর বয়স কত ছিল?”

“ঠিক বলতে পারবো না। তবে বেশ কিছুটা সিনিয়র ছিলেন। আমাদের কাব্যে আছে :—

‘নিশাকাল, এ যে ভীক, তুমি রাধে
লয়ে যাও ঘরে
হেন নন্দাদেশ পেয়ে চলে পথে
যমুনার কূলে
শ্রীরাধামাধব কিবা কুঞ্জে কুঞ্জে
রস কেলী করে।’

অপিচ শ্রীরাধার নানা বর্ণনার মধ্যে একটি বর্ণনা আমার মনের গভীরে উজ্জ্বল হিরকের মত চতুর্দিক উদ্ভাসিত করে রেখেছে। আমাদের দেশের কাব্য নাট্যাঙ্গার আরম্ভ করার পূর্বে লেখক নাট্যকার সরস্বতী বা ঈশ্বরের কোনো অবতারের বন্দনা তথা এবং পাঠক-দর্শক মণ্ডলীর মঙ্গল কামনা করেন। এখন হয়েছে কি, শ্রীকৃষ্ণ বাল্যে বড্ড দামাল ছেলে ছিলেন। প্রায়ই মায়ের তৈরী ননী—”

“সে আবার কি?” আমার মস্তকে অনুপ্রেরণা এল। প্রিয়াকে প্রীত করার জন্য আমার মত গণ্ড মূর্খের প্রতিও কন্দর্প সদয় হন। অবশ্য হৃদয়ে ঐ অত্যাবশ্যকীয় প্রেম রসটি থাকা চাইই। তাই হাফিজ গেয়েছেন,

নেত্র নাই বাজ্জা হেরি বিধুর বদন
কর্ণ নাই চাই শুনি ভ্রমর গুঞ্জন॥
প্রেম নাই প্রিয় লাভ আশা করি মনে
হাফিজের মত ভ্রাস্ত কে ভব-ভবনে॥

বললুম, “এই যে তোকে কাফে স্নাইডারে নিয়ে যাবার জন্য এতক্ষণ ধরে ঝুলোঝুলি করছি, সেখানে আপফেল টার্ণের উপর যে হুইপট ক্রীম বিছিয়ে দেয় অনেকটা সেই বস্তু।”

সঙ্গে সঙ্গে লটে উঠে দাঁড়ালো। “চলুন।”

আমি বললুম, “তুমি না কোথায় যেন যাচ্ছিলে?”

উত্তরে লটে যা বললে হিন্দীতে সেটা ভালো, “মারো গোলাী (গুলি)। গোল কর যাও।” “চুলোয়” যাকগে বড্ড ঝড়।

লটে বললে, “রাধার বয়ঃসন্ধিক্ষণ না কি যেন বলছিলে?”

আমার বাধো বাধো ঠেকছিল। যদিও তার বয়স এখন পঞ্চাশ তবু ক্ষণে ক্ষণে তার ঠোঁটের কোণের লাজুক হাসি, কথা বলতে বলতে হঠাৎ মাথা নীচু করে পায়ের দিকে তাকানো এসব যেন তাকে চল্লিশ বছরে উজিয়ে নিয়ে দশ বছরের ছোট পরিবর্তিত মেয়েটিকে করে তুলছিল। তবু দুগ্গা বলে ঝুলে পড়লুম। বললুম, “সেই শ্রীকৃষ্ণ পাঠক দর্শককে আশীর্বাদ করুন যিনি ছিলেন ননীচোরা। ধরা পড়ার পর নন্দপত্নী মাতা যশোদা যখন তাঁকে শুধালেন, ‘তুমি কতখানি ননী চুরি করেছ?’ তখন তিনি শ্রীরাধার স্তনযুগল দেখিয়ে বললেন, ‘এ অতটুকু’—সেই শ্রীকৃষ্ণ সর্বজনকে আশীর্বাদ করুন।”

বলা শেষ হতে না হতেই কেমন যেন লজ্জা পেলুম। অবশ্য মোদা কথাটি এই ঐটুকু আট বছরের বাচ্চা আর কতখানি ননী খেতে পারে। অর্থাৎ ব্রজসুন্দরীর তখন উঠতি বয়স মাত্র।

লটে আমার লজ্জারক্ত ভাব দেখে খিল খিল করে হেসে উঠলো। বললে, “হায়, হায়, হায়; হাস আমাদের হার ডক্টর। চল্লিশ বৎসর পূর্বে তুমি মেয়েছেলের মত যেরকম লাজুক ছিলে এখনো তাই আছ। ইতিমধ্যে কত কি হয়ে গেল, মায় একটা বিশ্বযুদ্ধ। এখনো তোমার চোখে পড়েনি, ছেলেমেয়ে পাশাপাশি ভিড়ে ভর্তি রাস্তা দিয়ে যেতে যেতে একজন অন্যজনের কোমরে হাত দিয়ে—মেয়েটা ছেলের কাঁধে হাত দিয়ে—নাচের সময় আমরা যে পজিশন নিই—ঘাড় বাঁকিয়ে একে অন্যকে চুমো খেতে খেতে এগিয়ে যাচ্ছে—ধীর পদে। তৎসত্ত্বেও মাঝে মাঝে হাঁচট খাচ্ছে। রাস্তার লোক নির্বিকার, পুলিশও তুরীয় ভাব অবলম্বন করেছে। আমার কুড়ি বছর বয়সে নির্জন বনের ভিতরও হেরমান যখন আমাকে আদর করতো আমার আড়ম্বল্য তখনো কাটতো না। রাস্তায় চলতে চলতে চুশন—এ টেকনিক আমি আর কখনোই রপ্ত করতে পারবো না।...চল্লিশ বছর! কত পরিবর্তন হয়েছে—বাইরে ভিতরে—এবং তোমার আমার লীজেল ‘আনার’ পক্ষে সে পরিবর্তন যে কী নিদারুণ ট্রাজেডী সেটা বুঝতে তোমার বেশ কিছুদিন কেটে যাবে। তুমি কাফে স্নাইডার স্নাইডার করছিলে। আমি তোমাকে নিরাশ করতে চাইনি, ও-কাফে কত কাল উঠে গিয়েছে। ওখানে এখন পঁচিশ গজী লম্বা একটা মার্কিন বার। বারের এক প্রান্ত থেকে অন্য প্রান্তে যেতে হলে ট্যাক্সি ভাড়া নেয় মার্কিনরা। সেই শান্ত সুন্দর বাড়িটি; ভিতরে বসে শোনা যেত মাসী যে ঘরে টার্ট বানাতো সেখান থেকে আসছে আধমুঠো পরিমাণ ক্ষুদ্রে ক্যানারি পাখির কাঁপা কাঁপা হুইস্‌ল, আর আসছে বেকিং-এর কেকের মৃদু গন্ধ, আরো সর্বোপরি, ভেসে আসে, মাসীর রুমালের ল্যাভেন্ডার গন্ধ।

সে-কথা থাক। অন্য একটা মধুর চিন্তা আমার মাথায়—হৃদয়েও বলতে পারো

ভীনা স্ টিলার প্রজাপতির মত—সর্বক্ষণ ঘুর ঘুর করছে যদিও আমি কথা বলছি, তোমার কথাও শুনছি। সেটা বলি; এতদিন ধরে যে সবাই আমাকে ক্ষেপাতো যে তুমি আমাকে ভালোবাসো, তার সঙ্গে সঙ্গে এটাও জানতো, ছাব্বিশ বছরের যুনিভার্সিটি স্টুডেন্ট (জন্মনিতে সে যুগে স্টুডেন্টরা উচ্চ সম্মান পেত—ধরে নেওয়া হত এরা সব এরিস্টোক্র্যাট) দশ বছরের বাচ্চার প্রেমে পড়ে না। সে পীরিত করে মেয়ে স্টুডেন্টদের সঙ্গে কিংবা বেকার কিন্তু ধনী ঝিয়ারীদের সঙ্গে। কিন্তু ওরা একটা কথা জানতো না, আমি তোমাকে সত্যি সত্যি ভালবাসতুম যাকে জর্মন বলে ‘লীবে’ ইংরিজিতে বোধ হয় ‘লাভ’। আমি তো অবাক। কিন্তু যে-রকম গভীর কণ্ঠে সীরিয়াসলি শব্দ কটি উচ্চারণ করলো তাতে ঐ নিয়ে পাগলামি করার মত রুচি বা সাহস আমার ছিল না। সেই চল্লিশ বৎসর পূর্বে আমার বয়স ছিল লটের আড়াই গুণ। এখন তো আর আড়াই গুণ নয়— তা হলে আমার বয়স হত ১২৫ বৎসর। আমাদের বয়স এখন অনেক কাছাকাছি চলে এসেছে। ওর যদি আশি বৎসর হয়—আর হবেই না কেন ওর ঠাকুদার বাপ তো একশ এক বছর অবধি বেঁচে ছিলেন—তখন আমার ছিয়ানব্বই আর ওর আশিতে তো কোনো পার্থক্যই থাকবে না।

তুমি ভাবছো, দশ বছরের মেয়ে কি প্রেমে পড়তে পারে? পারে, পারে, পারে! অবশ্য সিচুয়েশনটা খুবই অসাধারণ হওয়া চাই।

“আর তোমার যে পাকা একটি বান্ধবী ছিল—বন-এ তোমার সঙ্গে পড়তো, নাম আনামারি—”

সর্বনাশ! নামটা পর্যন্ত জানতো। এখনো স্মরণে রেখেছে।

॥ ২২ ॥

গডেসবর্গের সবচেয়ে বড় রাস্তা দিয়ে চলেছি। এ রাস্তা দিয়ে যাবার সময় আগের প্রায় দোকানীকে চিনতুম বলে তারা রোদ পোওয়াবার তরে চৌকাঠে দাঁড়ালে “গুট্‌ন্‌ মর্গেন” “গুট্‌ন্‌ টাখ” কিংবা দিনের শেষে ক্লাস্ত কণ্ঠে “গুট্‌ন্‌ অকেন্ট” বলতুম। সুদূর মাত্র ফুলওয়ার দোকানটির কাছে আসামাত্র পা চালিয়ে দ্রুতবেগে ওটাকে পেরিয়ে যেতুম। কেন? শো-উইন্ডোর বিরাট কাঠের জানলা দিয়ে দেখা যেত কত না সুন্দর তাজা ফুল— এক্কেবারে সাক্ষাত গুলস্তান। অনেক কিশোর কিশোরীই এই শো-উইন্ডোর সামনে রীদেড় করত। দ্বিতীয় পক্ষ সময়মত না এলে প্রথম পক্ষ ফুল দেখতে দেখতে হেসে খেলে দশ-বিশ মিনিট কাটিয়ে দিতে পারতো। তবে কি আমি ফুল ভালোবাসিনে? খুবই ভালোবাসি। বিশেষ করে শীতকালে যখন সবকিছু বরফে ঢাকা পড়ে যায়, গাছের পাতাগুলো পর্যন্ত ঝরে গিয়ে উঁচু উঁচু শাখা ন্যাড়া সসীনের মত ভয় দেখায়। শুনেছি, তখন এ দোকানের বেবাক ফুল আসতো দক্ষিণ ইতালি, মণ্ডে কার্লো, কোৎদাজুর থেকে। সঙ্গে সঙ্গে মনে পড়লো চার্লস ল্যামের রুদ্র রসিকতা। এক শৌখিন ধনী ব্যক্তি তাঁকে শুধিয়েছিল, “আপনার ঘরে ফুল নেই যে। আপনি কি ফুল ভালোবাসেন না?” তিনি জানতেন যে ঐ স্নব তাঁর অর্থকৃচ্ছতা বাবদে সম্পূর্ণ ওয়াকিবহাল হয়েও এই বেতমীজ প্রশ্ন শুধিয়েছে। গভীর কণ্ঠে বললেন, “স্যার! আমি ছোট বাচ্চাদের খুবই ভালোবাসি কিন্তু তাই বলে তাদের মুণ্ডুলো কেটে নিয়ে ফুলদানিতে সাজাই না।”...আমি দাঁড়াতুম না অন্য কারণে।

সেই প্রাচীন যুগে আমি এখানে আসার দু-তিন দিন পর যখন মুক্ত নয়নে ফুলগুলো দেখছি, এমন সময় দরজা খুলে দোকানী একগুচ্ছ ফুল হাতে দিয়ে মৃদু হেসে আমার দিকে এগিয়ে এসে বললে, “গুটন্ টাখ য়াঙার হ্যার (ইয়াং জেন্টলম্যান)! এই সামান্য কটি ফুল গ্রহণ করে আমাকে আপ্যায়িত করবেন কি? আমার ভাইঝি লিসবেতের কাছে গুনলুম আপনি আমাদের এই ক্ষুদ্রে গোডেসবের্গে ডেরা পেতেছেন। আমাদের এখানে যে কজন বিদেশী আছেন, তাঁদের সংখ্যা গোনবার জন্য হাতের একটা আঙুলই যথেষ্ট! কিন্তু জানেন, এর চেয়ে ক্ষুদ্রতর পরিবেশে—সে শতাব্দিক বৎসরের কথা—এখানে বাস করতেন রাজদরবারের এক সম্মানিত আমীর [১] তাঁরই জলসায়রে বন শহরের বেটোফেন তখনকার দিনের গ্রাঁ মেৎর্ (গ্র্যান্ড মাস্টার) ওস্তাদস্য ওস্তাদ হ্যাডেলকে বাজনা বাজিয়ে শোনান—”

বলা বাহুল্য আমি দাম দেবার চেষ্টা করে নাত্তানাবুদ হয়েছিলুম।

ফুস করে একটি ক্ষুদ্রতম দীর্ঘশ্বাস বেরুল কিন্তু লটের কান যেন বন্ধুক। শুধালো, “কি হল? এরই মধ্যে আমার সঙ্গসুখ তোমার কাছে একঘেয়ে হয়ে উঠলো?” আমি সজোরে মাথা নেড়ে বললুম, “না, না, না।” তারপর ওমর খৈয়াম থেকে আবৃত্তি করলুম—

‘তব সাথী হয়ে দক্ষ মরুতে
পথ ভুলে তবু মরি,
তোমারে ছাড়িয়া মসজিদে গিয়া
কি হবে মস্ত্র স্মরি!’

তারপর সেই ফুলওয়ার কাহিনী বয়ান করে বললুম, “ডার্লিং লটে! আমি এ-সব দোকানপাট তো বিলকুল চিনতে পারছি নে। কিন্তু সেই ফুলের দোকান নিশ্চয়ই সামনে এবং নিশ্চয়ই ফের চেষ্টা দেবে আমাকে মুফতে ফুল দেবার। চলো অন্য পেভমেন্টে।”

লটে পুনরায় ডুকরে কেঁদে বললে, “হায়, হায়, হায়! কোন্ ভবে আছো তুমি! সে-দোকান আর নেই। তার মালিক ওটাকে বেচে দিয়ে মাইল সাতেক দূরে আলু—আলু গো, আলু ফলাচ্ছেন। প্রাচীন দিনের আর কজন দোকানী আপন আপন দোকান বাঁচাতে পেরেছে। এই ছোট্ট জায়গাটিতে যারা বংশপরম্পরায় বাস করেছে তারা হয় পালিয়েছে নয় আপন আপন বাড়িতে আশ্রয় নিয়েছে। রাস্তায় পর্যন্ত বেরুতে চায় না। এই তোমার লীজেল—অন্তত চার মাইল না হাঁটলে অর্থাৎ মুফেনডর্ফ গোডেসবের্গ দুবার না চলে যার পেটের চকলেট হজম হত না (মনে পড়লো অভ্যুৎকৃষ্ট ব্রান্ডি ভর্তি মোটা মোটা লাল আঙুলের চকলেট খেত লিজেল) সে তো এখন আর একদম বাড়ি থেকে বেরয় না। তোমার ল্যান্ডলেডির মেয়ে আনা বেরয় না, আমাদের যে একটি ক্ষুদ্র বিউটি সেলুন ছিল তার মালিক কাটেরীনা সৌন্দর্য আর যৌবন বাঁচিয়ে রাখবার জন্য বিস্তর সঙ্কিসুডুক জানতো বলে—এবং বাঁচিয়ে রেখেছেও—এখনো তাকে দেখলে মার্কিন চ্যাংড়াদের মুগুগুলো বাঁই বাঁই করে ঘুরতে থাকে, সে পর্যন্ত বাড়ি থেকে বেরয় না।

(১) অধুনা বাঙলায় একাধিক লেখক একবচনে “ওমরাহ” লিখে থাকেন। বস্তুত ওমরাহ শব্দটি বহুবচন। একবচন আমীর শব্দের বহুবচন ওমরাহ। এবং “আমীর-ওমরাহ” সমাস কলেঙ্কিভ নাউন রূপে ফাসী, উর্দু, বাঙলাতে ব্যবহার হয়।

তাই তো তোমাকে পেয়ে আমার এত আনন্দ। তোমার আজকের দিনের চেহারাতে আর সেদিনকার চেহারাতে আর কতখানি মিল? বার বার মনে হয়, যেন তোমাকে ঘন কুয়াশার ভিতর দিয়ে দেখছি। কি রকম জানো। তুমি যে বাড়িতে থাকতে সেটা প্রায় তিনশ বছরের পুরনো। সে-যুগে আস্তানার ভালো ব্যবস্থা ছিল না বলে আমার বাপ-মার বেডরুম সবকটা ঘর ছিল খুদে খুদে—যেন বেদেদের কারাভানের গাড়িতে ক্ষুদে ক্ষুদে বেড-রুম, ডাইনিং-রুম, কিংবা—হ্যাঁ হ্যাঁ মনে পড়েছে ওয়ালট ডিসনির ম্যাজিক ল্যান্ডের রাজকন্যা বনের ভিতর কাঠুরের অতি ছোট্ট ঘরে আশ্রয় নিয়ে জানালার পাশে বসে আপন মায়ের কথা ভাবছে।

হব্ব ঠিক ঐ রকম একটি ছোট্ট জানলা ছিল তোমার ঘরে। দৈর্ঘ্য প্রস্থে একহাত হয় কি না হয়। তুমি আসবার আগে ওটাতে একটা সাদা মোটা পর্দা ঝুলতো। কিন্তু তোমার এখানে আসা স্থির হয়ে যাওয়ার পরই আনার মা আপন হাতে ক্রুশের কাঁটা দিয়ে একটুকরো নেট বুনলো। তার যা বাহার! আর তার মিনি কাক্স ডাচ লেসকেও টিঙ দেয়। আমি যখন মাখম কিনতে গেলুম আনাদের দোকানে তখন আনাকে শুধালুম, ‘অতিথি আসছে নাকি?’ উত্তর শুনে আমি ভয়ে ভিরমি যাই আর কি? আমাকে একদিন ভয় দেখাবার জন্য বাবা বলছিল, ‘তবে ডাকি একটা ইস্তারকে! তার মাথায় পাগড়ী, ইয়াব্বড়া দাড়ি আর হাতে বাঁকা ছোরা। (আমি বললুম শিখ আর গুর্খাতে লটের বাবা ককটেল বানিয়ে ফেলেছিল—লেখক) নাভিকুতুলির উপর সোঁধিয়ে দিয়ে এক হাঁচকায় পাঁজর অবধি ফাঁসিয়ে দেয়।’ ওমা! তারপর কোথায় কি? সেই রাতে তোমার ছোট্ট জানলার বাহারে লেসের পর্দার ভিতর ছিল দেখি, ঠিক তাই, তোমাকে এইমাত্র যা বললুম, তোমাকে যেন তখন ঘন কুয়াশার ভিতর দিয়ে দেখছি। তুমি টেবুল ল্যাম্পের সামনে বসে কিছু একটা লিখছিলে।”

আমি বললুম, “কত যুগের কথা! কিন্তু জাস্ট বাই চান্স তোমার মনে আছে কি, সেটা কি বার ছিল?”

“দিব্য মনে আছে। শুক্রবার সন্ধ্যাবেলা।”

“অ। তাই বলো। শুক্রবার রাত দুপুরে ইস্তিয়ার জন্য লাস্ট মেল ছাড়ে। প্রতি মাসে চিঠি না পেলে সব বন্ড চিন্তিত হয়। তোমার রাজকন্যা যেরকম বনের ভিতর কাঠুরের কুটিরে ছোট্ট জানলার পাশে বসে তার মায়ের কথা ভাবতো, আমার মায়ের মনও তেমনি আমার দিকে উধাও হয়ে চলে আসে।”

লটে বললে, “আহা!” সেই অল্প বয়সে লটে লাজুক ছিল বটে কিন্তু তার দরদী হিয়াটি সে কখনো লুকিয়ে রাখতে পারতো না। বললে, “একদা যেখানে কফে স্নাইডার ছিল সেখানে পৌছে গিয়েছি।”

আমি বললুম, “না। টাকার জোরে মার্কিনরা যে প্রতিষ্ঠান আত্মসাৎ করেছে সে পাপালয় তো ব্রথেল। আমি ওখানে যাবো না।”

লটে যেন খুশী হল। বললে, “ঐ যে ‘ব্রথেল’ বললে, সেটা একদম খাঁটি কথা। হয়তো না ভেবে বলেছ, কিন্তু পেরেকের ঠিক মাঝখানে মোক্ষম ঘা-টি মেরেছ। সেদিন একটা বইয়ে পড়ছিলুম, ইহুদীরা ঠিক এমনি ধারা কাঁড়া কাঁড়া টাকা নিয়ে প্যালেস্টাইন গিয়ে সেখানকার গরীব আরব দোকানদারদের দোকানপাট কিনে তো নিলেই, তারপর কিনল ওদের জমিজমা। আরবরা এখন নাকি ভিটেছাড়া হয়ে সর্বত্র ফ্যা ফ্যা করে ঘুরে

বেড়াচ্ছে। আরেকটা বইয়ে পড়ছিলুম, কোনো জায়গায় যদি একটা নূতন বন্দর তৈরী করা হয় তবে সঙ্গে সঙ্গে সেখানে এস্তের 'বার' আর বিস্তর 'ব্রথেল' চ্ছ চ্ছ করে ব্যাঙের ছাতার মত গজাতে থাকে।

আমি চিরকালই অ্যাডেনাওয়ারকে ভক্তি করেছি। তাঁরই কল্যাণে যুদ্ধে-বন্দী বিস্তর জর্মন্ মুক্তি পায় রুশ কারাগার থেকে, সাইবেরিয়া থেকে। ওদের মধ্যে ছিল আমার এক মাসতুতো ভাই—আমার মা তাকে ভালোবাসত আপন ছেলের মত। তা হলেই বুঝতে পারছো, আডেনাওয়ারের প্রতি আমাদের কতখানি শ্রদ্ধা। এবং সকলেই জানে এই বন্দীদের মুক্ত করার জন্য তাঁকে তাঁর মাথা অনেকখানি নিচু করতে হয়—সে লোক হিটলারের সামনেও কখনো নিজেকে খাটো করেননি।

কিন্তু এই যে তিনি ফুটফুটে সুন্দর ছোট্ট শহর বন-কে জর্মন্নির রাজধানীরূপে মনোনীত করলেন তাতেই হল বন-এর সর্বনাশ এবং আমাদের গোডেসবেগের সর্বশ্ব নাশ। বন-এর আশপাশে ফাঁকা জায়গা নেই। বিদেশী রাজদূত বাবুরা গোডেনবেগের চতুর্দিকে গম ক্ষেত বরবাদ করে হাঁকলেন বিরাট বিরাট এমারত, তৈরী করলেন আপন আপন 'কলোনি'। অফ্ কোর্স মার্কিনরাই হলেন পয়লা নম্বরী কলোনাইজারস। তাঁরা চান ঝাঁকে ঝাঁকে বার। রাতারাতি গোডেসবেগের চেহারা বদলে গেল। এদেশে স্নেভারি নেই। নইলে আমরা সবাই ওদের নীগ্রো স্নেভ বনে যেতুম।”

তারপর ঝপ করে আমাকে একটা চুমো খেয়ে বললে, “একটু দাঁড়াও—না, তুমিও সঙ্গে চলো। হেরমানকে ফোন করবো, আমার ফিরতে দেরি হবে।”

॥ ২৩ ॥

ভিন্ন ভিন্ন দেশে ভিন্ন ভিন্ন কায়দা-কোতার পাবলিক টেলিফোন বক্স, ফোন কियोস্ক থাকে। তার কোনো কোনোটাতে আপনি যদি প্রার্থিত নম্বর না পান, বা এনগেজড থাকে তবে B বোতাম টিপলে আপনার প্রদত্ত কড়ি একটা ফুটো দিয়ে ফেরত পাবেন। এখন হয়েছে কি, বেশীর ভাগ লোকই আপন বাড়ি থেকে ফোন করে। নম্বর না পেলে বা এনগেজড পেলে বোতাম টেপার কোনো কথাই ওঠে না। তাই পাবলিক ফোন থেকে ঐ দুই অবস্থায় B বোতাম টিপতে ভুলে যান। অতএব আপনার মত শেয়ানা লোকের কর্তব্য, পাবলিক ফোনে ঢুকেই প্রথম B বোতাম টেপা। যদি আপনার পূর্ববর্তী ভোলা-মন জনের কড়ি সেখানে থাকে তবে ফোকটে সেটি আপনি পেয়ে যাবেন এবং তাই দিয়ে আপনার কলটি—মাছের তেলে মাছ ভাজার প্রক্রিয়া অবলম্বনে সেরে নেবেন। এমন কি আপনি কোনো ফোন করবেন না; পথে যেতে যেতে দেখলেন একটি ফোন বাক্স। ঢুকে B টিপবেন। কড়ি পেয়ে গেলে ভালো। না পেলে কীই বা ক্ষতি। কড়িটি পকেটস্থ করে শিশু দিতে দিতে এগিয়ে চলবেন যতক্ষণ না আরেকটা ফোন বক্স পান। মার্কিন প্রসাদাৎ গোডেসবেগের নানাবিধ অধঃপতন হওয়া সত্ত্বেও ঘড়ি ঘড়ি পথপ্রান্তে অর্থোপার্জনের এ-ধরনের চিত্তহারিণী প্রতিষ্ঠান ফোন বক্স খুবই কম, কিন্তু হামবুর্গ, বার্লিন, কলোন—মরি! মরি! তিনশ কদম যেতে না যেতেই সেই নয়নাভিরাম প্রতিষ্ঠান। আবার ঢুকবেন আবার টিপবেন। কীই বা সময় যায় তাতে! এতে আপনার বিবেকদংশন হওয়ার কথা নয়। কারণ কড়িটা তো সরকারের নয়। ওটা আপনার মতই কোনো

নাগরিকের। ওতে আপনার হক্কই বেশী।

লটেকে এ-কৌশলটি শেখাবার মোকা পূর্ববর্তী যুগে আমি কখনো পাইনি। ইতিমধ্যে আমার মত জুউরী প্রেমিকও সে বোধ হয় পায়নি। ফোন বক্সে ঢুকে যেই না পয়সা ঢালতে যাচ্ছে আমি অমনি লম্ফ দিয়ে তাকে ঠেকালুম—“করো কি? করো কি?” বলে B-তে দিলেম চাপ।

ঈশ্বর পরম দয়ালু।

তাঁহার কৃপায় দাড়ি গজায়

শীতকালে খাই শাঁকালু।

দু-কান ভরে যেন কেউঠাকুরের মুরলিধ্বনি শুনতে পেলুম। যদ্যপি খটাং করে—কাঁসার থালার পর টাকাটি ফেললে যে রকম কর্কশ ধ্বনি বেরোয়। তিনটি গ্রশেন, আমাদের দিশী হিসেবে সাড়ে ন গুণা পয়সা সুরসুর করে বেরিয়ে এল।

লটে তাজ্জব মেনে শুধালে, “এ আবার কি?”

ভারতের জন্য প্রথম এটম বানাতে পারলে আমার একাননে সীতালোভে দশাননে যে আত্মপ্রসাদ অহংগ্ৰাঘা উদ্ভাসিত হয়েছিল তারই আড়াই পেঁচ মেখে নিয়ে হিটলারী কণ্ঠে আদেশ দিলুম, “এই কড়ি দিয়ে উপস্থিত সাত পাকের সোয়ামীকে ফোন তো করো; পরে সবিস্তর হবে।”

লটে : “হেরমান?”

অন্য প্রান্ত থেকে কচিৎ জাগরিত বিহঙ্গ কাকলীর মত শব্দ হল। হায়, কেন যে সেই ফরাসী কৌশল বিশ্বময় ছড়িয়ে পড়লো না—আফসোস করি প্যারিসে একদা পাবলিক কল বক্সে ফোন যন্ত্র থেকে একটি সরু রবারের নল—তার মাথায় ক্ষুদ্রে একটি লাউড স্পীকার, এমপ্লিফায়ার—বোতাম লাগানো—ঝুলতে থাকে। এখানে সেটা থাকলে আমি সেই বোতামটি কানে লাগিয়ে দিব্য শুনতে পেতুম ঐ প্রান্ত থেকে হেরমান কি বলছে।

লটে : “আমি লটে বলছি। লীকসটে (ইংরিজিতে এ-স্থলে হানি=মধু!) আমার ফিরতে দেরি হবে।... অ্যা না না! আমার প্রাচীন দিনের এক লাভারের সঙ্গে হঠাৎ দেখা। এখন তার সঙ্গে কফি টাট খাবো। তারপর সিনেমা। তারপর ছ-পদী ডিনার। সর্বশেষে পার্কের বেষ্টিতে বসে দুদণ্ড রসলাপ (মৃদু মর্মর গানে মর্মের কথার মধুময় মাখামাখি)।” ওদিকে আমি প্রাণপণ হাত ছুঁড়ে ছুঁড়ে সর্বাস্তে মৃগী রোগীর কাঁপন তুলে তুলে ওকে বোঝাবার চেষ্টা করছি—“কাট্ আউট, কাট্ আউট—মা-মেরীর দিবি, সান্তা মাগদালেনের দিবি, সান্তা আনার, সান্তা তেরেসার দিবি...।”

হেরমান বেশ একটানা কিছুক্ষণ কি-সব যেন বললে। লটে বললে, “দেখি চেষ্টা করে। কিন্তু তোমার সর্বনাশের জন্য প্রস্তুত থেকে।”

আমার বহু বৎসরের নিপীড়িত অভিজ্ঞতা বলে মেয়েছেলে একবার ফোন ধরলে আপনি নিশ্চিন্ত মনে মনিং ওয়াক (রবীন্দ্রসরোবর প্রদক্ষিণ তদ্ অন্তর্ভুক্ত) সেরে ফোন বক্সে ফিরে দেখবেন তখনো তিনি বলছেন, “তাহলে ছাড়ি, ভাই। বাইরে জনা তিনেক ফোন করার জন্য দাঁড়িয়ে আছে। কেন বাপু, আর ফোন বক্স নৌ কাছে পিঠে। এই তো মাত্র দু-মাইল দূরে গোরস্তানে (বাপুস—সেই রাতের ভূতুড়ে অন্ধকারে গোরস্তানের শর্টকাট প্রশান আর্মি আপিসার পর্বস্ত এড়িয়ে চলে) আরেকটা কল বক্স রয়েছে। তা হলে ছাড়ি ভাই—” এই ছাড়ি ভাই, ভাই—তার পরও নিদেন দশটি মিনিট ধরে চলবে।

কিন্তু লটে বড় লক্ষ্মী মেয়ে। যেই না দেখেছে একটি মহিলা ক্রিয়োস্কোর পানে...
দাঁড়িয়েছেন অমনি লটে বললে, “আউফ ভীডার হোরেন” যতক্ষণ না পুনরায় একে
অন্যের কণ্ঠস্বর শুনি (ততক্ষণের জন্য বিদায়)—এটা উহ্য থাকে।) [১]

রাস্তায় নেমে লটে বললে, “ফোন বক্স থেকে যে কৌশলে পয়সা বের করলে সেটা
বুঝিয়ে বলো।”

আমি বললুম, “হেরমান কি বললে? এবং তার কটা পিস্তল?”

খিল খিল করে হেসে বললে, “দুটো। হেরমানের রেজিমেন্ট যখন রাশা থেকে
ছত্রভঙ্গ হয়ে জার্মানি ফিরল তখন কোনো দফতর পর্যন্ত নেই যে পিস্তলটা জমা দেয়।
অন্যটা তার দাদার আপন নিজস্ব ছিল। সে রয়ে গেছে।” আমি অন্যদিকে ঘাড় ফেরালুম।
সুশিক্ষিত জার্মান জাত পর্যন্ত পয়া অপয়া মানে। “সে রয়ে গেছে” অর্থাৎ সে যুদ্ধ থেকে
“ফেরেনি।”—খুব সম্ভব মারা গেছে। হয়তো আত্মীয়স্বজন সৈন্য বিভাগ থেকে চিঠি
পেয়েছে, অমুক অমুক দিন অমুক স্থলে বীরের মৃত্যু বরণ করেছে। কিন্তু তারা ভাবে,
মৃত সৈন্য সনাক্ত করাটা সব সময় নির্ভুল হয় না। হয়তো বা সে সাইবেরিয়ার কারাগারে
বা লেবার ক্যাম্পে আছে। কিংবা হয়তো শেল শব্দ খেয়ে তার স্মৃতিশক্তি সম্পূর্ণ লোপ
পেয়েচে (এমনেসিয়া)। নিজের নামধাম পর্যন্ত স্মরণে আনতে পারছে না। হয়তো কোনো
হাসপাতালে পড়ে আছে, নয় ইন্ডিয়টের মত রাশার গ্রামে গ্রামে ভিখারির মত ঘুরে
বেড়াচ্ছে। কত কি হতে পারে। হয়তো একদিন ফিরে আসবে। “মারা গেছে” এই অপয়া
কথা বলি কি করে? সত্যি তো, আমিও তাই বলি।

কিন্তু সুশীলা লটে-চরিত্রের কোনো কোনো অংশ বেশ টনটনে। বললে, “কিন্তু ফোন
থেকে যে কড়ি দুইয়ে বের করলে সেটা বুঝিয়ে বলো।”

আমি বললুম, “সেটা পরে হবে। তুমি বরঞ্চ বলো, হেরমান কি বললে?”

হঠাৎ থেমে গিয়ে বললে, “দেখো হের ডক্টর হের প্রফেসর, প্রাচীন দিনের কথা
স্মরণে আনো। তোমার কোনো আদেশ, কোনো নির্দেশ আমি কস্মিনকালেও অমান্য
করেছি। এখনো কি আমার পালা আসেনি আদেশ করার”—গলায়, অল্প অত্যল্প ভেজা
ভেজা অভিমানের সুর।

আমি হস্তদণ্ড হয়ে বললুম, “এ কী বলছো তুমি। তুমি যা বলবে, তাই হবে। সে-
আমলে বললেও হত। ঐ যে ফোনের বাস—”

(১) সাক্ষাৎ দেখাদেখির পর বিদায় নেবার সময় জার্মান বলে “আউফ ভীডার জেন (দেখা)
হয়।” ফোনে বলে আউফ ভীডার হো রে ন্ (শোনা যায়)। ভিয়েনাতে বলে “আ দিয়ো”
(ভগবানের হাতে দিলুম)। নানা দেশে নানা রকমের বিদায়বাণী বলা হয়। জানিনে, এই লক্ষ্মীছাড়া
মুন্সকে এখন পনেরো আনা লোক—এমন কি মেয়েরা পর্যন্ত ঘোর অপয়া “এখন তবে যাই”
বলে। যেন অগন্ত্য যাত্রা করছে! “এখন তবে আসি” প্রায় উঠে গেছে। আমরা তখন উত্তরে
বলতুম “এসো।” এখন কি উত্তর দেয়।

এই আধুনিক আধুনিকারা যখন কেউ বলে, “এখন তবে যাই?” তারা কি “হ্যাঁ, যাও”
বলে? সর্বনাশ! এর চেয়ে মারাত্মক বর্বর অপয়া উত্তর কি হতে পারে। “যাই” শুধু তখনই বলা
চলে যখন কেউ আসছে। ডাকলুম, “রামা, রামা, এদিকে আয় তো, বাবা।” সে উত্তরে বলে,
“যাই, বাবু।”

তার বাঁ হাত দিয়ে আমার কোমর জড়িয়ে ধরে পাঁজরে দিলে কাতুকুত।

আমি “কঁক” করে সামনের দিকে দুর্ভাঙ্গ হই আর কি!

লটে ভারী পরিতৃপ্ত হয়ে বললে, “একদিন তোমাদের বাড়িতে রান্নাঘরে ঢুকে দেখি সেই গুণ্ডা অসকার তোমাকে সোফায় চিৎ করে ফেলে তার লোহার আঙুল দিয়ে তোমার পাঁজরে যেন পিয়ানো বাজাচ্ছে। আর তুমি পরিত্রাহি চিৎকার ছাড়ছো। আমারও বড্ড শখ হয়েছিল, আমিও মজাটা চেখে দেখি। এবারে ভাবলুম, এত দিনে বোধ হয় পাঁজরে তোমার আর সে সেনসিটিভনেস নেই। আছে, আছে, আছে। তুমি এখনো আমাদের সনাতন ফুটবল টিমের ক্যাপটেন। থাক ফোনের কেচ্ছা। হেরমান বলছিল, কাফেতে যাচ্ছি, উত্তম প্রস্তাব। কিন্তু ডিনার বাইরে কেন? তার শিকারের উত্তম হরিণের মাংস যখন বাড়িতে রয়েছে।”

আমি বললুম, “আঃ!”

“মানে?”

আমি জিভ চ্যাটাং চ্যাটাং করে বললুম, “হরিণ আমি বড্ড ভালোবাসি। কিন্তু তার জন্যে হরিণের মত আমিও কি তার হাতে শিকার হব!”

আর বললে, “সিনেমাটা বাদ দাও। ওখানে তো রসলাপ করতে পারবে না। বরঞ্চ বাড়িতে ডিনার খেয়ে পার্কে যাবে।” আমি বললুম, “চেষ্টা দেবো বন্ধুকে নিয়ে আসতে। এখন চলো কাফেতে।”

আমি পুনরায় মেরির ভেড়ার মত লটের পিছনে পিছনে কাফেতে ঢুকলুম।

॥ ২৪ ॥

“ভোক্তানাং দীর্ঘ জীবা প্রকাশিয়া ইন্দ্রধনু বিনিন্দিত হনুদয় বিস্তারীয়া”

আপনি যদি উদরস্থ বায়ু পাঠান-মুন্সুকের গিরিদরি প্রকম্পিত করে সশব্দে আস্যদেশ থেকে উচ্ছ্বসিত না করেন, সোজা বাঙলায় একটা বিরাট রামবোম্বাই টেকুর না তোলেন (নোবালেও পাঠান বিচলিত হয়ে স্বীয় উষ্ণিবপুচ্ছ নাসিকারঞ্জে স্থাপন করবে না) তবে পাঠান অতিথিসেবক বড্ডই স্রিয়মাণ হয়ে আদেশা করে, তার ধর্মপত্নী স্বহস্তে ১২৮ ডিগ্রীর উষ্ণতম বাতাবরণে অশেষ ক্লেশ ভূঞ্জিয়া যে খাদ্যাদি প্রস্তুত করলেন সেটি আপনার রসনাপূত হয়নি। পক্ষান্তরে আপনি যদি এই “ভদ্রস্তুতা” কোনো ডিউক—ডিউক কেন, ডিউকেতরের—বাড়িতেও করেন তবে অনায়াসে ধরে নিতে পারেন যে ও বাড়িতে প্রভু খৃষ্টের ন্যায় ঐটেই আপনার লাস্ট সাপার (Suffers) এবং সেইটে অজরামর করে রাখবার জন্য লেওনার্দো দা ভিন্সির সন্ধান নিতে পারেন।

ইংল্যান্ডের কায়দা-কেতার সঙ্গে কন্টিনেন্টের কায়দা-কেতার বেশ খানিকটে তফাৎ আছে। ইংলন্ডে সব সময়ই লেডিজ ফার্স্ট। এই সুবাদে একটি অতি মনোরম সত্য ঘটনা মনে পড়লো। সেটা বলছি।

ইতিমধ্যে সদর রাস্তা থেকে গলিতে ঢুকে লটে ছোট একটা কাফেতে ঢুকল। আমি পিছন পিছন। সঙ্গে সঙ্গে অন্তত তিনটি কণ্ঠ যেন গির্জের “হাল্লেলুইয়া, হে প্রভু! তোমার স্বর্গরাজ্য এই খর-তাপদগ্ধ মরুতে নেবে আসুক, ডমিনুস্ ভবিসকুম” শেষ পর্যন্ত শেষ পর্যন্ত, অবশেষে অবশেষে, আখের আখের এলি। দর্শন পেলুম। দিব্যারান্তির মিনষেকে

জাবড়ে ধরে শুয়ে থাকিস নাকি? না—”

লটে রেসপেশন কমিটির গণ্যমান্য সদস্যদের জ্বলন্ত উৎসাহে মদ্যে কংগ্রেসী মাইলডরা যে রকম সর্বপ্রকারের প্রশস্তি নবমীনিদিত্ত আবাহন “তাচ্ছল্য” ভরে উপেক্ষা করেন কিন্তু শুনে যাওয়ার ভান করেন। লটে অবশ্য কোনো প্রকারের ছলাকলা কন্মিনকালেও জ্ঞানতো না। তাই শুধলে, “হের প্রফেসর ডক্টর সৈয়দকে যে একটা মামুলি শুড মর্নিংও বললি নে।” মেয়েগুলো লটের মেয়ের বয়সী; আমাকে চিনবে কি করে? একজন বললে, “মাকে ডেকে আনি।”

লটে : “হ্যাঁ হ্যাঁ, তাই কর। ওর সঙ্গে হয়তো আমাদের কালামানিকের গোপন প্রেম ঘূষসি ভাব-ভালোবাসা ছিল। আমাদের লটবরটি তোদের মায়ের যৌবনে ছিলেন একটা আস্ত পেটিকোট-শিকারী ব্রা-বিজ্ঞয়ী।” আমি বললুম, “ছিঃ প্ফুই।”

লটে বললে, “মর্ডান হতে শেখ। নইলে আমার সঙ্গে নাগরালী চতুরালি করবে কি করে? নিরামিষ প্রেমে আমার অরুচি।”

আমি কথটা চাপা দেবার জন্য বললুম, “তোমাকে একটা মর্মস্পর্শী সত্য ঘটনা বলছি—এটিকেটের সুবাদে এইমাত্র মনে পড়ল। তোমাদের দেশে তো প্রায় কুপ্পে মোকা বেমোকাতে লেডিজ ফার্স্ট। এখন হয়েছে কি, ফরাসী বিদ্রোহের সময় উন্মত্ত জনতা কোনোপ্রকারের বাছবিচার না করে কচুকাটা করছিল ফ্রান্সের ডাক, ব্যারন জমিদার— তাবৎ খানদানী অভিজাতদের। প্রথম তাদের জেলে পুরে, পরদিন ভোরবেলা একজনের পিছনে অন্যজনের দীর্ঘ লাইন করে মেয়ে-মদ সবাইকে মধুর গতিতে এগিয়ে নিয়ে যেত গিলোটিনের দিকে কারাগারের বিরাট চত্বর ক্রস করে। সর্বপ্রথম জন এগিয়ে গিয়ে মুণ্ডটা চুকিয়ে দিত গিলোটিনের ফ্রেমের ফুটোটাতে। হুশ করে নেবে আসত দারুণ ভারী সূতীক্ষ্ণ ট্যারচা তিনডবল খঞ্জের চেয়ে সাইজে বড় একটা কাটার। বিদ্যুৎবেগে মাথাটা দেহ থেকে বিচ্ছিন্ন হয়ে ছিটকে পড়তো মাফ-মাফিক অদূরে রক্ষিত একটা বাস্কেটের ভিতর (ফরাসী ব্র্যাঞ্জে তাই এখানে বলে “বাস্কেটে থুথু ফেলা” অর্থাৎ গিলোটিন প্রসাদাৎ পরলোকগমন)। জল্পাদ সেটা সরিয়ে দিয়ে সেখানে নতুন বাস্কেট রাখার পর কিউয়ের দ্বিতীয় “উমেদারের” দিকে তাকাবার পূর্বেই তিনি এগিয়ে আসতেন। পূর্ববৎ প্রক্রিয়া।

এখন হয়েছে কি, সে প্রভাতে কিউয়ের পঞ্চম ব্যক্তি ছিলেন এক সাতিশয় খানদানী মনিষি ফ্রান্সাধিরাজ সম্রাটের ভাগ্নে না কি খেন। তিনি বন্দী হওয়ার সময়ই জ্ঞানতেন তাঁর অদৃষ্টে কি আছে। তাই তাঁর সর্বোত্তম রাজদরবারী বেশ পরেই তিনি কারাগারে এসেছিলেন। সকালে বধ্যভূমিতে নির্গত হওয়ার পূর্বে ঘটনাক্ষণে ধরে প্রসাধন করেছেন। জুতোর খাঁটি রূপোর বগলস ঘষে ঘষে ঝাঁ চকচকে করেছেন। পা থেকে আরম্ভ করে সর্বশেষে মাথার পরচুলার উপর সযত্নে পাউডার ছড়িয়েছেন। আহা যেন নব বর—গিলোটিন বধুকে আলিঙ্গন করতে যাচ্ছেন।

তিনি লক্ষ্য করেছিলেন, কিউয়ে ঠিক তাঁরই সামনে একটা মহিলা।

আমাদের নব বর কিউ থেকে এক পাশে সরে গিয়ে ডান হাত দিয়ে মাথার হ্যাট তুলে, বাঁ হাত বুকের উপর রেখে কোমরে দুর্ভাজ হয়ে বাও করে মহিলাটিকে বললেন, “আমাকে স্বরণাতীতকাল থেকে আমার মা-জননী আদেশ করেছেন, লেডিজ ফার্স্ট। সে-আইন আমি কন্মিনকালেও অমান্য করিনি। আজ বড়ই প্রলোভন হচ্ছে মাত্র একবারের

তরে সে আইন খেলাফ করি। একবারের বেশী যে করবো না সে-শপথ আমি মা মেরীর পা ছুঁয়ে গ্রহণ করতে প্রস্তুত। প্রমাণস্বরূপ আরো নিবেদন করতে পারি মাতুলক সেই অনুশাসন ভঙ্গ করার পর ‘ধন্য হে জননী মেরী, তুমি মা করুণাময়ী’র অশেষ করুণায়—যাঁর পদপ্রান্তে আমরা ত্রিসফ্যা অশ্রুজলসিক্ত প্রার্থনা জানাই, দেবতাত্মা মা মেরী দেব-জননী। পানী-তাপী আমাদের উপর এক্ষণে তোমার আশীর্বাদ বর্ষণ করো এবং যখন মরণের ছায়া আমাদের চতুর্দিকে ঘনিয়ে আসবে। আমেন—তাঁরই অশেষ করুণায় আমার মাতৃদত্ত সেই অনুশাসন ভঙ্গ করার পর আমি মাত্র মিনিট তিনেক ইহসংসারে মাতৃআজ্ঞা লঙ্ঘন করার বিবেকদংশনে কাতর হব, তিন মিনিট হয় কি না হয় মরণের ছায়া ঘনিয়ে আসবে, মা মেরী আশীর্বাদ করবেন, তাঁরই পদপ্রান্তে অনন্ত শান্তি অশেষ আনন্দ পাবো।

আমার একান্ত অনুরোধ কিউয়ে আপনি আমার স্থানটি গ্রহণ করুন। আমি আপনার স্থানটি গ্রহণ করার ফলে গিলোটিনে যাব আপনার পূর্বে—লেডিস ফার্স্ট আইন সজ্ঞানে স্বেচ্ছায় ভঙ্গ করবো এ-জীবনে প্রথমবার এবং এ-জীবনে শেষবারের মত। এই আমার সঙ্কল্প ভিক্ষা আপনার কাছে। [১] যে-বংশে জন্মেছি তার প্রসাদে এবং প্রাসাদে আমাকে কখনো ভিক্ষা করতে হয়নি। এ-জীবনে এই আমার সর্বপ্রথম ভিক্ষাভাণ্ড গ্রহণ এবং দ্বিতীয়বার এ-দীনচার করার পূর্বে সেটা চূর্ণবিচূর্ণ করে অনন্তলোকের প্রতি অভিযান। মা মেরীর জয় হোক।”

লটের চোখ দেখি ছলছল করছে। মেয়েটা চিরকালই স্পর্শকাতর আর অভিমानी।

কাফের রেসেপশন কমিটির মেয়েরাও তখন গুড়ি গুড়ি এসে আমার কাহিনী শুনছে।

আমি বললুম, “তুমি তো সাতিশয় খানদানী—”

“কি যে বলো!”

আমি বললুম, “তোমরা লীসেমরা রেগরা, গ্রেটে-কেটেরা, তোমরাই তো এখানকার প্রাচীনতম বাসিন্দা। এবং আপস্টার্ট মার্কিনদের সঙ্গে দু-পয়সার মোহে ধেঁই ধেঁই নৃত্য না করে উপায়ান্তর না দেখে আপন আপন বাস্তবায়িত নিজেদের জ্যাস্ত গোর দিয়েছ—”

“থাক, থাক। আমি হলে কি করতুম? বলতুম, ‘না, সম্মানিত মহাশয়। আমি তিন মিনিট বেশী বাঁচলুম কি না বাঁচলুম সেটা অবাস্তব। কিন্তু আপনি আপনার মাতৃ-আজ্ঞা—তা সে মৃত্যুর তিন মিনিট পূর্বেই হোক আর তিন বছর পূর্বেই হোক—লঙ্ঘন করতে যাবেন কেন? ফল যাই হোক না কেন। অবশ্য আমি নিশ্চয় জানি, আপনার পুণ্যশীলা মাতা মা মেরীর পদ-প্রান্ত থেকে সম্মেহ দৃষ্টিতে আপনার দিকে তাকিয়ে আপনাকে আশীর্বাদ করবেন, আপনাকে গর্ভে ধরে নিজেই ধন্যা মনে করবেন।”

লটে হঠাৎ বলে উঠলো, “এই ছুঁড়িরা, তোরা ভাগ দেখি এখান থেকে। আমি

(১) আত্মহত্যা করার পূর্বে হিটলার তাঁর উইলে অনুশাসন করেন এবং তাঁকে বাচনিক আদেশ দেন গোবেলস যেন তাঁর মৃত্যুর পর প্রধান মন্ত্রী (চ্যান্সেলর) রাখে কর্মভার গ্রহণ করেন। কিন্তু গোবেলস আত্মহত্যা করেন হিটলারের মৃত্যুর ২৪ ঘণ্টার পর। তাঁর উইলে লেখেন, “আমার জীবনে এই প্রথম আমি ফ্যুরারের আদেশ অমান্য করলুম। কিন্তু এটা লিখতে ভুলে গেলেই এবং এইটেই শেষ অবধ্যতা।” আফটার অল গোবেলস তো খানদানী ভ্রলোক নন। ফরাসী অভিজাতদের মত তাঁর পেটে এত এলুম, বুকে অত দরদ হবে কোথায়?

হেরমানকে ফাঁকি দিয়ে হোঁড়াটাকে (আমি মনে মনে বললুম, আমি সিক্সটি সিক্স ইয়ার ওল্ড নই, আমি সিক্সটি সিক্স ইয়ার ইয়ং) নির্জনে নিয়ে এলুম পীরিত করব বলে। তোরা আবার বাগড়া দিচ্ছিস কেন? যাঃ!” মেয়েগুলো হুড়মুড়িয়ে একে অন্যর ঘাড়ে পড়ে সঙ্গে সঙ্গে অন্তর্ধান। শুধু একজন বললে, “কোজনেফ মা! লটে মাসী যে অ্যাঙ্গিন ডুবে ডুবে শ্যামপেন খাচ্ছিলেন সে তো এ মল্লুকের কোন চিড়িয়াও জানতো না।”

লটে আমার পায়ের উপর জুতো বসিয়ে সম্পূর্ণ মোলায়েমসে চাপ দিলে।

আমি সোৎসাহে বললুম, “গো...ল।”

লটে : “মানে?”

“তোমার পা দিয়ে কি করছো? ফুটবল খেলছো না?”

বললে, “খ্যৎ”। আমার পাশেই ছিল একটা হ্যাট-স্ট্যান্ড। হঠাৎ লটের নজর গেল সেদিকে। সবচেয়ে ধূলিমাখা হ্যাটটি নামিয়ে এনে বললে, “এইটাই তো তোমার? দাঁড়াও আসছি।” বলে কাউন্টারে গিয়ে সেখান থেকে নিয়ে এল একটা ব্রাশ। টুপিটাকে অতি সযত্নে ব্রাশ করতে করতে বললে, “তেমাকে দেখভাল করার জন্য ইহসৎসারে কেউ নেই। টুপিটার গণ্ডির নিচের দিক থেকে যে ধুলো বেরুল সে-রঙের ধুলো এ-দেশে নেই। আর এদেশে দেখভাল করার তরে কেউ যে নেই সেটা তো স্পষ্ট দেখতে পাচ্ছি।”

আমি বললুম, “কি যে বলো। তুমি তো রয়েছ।”

লটের চোখে ফের জলের রেখা। হতাশ কণ্ঠে বললে, “কদিনই বা এ-দেশে থাকবে। আর কবারই তোমার দেখা পাব। কিন্তু ভেবে দেখো দিকি, এটা কি একটা আশ্চর্য ঘটনা নয়। বলো দেখি এ পৃথিবীতে কটা মেয়ে দশ বছর বয়সে যাকে ভালোবেসেছে তাকেই ফিরে পেল চল্লিশ বছর পরে। তাও নিতান্তই দৈবাৎ। তুমি যদি দশ মিনিট পর ট্রাম-স্ট্যান্ডে আসতে তো তোমার সঙ্গে দেখাই হত না; আমার ট্রাম এসে যেত আর আমি চলে যেতুম কোথায় কোন্ পোড়ারমুখো বন শহরে। তারপর ফের দেখা হত পঞ্চাশ বছর পরে।”

আমি বললুম, “মোটাই বিচিত্র নয়। তোমার ঠাকুন্দার বাবা তো বেঁচেছিলেন একশ এক বছর! তুমিই বা কি দোষ করলে।”

রাগের ভান না রাগ, হতে পারে দুটো, মিশিয়ে বললে, “তোমার শুধু হাসাহাসি আর ঠাট্টা মজা। কোনো জিনিস সিরিয়াসলি নিতে পারো না।”

আমি শব্দ আর দুর্ভাবনার ছল করে শুধালুম, “আমাদের প্রেমটা কি বড্ডই সিরিয়াস?”

‘আকাশ পানে হানি যুগল ভুঝ’ বললে, “দারুণ ডেঞ্জারাস, কখন যে ফট করে আমার হার্টটা টুক করে ফেটে যাবে তার কোনো ঠিকঠিকানা নেই। আর শোনো আমি একশ বছর বাঁচতে চাইনে।”

“কেন?”

“হেরমানের পরিবারের সবাই স্বল্পায়ু...বাপের দিক থেকে, মায়ের দিক থেকেও। সে আমার আগে চলে গেলে আমি সইতে পারবো না। বেশীদিন বাঁচবো না।”

আমি মনে মনে সমস্ত হৃদয় দিয়ে প্রার্থনা করলুম, “তোমার সিঁথির সিঁদুর অক্ষয় থাকুক। তোমরা জীবন যেন খণ্ডিত না হয়। তুমি অখণ্ড সৌভাগ্যবতী হও।”

আমি শুধালুম, “লটে, এদেশে তো নিয়ম কাফে-রেস্তোরাঁ-পাব-এ ঢোকার সময়ে ব্যত্যয় হিসেবে লেডিজ ফাস্ট নয়, পুরুষ আগে ঢোকে। তবে তুমি ছুট করে এ-রকম পয়লা ঢুকলে কেন?”

উত্তর শুনে বুঝলুম লটে রীতিমত তালেবর মেয়ে হয়ে উঠেছে। বললে, “এটিকেট যারা অন্ধভাবে মেনে চলে তারা হয় মূর্থ নয় স্তব। স্তব-রা সর্বক্ষণ ভরে মরে, ঐ বুঝি এটিকেটের পান থেকে চুন খসে গেল, এবং সঙ্গে সঙ্গে সবাই বুঝে গেল যে সে আসলে নিম্ন পরিবারের লোক কিন্তু এখন দু-পয়সার রেষ্ট হয়েছে বলে উঠে পড়ে লেগেছে কি করে খানদানী সমাজে প্রবেশাধিকার পাওয়া যায়। তাহলেই তো সর্বনাশ। স্নেক অ্যান্ড ল্যাডার খেলায় সাপের মুখে পড়লে যেরকম এক ধাক্কায় স্-স্-স-র করে পিছলে পড়ে ফের আপন কোঁঠে ফিরে যেতে হয় তারও হবে সেই হাল। আবার, ফের, ফিন্সে। আসলে এ-এটিকেটের কারণটা কি? রেস্তোরাঁ-পাব-এতে আকছারই কোনো কোনো পেঁচি মাতাল এমন কি অতিশয় খানদানী মনিষ্যিও (শোনোনি “ড্রাক্স লাইক এ লর্ড”) বানচাল হয়ে ইইহুমোড় লাগায় আকছার। ঐ অবস্থায় কোনো লেডি যদি ছুট করে হঠাৎ ঢুকে পড়েন তবেই তো চিন্তির। তিনি হবেন বিব্রত অপ্রতিভ। তাই সঙ্গে পুরুষ তাঁর আগে ঢুকে পাব-এর বাতাবরণটা জরিপ করে নিয়ে হয় তদুৎপত্তি বেরিয়ে যায় নয় তাঁকে গ্রীন সিগনেল দেয়। বেরুবার সময় কিন্তু লেডিজ ফাস্ট। লেডির উপস্থিতিতে সে হয়ত বিল বাবদে স্নো সার্ভিস নিয়ে কথা কাটাকাটি করতে চায়নি। লেডি বেরিয়ে গেলে কাউন্টারে গিয়ে প্রেমসে লড়াই লাগাবে। হয়তো বা বড্ড বেশী বিয়ার খাওয়ার ফলে পোট টনটন করছে—সে-স্থলে স্বয়ং কাইজারও ঘোড়ায় চড়ে যেতে পারেন না—অর্থাৎ বাথরুম—সে-স্থলে একটা টুঁ মেরে আসতে চায়।

এ-কাফেটি আমি চিনি আমার হাতের চেটোর মত—দশ বছর বয়স থেকে। কাফের অধিষ্ঠাত্রী মালিক আমাকে চেনেন সেই আদিকাল থেকে। এখানে আমি ছুট করে ঢুকলে বিব্রত হব কেন? তদুপরি সবচেয়ে মোক্ষম তত্ত্ব যেটা অবতরণিকাত্তেই বলা উচিত ছিল যে এ-কাফেতে মাদকদ্রব্য আদৌ বিক্রি হয় না। এখানে বানচাল হবে কি গিলে? আইসক্রীম, চা, কোকো, নেবুর রস, ইওগুর্ত (দই), কফি?—আর কালো কফি খেলে তো নেশা কেটে যায়।”

আমি শুধালুম, “লটে, তুমি কখনো নেশা করে বানচাল হয়েছে?”

লটে বললে, “বা রে। সেই যে দশ বৎসর বয়সে তোমাকে ভালোবেসেছিলুম সে নেশার খোঁয়াড়ি তো এখনো কাটেনি। অবশ্য এ-কথা ঠিক, তোমার সঙ্গে যদি ফের দেখা না হত তবে সে প্রেম এরকম মাথা চাড়া দিয়ে জেগে উঠতো না। শুনেছি, চীন দেশে নাকি একজন মোক্ষম দারুণ কড়া মদ আছে। রুশদের ভোদকা, ফরাসীদের আবসাঁৎ (১) কাতে নাকি একদম নিষ্পানি। সে-মদ রাত দশটা অবধি দু-তিন পাত্তর খেতে না খেতেই পুরো পাক্সা নেশা। তারপরও যদি খাও তবে হয় বমি করবে নয় অঘোরে ঘুমিয়ে পড়বে। পরের দিন ঘুম ভাঙতে দেখবে নেশা বিলকুল কেটে গিয়ে মাথা একদম সাফ। তখন সামান্য একটুপানি প্রান্তরাস সেরে খাবে দু-পেয়ালা গরম জল। আর যাবে কোথা? চড়চড় করে ফের নেশা চড়বে ছবৎ আগের রাস্তিরের মত। চীনারা বলে, আগের

রাশ্ত্রের নেশার একটা তলানি পেটে জ্বমে থাকে—আর পাঁচটা মদের মত শরীর থেকে বেরিয়ে যায় না। সোঁটাতে গরম জল পড়লেই সে মাথা চাড়া দিয়ে জেগে ওঠে, আবার সেই অরিজিনেল মদের কাজ করে। পরের দিন আবার দ্বিতীয় দিনের মত স্নেফ দু-পেয়ালা গরম জল ঢাললেই ফের উত্তম নেশা, করে করে একবার মদ খেয়ে তিন দিন ধরে তিন বার নেশা করা যায় একই খর্চায়।”

আমি শুধালুম, “মদ্যাদি ব্যাপারে যে তুমি এত গবেষণা করেছ সে তো আমি জানতুম না।”

চোখ পাকিয়ে বললে, “তুমি একটা আস্ত বুদ্ধ (জর্মনে বললে “ডোফ”—তারপর সেই “ডোফ” শব্দের তর তম করে বললে “ডোফ”—“ডোভার”—“কালো”)। রূপকটা একদম ধরতে পারো নি। আমার দশ বৎসর বয়সে তুমি যে প্রেম মদিরা খাইয়েছিলে, চল্লিশ বৎসর পরে এসে তার তলানিতে ঢাললে দুপেয়ালা গরম জল। সে প্রেম ফের চাড়া দিয়ে উঠলো। বুঝলে? না ঢীকার জন্য প্রফেসর কির্ফেলের সন্ধানে বেরতে হবে।”[১]

খানিকক্ষণ মুচকি হেসে শুধালে, “আচ্ছা বলো তো, আমার বয়স যখন কুড়ি আর তোমার ছত্রিশ তখন আমাদের দেখা হলে কি হতো?”

আমি সতর্কতার সঙ্গে শুধালুম, “হেরমান তখন বাজারে ছিল কি?”

বললে, “জোঃ। শুধু হেরমান! আমি কি অতই ফ্যালনা! আমার রসের হাটে অন্তত হাফ ডজন নাগর ছিলেন। সপ্তাহের ছটা দিন ছটা উইক-ডে ওদের ভাগ করে দিয়েছিলুম রীতিমত টাইম-টেবল বানিয়ে। আর রববারটা রেখেছিলুম ফ্রী চয়েসের জন্য। সপ্তাহের ছদিনের আটপৌরে কাপড় পরার মত আটপৌরে লাভার নিয়ে তো রববার বেরনো যায় না। পরতে হয় সানডে বেস্ট। কিন্তু কই আমার কথা তো উত্তর দিলেনা।”

“কোন কথা?”

ঠোট বেঁকিয়ে বললে, “লাও! কোন কথা? হায়রে আমার লাভার! আমার বয়স যখন কুড়ি আর তোমার—”

“অ! বুঝেছি বুঝেছি, কিন্তু জুলিয়েটের বয়স তো ছিল চোদ্দ।”

“সে তো ইতালির মেয়ে, প্রেমের ফুল ফুটে যায় কলিটা ভালো করে শেপ নেবার পূর্বেই। ওরা তো দক্ষিণ দেশের।”

মনে মনে বললুম খাস কলকাতাইও বজবজের লোককে বলে “দোনো”। ওরা নাকি বজ্জই অকালপক্কতা রোগ ধরে—দোহাই ধর্মের আমাকে দোষ দেবেন না—শুনেছি, কলকাতায় ফুটি করতে এসে চারটি পয়সা বেঁচে গেলে কাগজ কিনে খুড়োর নামে একটা ভূয়ো মোকদ্দমা লাগিয়ে গ্রামে ঢোকার সময় খুড়োকে শুধিয়ে যায় “মোকদ্দমা লাগিয়ে এসেছি, খুড়ো! এইবারে শিকেয় ঝুলনো হাঁড়ি থেকে ধুতি শাট বের করো। সদরে কবার ছুটোছুটি করতে হবে রাসবিহারী ঘোষও বলতে পারবে না। আর ধোপদুরন্ত

(১) প্রফেসর কির্ফেল গডেনবের্গে বাস করতেন বলে লটে তাঁকে চিনত। বন বিশ্ববিদ্যালয়ে সংস্কৃত পড়াতেন। পুরাণ সম্বন্ধে তিনি একখানা বিরাট গ্রন্থ রচনা করেন। নাম “ইন্ডিশে এসসেমপ্লী”। বহু তর্জন অজ্ঞানকে উত্তম সংস্কৃত শিখিয়েছিলেন—আমাকে শটকে শেখাতে পারেন না! সেন্সাস রিপোর্টে ধর্মস্থলে তিনি লেখেন, “বৌদ্ধ”।

জামাকাপড় পরে যেয়ো। নইলে খরটা আমার কানে পৌঁছেলে আমি তোমার ভাইপো হিসেবে বড্ড লজ্জা পাবো যে।”

ওদিকে লটে অতিষ্ঠ।

আমি গভীর কণ্ঠে বললুম, “ঐ সময়ে দেখা হলে, হুঁ, একটা আতশবাজী, একটা বিশ্বযুদ্ধ, একটা ভূমিকম্প, একটা দাবানল, একটা প্রলয়ঙ্করী মনস্তর, একটা—” মুখে আর কথা যোগালো না। ঈষৎ ভয় পেয়ে বললুম, “কিন্তু নাৎসিরা তখন সর্বশক্তিমান! তারা কি আমাকে ছেড়ে কথা কইত! আমাকে ইহুদী ভেবে—”

“যা। তোমাকে ইহুদী ভাবতে যাবে এমনতরো দুচোখ কানা নাৎসিদের ভিতরও হয় না। ইহুদীদের মত শকুনিপারা বাঁকা নাক তোমার কোথায়? কোথায় মোটা মোটা ঠোট যার নিচেরটা ঝুলে পড়েছে বিষৎ খানেক? কোথায় দুটো বিরাট বিরাট কান যেগুলো মাথার সঙ্গে চেষ্টে না গিয়ে পার্শ্বনডিকুলার হয়ে যেন আকাশের দু-প্রান্ত ছুঁয়ে উঠে আছে দুনিয়ার কে কি বলছে সে সব সাকুল্যে শোনার জন্য যেন ফাঁদ পেতেছে। আর বলতে নেই কিন্তু কোথায় তোমার সেই হাফ মেয়েলি নাদসনুদুস যুগ্ম নিতম্ব—ইহুদীদের পেটেন্ট করা মাল? বরঞ্চ আমাকে ইহুদী বলে ভাবতে পারে।”

আমি ভয় পেয়ে বললুম, “করেছিল নাকি?”

তচ্ছিন্নির সঙ্গে বললে, “এক লক্ষ্মীছাড়া কালো কুর্তিপরা নাৎসি আমার সঙ্গে আলাপচারী করার জন্য কোনো অরিজিনাল পছন্দ না পেয়ে শেষটায় ক্যাবলাকাস্তের মত বত্রিশটা পোকায় খাওয়া মূলোর মত হলদে দাঁত বের করে শুধলো, আমি ইহুদী কিনা?”

আমি বললুম, “সর্বনাশ!” আমসটার্ডামের আন ফ্রাঙ্কের কথা মনে পড়াতে শরীরটা শিউরে উঠলো। কনসানট্রেশন ক্যাম্পে অসহ্য যন্ত্রণা ভুলে যে গেল, তার দিদি মুহূর্তশয়ায় ছটফট করতে করতে উপরের বাস থেকে সিমেন্টের মেঝেতে পড়ে শিরদাঁড়া ভেঙে মারা গেল। তাদের বুড়ী মা গেল অন্য ক্যাম্পে অনাহারে। কিন্তু শাস্তসমাহিত-চিন্তে। পরিবারের মাত্র একজন বেঁচে গেলেন অলীলাক্রমে। হুকুম এসেছিল যে কটা ইহুদী, বেদে, বামন বাঁটকুল আছে (এই বাঁটকুলেরা সার্কাসের ক্লাউন প্রভৃতি সেজে নাৎসি কসাইদের মনোরঞ্জন করতো বলে এদের গ্যাস-চেম্বারে পাঠানোটা ক্রমেই পিছিয়ে দেওয়া হচ্ছিল) তাদের সবাইকে খতম করে কনসানট্রেশন ক্যাম্পে নিশ্চিহ্ন করা হোক। কিন্তু সে আদেশ পালন করার পূর্বেই রাশানরা ক্যাম্প জয় করে সবাইকে মুক্তি দিল। এরই মধ্যে ছিলেন আন ফ্রাঙ্কের পিতা। ইনি যখন কৃষ্ণ সমুদ্র থেকে “বাড়ি” “আমসটার্ডাম” পাড়ি দিলেন তখন তাঁরই মত অবলীলাক্রমে নিষ্কৃতিপ্রাপ্ত ইহুদীদের কাছ থেকে শুনতে পেলেন তাঁর পরিবারের সম্পূর্ণ বিলুপ্তির কথা। [১]

(১) হিমালয় সম্প্রদায় যে কী মারাত্মক আহাম্মুকী বশত কত লোক মেরেছে তার হিসেব নেই। একবার ধরা পড়ে কয়েকশ বা হাজার এক অজানা জাতের লোক। বিস্তার এনসাইক্লোপিডিয়া ঘেঁটেও হিমালয়ের “জাতি নিরূপণ বিভাগের” ভূইফৌড় “পণ্ডিতরা” স্থির করতে পারলেন না, এরা আর্থ না অনার্থ, “সাবধানের মার নেই” এই তত্ত্বের স্বরণে শেষটায়—বোধ হয়, একটা মুদ্রা টস করে—ওদের গ্যাস-চেম্বারেই পাঠানো হল। যুদ্ধের পর সন্দেহাতীতরূপে আন্তর্জাতিক গবেষকরা মীমাংসা করলেন এরা আর্থ। এ জাতের কটা লোক এখনো বেঁচে আছে কেউ জানে না।

লটে বললে, “আমি তেড়ে বললুম, আমার চতুর্দশ পুরুষ ইহুদী।” তারপর হ্যান্ডব্যাগ থেকে বের করে আমাদের ছাপানো কুলজি দিলুম বাছাধনের হাতে। ওটা ছাপা হয়েছিল কাইজারের আদেশে। তিনি অবশ্য তখন নির্বাসনে কিন্তু কাইজার থাকাকালীন তিনি এরকম কেউ শতায়ু হলে তাকে অভিনন্দন জানাতেন, ঠাকুদার বাবাকেও সেই রীতি অনুযায়ী শুভেচ্ছা জানান এবং অনুরোধ করেন আমাদের কুলজি যেন নির্মাণ করা হয়।

আমাদের অধ্যাপক কির্ফেল, গেরেমভারী বিস্তর বাঘা বাঘা প্রফেসর মায় পাট্রী সাহেবরা যাঁদের গির্জাতে আমরা বাপ্টিস্ট হয়েছি এবং চার্চের কেতাবে আমাদের নাম রয়েছে—এস্তের গবেষণা করে প্রমাণ করলেন আমাদের পরিবার সাতশ বছরের পুরনো ক্যাথলিক। এর চেয়ে প্রাচীনতর কোনো পরিবার আছে বলে তাঁরা জানান না। এটা যখন তৈরী হয় নাৎসিরা তখনো দাবড়ে বেড়াতে আরম্ভ করেন নি। কাজেই ওতে কোনো ফাঁকি-ফক্কিকারী ছিল না। আর গোটা ফতোয়াটাতে ক্যা অ্যাকবড়াবড়া শিলমোহর—সুপ প্রেটের সাইজ।”

কথা খামিয়ে হঠাৎ বললে, “বেচারী হেরমানকে কতক্ষণ বসিয়ে রাখবে? না বাইরে খাবে?”

আমি বললুম, “না হয় হেরমানের হাতে গুলি খেয়েই মরবো। কিন্তু হরিণের মাংসটা খেয়ে নিয়ে।”

বললুম, “এই আসছি”, কাউন্টারে গিয়ে কিনলুম একটা টাউস কেক।

ফিরতেই লটে বললে, “এ আবার কি আদিখেত্তা।”

আমি বললুম, “হেরমানের জন্য ঘুষ।”

বললে, “আহ! ঘুষ দেবার প্রাচ্যদেশীক পদ্ধতি এ-দেশে আবার আমদানি করছে কেন?”

॥ ২৬ ॥

বন-গডেসবের্গে একদা প্রবাদ ছিল, হাতে যদি মেলা সময় থাকে তবে ট্রামে চাপো, নইলে হস্টনই প্রশস্ততর, অর্থাৎ সঙ্গীর্ণতর অর্থাৎ কম সময় লাগবে। কারণ এসব প্রাচীন শহরে এত গলিঘূঁজির শর্ট-কাট রয়েছে যে ট্রামকে অনায়াসে টীড দিতে পারেন—কারণ তাকে যেতে হয় চওড়া রাস্তা দিয়ে এবং তাকে অনেকখানি ঘুরে ফিরে কখনো বা ট্রায়েঙ্গেলের দুই সাইড কাভার করে, কখনো বা চতুর্ভুজের তিন ভুজ দিয়ে তিন হন্দী (ঈশ্বর রক্ষতু। চৌহন্দী হয়) কেটে মোকামে পৌছতে হয়। বস্তুত আপনি গলিঘূঁজি দিয়ে যাবার সময় ঐ ট্রামকে অন্তত বার দুতিন অনেক দূর থেকে দেখতে পাবেন—আপনার অনেক পিছনে। বস্তুত সে আমলে তিনশ্রেণীর লোকে ট্রামে চাপতো : প্রথম-বিশ্বযুদ্ধে আহত খঞ্জ, বাচ্চা-কোলে মা এবং থুতুরে বড়ী। বস্তুত কোনো সুস্থ-সমর্থ যুবক ট্রামে উঠলে সবাই ভুরু কঁচকে তার দিকে তাকাতো : ভাবতো নিশ্চয়ই অগা টুরিস্ট কিংবা মুক্ত পাগল (বদ্ধ পাগল নয়) : পাগলা গারদকে ফাঁকি দিয়ে পাশাচ্ছে।

শুনেছি, কাশীর ঠিক মধ্যখানে ঐ একই হাল। হাতে এস্তের সময় থাকলে টাঙ্গাগাড়ি নেবে, না থাকলে চরণশকট। দিল্লীতে তো রীতিমত এর আঙ্গিনা দিয়ে, ওর রান্নাঘরের দাওয়া থেকে লম্ফ মেরে তেসরা আদমীর চৌবাচ্চায় উঠে, এমন কি সুড়ুং করে কোনো

রমণীর প্রসাধনকক্ষের এক দরজা দিয়ে ঢুকে অন্য দরজা দিয়ে বেরিয়ে মোকাম পৌঁছানই রেওয়াজ। কেউ কিছুটি বলবে না।

রাস্তায় নেমে লটে শুধোলে, “ট্রাম না হস্টন?”

আমি গুনগন করে গান ধরলুম,

“—তোমারি অভিসারে

যাবো অগম পারে—”

লটে খুশী হয়ে বললে, “বাঃ! তোমার তো বাস ডুকেলে (অঙ্ককার) গলা।”

আমি শুধালুম, “ডুকেলে স্টিমে, সে আবার কি?”

“ও হরি, তাও জানো না। হেলে স্টিমে—সে হল পরিষ্কার গলা—”

আমি অভিমানভরে বললুম, “বদখদ গলা? সে—কথা সোজা কইলেই পারো অত ধানাইপানাই কেন? আর তোমার হেরমানের গলা বুঝি কোকিলের মত, ঐসুজ্জ কুকুঙ্ক নখ্মাল্ (চুলোয় যাকগে)”—[১]

বাধা দিয়ে লটে বলে, “তোর বুদ্ধি বাড়তি না কমতি? সুকুমার রায় যেরকম “হ্যবরল” নামক তুলনাহীনা পুস্তিকায় কার যেন বয়স কত জানার পর বিদকুটে প্রশ্ন শুধোন “বাড়তি না কমতি?” অর্থাৎ বয়স বাড়ছে, না কমছে?

আমি তাড়া দিয়ে বললুম, “আমি ছেলেবেলাতেই ছিলাম অলৌকিক বালক। যে রকম বেটোফেন আট না দশ বছর বয়সে ওস্তাদস্য হেন্ডেল একবার এই গোডেসবের্গে এলে পর তার সামনে কি যেন এক যন্ত্র বাজান, মেডেলজেন ঐ বয়সেই গ্যোটার সামনে পিয়ানো বাজান। তোমরা যাকে বলো ভুভার কিন্ট (ওয়াভার চাইলড্) ইংরিজিতে বলে “চাইলড্ প্রডিজি”।”

লটে আমাকে জড়িয়ে ধরে—জায়গাটার ঈষৎ আলোছায়ার লুকোচুরি চলছিল—বললে, “হ্যাঁ আলবৎ! তুমি সেই ছাব্বিশ বছরেই ছেষটি বছরের বুদ্ধি ধরতে।”

আমি খুশি হয়ে বললুম, “হেঁ হেঁ।” তখন হঠাৎ খেয়াল গেল, লটে মীন করেছে, ছাব্বিশের পর আমার বুদ্ধি বাড়েনি। বললুম, “কি বললে?”

লটে একটা বাড়ি দেখিয়ে বললে, “এই তো তোমার আরেক প্রিয়া, লিস্বেটের বাড়ি।”

আমি চিন্তাশ্রিত হয়ে বললুম, “লিস্বেট? লিস্বেট?—আ এলিজাবেৎ।”

অবহেলার চরমে পৌঁছে লটে যা বললে সেটা আমরা বাঙলায় বলি, পাড়ার মেধো ও-পাড়ার মধুসূদন।

আমি বললুম, “ওর সঙ্গে আমার আবার কবে ভাব-ভালোবাসা হল? আমাদের মেলার সময় সবাই সকলের সঙ্গে কথা কয়। সেখানে প্রথম আলাপ। তারপর তো মাত্র দুতিন বার ট্রামে—”

“হ্যাঁ হ্যাঁ। তুমি আর ও তোমরাই তো ছিলে দুজন যারা এখান থেকে বন য়ুনিভার্সিটিতে পড়তে যেতে।”

(১) জর্মন শিক্ষার্থীদের উপকারার্থে : কোকিলকে জর্মনে কুকুঙ্ক বলে। তবে দুটাতে বোধ হয় কিঞ্চিৎ পার্থক্য আছে—যদূর আমার জ্ঞান। ঐসুজ্জ কুকুঙ্ক নখ্মাল্, অনেকটা আমাদের “কচু, ঘন্টা, হাতী”র মত। এখানে কোকিলকেই কেন বেছে নেওয়া হল সে প্রশ্ন যদি আপনি শুধোন তবে উত্তর, “কচু, ঘন্টা, হাতী”ই বা আমরা বেছে নিলুম কেন? “ছাই জানো” কেন?

“ট্রামে সামান্য আলাপ হয়।”

“তারপর সেটা যে দানা বাঁধলো তা তার একমাত্র কারণ, মেলার তিন-চারদিন পরই তো তোমার ল্যান্ডলেডি গোডেসবের্গের বাড়ি ছেড়ে দিয়ে বন-এ ফ্ল্যাট নিলে। তুমিও সুশীল ছেলের মত তার সঙ্গে সঙ্গে বন চলে গেলে। কেন? গোডেসবের্গে কি অন্য ঘর আর ছিল না?”

আমি চুপ।

বললে, “আমি কেঁদেছিলুম।”

আমি তো অবাক।

আমরা তখন রোমার প্র্যাংসে পৌঁছে গিয়েছি। লটে বললে, “ঐ দ্যাখো একটা ট্রাম আসছে। ওটা ধরলে পাঁচ মিনিটে বাড়ি পৌঁছে যাবো।”

আমি সেই প্রাচীন প্রবাদ “সময় হাতে থাকলে ট্রাম, নইলে হস্টন” উদ্ধৃত করলুম।

“ছোঃ এখন তো ট্রামটা একদম ফাঁকা রাস্তা দিয়ে নাক বরাবর মেলেম যাবে! একদম আমাদের বাড়ির সামনে ট্রামের টার্মিনাস।”

আমি উৎসাহিত হয়ে বললুম, “পায়ে চলার পথ দিয়ে কিছুটা ঝোপঝাড় পেরিয়ে একদম রাইনের পাড়ের উপর একটা ফুটফুটে কটেজ আছে বলে মনে পড়ছে।”

“হাঁ, হ্যাঁ। তোমার কি করে এত সব মনে আছে?”

“য়োহানেস সে তো যুদ্ধে রয়ে গেল, আংনেস আর আমি এখানে প্রায়ই আসতুম—রাইনে সাঁতার কাটতে। একদিন হয়েছে কি—সে ভারী মজার গল্প—আংনেস একটা ঝোপের আড়ালে ফ্রক-ট্রক ছেড়ে সেগুলো একটা উঁচু ঝোপের নিচের ডালে বুলিয়ে রেখে সুইমিং কসট্যাম পরে বেরিয়ে এল। সাঁতার কাটতে কাটতে সন্ধ্যার অন্ধকার ঘনিয়ে এল। ফেরার মুখে আংনেস কিছুতেই সে-ঝোপ খুঁজে পায় না। বোঝো ঠেলা। যোহানেস, জ্ঞানো তো, সব সময়ই ঠাট্টামস্করা করতে ভালবাসতো। সে বিস্ত্রভাবে বললে, “নিশ্চয়ই আংনেসের কোনো এডমায়ারার চুরি করেছে।” যেন চাপানের ওতর দিলুম, “যেন বৃন্দাবনের বস্ত্রহরণ।” যোহানেস শুধালে, “সে আবার কি?” ওদিকে আংনেস কাঁদো কাঁদো। সুদূরমাত্র সুইমিং কসট্যাম পরে এখান থেকে বাড়ি পর্যন্ত সদর রাস্তা দিয়ে সে যাবে কি করে। চোখের জলে প্রায় ভেসে গিয়ে বললে, “তোমরা দুজনার কেউ কি লক্ষ্য করেনি আমি কোন ঝোপটার আড়ালে কাপড় ছেড়েছিলুম?”

কোরাস :

আর জর্মনে বলা হয়, যে কোকিললোকে (কুকুকস্ল্যান্ড) বাস করেছে সে মহাশূন্যে বাসা বেঁধেছে; বাস্তবের সঙ্গে তার কোনো যোগ নেই। হিটলারের অবং সৈন্যদল, যখন পরাস্ত, রুশরা বার্লিন উপকণ্ঠে হানা দিয়েছে তখনো হিটলার ম্যাপের উপর লাল নীল নানা রঙের বোতাম সাজিয়ে ভিন্ন ভিন্ন কাল্পনিক সেনাবাহিনীর (কারণ তারা তখন হেরে গিয়ে উধাও) প্রতীক দিয়ে কোথায় তিনি পুনরায় আক্রমণ করে রুশদের মরণ কামড় দেবেন, তারই স্ট্যাটেজি-পরিকল্পনা করছেন। যেসব জেনারেল তখনো তাঁকে ত্যাগ করেননি তাঁরা বাস্তবের সঙ্গে সুপরিচিত ছিলেন বলে যুদ্ধ-শেষে লিখেছেন, “হিটলার তখন কোকিললোকে বাসা বেঁধেছেন।” বিশেষ করে কোকিলকেই কেন বাছা হল—সে তো খুব উদ্ধাকাশে যায় না—তার কারণ বোধ হয় সেই অবাস্তবলোকে কোকিলই তাঁকে মধুর আশার বাণী শোনায়।

য়োহানেস, “বা রে! আমরা বুঝি আড়ি পেতে দেখব একটি তরুণী কি প্রকারে বিবস্ত্র হচ্ছে?”

আমি, “বিলক্ষণ! বিলক্ষণ! ভদ্রতায় বাধে নইলে—”

আংনেস : অশ্রুবর্ষণ তথা রোদন।

শেষটায় আমি বললুম, “ঐ যে রাইনের পাড়ে বাড়িটি—সেখান থেকে না হয় তোমার জন্য একটা ফ্রক ধার নেওয়া যাবে।” অবশ্য ও বাড়ির বাসিন্দাদের আমরা চিনতুম না।

লটে বললে, “তখন সে বাড়িতে থাকতেন আমার শ্বশুরশাশুড়ি আর হেরমান। তাঁরা গত হলে পর—সে অনেক দিনের কথা—হেরমান আমাকে বিয়ে করে ঐ বাড়িতে তোলে। নইলে তো অন্য বাড়ি খুঁজতে হত। কিন্তু—”

ট্রাম গাড়ি তখন প্রায় ফাঁকা। টার্মিনাসে পৌছেছে কিনা। ঠাঠা করে অট্টহাস্যে কন্ডাক্টরকে সচকিত করে লটে শুধু হাসে আর হাসে।

আমি শুধালুম, “কি হল?”

হাসতে হাসতে বললে, “সে বাড়িতে তখন তো আমার শাশুড়ি ভিন্ন অন্য কোনো মেয়েছেলে নেই। তাঁর ওজন ছিল নিদেন একশ কিলো। ইয়া দশাসই গাড়ুপ্তম লাশ। আংনেসের চেয়ে দেড় মাথা উঁচু। তাঁর ফ্রক পরে আংনেস রাত্তায় নামলে তোমাদের দুজনােকে মাটিতে লুটনো সেই ফ্রকের শেষপ্রান্ত তুলে ধরে চলতে হত—বিয়ের সময় গির্জাতে দুটি মেয়ে যে রকম কনের এ্যাললস্বা ফ্রকের শেষপ্রান্ত তুলে ধরে পিছন পিছন যায়। তা সে যাকগে। শেষটায় হল কি তাই কও।”

“পর্বতের মৃষিক প্রসব। ব্যাপারটা কি জানো, আমাকে তোমরা যতখানি ভালো ছেলে বলে মনে করতে—”

“কে বললে?”

“আমি ততখানি মোটেই ছিলাম না। আড়ি পেতে বেশ কিছুটা—”

“চোপ!”

“অবশ্য আমি চালাকও বটি। যখন ঝোপটা খুঁজে পেলুম তখন তার থেকে বেশ খানিকটে দূরে গিয়ে যোহানেসকে ডেকে বললুম, “ওহ সোনারচাঁদ যোহানেস, ঐ হোথা ঝোপটায় তদন্ত করো তো। আমি এদিকটা সামলাই।”

মূর্খ যোহানেস যখন আবিষ্কারের বজ্রধ্বনি ছাড়লে তখন কোথায় লাগে প্রাচীন যুগের ‘ইউরেকা’—সে তো ঝিঝি পোকার মর্মরধ্বনির মৃদু গুঞ্জন।

আংনেস তখন যোহানেসের দিকে যে ভাবে তাকালে তার তুলনা তুমি যদি আমার দিকে পিস্তল উঁচিয়ে খুনের শাসানি দিয়ে শুনতে চাও তবে বলবো, যোহানেস যদি কোনো গ্রামের দয়ানিধি নিরীহ পাদ্রীসাহেবকে সপরিবার হত্যা করে তাদের লাশ ঐ গ্রামের একটিমাত্র কুয়োতে ফেলে দিয়ে তার জল বিষিয়ে দিত তবুও বোধ হয় গ্রামের কনস্টেবল তার দিকে ওভাবে তাকাতো না।”

মনে মনে বললুম, “খেলেন দই রামকান্ত বিকারের বেলা গোবন্দন।”

সেই ঝোপঝাড়ের ভিতর দিয়ে বনের পথে আঁধার-আলোর আলিম্পনের উপর দিয়ে আমি লটের কোমরে হাত রেখে আস্তে আস্তে এগিয়ে চলেছি। লটে যেন আরে ধীরে ধীরে যাচ্ছে। সে বনে যেন আবেশ লেগেছে। রাইন থেকে বয়ে আসা বাতাসে পরশে পাতায় পাতায় যেন নুপুরধ্বনির মৃদু গুঞ্জন। হায় যদুপতি, কোথায় গে

মথুরাপুরী—না, না, কোথায় গেল সেই কদম্ব বনঘন বৃন্দাবন! কলিযুগে দেবতাদের
স্মরণ করা মাত্রই সম্ভব।

—চলি পথে যমুনার কূলে
শ্রীরাধামাধব কিবা
কুঞ্জে কুঞ্জে রসকেলি করে।
বলো লটে, কেবা যায় ঘরে!!

হায় আমার কপাল যে বড়ই মন্দ।

লটে তার দীর্ঘতম উষ্ম প্রশ্বাস ফেলে বললে “তুমি বড় দেহিতে এলে।”

আমি মনে মনে বললুম, “তবু তো এসেছি। কদম্ববনবিহারিণী বিরহিণীর শোক তো
লটে জানে না। শ্যামসুন্দর যখন মথুরা চলে গেলেন তখন তারই স্মরণে আমারই গ্রামের
কবি গেয়েছিলেন :

“দেখা হইল না রে, শ্যাম, আমার এই
নতুন বয়সের কালে।”

লটে বাড়ির দোরে ন্যাচকী লাগাবার পূর্বেই হস করে দরজা খুলে গেল। সামনে
দাঁড়িয়ে—কে আর হবে—হেরমান।

আমি মূর্ছাহতের ন্যায় দরজা চেপে ধরে ক্ষীণ কণ্ঠে জিজ্ঞাসা করলুম, “কটা পিস্তল?”

॥ ২৭ ॥

এই হেরমান লোকটির সঙ্গে পরিচয় না হলে আমার জীবনে একটা দুঃখ থেকে যেত।
খবরের কাগজে তাই কোনো কোনো বেসাতির চতুর বেসাতি বিজ্ঞাপনে বলেন “আপনি
জানেন না, আপনি কি হারাইতেছেন” অর্থাৎ আপনি যে “সানসার্য” কিংবা “অমূল্য-
রমা-দালদা” ব্যবহার করছেন না—তাতে করে আপনার যে কী মারাত্মক সর্বনাশ হচ্ছে
সে-কথা আপনি জানেন না।” উত্তরে গুণীরা বলেন, “ঐ! যার সম্বন্ধে আমি কিছুই
জানিনে, সেটা আমার আর কী ক্ষতি করতে পারে। যতক্ষণ আপনার জ্ঞানচক্ষু উন্মীলিত
হওয়ার ফলস্বরূপ আপনি জানতে পারেন নি আপনার একচেটে প্রিয়া বিশ্বপ্রেমে বিশ্বাস
করেন, ভ্রুমাতে আনন্দ পান, কাউকে কোনো ব্যাপারে বঞ্চিত করে তাকে মনোবেদনা
দিতে অতিশয় বিমুখ, ততক্ষণ আপনার কিসের দুঃখ, কিসের দৈন্য, কিসের লজ্জা,
কিসের ভয়।” কিন্তু হায়, এ তত্ত্বও সর্বাবস্থায় কার্যকরী হয় না। আপনার সেই প্রিয়াই
আপনার অজানাতে খাদ্যে সৈঁকো মিশিয়ে দিলে। আপনি সৈঁকোর উপস্থিতি সম্বন্ধে
কিছুই জানতেন না বলে সৈঁকো কি আপন ধর্মানুযায়ী কর্ম করে আপনাকে নিমতলায়
পাঠাবে না? সে কথা থাক।

ইতিমধ্যে লটে টাট্টু ঘোড়ার মত ছুট দিয়েছে, রামাঘরের দিকে।

হেরমান দেখলুম তৈরী। কোন গুরুর কৃপায় জানতে পেরেছে যে আমি মোজেল
খেতে ভালোবাসি। অত্যুৎকৃষ্ট মোজেল নিয়ে এল ফ্রিজ থেকে। একটা গেলাসে নিজের
জন্য ঢেলে নিয়ে আমার গেলাসে ঢাললে। পাঠক হয়ত আশ্চর্য হয়ে ভাবছেন, এটিকেট
পর্যায়ে যেরকম প্রথম আগুবাফা, লেডিজ ফার্স্ট, ঠিক তেমনি মেহমানদারীর মামেলায়
প্রথম অনুশাসন, “গেস্ট ফার্স্ট”। কিন্তু লটে নির্দেশিত প্রথম আগুবাফোর যে রকম
ব্যত্যয় আছে, এই অনুশাসনের বেলাও ছবৎ তাই। আপনি যদি মেহমান (অতিথি

সংকারক) [১] হন, তবে আপনি সরবৎ, ছইস্কি ইত্যাদি দেবার সময় প্রথম মেহমানের জন্য চালবেন। কিন্তু যদি যে-বোতল থেকে চালছেন সেটা কর্ক দিয়ে ছিপি আঁটা থাকে তবে নিজের জন্য চালবেন, পয়লা। কারণ অনেক সময় কর্কের অতি ছোট ছোট টুকরো বা গুঁড়ো পানীয়ের উপরে ভাসে। হোস্ট নিজের গেলাসে প্রথম চালতে সে ‘রাবিশ’ তিনিই গ্রহণ করবেন। বিবেচনা করি বিদ্যাসাগরমশাই এই নীতিটি ঈষৎ সম্প্রসারণ করেই দুধ চালবার সময় আরশোলাটা আপন গেলাসে গ্রহণ করেছিলেন। [২]

হেরমান সিগারেট এগিয়ে দিয়ে অনুরোধ করলেন, “ইচ্ছে হোক।”

আমি সঙ্গে আনা কেকটা করিডরের একটি ছোট্ট টেবিলে রেখে এসেছিলুম। চিন্তা করতে লাগলুম, লটের অসাম্প্রদায়িক কেকটি এই বেলা দরগায় ভেট দেব কিনা। এমন সময় লটেই ছুটে গিয়ে কেকটা নিয়ে এসে বললে, “এই নাও তোমার ঘুষ। তোমার কাছে দুটো পিস্তল আছে শুনে সেই ভয়ে এনেছে।”

হেরমান বললে, “তা হলে শেমপেন অনুপানরূপে ব্যবহার করতে হয়। তাবৎ ইয়োরোগে বিশেষ করে বিলেতে ‘কেক অ্যান্ড শেমপেন’, ‘শেমপেন অ্যান্ড কেক’। (মদ্যেশীয়া মুড়ির সঙ্গে পাঁপড়ভাজা) কিংবা ‘মেঘের কোলে ইন্দ্রধনু মরণকালে হিরির নাম’। তুমি একটু বসো লটে, আমি সেলার থেকে নিয়ে আসছি।” কে বা শোনে কার কথা। হেরমানের অনুরোধ শেষ হওয়ার পূর্বেই সেলারের কাঠের সিঁড়িতে শোনা গেল লটের জুতোর খটখট শব্দ।

বোতল ঘিরে মাকড়ের জাল এবং দেড় পলস্তরা ধুলো। জার্মান, ডাচ, অস্ট্রিয়ান, সুইসরা ঘরদোর মাত্রাধিক ছিমছাম রাখে, কিন্তু ডুগর্ভহু কুটুরির মদের বোতল কক্থনো বাড়ামোছা করা হয় না। এবং মেহমানের সামনেও সেটা পেশ করা হয় ঐ অবস্থাতেই। তিনি স্বচক্ষে দেখতে পাবেন, ইটি প্রাচীন দিনের খানদানী বস্তু। [৩] ইতিমধ্যে লটে

(১) মেহমান শব্দ আমরা জানি, কিন্তু মেজমান (host) শব্দটিও যদি বাঙলায় চালু হয় তবে একটা জুৎসই শব্দ পাওয়া যায়। অতিথি-সংকার ইত্যাদি শব্দে আমি ঈষৎ ভীত। এক মারওয়াড়ি “বিদ্যাসাগর” নাকি তাঁর বাঙালী অভাগতকে সবিনয় বলেন, “আপনি এই এখানে দেহরক্ষা করুন। আমি আপনার সংকার (আপায়ন) করি।”

(২) “বঙ্গের রত্নমালা” না কি যেন এক পুস্তকে আমি এটা পড়ি। সেখানে “গেলাস” শব্দই ছিল, কিন্তু আমার বিশ্বাস সে-যুগে তখনো ফিরিসির গেলাস গৌড়ীয় পরিবারে প্রবেশাধিকার পায়নি। আর পাঠান যোগল ব্যবহার করতো “জাম”—যার থেকে জামবাটি। ইদানীং ইন্দ্রমিত্র মহাশয় নাকি বিস্তার বিদ্যাসাগরীয় লেজেন্ড ফুটো করে দিয়েছেন (আফসার অল, ঘটির দেশ তো!), এটা করেছেন কি না জানিনি। কারণ তাঁর পুস্তকখানি প্রাপ্তির ঘটনাখানেকের ভিতর সেটি কর্পূর হয়ে যায়। তাঁর মহাশয় যদি সেটা ফেরৎ দেন তবে আমি রাবণের মত দশ হাত ভুলে তাঁকে আশীর্বাদ করবো। হায়রে দুরাশা—

(৩) এটিকেট, যার বাড়াবাড়িকে চালিয়াতি বলা যেতে পারে, বিলেতে নগণ্য জন কাঁড়ি কাঁড়ি টাকা কামিয়ে “হঠাৎ নবাব” (আপস্টার্ট) বলে বাওয়ার পর সে যখন সমাজের উচ্চতম স্তরের ডিউক আর্লদের সঙ্গে দহরম মহরম করে কক্ষে পেতে চায় (স্ববারি) তখন তাকে সাহায্য করার জন্য একখানি প্রামাণিক পুস্তিকা লেখেন এক ডিউক স্বয়ং—বিলেতের প্রাচীনতম ডিউকদের অন্যতম। ডিউক অব বেডফোর্ড লিখিত পুস্তকের নাম “বুক অব স্নবস”। ইনি তাঁর প্রাসাদ দর্শকের জন্য অব্যাহত দ্বার করে দেন দেড় মিনিটের দক্ষিণায় পরিবর্তে।

এনেছে একটা রূপোর কিংবা ঐ জাতীয় কোনো ধাতু সংমিশ্রণে তৈরী, বরাফে ভর্তি একটা বালতি। হেরমান বতরিবৎ বোতলটি ন্যাপকিন দিয়ে সাফসুত্রো করে বালতিতে ঢুকিয়ে বললে, ‘বেশীক্ষণ অপেক্ষা করতে হবে না। আমাদের সেলারটিই আধা ফ্রিজ। এই হল বলে। ততক্ষণ মোজেল চলুক।’

‘আমি রহস্যভরা কণ্ঠে বললুম, “যতক্ষণ বেত না আসে কানমলা চলুক।”

একরকম বেরসিক আছে যারা কোনোকিছু না বুঝতে পারলে হাসে। ভাবে, যখন বুঝতে পারিনি তখন নিশ্চয়ই কোনো রসিকতা। আশস্ত হলুম, হেরমান সে গোত্রের নয়।

এ স্থলে এটা রসিকতা। এবং এতই উত্তম যে যদিও এটি আমি ভিন্ন প্রসঙ্গে অন্যত্র উল্লেখ করেছি তবু অক্কেশে এটার পুনরাবৃত্তি করা যেতে পারে।

বললুম, “আমাদের দেশের গ্রামাঞ্চলে কোনো মর্কট বড্ড বেশী বাদরামি করলে পণ্ডিত মশাই সর্দার পড়ুয়াকে আদেশ করেন ‘একখানা লিকলিকে বেত নিয়ে আয় তো’ এবং ছেলেটার কান মলতে মলতে বলেন, ‘যতক্ষণ বেত না আসে কানমলা চলুক—”

অসম্পূর্ণ বাক্যাংশ না শুনেই হেরমান হো হো করে হেসে বললে, “বুঝেছি, বুঝেছি। যতক্ষণ শেমপেন না আসে মোজেল চলুক। উত্তম রসিকতা।”

“বিলকুল এবং শুধুমাত্র তাই নয়, এটা নিত্য ব্যবহার্য না হলেও পালপরবে অবশ্যই। এমন কি আপন গৃহেও। এই মনে করুন লটে আপনাকে কি একটা হাবিজাবি মাছ খেতে দিল। আপনি নিমজ্জিত বন্ধুসহ দুপুর বেলা বাড়ি ফিরে রান্নাঘর থেকে মুগী রোস্ট করার খুশবাই পেয়েছিলেন। তাই সেই হাবিজাবি খেতে খেতে ইয়ারকে বলবেন, ‘যতক্ষণ বেত (রোস্ট) না আসে’ ইত্যাদি এবং তারপর সেটি রসিয়ে রসিয়ে বুঝিয়ে বলবেন। এবং—”

ইতিমধ্যে আমার কোচের পশ্চাৎ থেকে হুকার শুনতে গেলুম, “কী! আমি বুঝি হাবিজাবি মাছ রাঁধি! জানো, রাইনের জন্য হওয়ার বহু বহু যুগ আগের থেকেই আমরা পুরুষানুক্রমে রাইনের পারে বাস করছি (আমি মনে মনে বললুম, “রামের পূর্বেই রামায়ণ!”), রাইনের মাছ আমি রাঁধতে জানিনে—মুরমুরে ভাজা, আঙুর পাতায় জড়ানো স্যাঁকা—খেয়েছ কখনো?”

আমি বললুম, “রাইনের মাছ যে অপূর্ব সে-বিষয়ে সন্দেহ করে আমি কি তৃতীয় পিস্তলকে আমন্ত্রণ জানাবো। আমাদের গঙ্গার ইলিশও কিছু ফ্যাগনা নয়। সংস্কৃতে শ্লোক আছে, আমার ঠিক ঠিক মনে নেই, কিসের উপরে যেন কি, তার উপরে যেন আরো কি, তার উপর বোধ হয় জল, তার উপর কচ্ছপ, কচ্ছপের উপর পৃথিবী, তার উপর হিমালয়—তোমাদের আলপস্ তো তার হেঁটোর বয়সী—তার সর্বোচ্চ চূড়ো এভারেস্টের উপরে শিব—”

“ও! শিবের কাহিনী আমি জানি। কিন্তু বলে যাও।”

“শিবের উপর তাঁর জটার ভিতর গাঙ্গেস (গঙ্গা) তার জলের উপর কেলি করেন ইলিশ। সেই সর্বোচ্চ স্থানাসীন ইলিশ যে খায় না, তার চেয়ে বৃহত্তর মুখ ত্রি-সংসারে আর কেউ আছে কি? [৪] কিন্তু ভদ্রে, আমি তো শুনেছি, অগুনতি জাহাজের পোড়া

(৪) সংস্কৃত শ্লোকটি কোনো কাব্যচুষ্ক মহোদয় যদি “দেশ” সম্পাদক মহাশয়কে পাঠয়ে দেন তবে আমি কৃতজ্ঞ থাকবো, তথা বহু পাঠক উপকৃত হবেন।

তেল ইত্যাদি (বিল্জ) প্রক্ষিপ্ত হওয়ার ফলে এখন নাকি রাইনের মাছে আর সে সোয়াদ নেই।”

লটে দীর্ঘশ্বাস ফেলে চুপ করে রইল। দশ সেকেন্ড যেতে না যেতে বললে, “এখুনি আসছি।”

আমি বাধা দিয়ে বললুম, “তুমি ঠিক আমার বোনের মত। যখনই ওদের বাড়িতে গিয়ে উঠি—এবং সেটা ঝাড়া চল্লিশ বছরের ব্যবধানে নয়—তখনই তারা ঠিক তোমারই মত ডার্বি ঘোড়ার স্পীডে ঘড়ি ঘড়ি রান্নাঘরের দিকে ছুট দেয়। ভালোমন্দ এটা-সেটা নয়, রাজ্যের তাবৎ পদ খাওয়াবে বলে। আমি বলি, ‘বোস, তোর সঙ্গে দুটি কথা কই, কতদিন পরে দেখা। আমি তো খেতে আসিনি।’ কিন্তু ওরা শোনে না, ওরা জানে, যবে থেকে মা গেছে, অন্য কারোরই রান্না আমার পছন্দ হয় না। ওরাই কিছুটা পারে, কিছুটা নয় বেশ বিস্তর।”

লটে তার ঠোঁটের উপর করুণ মুচকি হাসির সঙ্গে মধুরিমা মিশিয়ে বললে, “সে আমি জানি। তুমি একদিন বিয়ুৎবারে রাত নটার সময় হস্তদস্ত হয়ে ছুটে চলেছিলে আমাদের বাড়ির সামনে দিয়ে। আমি তখনো ছোটদের মধ্যে। টায়-টায় আটটায় শুয়ে পড়তে হত। সে রাতে পূর্ণিমার চাঁদ পড়লেন তাঁর কড়া আলো নিয়ে আমার চোখের উপর। পর্দাটা টানবার জন্য জানালার কাছে যেতেই দেখি তুমি। ফিস ফিস করে ডাকলুম তোমাকে। তুমি থমকে দাঁড়িয়ে বললে, ‘এক লহমার তরেও সময় নেই। চিঠি ফেলতে ডাকঘরে যাচ্ছি।’ তারপর ঠিক জানালার নীচে দাঁড়িয়ে—”

হেরমান বিগলিত কণ্ঠে মুদিত নয়নে কাব্যি কাব্যি সুরে বললে—যেটা বাঙলায় দাঁড়ায়—“মরি গো মরি! সখী তোরা আমায় ধর, ধর। এ যে সাক্ষাৎ রুমিয়ো-জুলিয়েট। আর বলতে হবে না। রুমিয়ো তখন পূর্ণচন্দ্রকে সাক্ষী মেনে লটে—থুড়ি শারলটে-কে, ফের থুড়ি, জুলিয়েটকে তাঁর অজ্রামর প্রেম নিবেদন করলেন—তোমাদের কপাল ভালো, মাইরি। সে সন্ধ্যাটা পূর্ণিমা না হয়ে অমাবস্যাও হতে পারতো, পূর্ণিমা হয়েও গভীর ঘনমেঘের ঘোমটা পরে আত্মগোপন করে থাকতে পারতো—”

লটে বললে, “কি জ্বালা! হ্যার সায়েডের বুক পকেটে তখন তার প্রিয়া আনামারি, জরিমানা, মার্লেনে—জানিনে কোন প্রিয়ার নামে লেখা প্রেমপত্র। আর সে তখন শপথ করবে আমাকে প্রেম নিবেদন করে! অতখানি ডন জুয়ান আমার বন্ধু কস্মিনকালেও ছিল না। শোনোই না বাকিটা। আমি তো সেই সন্দ করে ঠোট বাঁকিয়েছি—” আমার দিকে তাকিয়ে বললে—“এখুনি ছুটতে হবে। ইন্ডিয়ান সাপ্তাহিক মেল-এর শেষ ক্লিয়ারেন্স গোডেসবের্গে হয় প্রতি বিয়ুৎবারে—”

রহস্য উদ্ঘাটিত হল। বললুম, “তাই বলো—নইলে সেটা যে বিয়ুৎবার ছিল সে-কথাটা এত যুগ পরেও তোমার মনে রইল কি করে, আমিও তাই ভাবছিলাম।”

লটে অসহিষ্ণু হয়ে বললে, “শোনোই না! তুমি আর হেরমান যেন যমজ দুই ভাই জেমিনাই (অশ্বিনী ভ্রাতৃদ্বয়) একজন যদি খামলেন তো অন্যজন পৌ ধরলেন।”

আমি মুদিত নয়নে উর্ধ্বমুখে প্রার্থনা করলুম, “আমেন, আমেন।”

লটে : “মানে?”

“অতি সরল। জেমিনাই জমজ...অন্তত আমাদের দেশে—একই সময়ে একই রমণীর প্রেমে পড়েন।”

হেরমান লম্বা এক দমে শেষমেন গেলাস শেষ করে বললে, “লাও! অ্যাগ্নিন বাদে এসে জুটলেন আমার, সাতিশয় মাই ডিয়ার, টুইন ব্রাদার তার, খবর নিতে। তখন কোথায় ছিলে, বৎস, হার ডক্টর, যখন লটের প্রেমে আমি চোখের জলে নাকের জলে হাবুডুবু খাচ্ছি, বিষ্টিতে ভিজে ঢোল হয়ে রাঁদেভূতে পৌঁছে মাদমোয়াজেলকে না পেয়ে তিস্ততম সত্য অনুভব করলুম, সেই জলঝড়ে তিনি তাঁর সাত বছরের পুরানো ফ্রকটি—যেটা এ আমলের ফ্যাশানের নিদর্শনস্বরূপ লুভর যাদুঘরে হেসে খেলে উচ্চ সিংহাসন পায়—সেটাকেও বরবাদ করতে নারাজ, এবং—”

হেরমানের খেদোক্তি সম্পূর্ণ উপেক্ষা করে লটে যেন শুধু আমাকে বলল—দুগালে দুটি টোল জাগিয়ে—“তখন তুমি বললে, ‘সাত সমুদ্র তের নদীর ওপারে সেই সুদূর ইন্ডিয়ায় মা বসে আছে এই চিঠির প্রতীক্ষায়। শেষ ক্রিয়ারেন্স মিস করলে ইন্ডিয়ান মেলও মিস। মাকে নেকস্ট চিঠির জন্যে প্রহর গুণতে হবে আরো পুরো সাতটি দিন। আর—আমার মা স্বপ্নেও কাউকে কখনো অভিসম্পাত করেনি—নইলে তার অভিশাপে গোটা জার্মান দেশটা জ্বলে পড়ে ছাই হয়ে যেত। মনে পড়ছে?”

আমি ভেজা গলায় বললুম, “খুব মনে পড়ছে। কিন্তু তোমার মনে আছে কি, তুমি প্রায়ই আমাকে তারপর শুধোতে ‘মায়ের চিঠি লিখেছেন? কেন বাপু, বিষ্ময়বাদের শেষ মুহূর্তে চিঠি লিখতে বসা? দুদিন আগে ধীরে সুস্থে চিঠিটা লিখে পোস্ট করতে আপনাকে ঠেকিয়ে রাখে কোন হিডেনবুর্গ?” তুমি বড় পাকা মেয়ে ছিলে, ডার্লিং লটে!”

॥২৮॥

“যোগাযোগ, যোগাযোগ! সবই যোগাযোগ।” দার্শনিকার মত বললে লটে।

আমি শুধালুম, “কি রকম?”

বললে, “এই যে আকস্মিকভাবে আমাদের দেখা হল।”

হেরমান জার্মনে যে শব্দটি ব্যবহার করলে সে যদি বাঙাল হত তবে বলতো “খাইছে!” ঘটিগো ভাষায় “খেয়েছে!” “এই মরেছে”-তে ঠিক যেন সে-রকম খোলতাই হয় না। আবার ওরা যখন বলে “মাইরি” তখন আমাগো ভাষায় তার ইয়ার পাওয়া যায় না।...তারপর বললে, “বা—রে! এত বড় অত্যাচার! ‘অদ্য রজনীর’ টাইমটেবল তো পাকাপোক্ত করা হয়ে গিয়েছে। আহরাদির পর তোমরা যাবে সিনেমায়, তারপর শান্ত্রানুযায়ী যাবে পার্কে—অশান্ত্রীয় রসলাপ করতে। তবে কেন, আমার প্রাণের লটে, আমার হকের উপর ট্রেসপাস করছো? আমাকে দুটি কথা কইতে দাও না, সায়েডের সঙ্গে?”

লটে বললে, “কোথায় হল ট্রেসপাস আর কোথায়ই বা রসলাপ! ট্রামে আসার সময় সায়েড আমাকে বলছিল, ১৯৩০-এ তুমি আমি হিটলারের খোড়াই তোয়াক্কা রাখতুম। তারপর ঐ তিরিশেই আখেরে সে পেল মেলাই ভোট। আমরা তবু নিশ্চিন্ত মনে আমাদের ফুটবল চালিয়ে গেলুম। [১] তিন বৎসর যেতে না যেতে ভিয়েনার সেই

(১) এই ফুটবল খেলা নিয়ে আমি বহু বৎসর পূর্বে ৮।১০।১২ বছর হতে পারে একটি “গল্প” লিখি। তার প্লট : আমাদের ফুটবল গ্রাউন্ডের (অর্থাৎ সরু এক চিলতে গলির) শেষ

ভ্যাগাবন্ত, প্রথম বিশ্বযুদ্ধের আটপৌরে নিতান্ত সাধারণ একটা করপোরাল—তারপর কি জ্ঞানি কোন্ এক ভাষায় কি একটা কবিতা আউড়ে বললে আমি আবৃত্তি করেছিলুম, “বণিকের মানদণ্ড পোহালে শর্বরী দেখা দিল রাজদণ্ডরূপে।” “লক্ষ্মীছাড়া ভবঘুরে পোহালে শর্বরী বসে গেল রাজসিংহাসনে” জর্মনির মত অত্যাচাৰ শিক্তি দারুণ ঐতিহ্যপন্থী দেশের হয়ে গেল চ্যামেলার।

খানিকক্ষণ চুপ করে থাকার পর লটে ফের বললে, “যোগাযোগ! যোগাযোগ সবই যোগাযোগ। এই যে আমরা খানিকক্ষণ আগে হোটেল ড্রেজেনের গা ঘেঁষে এলুম না সেখানে এসে উঠেছিলেন হিটলার। সমস্ত জর্মনির সব হোটেলের চাইতে তিনি বেশী ভালবাসতেন এই হোটেল ড্রেজেন। আর রাইনের ওপারে পেটেরসবের্গ পাহাড়ের উপরকার হোটলে উঠেছিলেন ইংলন্ডের প্রধানমন্ত্রী শ্রীযুত চেম্বারলেন। সমঝাওতা হল না। শুভক্ষণে শুভলগ্নে কোন্ যোগাযোগ হল না বলে সব কিছু ভেঙে গেল, সে তবু আমরা কখনো জানতে পারবো না।

কিন্তু আরেকটা বিবরণ জানা আমার আছে।

গেল বছর আমি গিয়েছিলুম মুনিক। তুমি হয়তো জানো না, সয়েড, জর্মনিদের এখন এমনই বস্তা বস্তা ধনদৌলত হয়েছে যে কি করে খরচ করবে ভেবে পায় না। তাই নিত্য নিত্য লেগে আছে সেমিনার কনভেন্সাৎসিয়োনে, কনফারেন্স আরো কত কী। আমার আজ আর মনে নেই যেটাতে গিয়েছিলুম সেটা বিশাল জর্মনি ট্যারাদের কনফারেন্স না—”

আমি বাধা দিয়ে বললুম, “ট্যারাদের কনফারেন্সে তুমি যাবে কি করে? তুমি তো ট্যারা নও। এক্ষেত্রে লক্ষ্মী ট্যারাও নও।”

বললে, “কে বললে আমি ট্যারা নই। ঐ তো সেদিন আমার এক আত্মীয় কোথেকে জ্ঞানি নিয়ে এল এক নয়া যন্তর। আমার হাতে সেটা দিয়ে বললে, ‘ঐ ফুটবলার ভিতর দিয়ে তাকাও তো একটাবার। দেখতে পাবে একটা খাঁচা আর অন্য প্রান্তে একটা পাখি। এইবারে ঐ হস্তিলাটা নাড়িয়ে পাখিটাকে খাঁচার মধ্যে পোরো দিকিনি হুঁ!’”

প্রান্তে বাস করতেন ফ্রাউ উলরিষ, থাণ্ডারিনী, ইয়া লাশ বৃড়ি। একবার যদি তিনি কারণে অকারণে চটে গিয়ে বকা আরম্ভ করতেন তবে যতক্ষণ না তাঁর পরবর্তী ভোজনের সময় আসে তিনি নায়গা প্রপাতের মত নাগাড়ে বকে যেতে পারতেন। আমাদের পুরোপাক্ষা খবরদারী ইশিয়ারী সঙ্গেও একদিন “ফুটবলটা” দড়াম করে গিয়ে পড়লো তাঁর জানলার উপর—শার্মিখানা খান খান। এহেন অন্যায আচরণ ফুটবলের নয়, আমাদের—যে তাঁকে সেদিন বকাবকির রেকর্ড নির্মাণের তরে টুইয়ে দেবে সে তবু বাথলে দেবার জন্য হেমলেটের পিতৃপ্রতাপা কেন, আমি টেশে গেলে যে মামদো জন্মাবে তারও প্রয়োজন নেই। সে পেল্লায় কটু বক্তিমের মূল বক্তব্য ছিল—“সরকার কি রাস্তা বানিয়েছে ফুটবলের তরে?” বহু বৎসর পরে জানতে পাই, বৃড়ি উলরিষ তার বেবাক সঞ্চিত ধন উইল করে দিয়ে যায়, আমাদের পাড়ার ছেলেমেয়েদের জন্য একটা ক্ষুদ্রে প্লেগাউন্ড নির্মাণ করার জন্য। কাহিনীটি আমি হারিয়ে ফেলার ফলে সেটি পুস্তকাকারে কখনো প্রকাশিত হয়নি। কোঁনো সহৃদয় পাঠক যদি দয়া করে আমাকে জানান (C/o সম্পাদক “দেশ” ৬নং প্রফুল্ল সরকার স্ট্রীট, কলিকাতা-১) কোন্ বৎসর, কোন্ মাস, কোন্ পত্রিকায় এটি বেরোয়, তবে আমি তাঁর কাছে চিরঋণী হয়ে থাকবো।

দম নিয়ে বললে, “হেরমানের মত সদাই উড়ু উড়ু চিড়িয়াকে পুরেছি চোখে-না-যায়-দেখা, হাতে না-যায় ছোঁওয়া খাঁচায়। আমারে ঠাকায় কেড়া?”

হেরমানের দিকে চোখ মেরে বললে, “কই, কিছু বলছো না যে?”

“কে কাকে পুরছে তার খবর রাখে কোন্ গেস্টা, কোন্ ওগ্পু? চিড়িয়াখানায় খাটাশটার খাঁচার সামনে দাঁড়িয়ে আমরা চিন্তবিনোদন করি। ওদিকে খাটাশটা ভাবে, নিছক তার চিন্তবিনোদনের জন্যই আমাদের ডেকে আনা হয়েছে। আমাদের জুর বড়কর্তা অতিশয় সঙ্গোপনে বলেছেন, যেদিন জলঝড় ভেঙে দুচারটি মুক্ত-পাগল ভিন্ন অন্য কেউ জুতে আসে না সেদিন খাটাশটা তার নিত্যদিনের চিন্তবিনোদন বরাদ্দ থেকে বঞ্চিত হয়ে রীতিমত মনমরা হয়ে যায়।”

লটে বললে, “কই তোমাকে তো কখনো মনমরা হতে দেখিনি।”

আমি মনে মনে বললুম, ‘লাগ, লাগ, লাগ’। বাইরে বললুম, “কে কাকে খাঁচায় পুরেছে সে তক্রার উপস্থিত থাক। স্পষ্ট দেখতে পাচ্ছি, দুজনাতে একই খাঁচাতে তো দিবা দুঃ দুঃ কুঁহ কুঁহ করছে। রীতিমত হিংসে হয়। তা সে যাকগে। তুমি তো খাঁচায় পুরলে সেই চিড়িয়াটাকে। ডাক্তারের আলু ক্ষেতে তাতে করে কগণ্ডা পুলি পিঠে গজালো, শুনি।”

লটে : “সায়েডযেন, সেইখানে তো রগড়। ডাক্তার বলে কি না, আমি নির্ভেজাল চোদ্দ ডিগ্রী ট্যার।”

“সেন্টিগ্রেড না ফারেনহাইট?”

লটে ঘন ঘন মাথা নাড়িয়ে বললে, “কোনোটাই না। তুমি কিছু বোঝো না। চোদ্দ ডিগ্রী বলেছিল, না চোদ্দ কেজি বলেছিল সে কি আর আমি কান পেতে শুনেছিলুম। চোদ্দ—কোনো কিছু একটা। তারপর ডাক্তার কি বললে, জানো? বললে, এই ট্যারাইসিন সারাতে হলে হয় কামচাটকা, নয় ললুখা ছলা ছলা থেকে আনাতে হবে এক অতি বিশেষ রকমের চশমার পরকলা—” হঠাৎ থেমে গিয়ে আমাকে শুধালে, “তোমার কি হল সায়েড ডিয়ার? হঠাৎ অভিনিবেশ সহকারে এ-রকম প্রাকৃতিক সৌন্দর্য নিরীক্ষণ করছ কেন? বিস্তর পুরুষ মানুষ দেখেছি যারা ডিনার শেষে ওয়েটার বিল নিয়ে আসছে দেখলে হঠাৎ অতি অকস্মাৎ জানলা দিয়ে প্রাকৃতিক সৌন্দর্য নিরীক্ষণ করতে লেগে যায়। ও! প্রকৃতির কী মাহাত্ম্য! পাঁচো ইয়ার তখন আর কীই বা করেন। হাঁড়িপনা মুখ করে সেই জিরাফকণী বিলটা শোধ করে দেন। কই, আমরা তো এখনো তোমাকে কোনো বিল দিই নি, মাইরি।”

আমি চিন্তাকুল কণ্ঠে বললুম, “যত দুর্ভাবনায় ফেললে, লটে সুন্দরী।”

“যথা?”

“ওহে হেরমান, এমন মোকাটি হেলায় অবহেলা করে না ভাই। টাপেটোপে কই। তোমারই মত এক নিরীহ, গোবেচারীর বউয়ের জিভে কি যেন কি একটা বিদকুটে প্যামো দেখা দিল। বউ একদম একটি কথাও বলতে পারছে না। এমন কি গা গা ইডিয়টের মত গাঁ—জাঁ—জাঁ, গাঁ—জাঁ—জাঁ করতে পারছে না। বেচারী সেই সাত পাকের সোয়ামী নিয়ে গেল বউকে ডাক্তারের কাছে। ডাক্তার মাত্র একটিবারের তরে এডয়ের জিভের উপর চামচের চ্যাপটা হাতলটা বুলিয়েছে কি বুলোয়নি—দ্যাখ তো না দ্যাখ—সাত পাকের হাত পাকড়ে ধরে দে ছুট। বৃহৎ হাসপাতালের নিভৃততম কোণে

তাকে টেনে হিঁচড়ে নিয়ে গিয়ে হাঁপাতে হাঁপাতে বললে, হিপোক্রাতেসের শপথে এ বিধান নেই। কিন্তু আমি বিশ্বাস করি, আমার ধর্মবুদ্ধি বলে কারো কোনো ব্যামো যদি অন্য কারোর উপকার সাধন করে তবে উপকৃতজনকে এ বিষয়ে কনসাল্ট করে নিতে। আপনাকে অতিশয় সঙ্গোপনে একটি তথ্য নিবেদন করি : আপনি সত্যি বড্ড ‘লাকি’ পুরুষ; কথায় বলে “স্ট্রী ভাগ্যে” ধন। এই যে আপনার স্ত্রীর জিভ আড়ষ্ট হয়ে গিয়েছে, কোনো প্রকারের শব্দটি মাত্র উচ্চারণ করতে পারছেন না, টু ফ্যা দূরে থাক, অষ্টপ্রহর বকর বকর করে আপনার জীবন অতিষ্ঠ করে তুলতে পারছেন না,—এ রকম ‘লাক’ দৈবাৎ কখনো কোনো স্বামীর কপালে নৃত্য করে।’ বললে পেতায় যাবেন না, শতেকে গোটেক নয়, লাখে এক হয় কি না হয়। ডাক্তার দম নিয়ে স্বামীকে গম্ভীর কর্তে বললেন, ভেবে দেখুন, ভালো করে চিন্তা করে নিন আপনি কি সত্য সত্য, তিন সত্য চান, যে আমি আপনার স্ত্রীর জিভটা সারিয়ে দিই। বলুন, আবার বলছি চিন্তা করে বলুন।”

হেরমানের হাসির পরিমাণ থেকে অনুমান করলুম, সে লটেকে কতখানি ডরায়। বললে, “কিন্তু গল্পটি আমারই উদ্দেশ্যে বিশেষ করে বললে কেন?”

আমি বললুম, “বলছি, বলছি। অত তাড়াহড়ো করছো কেন, হের গট—সদাপ্রভু তো এক মুহূর্তেই বিশ্বসংসার নির্মাণ করতে পারতেন; তবে পূর্ণ ছয়টি দিন ঐ কর্মে ব্যয় করলেন কেন? কিন্তু তার পূর্বে লটে-কে একটা প্রশ্ন শুধনো দরকার। আচ্ছা লটে, তুমি যে চৌদ্দ ডিগ্রী না চৌদ্দ গজ ট্যারা সে তো বুঝলুম, কিন্তু তোমার ট্যারাতর ট্যারাতম মার্জিন আর কতখানি? যোলো, আঠারো? আমাদের ছেলেবেলায় চশমার ‘পাওয়ার’ মাইনাস কুড়ির চেয়ে বেশী হত না। [১]

লটে বললে, “আমি ঠিক ঠিক শুধাই নি। যদুদ্র মনে পড়ছে চৌদ্দই শেষ সীমা। তবে মেরে কেটে আরো দু-এক মাত্রা, দু-এক পেগ সেবন করতে পারি বোধ হয়।”

“তাই সই। ওহে হেরমান, তুমি এই বেলা সময় থাকতে থাকতে লটের বিরুদ্ধে একটা ডিভোর্স কেস ঠুকে দাও। আদালতকে বলবে, ‘এই রমণী আমাকে ধাপ্পা মেরে বিয়ে করেছে। বিয়ের পূর্বে একবারও সেই গুহ্য তথ্যটি প্রকাশ করেনি যে সে ট্যারা। আর যা তা ট্যারা নয় হজুর, একদম চৌদ্দ ডিগ্রী ট্যারা। এর বেশী ট্যারা মি লাট—মাই লর্ড—বিবাদিনী গেল বছর যে বিশাল—জর্মন ট্যারা কনফারেন্স—এ নিমন্ত্রিত হয়ে ম্যুনিক গিয়েছিলেন—”

এ স্থলে আদালত বাধা দিয়ে তোমার উকিলকে শুধোবেন, বিবাদিনী কেন নিমন্ত্রিত হয়েছিলেন?

তোমার উকিল সোল্লাসে : ঠিক ঐ বক্তব্যেই আমরা আসছিলাম, হজুর। আমরা জটনৈক প্রসিদ্ধ চক্ষু চিকিৎসককে সাক্ষীরূপে এই মহামান্য আদালতে হাজির করবো, এবং তিনি কিছু হেজিপেজি য়েদোমেধো—”

আদালত ঈষৎ শুদ্ধ তথা দৃঢ়কণ্ঠে : ‘বিস্তৃত আইনজ্ঞের শেষোক্ত জনপদসুলভ গ্রাম্য সমাসদ্বয়ের প্রয়োগ মহামান্য আদালতের মর্যাদা ক্ষুণ্ণ করবার অবকাশ ধারণ করে।’

উকিল : ‘আমি খুশমেজাজে বহাল তবীয়তে—মহামান্য আদালত ঈষৎ জ্রকৃষ্ণন

(১) সুকুমার রায় যজ্ঞির ভোজে পরিবেশকদের বর্ণনা করেছেন, “কোনো চাচা অন্ধপ্রায় মাইনাস কুড়ি। ছড়ায় ছোলার ডাল পথঘাট জুড়ি।”

করলেন কিন্তু স্পষ্ট বোঝা গেল তিনি ভাবার জগাখিচুড়িকে আর ঘাঁটাতে চান না।) ঐ দুটো লক্ষ্মীছাড়া সমাসকে আদালত থেকে গলাধাক্কা দিয়ে বের করে দিলুম। কিন্তু ছদ্ম, ইংরেজও বেকায়দায় পড়লে এ জায়গায় টম ডিক অ্যান্ড হ্যারি এন্তেমান করে থাকে।’

আদালত : ‘অত্র আদালত স্বাধিকার-অপ্রমত্ত। কিন্তু অত্র আদালত অব্যচীন আলবিয়নের রসনাসহযোগে অস্বদেশীয় রাইন-মোজেল-মদিরা আশ্বাদন করে না।’

উকিল : ‘তথাস্তু মি লট্। পুরনো কথার খেই ধরে নিয়ে উপস্থিত জটটা ছাড়াই : সেই চোখের ডাক্তারের সুনাম দেশ-বিদেশের কহাঁ কহাঁ মুন্সুকে ছড়িয়ে পড়েছে। গত বৎসর তিনি প্যারিস যান “সারা জাহাঁ আঁখ মজলিসের” দাওয়াৎ পেয়ে। তিনিই হরেক রকম হাতিয়ার চিড়িয়া পিঞ্জরা হ্রদ দিয়ে মহামান্য আদালতকে বাংলা দেবেন, বিবাদিনী চোদ্দ পেগ-এর ট্যারা।’

বিবাদিনীর উকিল পেরি মেসন কায়দায় হাইজাম্প মেরে : ‘আমি আমার সুবিস্ত্র সহকর্মী বাদীপক্ষের উকিল যে মন্তব্য করেছেন তার তীব্রতম প্রতিবাদ জানাই। তিনি অশোভন ইঙ্গিত করছেন, আমার সম্মানিতা মক্কেল চৌদ্দ পেগ হুইস্কির সঙ্গে সংশ্লিষ্ট।’

হেরমান বাধা দিয়ে বললে, “তোমাদের সিনেমা গমনের কি হল! আচ্ছা, তুমি বলছো, আমার কেস একদম ওয়াটার টাইট? মোকদ্দমা জিতবই জিতব?”

আমি সোৎসাহে : “আলবৎ, একশ’ বার।”

“আর তুমি তখন লটেকে বগলদাবা করে ড্যাং ড্যাং করে নাপাতে নাপাতে এন্ডিয়া বাগে সটকে পড়ো! না? অফ কোর্স নট। আমাদের ফরেন মিনিষ্টারের নাম হের শেল (Scheel), অর্থাৎ ট্যারা, লক্ষ্মী ট্যারা নয়, সমুচা ট্যারা। তার বউ তো তাকে তালুক দেয়নি।”

লটে এক লাফে হেরমানের কোলে বসে তাকে জড়িয়ে ধরে চুমো খেতে খেতে বললে, “ডার্লিং, তুমি সত্যি আমার মূল্য বোঝো।”

আমি বললাম, “কচু বোঝে। ওয়াইলড বলেছেন, ‘আমাদের প্রত্যেকেরই এমন সব রদিমাল আছে যা আমরা সানন্দে রাস্তায় ছুঁড়ে ফেলে দিতুম। শুধু ভয়, পাছে অন্য কেউ না কুড়িয়ে নেয়।’ এ স্থলে আমি শর্মা রয়েছে যে।”

“কী! আমি রদ্দি মাল! যাও! তোমার সঙ্গে সিনেমা যাবো না, না, না!!”

॥ ২৯ ॥

আমি বললুম, “সুন্দরী লটে, তুমি যাত্রারস্তে বার বার মস্তোচারণ করেছিলে ‘যোগাযোগ, যোগাযোগ, সবই যোগাযোগ’, এবং সঙ্গে সঙ্গে হিটলারেরও উল্লেখ করেছিলে সেটা তো সটীক প্রকাশ করলে না। আমি জানি, ভালো করেই জানি জর্মন মাত্রই হিটলার-যুগটাকে যেন একটা দুঃস্বপ্নের মত ভুলে যেতে চায়। আমি তাদের খুব একটা দোষ দিইনে; আমি দেশে বসেই হিটলারের বিজয়ের পর বিজয়, পতনের পর পতন, প্রায় সবকিছুই স্বকর্ণে শুনেছি—”

“মানে?”

“অতি সরল। বেতার আমাদের দেশে ত্রিশ শতকেই বেশ ছড়িয়ে পড়েছিল। তবে ইয়োরোপীয় বেতার কেন্দ্রগুলো আমাদের বড় একটা পরোয়া করতো না—একমাত্র বি

বি সি আমাদের জোর তোয়াজ করতো। বোঝাবার চেষ্টা করতো, আখেরে ইংরেজ জিতবেই জিতবে। ওদের ভয় ছিল আমরা যদি ইংরেজ পরাজয়ের মোকাটি হেলায় অবহেলা না করে ভারত থেকে তাদের তাড়াবার বন্দোবস্ত শুরু করি তাহলেই তো চিত্তির। তাই তারা সুবো-শাম জোর প্রপাগান্ডা চালাত—বিশেষ করে ডানকার্কের অতুলনীয় পরাজয়ের পর—যে ইংরেজকে হারানো চারটিখানি কথা নয়। জমনি তখন বিজয় মদে মত্ত। বিজয় মাত্রই বড় কড়া মদ। সে মদে যদি আবার ‘পঞ্চরঙ’ মিশিয়ে দাও তাহলে তো আর কথাই নেই—” অতুলনীয় পরাজয়ের পর—যে ইংরেজকে হারানো চারটিখানি কথা নয়। জমনি তখন বিজয় মদে মত্ত। বিজয় মাত্রই বড় কড়া মদ। সে মদে যদি আবার ‘পঞ্চরঙ’ মিশিয়ে দাও তাহলে তো আর কথাই নেই—”

“পঞ্চরঙ আবার কি মদ?”

আমি সবিনয় নিবেদন করলুম, “ঐ বস্তুটির সঙ্গে আমার পরিচয় হয়নি বলে আমি সত্যিই লজ্জা বোধ করি। শুনেছি পাঁচটা ভিন্ন ভিন্ন পাইপে (‘ছিলিম’ তো এরা বুঝবে না) পাঁচটা ভিন্ন ভিন্ন জাতের নেশা, যেমন গাঁজা, চরস, ভাঙ—”

“এ সব আবার কি?”

“বোঝানো শক্ত, কারণ নিজেই জানিনে। তবে ইউরোপোমেরিকায় প্রচলিত হশীশ, হেরইন, মরফিন এগুলোর প্রায় সবকটাই হয় গাঁজা নয় আফিম থেকে তৈরী হয়। এই যে তোমাদের হিপিরা—”

লটে ভুরু কুঁচকে বললে, “আমাদের!”

আমি সঙ্গে সঙ্গে বললুম, “সরি, সরি! এই যে ইউরো-আমেরিকা থেকে হিপিরা ভারতে যায়, তারা তো সঙ্কলের পয়লা ধরে গাঁজা। [১] ওটার একটা লাতিন নামও আছে—কানাবিস ইন্ডিকা না কি যেন—তা সে যাকগে!...যা বলছিলুম, গাঁজা, চরস, ভাঙ, আফিঙ,—আরেকটার নাম ভুলে গিয়েছি—পাঁচটা পাইপে সাজিয়ে সে পাইপগুলো ঢুকিয়ে দেয় আরেকটা মোটা পাইপে। দেখে নাকি মনে হয় যেন একটা গাছের গুঁড়ি থেকে পাঁচটা শাখা ট্যারচা হয়ে উপর বাগে উঠেছে। আবার সেই বড় পাইপটা ঢুকেছে

(১) পশ্চিম বাঙলায় প্রচলিত আছে কি না জানিনে বলে একটি গঞ্জিকাপ্রশস্তি নিবেদন করি :

জীবন গাঞ্জা, তোরে আমি ছাড়তাম না (খু)

এক ছিলিমে যেমন তেমন

দুই ছিলিমে মজা

তিন ছিলিমে উজীর নাজির

চার ছিলিমে রাজা।

পাঁচ ছিলিমে হুকুর হুকুর

ছয় ছিলিমে কাশ

সাত ছিলিমে রক্ত—গা

(মডার্ন মেয়েরা যাকে ‘বাথরুপ পাওয়া’ বলে।)

আট ছিলিমে নাশ

হিপির উচিত এটা তাদেরই কোনো একেলে বেটোফেনকে দিয়ে সুরে বসিয়ে ইন্টারনেশনাল রূপে গাওয়া।

একটা খোলে। সে খোলে থাকে কড়া ধান্যেশ্বরী। সেই খোলের একটা ফুটোর ভিতর ছোট্ট একটি পাইপ ছবৎ সিগ্রেট হোস্টারের মত দেখতে দেবে ঢুকিয়ে। ওদিকে পঞ্চ পাইপের মুণ্ডুতে ধরাবে মোলায়েম আগুন। আর হোস্টারে মুখ লাগিয়ে দেবে ব্রস্টটান। ওঃ! তাতে নাকি কৈবল্যানন্দ লাভ হয়। তা সে যাকগে। হিটলার আর তাঁর জাঁদরেলরা তো জার্মান জাতটাকে খাইয়ে দিলেন বিজয় মদ। তার সঙ্গে জুড়ে দিলেন নাৎসি পার্টির হের ডক্টর অর্থাৎ গ্যোবেলস ‘পঞ্চরঙ্গ’ প্রোপাগান্ডা। কিন্তু তিনি নিজে মাতাল হলেন না। একে তোমার মত রাইন নদের পারে তার জন্ম—”

লটে “থাক, থাক” কিন্তু মোলায়েম গলায়। আমি এ মনোভাবটা বুঝি! গ্যোবেলস মার্ক-মারা পাজির পা-ঝাড়া হতে পারে কিংবা সং ব্রান্সনের পদধূলিও হতে পারে, কিন্তু যাই বলো যাই কও সে তো তার জন্মভূমি রাইনল্যান্ডকে বিশ্বের সুদূরতম কোণে পরিচয় করিয়ে দিয়েছে।

বললুম, “তার শত্রুতা পর্যন্ত স্বীকার করে, নাৎসি পার্টির করাতে গুঁড়ো ভর্তি মাথাওলাদের ভিতর ওরকম পরিষ্কার মগজওলা দ্বিতীয় ব্যক্তি ছিল না। মায় হিটলার। [২] ইংরেজ জাত ফরাসী জাতটার উপর অত্যধিক সুপ্রসন্ন নয়, তারা পর্যন্ত স্বীকার করে লাতিন জাতের ফরাসীরাই এ-জাতের অগ্রণী, ইতালিয়রা যতই চেল্লাচেল্লি করুক না কেন—এত পরিষ্কার মাথা স্যাকসন টিউটনদের হয় না, এবং গ্যোবেলসের ধড়ের উপর যে ব্রেন-বজ্রটি হামেশাই সজাগ থাকতো সেটা ছিল লাতিন মগজে টাইটমুর। আশ্চর্য নয়, এই রাইনল্যান্ডেই যে জার্মান রক্তের সঙ্গে ফরাসী রক্তের সবচেয়ে বেশী সংমিশ্রণ হয়েছে সে তত্ত্বটি বর্ণসঙ্কর বিভীষিকায় নিত্য নিত্য ঘামের ফোঁটায় কুমীর দেখনেওলা হিমলার পর্যন্ত অস্বীকার করতে পারেননি। কেন লটে, তোমার যে চোদ্দ ডিগ্রী ট্যারার মত চোদ্দ কেন, চোদ্দশ’ পুছ কালো চুল তার জুড়ির সন্ধানে বেরুতে হলে তো যেতে হয় ইতালি বা স্পেন মল্লুকে। কি বলো, আমার কৃষ্ণ কেশিনী?”

তাচ্ছিল্যভরে বললে, “রেখে দাও তোমার ঐ রক্ত নিয়ে ধানাইপানাই। হিটলার চেল্লালেন, ‘জার্মানরা সব নর্ডিক। এখন রব উঠেছে, আমরা রাইনলেভার নই, প্রাশান নই, এমন কি আমরা জার্মানও নই (!), আমরা সব্বাই একন ইউরোপীয়ান!’ ছোঃ। কিন্তু এই সুবাদে শুধোই, লোকে বলে বিপরীত বিপরীতকে টানে। তোমার চুল তো কালো। তবে তুমি প্লাটিনাম ব্লন্ড রূপোলী ব্লন্ডের এফাকে উল্লাসে নৃত্য করতে করতে তোমার টামের গোলি না করে আমাকে করতে কেন?”

হেরমান এতক্ষণ অবহিত চিন্তে আমাদের চাপান ওতোর শুনছিল। মৌনভঙ্গ করে বললে, “শাবাশ! হে অশ্বিনীপ্রধান! (আশা করি শ্রুতিধর পাঠককে অযথা স্মরণ করিয়ে দিতে হবে না, অশ্বিনী ব্রাতৃদ্বয় নিরবচ্ছিন্ন অভিন্নমনা ছিলেন বলে উভয়ে একই কামিনীকে কামনা করতেন) তোমার জয় হোক। তৎপূর্বে প্রিয়াকে সদুত্তর দাও। অনুজ শিক্ষালাভ করুক।”

(২) স্বয়ং গ্যোবেলস তাঁর ডাইরিতে লিখেছেন, “ফ্যুরারের পশ্চাদ্দেশে (তিনি এস্থলে যে শব্দটি ব্যবহার করেছেন সেটি জার্মানির গ্রাম্যতম আটপৌরে শব্দ এবং ইংরিজিতেও একই অর্থ এবং প্রায় একই ধ্বনি ধরে) আস্ত একটা জ্যান্ত টাইম বম না রাখা পর্যন্ত তাঁর চৈতন্যদয় হয় না।”

আমি বললুম, “প্রিয়ে কৃষ্ণকুন্তলে। তোমার চুল আমাকে আমার দেশের খেলার সাথীদের কথা স্মরণ করিয়ে দিত। তাদের চুল ছিল তোমারই মত কালো।”

(লটের চোখে কেমন যেন সন্দ সন্দ ভাব)

‘আমার প্রথম খেলার সাথী জোটে সাত-আট বছর বয়সে।’

(লটের ঠোটে ক্ষীণতম মধুর স্মিতহাস্য)

“করে করে আমার পাঁচটি সঙ্গিনী জুটলো। আমি আমার ছোট বোনেরদের কথা বলছি—”

লটে আমার দিকে রহস্যভরা নয়নে তাকিয়ে বললে, “খুশী হব, না ব্যাজার হব ঠিক অনুমান করতে পারছি। তুমি যদি বলতে, আমার চুল দেখে তোমার আপন দেশের প্রিয়ার কথা স্মরণে আসে তবে আমার বুক নিশ্চয়ই হিংসায় কিছুটা খচ খচ করতো। তা-ও না হয় সময়ে নিতুম, কিন্তু আমার চুল তোমাকে তোমার বোনেরদের কথা স্মরণ করিয়ে দেয়—সে যে বড্ড পানসে।”

হেরমান বললে, “মানুষের মতিগতি এমনিতেই বোঝা ভার, তার উপর যে-মানুষ দূর বিদেশ থেকে এসেছে তার হৃদয়, তার রুচি বোঝা আরও কঠিন। লটে ঠিকই শুধিয়েছে, কালো চুলের প্রতি তোমার, বিশেষ করে তোমার এহেন অহেতুক আনুগত্য কেন? কালোর কীই বা এমন ভুলোক দুলাোক জোড়া বাহার?”

মুচকি হেসে এবং বেশ গর্বসহকারে বললুম, “এর উত্তর তোমাদের কান্টও দেন নি, আমাদের শঙ্করাচার্যও দেন নি। দিয়েছে বাংলাদেশের এক গাঁইয়া কবি। গেয়েছে,

‘কালো যদি মন্দ তবে

কেশ পাকিলে কান্দো কেনে?’

ব্লন্ডের সন্ধান সে কবি জানতেন না। কেশ পাকলে সাদা হয়, আর ধবল কেশ মানেই তো বার্বাক্য। তা সে-কেশকে যে নামেই ডাকো না কেন—ব্লন্ড, প্ল্যাটিনাম ব্লন্ড, সিলভার ব্লন্ড, পরান যা চায় সে নাম দাও। হ্যাঁ, স্বীকার করি, সত্যিকার ব্লন্ড চুল অদ্ভুত চিকচিক করে, ঠিক যে রকম লটের কালো চুল চিকচিক করে (লটের একটা ক্ষীণ আপত্তি শোনা গেল—তার চুলে নাকি পাক ধরতে শুরু করেছে)। কিন্তু যবে থেকে না জানি কোন্ নাথসি লক্ষ্মীছাড়া ছাতের চিমনির উপর থেকে ট্যাচাতে আরম্ভ করলো, খাঁটি নর্ডিক জাতের চুল হয় ব্লন্ড, অমনি আর যাবে কোথা—বইতে লগলো গ্যালন গ্যালন হাইড্রজেন পরোক্সাইড না কি যেন এক রাসায়নিক দ্রব্য। রাতারাতি সবাই হয়ে গেল ব্লন্ড। কিন্তু সে দ্রব্যের প্রসাদাৎ—যে ব্লন্ড নির্মিত হন, তিনি না করেন চিকচিক, না আছে তেনাতে কোনো জৌলুস।”

লটে বললে, “খামো না। তুমি কি ওয়ার্ল্ড ফেডারেশন ফর দি প্রিভেনশন অব হাইড্রজেন পেরক্সাইডের প্রেসিডেন্ট?”

আমি বললুম, “আর একটুখানি সময় দাও। কিন্তু আমি জানি, হেরমান কেন তোমাতে মজেছে। চুল কালো হলে এদেশে চোখ হয় কটা। বিদকুটে কটাও আমি দেখেছি—ঠিক যেন বেড়ালের চোখের মত। কিন্তু কালো চুল আর নীল চোখের সমন্বয় বড়ই বিরল। লটের বেলা সেই সমন্বয় ঘটেছে। আর জানো সুনীল-নয়না লটে, নীল চোখ আমি বড় ভালোবাসি। তোমাদের দেশে খাঁটি নীল রঙের আকাশ বড় একটা দেখা যায় না। যেটা আমাদের দেশে দিনের পর দিন দেখা যায়—বিশেষ করে শরৎকালে।

নীল চোখ এস্তের না হলেও বিরল নয় এ-দেশে। লটের কালো চুল আমার স্বরণে আনতো বোনেদের কথা, আর তার নীল চোখের দিকে তাকালেই আমি যেন দেশের নীলাকাশ দেখতে পেতাম; মনটা বিকল হবে না তো কি? বিশ্বাস করবে না, ঐ নিয়ে একটা কবিতাও লিখে ফেলেছিলুম।

কাতরে শুধাই, একি
তোমার নয়নে দেখি,
আমার দেশের নীলাভ আকাশ
মায়া রচিছে কি?”

জর্মন অনুবাদটা আমার পছন্দসই হল না। কিন্তু লটেকে পায় কে? সে কবিতার বাকিটা গুনতে চায়।

আমি কিন্তু-কিন্তু করে গোটা দুই চৌক গিলে বললুম, “কিছু মনে করো না লটে, আর ব্রাদার হেরমান, কবিতার বাকিটা একটু স্কেটিং অন থিন আইস, আমাদের দেশের ভাষায় সদ্য নূতন ভেসে-ওঠা চরের চোরাবালির উপর হাঁটা। যে-যুগে কবিতাটি লেখা হয় তখন সেটা রীতিমত দুঃসাহসিক কর্ম ছিল।”

হেরমান বললে, “বাইরের দিক দেখতে গেলে কবিতা গদ্যের তুলনায় অনেকখানি শৃঙ্খলাবদ্ধ। তাকে ছন্দের বন্ধন, মিলের কড়া শাসন মেনে চলতে হয়; আর সনেট রচনা করতে গেলে তো কথাই নেই। সেখানে এসবের বন্ধন তো আছেই তদুপরি ক’ছত্রে সে কবিতাটিকে সঠিক সমাপ্তিতে আনতে হবে সেটা যেন রাজ্য দণ্ডদেশ। কোনো কোনো দেশে যাবজ্জীবন কারাবাসের অর্থ চোদ্দ বছরের জীবন। আমার তো মাঝে মাঝে মনে হয় এই চোদ্দর অনুশাসনটি আইন-কর্তারা ধার নিয়েছেন কবিদের কাছ থেকে, তাদের সনেট হবে চতুর্দশপদী। এবং তারও উপর আরেকটা মোক্ষম বন্ধন—বিষয়বস্তু কোন্ কায়দা-কৈতায় পরিবেশন করবে সেটাও আইনকানুনে আঁটেপুটে বাঁধা। প্রথম চার ছত্রে প্রস্তাবনা, দ্বিতীয় চার ছত্রে—আমার মনে নেই আরো যেন কী কী। কিন্তু ঠিক এই কারণেই সে অনেক-কিছু বলার স্বাধীনতা পেয়ে যায়, যেটা গদ্যের নেই, গদ্যে সেটা কর্কশ এমন কি ভালগার শোনায। এই যে আমি লটেকে বিয়ে করে পরাধীনতা স্বীকার করে নিয়েছি—”

লটে : “অর্থাৎ বিয়ের সদর রাস্তা ছেড়ে আইবুড়ো বয়সের সাইড জাম্প আর মারতে পারো না।”

“ইগজেকলি! কিন্তু সঙ্গে সঙ্গে নীলাকাশে উড্ডীয়মান হওয়ার মত, কিংবা বলতে পারো লটের নীল চোখের গভীরে ডুবে যাওয়ার মত এমন একটা স্বাধিকার লাভ করেছে যেটা অতুলনীয়, যেটা না পাওয়া পর্যন্ত বাউন্ডুলে আইবুড়ো স্টোর বিন্দু পরিমাণ কল্পনাও করতে পারে না। লটেকে আমি সব কিছু বলতে পারি। এস্তেক আমার মারাত্মকতম দুর্বলতা। কবিতার বেলাও তাই। দেখোনি—প্রিয় অপ্রিয় গোপন কথা বাদ দাও—বহু কবি তার হীনতা নীচতা পর্যন্ত অগ্নান বদনে স্বীকার করেছেন আপন আপন কবিতায় এবং সেটাও কোনো বিশেষ ব্যক্তির সম্মুখে নয়, বিশ্বজনকে সাক্ষী মেনে। তুমি নির্ভয়ে বলে যাও।”

আমি তবু আমতা আমতা করে বললুম, “পূর্বেই বলেছি তোমাদের দেশে নীলাকাশ হয় না, কিন্তু নীল নয়ন হয়। ঠিক তেমনি না হলেও বলা যায়, তোমাদের দেশে পদ্ম

ফুল ফোটে না বটে, অর্থাৎ সরোবরে ফোটে না, কিন্তু ফোটে অন্যত্র! আমাদের দেশে মেয়েরা শ্যাম, উজ্জ্বল শ্যাম, এমন কি ফর্সাও হয় বটে, কিন্তু ধরো আমাদের লটের মত ধবলশুভ্র কম্বিনকালেও হয় না। তাই, যার নীল নয়ন দেখে দেশের নীলাকাশ মনে পড়েছিল তাকে বললুম,

তোমার বক্ষতলে
আমার দেশের শ্বেত পদ্ম কি
ফুটিল লক্ষ দলে?"

॥ ৩০ ॥

হেরমান দুই হাসির মিটমিটি লাগিয়ে বললে, “লোভ হচ্ছে না?”

আমি বললুম, “সে আর কও কেন, ব্রাদার?”

লটে বুঝতে পারেনি। চটে বললে, “কি সব হেঁয়ালিতে কথা বলছো তোমরা?”
কবি বলেছেন,

“মধু তার নিজ মূল্য নাহি জানে,
মধুর তারে না বাখানে।”

আসলে লটে কি করে জানবে, সামান্য কয়েক গ্লাস ওয়াইন খেতে না খেতে তার গাল দুটি আরো টুকটুকে হয়ে গিয়েছে। দেখতে পাচ্ছে হেরমান, লক্ষ্য করছি আমি। লটে জানবে কি করে? আমাদের দেশের সাধারণ জনের বিশ্বাস, ইয়োরোপের মেমসায়েবরা সায়েবদেরই মত জালা জালা মদ গিলে খেই খেই নৃত্য করে। দ্বিতীয়টা সত্য। পুরুষের তুলনায় মেয়েরা নাচতে ভালোবাসে বেশী (কাঠরসিকরা তার সঙ্গে আবার যোগ দেন, “বাচ্চা বয়সে তারা আপন খেয়াল-খুশীতে নাচে; একটু বয়স হওয়ার পর বেকুব পুরুষগুলোকে নাচায়”) কিন্তু মদ তারা খায় পুরুষের তুলনায় ঢের ঢের কম। কেন কম খায়, সে এক দীর্ঘ কাহিনী। তবু একটা ইঙ্গিত দিতে পারি; কাচ্চাবাচ্চা হওয়ার সম্ভাবনা লোপ পাওয়ার পর অনেক মেয়েছেলেই পুরুষের সঙ্গে পান্না দিয়ে মদ খেতে শুরু করে এবং বিস্তর পয়সাওলী বৃদ্ধা খাটে শুয়ে শুয়ে রাত বারোটা অবধি খাসা ঢুকুস ঢুকুস করে। লটের এখনো বাচ্চা হতে পারে কিনা বলা কঠিন—অসম্ভব নয়। তবে এ-কথা ঠিক, লটের ওয়াইন ঢুকুস ঢুকুস করার কায়দাকেতা থেকে পষ্ট মালুম হয়, ও-রসে এ-গোবিন্দদাসী বঞ্চিত না হলেও আসক্তা তিনি নন। তাই কুম্বে আড়াই গ্লাস চুষতে না চুষতেই তার গোলাপী গাল দুটি হয়ে গিয়েছে টুকটুকে লাল—বুড়িদের নাক হয়ে যায় বিচ্ছিরি কোণী ঘেঁষা লাল।

হেরমান নির্ভয়ে বললে, “হের সায়েড তার দেশের কি এক মাছের বিরাট বয়ান দিয়ে বলেছিল না, সে-মাছ যে খায় না সে মূর্খ। তোমার গাল দুটি যা টুকটুকে লাল হয়েছে—মনে হয় ঠোনা দিলেই ফিনকি দিয়ে রক্ত ছুটবে—সে গালে একটুখানি হাত বুলিয়ে দিতে যে-লোকের ইচ্ছে হয় না সে মূর্খের চেয়েও মূর্খ, গবেট, গাড়ল এবং বর্বর।”

লটে আমার দিকে তাকিয়ে শুধালে, “আর তুমি সায় দিচ্ছিলে?”

আমি ঘাড় চুলকোতে চুলকোতে—এ-পোড়ার দেশে আবার টাইট কলারের চাপে

আপন অপ্রতিভ ভাবটা যথারীতি পাকা ওজনে চুলকোনোও যায় না—নানা প্রকারের অশ্রুট আনুমানিক মার্জার সুলভ আঁচ ও ম্যাঁচ করতে করতে বললুম, “তা,—সে—ওটাতে—সত্যি বলতে কি,—এহেন দুরাকাঙ্ক্ষা যদি আমার হৃৎকন্দরে অঙ্কুরিত হয় তবে সেটা এমন কি অন্যান্য হল বলা তো। তোমাদের দেশেই তো, বাপু, প্রবাদ আছে, “বেরালটা পর্যন্ত খুদ কাইজারের দিকে তাকাবার ইচ্ছা ধরে।”

আমি মনে মনে ভাছিলাম, লটে বোধ হয় বিরক্ত হয়েছে।

ওমা, কোথায় কি! লটে চটে নি।

বললে, “আমার বয়স পঞ্চাশ—বুড়ি হতে আর কবছর বাকি?”

আমি গভীর কণ্ঠে বললুম, “জরমনিতে বুড়ি নেই। এ-দেশে কেউ বুড়ি হয় না।” “মানে?”

“এ তস্তুটা আমি শিখি এই গোডেসবের্গ শহরেই। তোমার মনে আছে, আমাদের সেই ফুলওলা? সবে এখানে এসেছি, তার সঙ্গে আলাপ হয় নি। ইতিমধ্যে আনার মার পেটে কি যেন একটা হল। জব্বর অপারেশন করলেন কলোন থেকে এসে ডাকসাইটে এক সার্জন।”

লটে বলল, “হ্যাঁ, হ্যাঁ, আমার পষ্ট মনে আছে। আমাদের পাড়ার হাসি-খুশী তখন প্রায় বন্ধ হয়ে গিয়েছিল।”

“একদম খাঁটি কথা। আনার মা যখন সেরে উঠছেন তখন ভাবলুম, কিছু ফুল নিয়ে যাই। ঢুকলুম সেই ফুলের দোকানে। সেই ছোকরা—প্রায় আমার বয়সী—তো উল্লাসে প্রায় নৃত্যমান। বার তিনেক জপ-মন্ত্রের মত ‘গুটন্ মর্গন্’ বলতে বলতে শুধোল, ‘আপনার ইচ্ছে? আদেশ করুন।’ এবং পূর্ববৎ অদৃশ্য সাবানে হাত কচলাতে লাগল।

জর্মন ফুলের তত্ত্ব তখনো কিছু জানিনি। কোন ফুল নিলে ভদ্রদুরন্ত হয় সে বাবদে আরো অজ্ঞ। তাই ‘কিন্তু কিন্তু’ করছি দেখে অতিশয় লাজুক খুশীভরা মুখে বললে, ‘স্যার, কিছু মনে করবেন না। কে, কার জন্য, কোন ফুল নেবেন কি নেবেন না, সে-সম্বন্ধে কোনো প্রকারের কৌতূহল দেখানো আমার পক্ষে, সর্ব ফুলবেচনেওলার পক্ষে অমার্জনীয় অপরাধ। তাই, হেঁ—হেঁ, কিছু মনে করবেন না, যদি সামান্যতম ইঙ্গিত দেন—’

আমার বয়স তখন আর এমন কি। লজ্জা পেয়ে থতমত হয়ে তোতলালুম, না, না, সে-রকম কিছু নয়। আমি ফুল কিনব একজন অসুস্থ বৃদ্ধা—’

সঙ্গে সঙ্গে—যেন কেউ তার উদ্যোগ পিঠে সপাং করে বেত মেরেছে—কোঁক করে ককিয়ে বললে, ‘এমন কথাটি বলবেন না, স্যার।’

আমি তো রীতিমত ভীত সন্ত্রস্ত। নাচতে গিয়ে আবার কোন এটিকেট নান্নী মহিলার পা মাড়িয়ে দিয়েছি।

কোমরে দুর্ভাজ হয়ে বাও করে বিনয়নম্র কণ্ঠে বললে—আপনি বিদেন্নী; তাই জানেন না, আমাদের এই “ডয়েচ্শ্লানট যুবাবার আলেসের” দেশে, বিশেষ করে এই সুর-কানন-সুন্দর রাইনল্যান্ডে কোনো বৃদ্ধা, এমন কি প্রৌড়া মহিলাও নেই। কম্বিনকালে হয়নি, হবেও না। বলতে হয় “বর্ষীয়সী” এবং সর্বোত্তম পছা, কিঞ্চিৎ “হেঁ হেঁ” করে যেন বড়ই অনিচ্ছায় বলছেন, “এই একটুখানি বয়স হয়েছে আর কি”। সেই আমার প্রথম শিক্ষা। তাই বলি, “পঞ্চাশ! ছোঃ! সে আর এমন কি বয়স!”

লটে বললে, “পিরামিডের তুলনায় তেমন আর কি?....সেই যে বলছিলুম, আর বছর যখন আমি ম্যানিক গিয়েছিলুম—”

আমি উৎসাহিত হয়ে বললুম, “হ্যাঁ, হ্যাঁ ‘হিটলার’, ‘যোগাযোগ’, ‘ড্রেজেন হোটে’ এসব দিয়ে কেমন যেন একটা ক্রসওয়ার্ড পাঙ্কল বানাচ্ছিলে?”

“মুনিকে পরিচয় হল এক ভদ্রলোকের সঙ্গে, পরবের শেষ পার্টিতে। কথায় কথায় বেরিয়ে পড়ল, তিনি হিটলারের যে অ্যারোপ্লেন পাইলট ছিলেন বাওর, তাঁর ‘নিকট আত্মীয়। আমাদের মধ্যে কে যেন আশকথা-পাশকথার মাঝখানে ‘যোগাযোগের’ মাহাত্ম্যের প্রতি ইঙ্গিত করেছিল। আত্মীয়টি তখন বললেন, ‘এই যে পাঁচ বছর ধরে পৃথিবীর বীভৎসতম যুদ্ধ হয়ে গেল, কত নিরপরাধ ইহুদি কনসানট্রেশন ক্যাম্পে মারা গেল, বর্মিঙের ফলে হাজার হাজার নারী শিশু মারা গেল এর কিছুই হয়তো শেষ পর্যন্ত ঘটতো না, যদি না সামান্য একটা ‘যোগাযোগে’ একটুখানি গোলমাল হয়ে যেত।’ তারপর বিশেষ করে আমার দিকে তাকিয়ে বললেন, ‘আপনি গডেসবের্গের বাসিন্দা বললেন না, সেই গডেসবের্গের ড্রোজেন হোটেলে গিয়ে উঠেছেন হিটলার। তারিখটা ২৯-এ জুন ১৯৩৪। আমার আত্মীয় বাওর বলেন, হিটলারের আশু প্রোগ্রাম সম্বন্ধে কেউই বিশেষ কিছু জানতো না। তবে হিটলার তাঁকে বলে রেখেছিলেন, তাঁর প্লেন যেন হামেহাল তৈরী থাকে। বাওর খানিকক্ষণ পরে এসে বললেন, সে-প্লেনে নাকি কি একটা গলদ দেখা গিয়েছে তবে তিনি অন্য প্লেনে বার্লিন গিয়ে সেখান থেকে রাতারাতি স্পেয়ার নিয়ে আসতে পারবেন। হিটলার অসম্মতি জানানলেন। রাতের খানাদানা শেষ হলে পর হিটলার কেমন যেন চুপ মেয়ে গেলেন। যথারীতি তাঁর প্রিয় ভাগনারের রেকর্ড বাজতে শুরু করলো। হিটলারের সেদিকে যেন কান নেই, অভ্যাসমাত্তিক সঙ্গীতের সঙ্গে সঙ্গে উরুতে ঠোকাও দিচ্ছেন না আর সর্বক্ষণ উসখুস করছেন। বাওর তখন সেই একঘেঁয়েমি থেকে নিষ্কৃতি পাবার জন্য হিটলারের কাছ থেকে ঘন্টা দুপ্তিনের ছুটি চাইলেন। ইচ্ছে, পাশের বন শহরে একটা রৌদ মেয়ে আসেন। এটা কিছু নূতন নয়। হিটলার হামেশাই এ ধরনের ছুটি সবাইকে মঞ্জুর করতেন। আজ কিন্তু বললেন, “না, তোমাকে যে কোনো সময় আমার প্রয়োজন হতে পারে।” দুপুর রাতে বাওরকে বললেন, “খবর নাও তো, মুনিক ফ্লাই করার মত আবহাওয়া স্বাভাবিক কি না।” বাওর পাশের বড় এয়ারপোর্ট কলন শহরে ট্রাঙ্ককল করে খবর নলেন, আবহাওয়া খারাপ। হিটলার কেমন যেন উত্তেজিত হয়ে উঠলেন। বাওরকে আদেশ দিলেন, খানিকক্ষণ বাদে বাদে যেন তিনি ট্রাঙ্ককল করে আবহাওয়ার খবর নেন। বাওর তাই করে যেতে লাগলেন। শেষটায় রাত তিনটের সময় বাওর সুসংবাদ দিলেন, এখন ফ্লাই করা সম্ভব। হিটলার সঙ্গে সঙ্গে মোটরে উঠলেন, প্লেনে চেপে ভোরের আলো ফুটি ফুটি করছে এমন সময় মুনিক পৌছলেন। এখানে বিশেষ ভাবে লক্ষ্যণীয়, হিটলারের আপন প্লেন মেরামৎ হয় নি বলে তিনি মুনিক পৌছলেন অন্য প্লেনে। এয়ারপোর্টে পৌছেই হিটলার জোর পা চালিয়ে গিয়ে উঠলেন মোটরে। সে গাড়িতে তাঁর কয়েকজন অতিশয় বিশ্বাসী সশস্ত্র সহচর তাঁর জন্য প্রতীক্ষা করছিলেন। মোটর সঙ্গে সঙ্গে দ্রুতগতিতে উধাও হল। বাওর প্লেন হ্যাঙারে তোলার ব্যবস্থা করে দিয়ে এয়ারপোর্টে পাইচারি করছেন এমন সময় তাঁর পরিচিত এক অফিসার তাঁকে দেখে শুধোলেন, “আপনি এখানে?” “কেন, ফ্যারারকে খানিকক্ষণ আগে প্লেনে করে এখানে নিয়ে এলুম যে।”

অফিসার আরো আশ্চর্য হয়ে শুধোলেন, “সে কি? তাঁর প্লেন তো দেখতে পেলুম না।”

“আমরা অন্য প্লেনে এসেছি। কিন্তু ব্যাপার কি?”

অফিসার অত্যন্ত চিন্তাঘটিত হয়ে বললেন, “কেপটেন রোয়াম আমাকে খাড়া ছকুম দিয়েছিলেন, আমি যেন এখানে কড়া চোখ রাখি, ফ্যুরারের প্লেন দেখা গেলেই যেন তাঁকে ফোন করে খবর দি। এখন করি কি?”

বাওর বললেন, “করার তো কিছুই নেই আর। ফ্যুরার তো এতক্ষণে কেপটেন রোয়ামের ওখানে নিশ্চয়ই পৌঁছে গিয়েছেন।”

এস্থলে বলা প্রয়োজন, হিটলার সম্বন্ধে বিশেষ কোনো বই পড়া না থাকলেও একাধিক ফিল্মের মারফৎ অনেক পাঠকই জানেন, এই কেপটেন রোয়ামই হিটলারের সর্বপ্রধান অন্তরঙ্গ সখা যিনি হিটলারকে জার্মানির চ্যানসেলর রূপে গদীনশীল করার জন্য সর্বাধিক কৃতিত্ব দেখান। তাঁর অধীনে প্রায় পাঁচলক্ষ নাৎসি যুবক আধা-মিলিটারি ট্রেনিং পেয়েছিল। হিটলার নাকি হঠাৎ খবর পান—কখন পান বলা কঠিন—যে রোয়াম নাকি তাঁর বিরুদ্ধে ষড়যন্ত্র করছেন, তাঁকে হটিয়ে স্বয়ং গদীতে বসবেন। তাবেতে আছে, বিশেষ করে তাঁরই (রোয়ামেরই) অনুগত পাঁচ লক্ষ নাৎসি—এদেরই নাম ব্রাউন শার্ট।

হিটলার তাই কাউকে কোনো খবর না দিয়ে, গোপন ব্যবস্থা করে হঠাৎ গোডেসবের্গ থেকে (সেখানে গিয়েছিলেন যেন পূর্বাভাস মত বিশ্রাম নিতে—আসলে রোয়ামের চোখে ধুলো দেবার জন্য; অবশ্য রোয়ামও কিছুটা সন্দেহ করেছিলেন বলে পূর্বোন্নিখিত অফিসারকে এয়ারপোর্টে মোতায়ন করেছিলেন) মুনিকে পৌঁছে সোজা রোয়াম যে হোটеле স্বাস্থ্যোদ্ধার করছিলেন সেখানে অতি ভোরে পৌঁছে তাঁকে অতর্কিত ভাবে হামলা করে বন্দী করেন।

রোয়াম এবং তাঁর নিতান্ত অন্তরঙ্গ ষড়যন্ত্রকারীদের গুলি করে মারা হয়।

লটে বললে, “আবহাওয়ার যোগাযোগ তো আছেই কিন্তু আসল কথা এই, হিটলার যদি আপন প্লেনে আসতেন তবে সেই পাহারাদার অফিসার তৎক্ষণাৎ রোয়ামকে জানাতেন। রোয়ামও তৈরী থাকতেন। সঙ্গে সঙ্গে তাঁর সান্সোপাসকে জড়ো করতেন। কে জানে, আথেরে কি হত। হয়তো রোয়ামই জিততেন। তা হলে কি হত? কে জানে? হিটলারের মতে রোয়াম তো ফ্রান্সের প্রতি বিরূপ ছিলেন না—ভালোবাসতেন বললেও অতুষ্টি হয় না।

আর জানো, সব-কিছু ঠাণ্ডা হয়ে যাওয়ার পর বাওর এই প্লেনের গুবলেট-কাহিনী হিটলারকে বলেন।

হিটলার নাকি প্রত্যুত্তরে বলেন, “নিয়তি।”

লটে বললে, “আমি বলি, ‘যোগাযোগ’।”

॥৩১॥

“আচ্ছা লটে, আর পাঁচজন জার্মানের মত তুমি তো হিটলার-যুগটা একটা বিভীষিকা-ভরা দুঃস্বপ্নের মত ভুলে যেতে চাও না। তবে একটি কাহিনী আমি শুনতে চাই—বরঞ্চ বলা উচিত, আমি শুনতে চাই আর নাই চাই, আমার দেশের ছেলেছোকরা মোকা পেলেই আমাকে শুধায়, ‘হিটলার বিশেষাদী করলেন না কেন?’ তা সে করুন আর নাই করুন—ইয়োরোপে যখন দুধ সস্তা তখন গাই কিনে সেটার হেপাজতীর বয়নাক্কা—

ঝামেলা পোয়ানো মহা আহাম্মুখী—প্রেম-ট্রেমের দিকে তাঁর কি কোনো প্রকারেরই ঝোঁক ছিল না?”

লক্ষ্য করেছি, এ প্রশ্নে অনেক জর্মনই অসহিষ্ণু হয়ে ওঠে। কিন্তু লটে মেয়েটির সমঝ-বুঝ আছে। একদিকে যেমন খানিকটে প্যুরিটানিজম আছে অন্যদিকে কথাপ্রসঙ্গে যদি প্রেম এমন কি আলোচনা দৈহিক কামনার দিকে মোড় নেয় তবে সে সব সময় নাসিকা কুণ্ঠিত করে না। এমন কি মাঝে মাঝে হাজার ভল্টের প্রাণঘাতী শকও দিতে জানে। যেমন আমাদের তিনজনাতে বেশ যখন জমে উঠেছে তখন লটে বেশ রসিয়ে রসিয়ে যোহানেস-আঙনেস-আমার স্নান-বিহারের বিপর্যয় কাহিনী হেরমানকে শোনালে। হেরমান কৌতুকভরে আমাকে শোধালে, “আচ্ছা সায়েড, সবই তো হল কিন্তু ঝোপের আড়াল থেকে অষ্টাদশী আঙনেসের বার্থডে ফ্রকপরা যে অনাবিল সৌন্দর্য—”

ঝোপের ভিতর দিয়ে আসার সময় কাহিনী বলতে বলতে যখন এই অঙ্কে পৌঁছই তখন যে রকম রসভঙ্গ করে লটে ধমক দিয়ে বলেছিল “চোপ” এম্বলেও সেটা তদ্বৎ।

আমি হেরমানের দিকে তাকিয়ে করুণ কণ্ঠে ফরিয়াদ জানালুম, “ভায়া হেরমান, আড়াল থেকে মাত্র দুটিবার এ জীবনে নগ্ন সৌন্দর্য দেখবার সৌভাগ্য আমার হয়েছিল—”

ঠোটকাটা হেরমান শুধোলে, “আর মুখোমুখি?”

লটে ফের ধমকালে, “চোপ!” এ—“চোপেতে” আমার সর্বাঙ্গঃকরণের সম্মতি।

রূঢ়বাক্য প্রয়োগের বেলায় লটের শব্দভাণ্ডার বড্ডই-বাড়ন্ত। অনুমান করলুম, প্রাচীনদিনের সেই নবীনা লটে নানা অনাবশ্যকীয় কিন্তু অনিবার্য পরিবর্তন সত্ত্বেও সেই লটে এখনো শাস্তা নাম নিতে পারে। কাউকে ধমক-টমক দিতে দিতে কড়া কথার স্টক বড় একটা বাড়িতে পারেনি।

আমি হেরমানকে করুণতর কণ্ঠে বললুম, “শুনলে ভাইয়া শুনলে? দেখলে, কী মারাত্মক প্যুরিটান, বুরবুরে সেকেলে পদিপিসি!”

লটে স্থির নয়নে আমার দিকে তাকিয়ে বললে, “আমার সঙ্গে যুগ্ম অভিসারে বেরিয়েছো আমারই বাড়ির সামনেকার কুঞ্জবনে—”

আমি মনে মনে খানিকটে আমেজ করে গুণগুণালুম,

আমার বঁধুয়া আন বাড়ি যায়

আমারি আগুনা দিয়া।

লটে বাক্যের শেবাংশ পুনরাবৃত্তি করে বললো—“আমারই বাড়ির সামনেকার কুঞ্জবনে, আর আমাকে শুনতে হবে, কান ভরে শুনতে হবে, প্রাণভরে ‘আমরি-আমরি’ বলতে হবে আঙনেসের নগ্ন সৌন্দর্য বর্ণনার প্রতিটি শব্দ যখন আমার কানের পর্দাতে কটাং কটাং করে হাতুড়ি ঠুকবে। ভেবো না আমি হিংসুটে। নগ্ন সৌন্দর্যের বর্ণনা যে-কোনো পুরুষ যে-কোনো রমণীর এবং ভাইস-ভার্সা দিক। আমার তাতে বিন্দুমাত্র আপত্তি নেই—তা সে বিন্দু সরেসতম নেপলিউন ব্রান্ডিরই হোক আর নিরেসতম জাপানী বিয়ারেরই হোক কিন্তু তুমি যদি দিতে চাও—তা সে তোমার জীবনে প্রথমবারের মতই হোক, আর শেষবারের মতই হোক—তুমি দেবে আমায় রইলো কথা।”

হেরমান বললে, “ব্রাভো, ব্রাভো, ন-বউ বাঁচলে হয়।”

এবার আমার “চোপ” বলার পালা। হেরমান যেন রণাঙ্গনে সম্মুখ সমরে অবতীর্ণ হয়ে বললে, “কেন? শুনতে পাবার মত অধিকার আমার আছে কি, বর্ণনাটা গেলবার

মত প্রাপ্তবয়স্ক হয়েছি কি, সে সিনেমাটা এ-মার্ক না বি-মার্ক, জানতে পারি কি? কেন আর্টিস্টরা কি ন্যূড মডেল সামনে দাঁড় করিয়ে ছবি আঁকে না? আর দাঁড় করিয়েই বা বলছি কেন? আর্টিস্ট পিটমুলারের স্টুডিয়োতে যখনই গিয়েছি, তখনই দেখেছি, নিদেন গোটা তিনেক মডেল বার্থডে ফ্রক পরে কেউ বা কফি বানাচ্ছে, এখান থেকে দেশলাই আনছে, ওখান থেকে চিনিটা আনছে, সেখানে আতিপাতি খুঁজছে, কফির কৌটোটা গেল কোথায় শুধোচ্ছে, জানো তো আর্টিস্ট মাত্রই কি রকম মারাত্মক গোছ-গোছানোর নীতি অ্যান্ড ক্লীন বেড়ালটির স্বভাব ধরেন—অন্যজন মুলারের আসন্ন প্রদর্শনীর জন্য ছবি খুঁজতে গিয়ে কখনো কাত হয়ে গড়াতে গড়াতে সোফার নিচে ঢুকছেন, কখনো বা অর্ধ-লক্ষ্যে জানলার চৌকাঠের উপর উঠে একটি বাছ সম্প্রসারিত করেছেন সর্বোচ্চ শেলফের দিকে, আমি তো ভয়ে মরি হাতখানির প্রলম্বিত ঐ টান-টান টানের ফলে দেহশ্রীর উচ্চাধ না বক্ষ্যুত হয়—”

হেরমান সবিনয় বললে, “ভাই সই।” বাকিটা সংক্ষেপে সারছি। কারণ তৃতীয়া মডেলটি সবাকার সেরা। সেই বিরাট স্টুডিয়ার মাঝখানে তিনি মেদ বৃদ্ধি নিবারণার্থে জিমনাস্টিক জুড়েছেন। আর সে যা তা জিমনাস্টিক নয়—ভারতীয় সাপুড়ে নাচ থেকে শুরু করে মিশরী বেলিডানস—নাভিকুণ্ডলীটি কেন্দ্র করে।

আর ঐ সব হরীপরীদের কর্মকলাপের মধ্যখানে যেন তুর্কীর পাশা জর্মন পিটমুলার তার খাস-প্যারা ডিভানটির উপর অঘোরে ঘুমঘোরে নাক ডাকাচ্ছেন। একদিন পিটকে শুধিয়েছিলুম, মঞ্চের উপর মডেল ছিল....দাঁড়িয়ে আছেন সে না হয় বুঝি। কিন্তু কাজকর্ম করার সময় ওনারা জামা-কাপড় পরলে কি দোষটা হয়। পিট বললে, আমি নাকি একটা আস্ত বুদ্ধ। দুনিয়ার তাবৎ মেয়েই তো এমন কিছু আর্টিস্টের মডেলের মত ‘যাবজ্জীবন’ ততকাল মঞ্চের উপর দাঁড়িয়ে ‘সুখং জীবৎ’ বরাত নিয়ে আসে না। ওরা হাঁটে, কাজ করে, উপু হয়ে এটা-সেটা কুড়োয়, পায়ের আট আঙ্গুলের উপর ভর দিয়ে নাগালের প্রায় বাইরের তাকটা থেকে আচারের বোয়াম নামায়। এগুলোও তো আঁকতে হয়—অবশ্য ফ্রক ব্লাউস তখন তাদের পরনে থাকে, আমিও তাই আঁকি। কিন্তু অঙ্গ-প্রত্যঙ্গের স্থান পরিবর্তন এবং তজ্জনিত নানাবিধ আন্দোলন ন্যূডে না দেখা থাকলে ছবি ডাইনামিক হয় না। উদাহরণ দিয়ে পিট বলেছিল, গাছের যে ডালপালা—তার গতিবিধি হবহু জানতে হলে গাছটাকে খুঁটিয়ে খুঁটিয়ে দেখতে হয়, যখন শীতকালে সে সর্ব পত্র বিবর্জিত নগ্ন।

আমি বললুম, “তা হতে পারে। কিন্তু আর্টিস্টরা সব-কিছু দেখে নিরাসক্ত নয়নে। ন্যূড গাছ, ন্যূড রমণীকে—একই নিরাসক্ত নয়নে। কিন্তু আর পাঁচজন তো প্রভু খৃষ্টের মত নয়। তিনি বলেছেন, ‘পাপনয়ন উপড়ে ফেলে’। আর বললে বিশ্বাস করবে না, আমাদের দেশের এক বেশ্যাসক্ত পাপী ঐ উপদেশ না জেনেও জ্ঞানচক্ষু খুলে যাওয়াতে চর্মচক্ষু উপড়ে ফেলে। আশ্চর্য, প্রভু খৃষ্ট উদ্ধার করলেন ভ্রষ্টা নর্তকী মারি মাগদেলেনকে আর ভ্রষ্টা নর্তকী চিস্তামণির উপদেশে উদ্ধার পেল পাপী বিশ্বমঙ্গল। কিন্তু সে-কথা থাক। আমি বলছি, তোমার বউ তো বিরাট ওকগাছ—”

লটে : “কি বললে! আমি ধুমসী মুটকী ওকগাছ?”

“আহা চটো কেনে? অন্য হাতটা আনতে দাও—”

“সে আবার কি জ্বালা?”

“পরে হবে,—কিংবা তুমি তব্বঙ্গী চিনার গাছও নও, তাহলে, বলো বৎস, হেরমান, করি কি?”

হেরমান : “কে বললে তোমাকে, আর্টিস্টরা নিরাসক্ত নয়নে কুন্সে দুনিয়ার দিকে তাকায়? তা হলে কোনো ন্যূডকে সরলা, কোনোটিকে চিত্তাশীলা, কোনোটিকে কামুকা, কোনোটিকে চিত্তপ্রদাহিণী, কোনোটিকে শান্তিদায়িনী আঁকে গড়ে কি প্রকারে? নিশ্চয়ই তাঁদের হৃদয়মনে ভিন্ন ভিন্ন ভাবোদয় হয়। অবশ্য পূর্ণ সিদ্ধা মডেল তার খোড়াই পরোয়া করে। “সঙ অব সঙ”—“সঙ অব সলমন” নামেও পরিচিত—ফিলিম দেখেছ? আমাদের ঐ পাশের শহরে কলোনের মেয়ে—হিটলার-বৈরী রমণী মার্লেণ ডীটরিব্ সে ফিলিমের প্রধান নায়িকা। গাঁইয়া মেয়ে এসেছে শহরে পিসীর দোকানে কাজ করতে। সেখানে এক ছোকরা ভাস্করের সঙ্গে মাত্র কয়েক মিনিটের আলাপ। ছোকরা পিসীর ভয়ে বেরুবার সময় শুধু আঙ্গুল দিয়ে দেখালে—সামনের পাঁচতলার বাড়ির চিলেকোঠায় তার স্টুডিও। মেয়েটা মজ্জেছে। সে-রাট্রেই গেল আর্টিস্টের কাছে। আর্টিস্ট সত্যি মেয়েটিকে দেখে অনুপ্রাণিত হয়েছে—যেন সন্ধান পেয়েছে তার সর্বশ্রেষ্ঠ কীর্তি, মাস্টারপীস্ ‘সঙ অব সঙস্’ সর্বগীতির সেবা গীতি ওরই ন্যূড দিয়ে নির্মাণ করবে। অনুপ্রাণিত ভাষায় মেয়েটিকে তার আদর্শ, তার সর্বকীর্তির শ্রেষ্ঠতম কীর্তির কথা বলে বলে সেই সরলাবালার হৃদয়ে তার ভাবাবেগ সঞ্চারিত করলো। অবশেষে অনুরোধ করা মাত্র সর্ব আবরণ খুলে ফেলে দাঁড়ালো মঞ্চের উপর সে মেয়ে। দ্বিধাদিক জ্ঞানশূন্য আর্টিস্ট উর্ধ্বশ্বাসে দ্রুততম গতিতে ঐকে যেতে লাগল প্রথম স্কেচ। সম্মুখে ফিরে এলো স্কেচ শেষ হওয়ার পর। তখন এই সর্বপ্রথম, সে লক্ষ্য করলো মেয়েটির দেহের সৌন্দর্য। তার চোখের উপর ফুটে উঠলো সে ভাব-পরিবর্তন, মেয়েটি এক পলকেই সে আবেশ লক্ষ্য করলো। সঙ্গে সঙ্গে পেল নিদারুণ লজ্জা। ছুটে গিয়ে সর্বাস জড়ালো, হাতের কাছে যা পেল তাই দিয়ে।

এতক্ষণ অবধি দুজনার কারোরই কোনো আচরণে কোনো প্রকারের আড়ষ্টতা ছিল না। দুজনা একই সৃষ্টিকর্মের ভাবাবেশে নিমজ্জিত, একই আদর্শে অনুপ্রাণিত—একজন ডাইনামিক অন্যজন স্টাটিক। একজনের সে-ভাব পরিবর্তন হওয়া মাত্রই সে পরিবর্তন ওর মনে সঞ্চারিত হল। মৃন্ময় দেহ সম্বন্ধে সে এই প্রথম সচেতন হল। সঙ্গে সঙ্গে তার চিত্তে উদয় হল, সঙ্কোচ ব্রীড়া লজ্জা। সঞ্চারিত হল দেহে।

অনুরোধের সঙ্গে সঙ্গে এ-মেয়েটির বিবস্ত্র হওয়া, আর্টিস্ট যতক্ষণ স্কেচ করছিল আপন নগ্নদেহ সম্বন্ধে সম্পূর্ণ অচেতন থাকা, স্কেচ শেষে হঠাৎ আর্টিস্টের চোখে ভাবান্তর লক্ষ্য করে চিন্ময়ভুবন থেকে মৃন্ময়লোকে পতন—এসবই সম্ভব হয়েছিল, তার একটিমাত্র কারণ সে ছিল জনপদবালা সরলা কুমারী।”

হেরমান ঠিক সময়ে এসেই থামলো। আমার দিকে তাকিয়ে বললে, “বে-আদবী মাফ হয়। আমি একটু আসি।”

আমি লটের দিকে তাকালুম। তার নয়ন মুদ্রিত। হেরমানের ঘর থেকে বেরিয়ে যাবার শব্দ শুনে চোখ মেলে আমার দিকে গভীর স্নেহভরা চোখে তাকিয়ে বললে, “হেরমান অনায়াসে চিন্ময় মৃন্ময়ে আনাগোনা করতে পারে। আমার অতখানি বুদ্ধি নেই, অতখানি স্পর্শকাতরও আমি নই। আমি অত্যন্ত সাদামাটা রাইনের কাদায় গড়া মানুষ। তবু বলবো, হেরমান যেভাবে সমস্যাটা বুঝিয়ে বললে এরপর হিটলারের প্রেম নিয়ে

আলোচনা করা যায় না। লোকে বলে “হিটলারের প্রেম”, কিন্তু সে-পক্ষিল বস্তুটাকে প্রেম নাম দিতে হলে অনেকখানি কল্পনাশক্তির প্রয়োজন, ওটা আছ থাক।”

খানিকক্ষণ ভেবে নিয়ে শুধোলো—“আজ চাঁদের আলোটা ঠিক তেমন উজ্জ্বল নয়, সেই সে-রাত্রে তুমি যখন রাইন গল্ট্‌ এক্সপ্রেসের তূফান বেগে চিঠি ডাকে ফেলতে যাচ্ছিলে। তবু নেই নেই করে কিছুটা তো আছে। আচ্ছা তুমি কখনো চাঁদের আলোতে ক্যানভাসের ফোলডিং বোর্ড-এ রাইনের উপর ঘোরাঘুরি করেছ?”

আমি বললুম, “কেন?”

“আমাদের একটা আছে। যাবে?”

আমি শুধালুম, “সে তো বেশ কথা। হেরমান নিশ্চয়ই ভালো নৌকো বাইতে জানে—রাইনের পারে জন্মাবধি এতটা কাল কাটালো।”

লটে খিল খিল করে হেসে বললে, “তুমি কি ভেবেছো আমাদের ফোলডিং বোর্ড স্বর্গীয় মানওয়ারী জাহাজ ‘বিসমার্ক’ বা ‘কুইন মেরি’ সাইজের জাহাজ। ওটাতে মাত্র দুজন্যর জায়গা হয়।”

আমি বললুম, “সর্বনাশ।”

॥ ৩২ ॥

কথায় বলে “কানু ছাড়া গীত নেই।” অবশ্য সে গীত শ্রীকৃষ্ণের শৌর্যবীর্য তাঁর অসাধারণ বুদ্ধিমত্তা এমন কি তিনি যে মথুরায় একাধিক বিবাহ করেছিলেন এবং হয়তো বা এঁদের কোনো একজন বা একাধিক জনকে ভালোও বেসেছিলেন—এসব বিষয় নিয়ে নয়। সত্রাজিত দুহিতা সত্যভামার প্রতি তিনি যে বিলক্ষণ অনুরক্ত ছিলেন সে-বিষয়ে কোনো সন্দেহ নেই। মহাভারতে আছে, “সত্যভামা কোপাবিষ্ট চিন্তে রোদন করিতে করিতে বাসুদেবের ক্রোড়ে উপবিষ্ট হইয়া তাঁহার কোপানল উদ্দীপিত করিলেন।” এবং ফলস্বরূপ পরে যে হানাহানি আরম্ভ হয় সেটাতে স্বয়ং শ্রীকৃষ্ণ বিস্তর ভোজ এবং অন্ধক বংশের বীরদের বিনষ্ট করেন। কিন্তু প্রশ্ন, সত্যভামার প্রতি বাসুদেবের অনুরাগ নিয়ে কোনো কবি উচ্চাসের কাব্য সৃষ্টি করেছেন বা “গীত” গেয়েছেন এ-কথা তো কখনো শুনি। কানুর গীত মানেই ত্রীরাধার উদ্দেশে কৃষ্ণের প্রেমনিবেদনের গীত এবং তার চেয়েও মধুরতর এবং বেদনায় নিবিড়তর—বিশ্বসাহিত্যে অতুলনীয়—কানুর বিরহে রাজার বিয়ারির আত্মগীতি।

গোডেসবের্গ-মেলমের অতি কাছেই রাইনের দুটি অপরূপ সুন্দর দ্বীপ। অর্থাৎ লটেদের বাড়ি থেকে দূরে নয়। কিন্তু উজানবাগে।

হেরমান নৌকাটি ফিটফট করে সেটাকে এক ধাক্কায় ভাটির দিকে ঢালু করে দিয়ে বেশ উঁচু গলায় বললে, “বলি লটে, বেশী বাড়াবাড়ি করো না। রিভার-পুলিস কাছেই।” আমাদের স্টেশনে স্টেশনে যে-রকম একদা সাইনবোর্ড সাবধান বাণী শোনাতে “পকেটমার নজদীকে হৈ।” আমি বললুম, “তবেই হয়েছে।” বলেই ফিক করে আধগাল হেসে নিলুম।

তোমার কথায় আর আচরণে কোনো মিল নেই। এদিকে বলছো, “তবেই হয়েছে”, অর্থাৎ কাছেপিঠে রিভার-পুলিস থাকলে আমাদের সর্বনাশ হবে। ওদিকে টোঁটের

সৈয়দ মুজতবা আলী রচনাবলী (৮)—১৩

১৯৩

আলোতে খেলে গেল মোলায়েম হাসি। মানে খুশী। কোন্টা ঠিক? হেঁয়ালি ছেড়ে কথা কও। তুমি চিরকালই বেখেয়ালী। অভদ্র ভাষায় বলতে হলে নির্ভয়ে বলবো, তুমি আমার মনে আমার বুকে কি চলছে সে-সম্বন্ধে উদাসীন। আচ্ছা, তুমি কি একবারের তরেও নিজের মনকে শুধিয়েছ, আমি তোমাকে সর্বক্ষণ কোন্ প্রশ্নটি, মাত্র একটি প্রশ্ন শুধোতে চাই? বলো।”

এর চেয়ে পকেট-বুক সাইজের ভেলা, মোচার খোলও অক্লেশে বলা যেতে পারে ত্রিসংসারে হয় না। জন্মন জাতটাই দুই একসট্রিম নিয়ে গেণ্ডেরী খেলতে ভালোবাসে, ক্ষণে আসমান ক্ষণে জমীন, ক্ষণে মোচার খোল নৌকো ক্ষণে জেপেলীন। এ ভেলাটি সাইজে দেশের মাদ্রাজী মেস বাড়ির—মাদ্রাজী উচ্চারণে হিন্দীতে “চোটো সে চোটো”—তক্তপোশের যমজুড়াই দৈর্ঘ্যপ্রস্তু। অবশ্য নৌকাটির হাল আর গলুইয়ের দিক দুটো ছুঁচলো বলে সে দু-প্রান্তে তক্তপোশকে অবশ্যই হার মানায়। লটে হাল ধরে বসেছে একপ্রান্তে আমি অন্যদিকে। দেশের কোঁদা নৌকোর সঙ্গে এ-ভেলার আর একটা সর্বনাশা প্রাণঘাতী মিল আছে। কোঁদা নৌকাতে ওঠার সময় নৌকোর ঠিক মধ্যখানে পায়ে ভর না দিলে আসন নেবার সময় ভাগ করে গলুইয়ের ঠিক মধ্যখানে না বসলে, বসার পরও ডাইনে বাঁয়ে পঁয়তাল্লিশ ডিগ্রীর বেশী, হঠাৎ কাৎ হয়েছো কি অমনি নৌকো কুপোকাৎ। হাটবারে কচ্ছপকে চিং করে রাখে, আর ইনি হয়ে যান উপুড়। হ্যাঁ, হেরমান অতি নিশ্চিত তালেবর মাল। এ-ভেলায় আর যা হয় করতে চাও করো কিন্তু ঢলাঢলিটি—উভয়ার্থে—করতে যেয়ো না, বাপধন। আচ্ছা এক নয়া সেফটিবেস্ট অবিস্কার করেছে রাম ঘুঘু হেরমান। ওদিকে আমি তো “ঘুঘু দেখেই নাচতে শুরু। ফাঁদ তো, বাবা দেখি নি।”—হেরমান যখন পার্কের বেঞ্চিতে বসার প্রোগ্রাম বাতিল করে দিয়ে কত না সোহাগভরে তরণীবিহারের প্রস্তাবটা পাড়লে তখন সে কত ধুরন্ধর বুঝতে পারিনি—পরে লটে বলেছিল।

সংস্কৃতির ডাকসাইটে অধ্যাপক প্রফেসর কির্কেল বহু বৎসর রাইনের পারে বাস করেছেন। একদিন আমি যখন রাইনের পাড়ে বসে আত্মচিন্তায় মগ্ন তখন তিনি আমার পাশে এসে বসাতে আমার ধ্যান ভঙ্গ হল। তিনি শুধোলেন, “রাইন আজ কি রকম?” আমি বললুম, “নদীর এ-পার ও-পার দু-পারই তো বেশ পরিষ্কার কিন্তু ঠিক জলের উপরটা কেমন যেন ঝাপসা ঝাপসা দেখায়।” প্রফেসর বললেন, “সে প্রায় গোটা বছর ধরেই চলে। তাই যেসব আর্টিস্ট রাইনের ছবি ঐকেছেন তাঁরাই রাইনের ঠিক উপরটা যেন সামান্য কুয়াশা ঢাকা ঝাপসা ঝাপসা ঐকেছেন।” এ বাক্যালাপের পর আমি রাইনের বহু ছবি দেখেছি। প্রফেসরের কথা ন-সিকে খাঁটি।

আজও তাই লটেকে দেখতে পাচ্ছি ঠিকই। কিন্তু মাঝে মাঝে কেমন যেন ঝাপসা ঝাপসা হয়ে যাচ্ছে। চাঁদের আলো আজ রাতে তেমন উজ্জ্বল নয়। কিন্তু সে-আলো কুহেলির গ্লানি ছিন্ন করে মাঝে মাঝে তার মুখের রেখা স্পষ্ট করে দিচ্ছে। কপালের উপরকার অতি সামান্য ঘাম তখন চিকচিক করে ওঠে। আর চিকচিক করে ওঠে তার অতি কৃষ্ণ কুন্তলের মাঝখানে তুষারশুভ্র সীমান্তরেখা। এ-রকম শুভ্র সিতের সমন্বয় তো আমাদের দেশে চোখে পড়ে না। মাঝে মাঝে আমার দিকে এক বলক তাকায় আর একটুখানি মুচকি হাসে।

শুধোলে, “কই? আমার প্রশ্নের উত্তর দিলে না!”

মশাফিল! বললুম, “তুমি কি প্রশ্ন শুধোতে চাও সেটা আমি এতক্ষণ চিন্তা করতে পারতাম ২১১ আমার একটি কবিতা মনে পড়ে গেল। তাই সমস্যাটার কোনো শেষ সমাধানে পৌছতে পারিনি। কখনো পারবো বলে মনেও হয় না।”

“আমি বলবো?”

“বলো।”

“তুমি বাকী জীবন এই গোডেসবের্গ-মেলমে কাটাবে না, সে আমি জানি। কিন্তু চান্দনা এখানে থাকবে সেটা আমি বার বার জিজ্ঞেস করতে গিয়ে থেমে গিয়েছি। যদি ২১১ বলে বসো, কালই চলে যাচ্ছে, তখন কি? এটা বলতে তোমার তো এতটুকু বাধবে না সে আমি ভালো করেই জানি। তোমার হৃদয়ে যে রক্তিম রম্যামহবৎ নেই সে আমি ভালো করেই জানি। আর সত্যি বলতে কি, তোমার আমার অদৃষ্ট সুপ্রসন্ন যে চাঁদের আলোতে ঘুম ভেঙে যাওয়ায় একদা জানলার পাশে এসে আমি দেখি, তুমি ছুটে চলেছ মায়ের চিঠি ডাকে ফেলতে। তুমি যদি সেদিন রহস্য করে যা লোকে আকছারই করে থাকে বলতে হেঁ হেঁ হেঁ হেঁ এই—এই—প্রিয়ার চিঠি ডাকে ফেলতে যাচ্ছি—”

আমি বাধা দিয়ে বললুম, “ছিঃ! দশ বছরের বাচ্চা মেয়েকে কেউ কখনো এ-রকম কথা বলে?”

লটে অবাক হয়ে বললে, “কেন? সবাই তো বলে, সঙ্কলের সামনে!”

“আমাদের দেশে বলে না।”

“সে কথা থাক! আসল কথা তুমি যে তোমার মাকে খুব ভালোবাসো সেটা আমাকে বড় আনন্দ দিয়েছিল সেদিন। এটুকু ছিল বলে—”

“কাকে চিলে ছৌঁ মেরে তুলে নিয়ে উধাও হয়ে যায়নি।”

“মানে?”

“অতি সরল, অর্থাৎ এমনই পাচা জিনিস যে কেউ তার দিকে ফিরেও তাকাতে না। পাচা জিনিসের প্রতি লোভ কার? কাকের চিলের। কিন্তু একটা কথা তোমাকে বলি, লটে, যদি প্রতিজ্ঞা করো, আমি যা বলতে যাচ্ছি, সেটা নিয়ে তারপর তুমি আমার সঙ্গে কোনো আলোচনা জুড়বে না, কোনো প্রশ্ন শুধাবে না।”

“প্রতিজ্ঞা করছি।”

গলায় দরদ ঢেলে বললুম, “তুমি বড় লক্ষ্মী মেয়ে লটে। তাহলে বলি। আমি আমার মাকে জানা অজানায় যতখানি কষ্ট দিয়েছি অন্য কেউ সেরকম দিয়েছে কিনা বলতে পারবো না। আর আমি আমার জীবনে যা-কিছু দুঃখকষ্ট পেয়েছি সে শুধু মাকে কষ্ট দিয়েছিলুম বলে তার শাস্তিস্বরূপ, সে-কথা জানি। ব্যস, এ বিষয়ে আর কোনো কথা না। এবারে তোমার কথার উত্তর দি। আমি গোডেসবের্গ ছেড়ে কাল যাচ্ছিনে পরশু যাচ্ছিনে ৩২৩ না।”

খুশীতে গলা ভরে বললে, “বাঁচালে।” তারপর মনমরা হয়ে শুধোলে, “তরশুর পর?”

আমি গম্ভীর হয়ে বললুম, “লটে, তোমার কথা শুনে যে কোনো লোক ভাববে যেন কোনো বাচ্চা মেয়ে জীবনে এই প্রথম প্রেমে পড়েছে।”

নিশ্চিন্ত মনে লটে বললে, “তা ভাবুক না। আমার তাতে কি? যে জিনিসের মূল্য না বুঝে কিংবা নিজেদের এঞ্জেলের মত মনে করে দস্তভরে কতকগুলো পাঁড় ইডিয়ট

হাসি-ঠাট্টা করে তার গায়ে তাড়ে করে কোনো ক্ষত হয় না।”

আমি উৎসাহভরে বললুম, “দাঁড়াও, দাঁড়াও। তোমার কথাতে আমার গুরুর একটি আপ্তবাক্য মনে হল। শোনো, শোনো।

“বাহুর দম্ভ, বাহুর মতো, একটু সময় পেলে
নিত্য কালের সূর্যকে সে এক-গরাসে গেলো,
নিমেষ পরেই উগরে দিয়ে মেলায় ছায়ার মতো,
সূর্যদেবের গায়ে কোথাও রয় না কোনো ক্ষত।”

হায়, অনুবাদে কি আর সে রস আসে, সাথে কি বিবেকানন্দ বলেছেন, অনুবাদ—
সে তো কাশ্মীরি ডিজাইনের উল্টো দিকটা দেখার মত।”

লটে বললে, “মূর্খ মূর্খ মূর্খ, কি ভাববে সবাই? বুড়ি লটের ভীমরতি ধরেছে,
এইবারে দেখে নিয়ো। কী কেলেকারিটাই না হয়। ড্যাং ড্যাং করে লাফাতে লাফাতে হের
সারেডকে বগলে চেপে চললো লটে মস্তে কার্লো কিংবা হাওয়াই দ্বীপে। জব্বর
অপারেশন করিয়ে মুখের চামড়া টান-টান করাবে। পাকি-পাকছি পাকি-পাকছি চুলের
উপর লাগাবে তিন পলস্তুরা কলপ—”

“তা হলে?”

“তা হলে? এই যে তুমি তিন দিন থাকবে আমি কি তোমার পিছন পিছন হেঁক
হেঁক করবো নাকি? তোমার গায়ে পোস্টেজ স্ট্যাম্পের মত সেঁটে রইব নাকি—”

“গেল গেল” চিৎকার করে উঠলুম আমি। কি যেন কি একটা ভাসন্ত জিনিসের সঙ্গে
ভেলা খেয়েছে জব্বর এক ধাক্কা ॥

॥ ৩৩ ॥

জর্মন কবি গ্যোটেকে নিয়ে যত গবেষণা আলোচনা হয়েছে, রবীন্দ্রনাথকে নিয়ে তার
শতাংশের একাংশ হয়েছে কিনা সন্দেহ। অথচ জর্মন সাহিত্যে গ্যোটে ছাড়াও এমন সব
কবি রয়েছেন যাদের দু-চারজনকে পেলে আমাদের সাহিত্য বর্তে যেত। স্বয়ং রবীন্দ্রনাথও
তাই অল্প বয়সেই জর্মন কবি হাইনের গুটিকয়েক কবিতার বাঙলা অনুবাদ করেন।
লোকে বলে গ্যোটে সম্বন্ধে জর্মনে তথা পৃথিবীর অন্যান্য ভাষাতে এত বেশী আলোচনা
টীকা-টিপ্পনী করা হয়ে গিয়েছে যে আজ নয়, প্রায় অর্ধশতাব্দী পূর্বে এক ছোকরা গবেষক
তার ডকটরেটের জন্য অন্য কোনো সবজেক্ট না পেয়ে থিসিস লেখে “গ্যোটে ও
দস্তশূল” বিষয়ের উপর। তার বক্তব্য ছিল গ্যোটের কাব্যে যে-সব বিষাদময়
নৈরাশ্যব্যঞ্জক অনুভূতি আমরা পাই, তার অধিকাংশই কবি রচনা করেছেন যখন তিনি
দাঁতের কনকনানিতে কাতর, কিংবা কাতর না হলেও সেটা তাঁকে স্বস্তিতে আপন রুচি
অনুযায়ী (কলকান্ত-ই হিন্দীতে যে-রকম বলে “আপ রুচি খানা”) কবিতা রচনা করতে
দিত না। দস্তরুচি অনুযায়ী অর্থাৎ দাঁতের যা রুচি, সেই অনুযায়ী লিখতে বাধ্য হতেন,
অর্থাৎ “পর রুচি” খেতেন—এখানে আমি অবশ্য “দস্তরুচি” প্রচলিত “দাঁতের সৌন্দর্য”
অর্থে ব্যবহার করিনি। এবং দাঁতের রুচি যে কি হতে পারে সেটা ভুক্তভোগী পাঠক
নিশ্চয়ই আমার নিবেদন শেষ হওয়ার বহু পূর্বেই দস্তরুচি বিকশিত করে সহাস্য আসো
অনুমান করে নিয়েছেন।

এসব অবশ্য বাড়াবাড়ি। কিন্তু আমরা সকলেই জানি, নদী এবং প্রধানত পদ্মা—
রবীন্দ্রনাথের জীবনের কতখানি বৃহৎ অংশ অধিকার করে তাঁকে সুখে-দুখে সজ
দিয়েছে। এমন কি শান্তিনিকেতনে ব্রহ্মচর্যাশ্রম স্থাপনা করার পর থেকে পদ্মার সঙ্গে তাঁর
যোগসূত্র ক্ষীণতর হওয়া সত্ত্বেও তাঁর কাব্যজগতে “সে বিরাট নদী চলে নিরবধি”।
ক্ষীণস্রোতা তো হয়ই নি, বরঞ্চ সে মৃন্ময়ী নদী তখন চিন্ময় রূপ ধারণ করে তাঁর
জীবনদর্শনে প্রধানতম স্থান অধিকার করে নিয়েছে। তাই বৈতরণীর সম্মুখীন হওয়ার বহু
পূর্বেই তিনি গেয়েছেন :

‘ওরে দেখ, সেই স্রোত হয়েছে মধুর,
তরণী কাঁপিছে থর থর।...

তিনি চলবেন,

মহাস্রোতে

পশ্চাতের কোলাহল হতে

অতল আঁধারে—অকুল আলোতে।’

নদী তরণীর দেশ “বাংলাদেশ”। সে শুভদিন প্রত্যাসন্ন যেদিন ঐ বাংলাদেশের ভাবী
পদ্মা-সন্তান “রবীন্দ্রনাথ-পদ্মাতরণী” রচনা করে বাংলাদেশের চিন্ময়রূপ আলোকিত
করবেন।

পদ্মার জলে স্নান করেছি, সাঁতার কেটেছি বিস্তর। কিন্তু নৌকো কুপোকাত হওয়ার
অবশ্যজ্ঞাবী ফলস্বরূপ কখনও নাকানিচোবানি খাইনি। একদা মিস মেয়ো যখন তাঁর
ড্রেন-ইনস্পেক্টর রিপোর্টে ভারতবাসীর নোংরা স্বভাবের চূটিয়ে নিন্দা করেন তখন
তদুত্তরে প্রাতঃস্মরণীয় লালা হরকিষণ লালের সুযোগ্য পুত্র শ্রীযুক্ত কানহাইয়া লাল
গাওবা তাঁর “আংকল শ্যাম” (Uncle Sham = বুটা চাচা বা “ঠক চাচা”ও বলতে
পারেন) পুস্তকে প্রসঙ্গক্রমে মার্কিনদের স্বপ্নলোক ফ্রান্সভূমি—মার্কিন প্রবাদে আছে
“অশেষ পুণ্যবান আমেরিকান পরজন্মে ফ্রান্স ভূমিতে জন্মলাভ করে”—তথা তথাকার
জনসাধারণের বদখদ নোংরা স্বভাব সম্বন্ধে বক্তব্যক্তি করেন, “সেই ফরাসী দেশ—
যেখানকার আপামর জনসাধারণ নিতান্ত জাহাজডুবি ভিন্ন অন্য কোনো অবস্থাতেই স্নান
করে না।” কিন্তু আমি এমন কি পাপ করেছি যে এই রাতদুপুরে নৌকোডুবির ব্যবস্থা
করে বরুণদেব আমাকে স্নান করাবেন—আমি তো হে, প্রভো, নিত্য প্রভাতে দিব্য স্নান
করি। তদুপরি যে দুর্ভাবনা আমার মনের ভিতর চড়াৎ করে নেচে গেল সেটি শুনলে
লেডি-কিলার মাত্রই আমাকে বর্বরস্য বর্বর ভিন্ন অন্য কোনো উপাধি দেবেন না—লটে
সাঁতার জানে তো, আমি তো ব্রিটনের প্রাক্তন মন্ত্রী নটবর মি. প্রফুমো নই যে মাঝরাতে
রাইন নদীতে লটের সঙ্গে জলকেলি করবো। হুঁ—

নদীর জলে স্নান করাটা

বলেন গুণী, স্বাস্থ্যকর।

প্রাণটা আগে বাঁচাই দাদা,

জলকেলিটা তাহার পর ॥

কিন্তু উলটো বুলি রাম; লটে চৈচিয়ে শুধোলো, “সায়েড, তুমি সাঁতার জানো
তো?”

বাঁচালে। কারণ যে সূরে প্রহরাটা শুধলো, তার থেকে স্পষ্ট বোঝা গেল, লটে সাঁতার জানে, তার দৃষ্টিভঙ্গি আমাদের নিয়ে। বদরপীর সোনাগাছির জন্মদাতা সোনা গাজী দুজনাই পাণির পীর, এবং মাঝি-মাস্তার ত্রাণকর্তা। এতক্ষণ মনে মনে উভয়কে স্মরণ করছিলুম; এখন বিস্তর শুকরিয়া জানালুম।

কিন্তু কোনো পীর কোনো বরুণদেবের শরণ না নিলেও চলতো। লটে দেখি খোলামকুচিখানা খাসা সামলে নিয়েছে। কিন্তু ধাক্কা লেগেছিল কিসে? কোনো বয়াতে নাকি? কিন্তু লটে আমার প্রশ্নের উত্তর দেওয়াটা বিলকূল বেকার মনে করে শুধালো, “ভয় পেয়েছিলে নাকি?”

“না।”

লটে তাকিলাভরে বললে, “এ-রকম তো আখছারই হয়। আর ছোট নৌকো তো বড় জাহাজের চেয়ে ঢের বেশী নিরাপদ। নইলে বিরাট জাহাজ ডুবে গেলে মানুষ ক্ষুদে লাইফ-বোটে ওঠে কেন? তাহলে আগেভাগে ছোট নৌকো চড়লেই হয়। কিন্তু এ-যুক্তিটা আমার আবিষ্কার নয়। কে যেন এক মিনি-নৌকো-পাগলা দুঁদে আটলান্টিক শিকারী, বলতে গেলে ডিমের খোলায় চড়ে স্পেন থেকে পানামা না কোথায় যেন পৌঁছয়। সেখানে কেউ ওকে না থামালে হয়তো তারপর লেগে যেতো প্রশান্ত মহাসাগর পাড়ি দিতে। তাকে নাকি হিটলার প্রহরাটা শুধিয়েছিল। হয়তো লোকটার কথাই ঠিক। আমি কিন্তু ওরকম সাগর পাড়ি দিতে একা-একা পারবো না।”

“কেন, মেয়েরা একা কোনো কাজ করতে ভয় পায় তাই?”

“কিছু জানো না তুমি সায়েড। একা একা বিস্তর কাজ করে থাকে মেয়েরা। কিন্তু ভয় পায় একা থাকতে। শারীরিক মানসিক দুই অবস্থাতেই ভয় পায় একা থাকতে। এই যে ছোঁড়াছড়িরা ঘেঁই ঘেঁই করে নৃত্য করছে, তাদের তিন কোয়ার্টার শেষ পর্যন্ত বিয়ে করতে চায়। কিন্তু আরেকটা একা থাকা সত্যি রীতিমত বিপজ্জনক। আমাদের বাড়িটা দেখেছো তো—চতুর্দিক নির্জন। যে কোনো রাত্রে এমন কি দিনের বেলাও যে-কোনো মহাপ্রভু মার্কিন স্টাইলে বাড়ি হানা দিতে পারেন—হাতে পিস্তল চোখের উপর দুটো ফুটোওলা পট্টি। এবং মেয়েরাও কম যান না। পিস্তল ব্যবহার করতে মোটেই বাধে না। ব্যাঙ, ব্যাঙ, ব্যাঙ। ব্যস হয়ে গেল। তুমি দু-ভাঁজ হয়ে সামনের দিকে—না, দড়াম করে নয়, চুবশে-যাওয়া বেলুনটার মত ধীরে ধীরে কার্পেটের উপর গুটিয়ে পড়বে। তারপর রক্তগঙ্গা—”

আমি বাধা দিয়ে বললুম, “লটে, তুমি বড্ড বেশী মার্কিন ‘ক্রীমী’ পড়েছো (ক্রাইম-নভেল, ক্রাইম-টেলিভিজনের মার্কিনী এই শব্দটি জার্মানরা গোপ্তাসে গ্রহণ করেছে)। আমাদের দেশের লোক একটুখানি অলঙ্কার চাপিয়ে এস্থলে বলে, ‘ঘামের ফোঁটায় কুমির দেখেছো’।”

“কথাটা তো চমৎকার। মনের খাতায় টুকে রাখলুম। কিন্তু তোমাকে যা বলছি সেটা একদম সত্যি। আচ্ছা, সব-কিছু বাদ দিয়ে তোমাকে শুধোই, তুমি কখনো ‘বাডারমাইনহফ-গ্রুপ’-এর নাম শুনেছ?”

“না। পলিটিক্যাল পার্টি নাকি?”

“না। তাই এখনো নিজেদের ‘গ্রুপ’ বলে। এই তো তোমাদের এলেম। কথায় কথায় তুমি যে আমাদের মার্কিনী মার্কিনী খেতাবটা দাও, যেন আমি মার্কিন বেড়ালের জার্মান

ন্যাজ, তুমি বরঞ্চ মার্কিন রিপ ডান উইনকলকে হার মানাতে পারো। সে ঘুমিয়েছিল কুপ্পে কুড়িটা বছর, তুমি ঝাড়া চল্লিশটি বছর। এরকম—”

“আহা! চল্লিশটি বছরে আমার কোনো অভিজ্ঞতা হয়নি, আর পাঁচটা দেশের তুলনায় জর্মনি যে অনেকখানি বদলে গেছে তার কোনো খবর রাখিনে—এই তো?”

“উ—”

“সে-ই তো ভালো। তাই তোমাকে দেখাযাই চিনে ফেললুম,

‘তোমার পানে চেয়ে চেয়ে

হৃদয় উঠিল গেয়ে,

চিনি, চিনি, সখী।

কত প্রাতে জানায়েছে

চিরপরিচিত তোমার হাসি,

“আমি ভালোবাসি” ॥’

এইবারে বলো, চল্লিশ বছরে আর পাঁচজন যে-রকম বদলে গেছে আমার বেলা তাই হলে কি ভালো হত।”

খুশী মুখে লটে বললে, “শুনতে মন্দ লাগছে না। কিন্তু এই ভালোবাসার ব্যাপারেই যে তুমি কি দারুণ অগা সেটা আমি তোমাকে না শুধিয়ে বুঝতে পেরেছি। এবং যৌন সম্পর্ক ব্যাপারে আজ জর্মনি কোন্ জায়গায় এসে পৌঁছেছে তার কোনো খবরই রাখো না। আচ্ছা বলো তো, তোমার কি মনে হয়, এদেশের ইস্কুলের ছেলেমেয়েদের শতকরা কতের ইস্কুলে থাকতে থাকতেই যৌন অভিজ্ঞতা হয়ে যায়?”

“কি করে বলবো, বলো। খুবই অল্পই। ধর্তব্যের মধ্যে নয় নিশ্চয়ই।”

খানিকক্ষণ চুপ করে থেকে লটে বললে, “তাহলে শোনো, এবং ভির্মি খেয়ো না। ষোল-সতেরো বছর বয়স হতে না হতেই শতকরা পঁয়ত্রিশটি ছেলের ত্রিশটি মেয়ের পরিপূর্ণ যৌন অভিজ্ঞতা হয়ে যায়। পনেরো বছর বয়সেই যথাক্রমে শতকরা চৌদ্দ/পনেরো ও দশ। এবং চৌদ্দ বছর বয়সেই একশোটার ভিতর জনা পাঁচেক!”

আমি স্তম্ভিত হয়ে শুধোলুম, “এ-সব কি সত্যি? আর তুমি জানলেই বা কি করে?”

“জ্ঞানতে হয় তাই জেনেছি। আমি যে একটা ইস্কুলে আমার বান্ধবীর হয়ে মাঝে মাঝে পড়াতে যাই। হালেরই তো একখানা প্রামাণিক বই বেরিয়েছে। আমি তোমাকে শুধোচ্ছিলুম, তোমাদের দেশে পরিস্থিতিটা কি রকম, তার খবর নিয়ে তুলনা করে দেখতে। জানো, আমার নিজের বিশ্বাস যে-দেশের লোক অল্প বয়সেই যৌন অভিজ্ঞতা পেয়ে যায় তারা উন্নতিশীল প্রোগ্রেসিভ হয় না। এসব কথা এখন থাক। তোমাকে সেই স্টাটিসটিকস্ ভর্তি বইখানা দেব। তুমি সেটা পড়ে নিলে আলোচনার সুবিধে হবে। কিন্তু হাতের কাছে ভিরমি ভাঙবার জন্য স্মেলিং সলটস্ রেখো...ঐ দেখো, আমরা জর্মনি রাইখের প্রেসিডেন্টের বাড়ির কাছে গিয়েছি।”

এদেশে, এ-দেশে কেন পৃথিবীর সর্বত্রই এ-যুগে স্ত্রী-পুরুষের সম্পর্ক নিয়ে এত বেশী আলোচনা, নাটক, ফিল্ম, সাহিত্য, সঙ্গীত তৈরী হচ্ছে যে, আমরা এই ইন্টগোলের

মাঝখানে প্রায়ই ভুলে যাই যে, এই ভারতেই রতি বা কাম সম্বন্ধীয় প্রথম পুস্তক রচিত হয়। এই সর্বপ্রথম পুস্তক বহু যুগ ধরে সম্মানিত হয়েছে নিশ্চয়ই, কিন্তু এ-যুগে পৃথিবীর সর্বত্র এ বই এমনই সিংহাসনে আসন পাচ্ছে, শুধু তাই নয়, এমনই জনপ্রিয় হয়েছে যে, একে এখন অক্রেপেই ওরো-আমেরিকার অন্যতম বেস্ট-সেলার বলা যেতে পারে। ঠিক মনে পড়ছে না, কোথায় যেন পড়েছি, এক নাতিবৃদ্ধ জ্যাঠামশাইকে তাঁর ভাইঝি একখানা অতি মনোরম দ্য-লুকস বই উপহার দেয়—তাঁর জন্মদিনে। এই ভদ্রজন পুস্তক সঞ্চয়নে অতিশয় অনুরক্ত ছিলেন এবং এ-রকম মরক্কো চামড়ার বাঁধাই সোনালী, চারুকর্ষে ঝলমলিয়া কেতাব যে তিনি একটু মনোযোগ সহকারে দেখবেন, মেয়েটি সে-আশা নিশ্চয়ই করেছিল! জ্যাঠামশাই সেরকম কিছু করলেন না বটে, কিন্তু দেখা গেল, তিনি অতিশয় সযত্নে তাঁর আপন ডেসকে আর পাঁচটা দামী জিনিসের সঙ্গে সেটি তালাবদ্ধ করলেন। তারপর বহু বৎসর কেটে গেল, সামান্য এই ঘটনাটি কে-ই বা মনে রাখে। তাঁর মৃত্যুর পর (যতদূর মনে পড়ছে তাঁর অন্য এক ভাইঝি) তাঁর ঘরদোর গোছগাছ করতে গিয়ে ডেসকের ভিতর আবিষ্কার করলো সেই প্রাচীন দিনের বইখানি। ততদিনে ইয়োরোপ নানা বিষয়ে মুগ্ধমনা হয়ে গিয়েছে কিন্তু ভাইঝি বইখানা দেখে স্তম্ভিত। সেই সে-আমলে কোনো ভদ্র পরিবারের মেয়ে তাঁর শান্তশিষ্ট বয়স্ক জ্যাঠামশাইকে “কামসূত্র” উপহার দেবে, এ তো একেবারেই অবিশ্বাস্য। আসলে মেয়েটি দোকানে গিয়ে নিশ্চয়ই চেয়েছিল, কোন্‌ একখানা বেস্ট-সেলার এবং তার চেয়েও বড় কথা, সেটার বাঁধাই যেন অসাধারণ চাকচিক্য ধরে। জ্যাঠামশাই সব জাতের বইয়ের খবর রাখতেন। রঙিন মোড়ক খুলে এক নজর তাকাতেই বুঝে ফেলেছিলেন, ব্যাপারটা কি, কিন্তু মেয়েটি যাতে লজ্জা না পায় তাই তিনি ঐ পছা অবলম্বন করেন।

এর থেকেই পাঠক অনায়াসে বুঝে যাবেন যে, ঘটনাটি ঘটেছিল মাস্কাতার আমলে; নিদেন মহারানী ভিক্টোরিয়ার সুবর্ণযুগে এবং খুব সম্ভব তাঁর পূতপবিত্র আপন দেশে। কারণ বহু বহু কন্টিনেন্টাল গুণীজ্ঞানীর দৃঢ় প্রত্যয়, কুন্সে ইয়োরোপের একমাত্র বিলেত-দেশেই যৌনজীবন নামক কোনো প্রতিষ্ঠান নেই, কন্সিনকালেও ছিল না—অন্তত ফরাসীদের গলা কেটে ফেললেও তারা এ-বিশ্বাস কিছুতেই ত্যাগ করবে না। অবশ্য দেশকালপাত্র হিসেবে নিয়ে ইংরেজ জীবনযাপন পদ্ধতি সম্বন্ধে সে তার মতবাদের অতি সামান্য কিছুটা অতি অবরে-সবরে সামান্য রদবদল করতে পারে। যেমন, একদা ইংরেজ সম্বন্ধে ফরাসীদের মধ্যে সুপ্রচলিত প্রবাদ ছিল, “কন্টিনেন্টের আর-সর্বত্র নরনারীর মধ্যে যৌন সম্পর্ক থাকে, ইংরেজের থাকে, গরম জলের বোতল।”[১] কিন্তু ইতিমধ্যে এই পৃথিবীতে, তার সর্বোত্তম গৌরবময় যুগে, মানুষ কলকজ্জা যন্ত্রপাতি, এক কথায় টেকনিকাল সর্ববাবদে এমনই উন্নতি করেছে যে, এস্তেক ফরাসীও সেটাকে এড়িয়ে যেতে পারে না। বংশবৃদ্ধি বংশ-নিরোধ আরো মেলা আশকথা পাশকথা তার কানে এসেছে।

(১) এ-দেশেও বলে, “শীত কাটাতে হলে হয় দুই, নয় রুই (তুলার লেপ)।” ইংলন্ডের কাঠফাটা শীতে তুলোতে কিছু হয় না বলে হট-ওয়াটার-বটলকে সে শয্যাসঙ্গিনী করে। ইংরেজের চাচাতো ভাই ডাচদের সম্বন্ধে বলা হয়—যদিও বিলেতের মত ও-দেশেও যৌন-জীবন নেই, একথা কেউ কখনো বলেনি—“অন্য দেশের পুরুষ যৌবনে বিয়ে করে, হল্যান্ডের লোক পাশবাশিশ কেনে”, এটা চালু হয় ডাচদের কিপটেমি বোঝাবার জন্যে।

তাই বিস্তর ঘাড় চুলকে অনেক ভেবেচিন্তে তার পূর্বকার প্রবাদটি বছর দশেক পরে পরিবর্তিত করে সর্বাধুনিক পরিমার্জিত সংস্করণ ছাড়লে, “এখন তারা ইলেকট্রিক কারেটে গরম করা লেপ ব্যবহার করে।”

এসব বিষয়ে অধুনা এক অতিশয় খানদানী ডিউক একখানি প্রামাণিক পুস্তিকা রচনা করেছেন। এ পুস্তিকা রচনা করার হক তাঁর ন-সিকে, প্লাস “শরণার্থী সহায়তা” কী লীয়ে পাঁচ নয় পয়সে। বললুম বটে কিন্তু বন্ধমান “জান্” (কোম্পানি আমলের বানান) সায়েব যখন রাজসিক চাকচিক্যময় ডিউকত্ব লাভ করলেন তখন সঙ্গে সঙ্গে লাভ করলেন মহারানীর রাজত্ব বাঁচাবার জন্য, সহায়তা কী লীয়ে চার মিলিয়ন পৌন্ডের চেয়েও বেশী মৃত্যু-কর, বা ডেথ ডিউটি। ফরেন এম্বলেন্স নিয়ে কালোবাজার করার মত কিম্বৎ কপালে লেখা ছিল না বলে সেই পাঁচ পয়সী ডাকঘর যিনি নিরিখ বেঁধে মুন্ময় টাকাকে ‘হিরন্ময়’ পৌন্ডে পরিণত করেন সে-আর্য্য নির্দেশ দিয়ে বলে মোটামুটি ১০০০০০০০০ (দশ কোটি) টাকা—যদি খেসারতী চার মিলিয়নের উপরে ধরা হয়—; নইলে কত আর?—এই ধরুন কোটি সাত আষ্টেক।

এ-ভদ্রলোক বলছেন, “যৌন সম্পর্ক ব্যাপারটা নিছক কন্টিনেন্টের একচেটে আবিষ্কার নয়। কন্টিনেন্টের বাসিন্দারা তাঁদের ‘কমন মার্কেটে’ আমাদের পাত পাড়তে না দিয়ে সে-সুখ থেকে আমাদের বঞ্চিত করতে পারেন কিন্তু প্রেম করার সুখ থেকে বঞ্চিত করতে পারবেন না। তফাৎটা তবে কোথায়? ওনারা তাঁদের যৌনজীবন নিয়ে বিস্তর ঢাকঢোল বাজিয়ে বেহদ চেল্লাচেল্লি করেন, এস্তের বড়ফাটাই মারেন, ঐ নিয়ে অষ্টপ্রহর ভ্যাচর ভ্যাচর করেন। আমরা করিনে। আমাদের বিবেচনা-বোধ আছে, আমরা পিছিয়ে থাকতে ভালোবাসি। এর থেকে কি স্পষ্টই ধরা পড়ে না যে, নিজেদের উপর ওদের প্রত্যয় নেই, আমরা ওদের চেয়ে সরেস? (ডুক বোধ হয় বলতে চেয়েছেন, ‘ইংরেজ জাটটা নীরব কর্মী’! —লেখক) আর এইটাই হল সব কথার নির্যাস। পৃথিবীর আর সর্বত্র যা ঘটে থাকে এ-দেশেও তাই ঘটে। শুধু আমরা আমাদের যৌনজীবন নিয়ে বড় একটা কথা বলিনে। হয়তো বা প্রকৃতিদেবীই এই প্রবৃত্তিটি দিয়ে আমাদের গড়েছেন। পুরুষানুক্রমে হয়তো বা আমরা নীতিবাগীশ—ঐটে পেয়েছি উত্তরাধিকারে। কিংবা হয়তো এও হতে পারে যে, এ-খেলাটার আইনকানুন আমাদের দেশে অন্য এক ভিন্নভাবে গড়ে উঠেছে; আর সবাই জানে স্পোর্টসের আইনকানুন মেনে চলাতে আমরা পয়লা নম্বরী এবং তার চেয়েও ঢের ঢের বেশী কেরদানী আছে আমাদের ভগুমিতে।”

এই এতক্ষণে আমাদের মাই লর্ড ডিউকপ্রবর হাটের মধ্যখানে হাঁড়িটি ফাটালেন—ইংরাজীতে বলা হয় কার্পেটের হ্যান্ডব্যাগ থেকে লুকনো বেড়ালটা বের হবার মোকা পেয়ে এক লক্ষ্মে কেলেকারিটা ফাঁস করে দিলে। কিন্তু এস্থলে শ্রীযুক্ত জন-এর প্রতি সুবিচারের খাতিরে অবশ্যই বলতে হয়, তিনি সজ্জন এবং সঙ্গে সঙ্গে এককাঁড়া দুট্টবুদ্ধিও ধরেন। ইংরেজের নষ্টামি ভগুমির চিচিং ফাঁক করে দিতে পারলে তিনি সদাই নির্বিষ বিমলানন্দ উপভোগ করেন। তার একটা কারণ হয়তো এই যে, সাতপুরুষের (আসলে ইনি গোষ্ঠীর ত্রয়োদশ পুরুষ) ভিটের উপর খাড়া প্রাচীন কাসলটি বাঁচাতে হলে তাঁকে সরকারের প্রাপ্য অষ্ট কোটি টাকার ট্যাক্সটা দিতে হয় রোজ্জা নন্দানন্দি, এবং সে-রেস্তটা কাছারিবাড়ির হেঁদো তহবিলে বাড়ন্ত। তাই বহু পূর্বেই নিবেদন করেছি, এস্থলে আমাদের

উল্টো “উপীন” যেন তেন প্রকারেণ কাস্‌লাটি খুলে দিলেন পবলিকের তরে। “ফ্যালো দশনীর কড়ি—মাথো ত্যালা।” বলে কি! বিলেতের খানদানী পরিবারের কেউ কস্মিনকালেও এ-হেন “অনাশ্চিষ্টি কস্মো” করেননি। নবাব সায়েবরা যে কি পরিমাণ চটেছিলেন তার জরীপ এ-স্থলে অবান্তর। বরঞ্চ জন মিঞার দাদ নেবার কায়দাটি বড়ই মুখরোচক—তিনি ওনাদের যাবতীয় ধূর্তামি নষ্টামি বের করে দিলেন দুখানি বইয়ে—এবং ইহসংসারে ভিলেজ ইডিয়টটা পর্যন্ত বিলক্ষণ অবগত আছে ভণ্ডামির গণ্ডা গণ্ডা ভাণ্ড চিরকালই যৌনরসে টেটখুর।

এই বৃদ্ধ বয়সে আমি যে ইয়োরোপের কাম-কাণ্ড নিয়ে অল্পবিস্তর গবেষণা করছি তার জন্য কোনো প্রকারের কৈফিয়ৎ দেবার বা সাফাই গাইবার প্রয়োজন আমার পাপ বিবেক রস্তিভর অনুভব করছে না। আমার অকরণতম পাঠক এমন কি এদানির যে-সব রুচিবাগীশ মার্কামারা পদিপিসীর পাল এসব “চলাচলি” না করে খট্টাপুরাণ বা এরণ্ডমৌলার নবনির্ঘণ্ট নির্মাণ করতে মাণ্ডামাস ঝাড়েঁন তাঁদের স্মরণে আনছি যে, ঝাড়া বিয়াল্লিশ বছর ধরে আমি ভারত ইয়োরোপ আফ্রিকায় মাকু মারছি, ক্রনিক মেলিগনেস্ট বেকারি ব্যামো থেকে ভুগছি বলে গত বাইশ বছর ধরে মাঝেসাঝে সেই মাকু মারার বয়ান লিখে পথ্যির হাঁড়ি চড়িয়েছি, তার পূর্বেকার অর্থাৎ ভ্রমণারম্ভের প্রথম কুড়ি বছরের কাহিনী কাবলীওলার বোয়াল মাছের মত চোখ-রাঙানি সন্ত্বেও মা সরস্বতীর কাছ থেকে ভিক্ষে চাইনি। সে সব কথা এখন থাক। আমি শুধু শুধোচ্ছি, অর্ধসিদ্ধ অর্ধপক্ক যা-সব লিখেছি তাতে কি পাঠকের মনে কখনো সন্দেহ জেগেছে যে, আমি যৌন-কেচ্ছার সন্ধান পাওয়ামাত্রই তার পিঠের উপর ডাকটিকিটের মত সঁটে গিয়েছি? বরঞ্চ বলবো ও-বাবদে আমার উৎসাহ ছিল অত্যন্ত। তার প্রধান কারণ, আমার ধারণা জন্মেছিল, যদিও ইয়োরোপের যৌনজীবন, প্রেমের ছড়াছড়ি প্রাচ্যভূমির তুলনায় অনেকখানি বে-আবরু তবু তাদের ঐতিহ্য বৈদম্ব্যের সঙ্গে তাদের আচরণের খতন মেলালে সামঞ্জস্যটাই চোখে পড়ে বেশী। (বরঞ্চ মাঝে মাঝে মনে হয়েছে, কামসূত্র, কুটুর্নীমতম্, চৌরপঞ্চাশিকা, এমন কি অর্বাচীনকালে বিদ্যাসুন্দর লেখার পর আমরা কেমন যেন ঈষৎ বেরসিক হয়ে গিয়েছি। সে কথা থাক।) মাত্র দশ বছর পূর্বেও ইয়োরোপে যে বাড়াবাড়ি দেখেছি তাতেও মনে হয়নি যে, ঐ নিয়ে কাউকে অত্যধিক দৃষ্টিস্তাগ্রস্ত হতে হবে। তবে খুব সম্ভব দু-এক জায়গায় আধা-সাদা অপ্রসন্নতা প্রকাশ করেছে। এবারে যা দেখলুম, শুনলুম, পড়লুম, বিশেষ করে লটে যে-সব কথা বললো তার থেকে মনে প্রশ্ন জাগলো, প্রতীচোর বহু দেশে অত্যধিক মদ্যপান যেমন এই শতাব্দীর গোড়ার থেকে একটা কঠিন সমস্যায় দাঁড়িয়েছে, ঠিক তেমনি এদের যৌন আচরণ যে-প্রোতে গা ঢেলে দিয়েছে, যে গতিতে এগিয়ে চলেছে, বিশেষ করে ইঙ্কুলের পনেরো শোল সতেরো বছরের ছেলেমেয়েদের উপর এটা যে-ভাবে প্রভাব বিস্তার করেছে তার পরিণতি কোথায়? ব্যক্তিগতভাবে আমার মাত্র একটি বিষয়ে কৌতূহল আছে : ব্রঙ্কার্চ, সেক্স স্টার্ভেশন কি মহত্তর কর্মে সাহায্য দেয়, উচ্চতর আদর্শে উদ্বুদ্ধ করে? দু-হাজার বছর ধরে ক্যাথলিক পাদ্রিরা ব্রঙ্কার্চী জীবনযাপন করার পর আজ বহুতর ব্রঙ্কার্চী এবং গৃহীর মনে ঐ নিয়ে সন্দেহ জেগেছে—বৌদ্ধদের ভিতর এ সমস্যা নিয়ে কোনো আলোচনা এখনো আমার কানে এসে পৌঁছয়নি।...পাঠকদের মধ্যে যাদের বয়স কম তাদের মনে নিশ্চয়ই আরেকটা

চিন্তার উদয় হবে : আজ ইয়োরোপে যা হচ্ছে কাল সেটা এ-দেশে দেখা দেবে না তো ? এবং দিলে দু-দিনের মধ্যে যে তার ভেজাল রূপ দেখা দেবেই সে বিষয়ে আমি সূনিশ্চিত।

সবুরদার পাঠক। এ কচকচানিতে তুমি যদি কিঞ্চিৎ চঞ্চলিত হয়ে থাকো, তবে আমি মাফ চাইছি। ভবিষ্যতে আর ককখনো এমন শুনা করবো না—এ-ওয়াদা করলে অধর্ম হবে, তবে চেষ্টা দেব, পরশুরামী ভাষায় তোমার “মন যেন হিম্মোলিত হয় : চিন্তে চুলবুল লাগে।”

তার জন্য ঐ জন্ সাহেবটির সরেস মন্তব্য যেন মন্তব্যমণ্ডলীর সায়েব।

পাঠক, ফরাসী দেশে তুমি যদি কোনো ফিল্ম-স্টার বা অভিনেত্রীর সঙ্গে প্রেম জমাতে পারো তবে আর পাঁচজনের চোখে ফুটে উঠবে সন্ত্রম; মুখে ফুটেবে সপ্রশংস “ও! লা লা!” বুকে ফুটেবে কাঁটা—কিন্তু সেটি অতিশয় বেবি সাইজের, দৃষ্টিভ্রান্তার কারণ নেই, কারণ ফরাসী জাতটা মোটেই হিংসুটে নয়। “কিন্তু”, জন্ বলছেন, “এমন কন্মটি লন্ডনে করতে যেয়ো না। এতে করে তোমার খ্যাতি-প্রতিপত্তি বাড়বে তো না-ই বরঞ্চ তোমার পক্ষে রীতিমত খতরনাক্ হতে পারে—বিশেষ করে তুমি যদি এ লাইনে এমেচার হও। এমন কি মেয়ে আর্টিস্টের প্যার পেলোও ঐ একই হাল। আর্টের সঙ্গে প্রেম মোটেই ম্যাচ করে না। ও দুটোর মধ্যে কোনো সম্পর্কই নেই। ফরাসীরা অবশ্য প্রেমটাকে আর্টের উচ্চাসনে বসায় (গুরুচণ্ডালী!—বলবো আমরা) এবং ওটাকে একটা অত্যন্ত প্রকৃষ্ট আপন বৈশিষ্ট্যপূর্ণ আর্ট বলে স্বীকৃতি দেয়। কিন্তু আমরা ইংরেজ জাতি স্পোর্টসের নেশন; এ দেশে প্রেমকে এক বিশেষ ধরনের ডনকসরত (জিমনাস্টিক) বলে স্বীকৃত হয়।”

॥ ৩৫ ॥

স্বখাত সলিলে আমি ডুবিনি, তোমাকেও ডোবাইনি। পাঠক নিশ্চিত থাকতে পারো। আর ডুবলেই বা কি? কবিগুরু বাউলের গীত উদ্ধৃত করে বলেছেন, “যে-জন ডুবলো, সখী, তার কি আছে বাকি গো” অবশ্য ‘পাতকো’তে নয়, “রসের সাগরে” “অমিয় সাগরে”। কিন্তু আশ্চর্য, ইংরেজের আপন দেশের চতুর্দিকে গভীর জলের সমুদ্র থাকা সত্ত্বেও সে ডোবাডুবির প্রস্তাব বড় একটা পাড়ে না। তাই ডুক জন্ সেটা লক্ষ্য করে বলেছেন, অন্য দেশের লোক প্রেমকে আর্টের পর্যায়ে ফেলুক (কিংবা ঈশ্বরোপলব্ধির প্রথম সোপান বলে গণনা করুক—লেখক), ইংরেজের কাছে প্রেম এক প্রকারের জিমনাস্টিক। কৌতূহলী মন জানতে চাইলো, সেটা কোন্ প্রকারের জিমনাস্টিক? তখন, ও হরি, আবিষ্কার করলুম ইংরেজের আরেকপ্রস্ত ভণ্ডামি। মার্কিন জাতের পুণ্যভূমি যে রকম প্যারিস, বিলেতের ভণ্ড এবং স্রব—দুজনার মধ্যে খুব যে একটা ফারাক আছে তা নয়—দুজনারই মোক্ষক্ষেত্র অজ্ঞফর্ড। সেই অজ্ঞফর্ডে আছে একটি বিশ্ববিদ্যালয়। ইংরেজ মোকাবে মোকায় হামেশাই কভু বা কনে বউয়ের মত ফিসফিসিয়ে কভু বা বাঘা জমিদারের মত গলা ফাটিয়ে মহারানীর যে রাজত্বে সূর্য কখনো অন্তমিত হন না সে-রাজত্বে এবং তারই কাছে-পিঠে উপীনদের যে দু-বিষে জমি আছে সে সব জায়গাকেও জানিয়ে দেয় অজ্ঞফর্ডের মত বিদ্যায়তন ত্রিসংসারে আর কোথাও নেই, এবং এসব ব্যাপারে ইংরেজের ন্যাজ মার্কিন

স্বব সাধারণ সর্বাঙ্গ ঘন ঘন আন্দোলিত করে সম্মতিসূচক মুদ্রা মারে। সেই বিদ্যালয় থেকে প্রকাশিত হয় একখানা রাজভাষার অভিধান।[১] অভিধানটি উত্তম কোনো সন্দেহ নেই। কিন্তু স্ফাবিতে ভর্তি। সেই কোষ খুলে দেখতে গেলুম, “টু মেক লাভ” বলতে কি বোঝায়? “প্রেম পড়া” সে তো খুব সম্ভব বিলেতের “টু ফল ইন লাভ” থেকে কবে, কোনকালে পালতোলা জাহাজে করে সরাসরি এদেশে চলে এসেছে। দেখি “টু পে অ্যামরাস অ্যাটেনশনস্ টু—” তবেই তো ফেলল মুশকিলে। ইংরেজ কী ধুরন্ধর জাত। যেখানে টাকাকড়ির ব্যাপার নয় সেখানে চট করে স্বীকার করতে তারি চটপটে। তদুপরি দায়টা ফরাসীর ঘাড়ে ফেলে দিয়ে নিজে চটসে সরে পড়লো—প্রেমদ্রোম তো বাধা, জানে ওরাই। কথটা এসেছে ফরাসী ভাষা থেকে; “আমুর” শব্দের অর্থ “প্রেম” (মূলত অবশ্য এসেছে লাতিন “আমরসুস” থেকে) কিন্তু ফরাসীরা “আমুর” বলতে প্রেম, কাম সবই বোঝে। ওদিকে ইংরেজ “অ্যামরাস” বলতে বোঝে নিছক প্রেম—সে প্রায় আমাদের “রজকিনী প্রেম নিকষিত হেম/কামগন্ধ নাহি তায়”...তাহলে আমাদের মহাখানদানী অক্সফোর্ড অভিধানের মতানুযায়ী “টু মেক লাভ” কথটার অর্থ “বল্লভার প্রতি সপ্রেম মনযোগ দেওয়া, তাঁর যত্ন “আত্মিকর”। এস্থলে বলে রাখা ভালো “লাভ” শব্দে “সেক্স” জাতীয় কোনো প্রকারের ভেজাল নেই এ কথটা পট্টাপট্টি বলবার মত দুঃসাহস অক্সফোর্ডের নেই। তাই অতি অনিচ্ছায় (আমার মনে হয়) স্বীকার করেছেন, “সেক্সুয়াল অ্যাকশন, ডিজ্যার” ইত্যাদি। পুনরপি বলেছেন, “রিলেশন” বিটউইন সুইট হার্টস—এইবারে পাঠক নিশ্চয়ই ঠাঠর করে নিয়েছ শ্রদ্ধাটা কোন্ দিকে গড়াচ্ছে “সুইট হার্টস”—একে অন্যের প্রতি অনুরক্ত জনের সম্পর্ক তো হাজারো রকমের হতে পারে। এখানে যদি অক্সফোর্ড সত্যের খাতিরে সাতিশয় কায়ক্রেপে লিখতেন “স্বামী-স্ত্রীর সম্পর্ক” তা হলেই তো ল্যাঠা চুকে যেত।

এইবারে আইস, নিম্ননাসিক পাঠক, অন্য একখানা অভিধানের শরণাপন্ন হই। যে “কনসাইস অক্সফোর্ড ডিকশনারি” নিয়ে এতক্ষণ নাড়াচাড়া করছিলুম, যার নাম শ্রবণেই শ্রীরাধার ন্যায় উন্নাসিকজনের “কপোল ভাসিয়া যায় নয়নের জলে” তিনি জন্মগ্রহণ করেন ১৯১১ খৃষ্টাব্দে; পক্ষান্তরে আমি যে অন্য কোষের শরণাপন্ন হচ্ছি সে-কোষ প্রথম

(১) ইংরেজ জাতটার প্রাণপুরুষ যে বেনে সেটা বোঝাবার জন্য বহু জ্ঞানী বহুতর যুক্তিতর্ক উদাহরণ-হৃদীশ পেশ করেন। সেগুলো নিতান্তই কাঁচা পড়ুয়ার সেই যুক্তির মত ডাস্টবিন মার্কা : “ওকুমশাই, আমি ঘুমুচ্ছিলুম, কে যেন আমার হাত দিয়ে তামাক বেয়ে গেছে।” আসল মোক্ষম যুক্তি, কামারের এক ঘা-র মত, এই বিপুল বসুন্ধরায় লক্ষ্মী এবং সরস্বতীকে একই গোয়ালে নাকে দড়ি দিয়ে বেঁধে রেখেছে কে কোথায়? ইংরেজ—অক্সফোর্ডে। পেতার না হয় তো যান সেই বিগ্রহ-পাণ্ডার যুগল-মিলন দেখতে সেখানে। এই বিদ্যায়তন এন্তেক কেতাবাদি ছাপে, প্রকাশ করে। এবং সবচেয়ে বড় কথা লাভ করে। কণ্টিনেন্ট বা ভারতের বিদ্যায়তনদের লাভ করা মাথায় থাকুন গচ্চা দিতে দিতে কষ্টশ্বাস। অর্থশাস্ত্রের মহাজনরা বলেন, ১৯৩০-৩২ যখন বিশ্বময় ব্যবসা-বাণিজ্য জীবমৃত তখন যে প্রতিষ্ঠান রেকর্ড মুন্যফা করেন তিনি অক্সফোর্ড। অস্বাদেয় বিশ্ববিদ্যালয়ের ইষ্টমন্ত্র “Advancement of Learning” এই কাঠরসিকতা শুনে এক ইংরেজ বলেছিল, “সেকি! একশ বছর হয়ে গেল, তোমরা এখনো ফালতো “L” অক্ষরটি ঝেড়ে ফেলে দিয়ে আমাদের মত Advancement of Earning করতে পারোনি!”

যে রূপ নিয়ে প্রকাশিত হয় সেটি ১৮২৮ খৃষ্টাব্দে অর্থাৎ অক্সফোর্ডের প্রায় একশ বছর পূর্বে। তার অর্থ, গত একশ বছর ধরে এ অভিধানের ঐতিহ্য। একে সচরাচর ওয়েবস্টার বলা হয় এবং উপস্থিত “Webster’s Seventh New Collegiate Dictionary” নাম দিয়ে কলকাতার রাস্তাঘাটে জ্বলের দরে বিক্রী হচ্ছে—আমার হিসেবে যার দাম হওয়া উচিত ৬০/৭০ টাকা, বিক্রী হচ্ছে সেটি দশ টাকায়—চেষ্টা-চরিত্র করলে পাবেন আট টাকায়। এ-অভিধান অবহেলা করার মত কেতাব নয়। এনসাইক্লোপীডিয়া ব্রিটানিকা বলেন, “অভিধানের ইতিহাস লিখতে গিয়ে এ-অভিধানের উল্লেখ না করলে সে-বিবরণী অসম্পূর্ণ থেকে যায়” এবং “কনসাইন্স অক্সফোর্ড” যে পাঁচখানি “বেস্ট মর্ডান ডিকশনারির” কাছে ঋণ স্বীকার করেছেন তার মধ্যে ওয়েবস্টার রচিত কোষ অন্যতম। এইবারে দেখি ইনি কি বলেন। প্রথমেই দেখা যাচ্ছে, ইনি ঈশ্বর ধর্মভীরু, কারণ “লাভ” শব্দের ভিন্ন ভিন্ন অর্থ দিতে গিয়ে তিনি বলেছেন, “পিতার ন্যায় ঈশ্বর মানব সন্তানের জন্য যে মঙ্গল-চিন্তা করেন (উদ্বেগ ধরেন’ও বলা যায়, কারণ ইংরিজিতে আছে “ফাদারলি কনসার্ন”)। অক্সফোর্ডে ভগবান নেই—না, না—আমি বলতে চাই, অক্সফোর্ড অভিধানে “লাভ” শব্দ ব্যাখ্যা করতে গিয়ে সঙ্কলনকারী মানুষের প্রতি ঈশ্বরের, কিংবা ঈশ্বরের প্রতি মানুষের ভালোবাসার উল্লেখ করার প্রয়োজন বোধ করেন নি কিংবা এই “কুসংস্কারে” বিশ্বাস করেন নি। তা সে যাই হোক, সেই ধর্মভীরু ওয়েবস্টার “লাভ” শব্দের নানা অর্থ দিতে গিয়ে (কেউ কেউ যে ঈশ্বরের প্রতিশব্দরূপে “লাভ” ব্যবহার করেন সেটাও বলেছেন) লিখছেন “যৌন আলিঙ্গন” এবং সেটা বোঝাতে গিয়ে সঙ্গে সঙ্গে ক্যাপিটাল অক্ষরে লিখছেন, “COPULATION” অর্থাৎ “মৈথুন” যৌন “সঙ্গম” এবং যে “টু মেক লাভ” নিয়ে গবেষণা আরম্ভ করেছিলুম তার বেলা ইংরেজের মত বিস্তার ধানই-পানাই না করে, আশকথা পাশকথা (বীট অ্যাবাউট দি বুশ) না ঝেড়ে, এর ঘাড়ে ওর কাঁধে আপন বোঝা না চাপিয়ে একদম এক ঘায়ে সোজাসুজি উত্তর দিচ্ছেন : “টু এনগেজ ইন সেক্সুয়েল ইন্টারকস।”

অবশ্য বলতে পারেন, ওয়েবস্টার অভিধান মূলত মার্কিন অভিধান। এর উত্তরে নিবেদন : (১) এ-অভিধান আমেরিকায় প্রকাশিত হওয়ার অল্পদিনের মধ্যেই এর বিলিতি সংস্করণ প্রকাশিত হয় এবং এখনো যে সব ইংরেজ উন্নাসিকতা অপছন্দ করেন (আমি নেটিব ঘৃণা করি) তাঁরা এ-অভিধানই ব্যবহার করে থাকেন; (২) কনসাইন্স অক্সফোর্ড বহুস্থলে বিশেষ বিশেষ ইংরিজি শব্দ মার্কিন মুন্ডুকে যে অন্য অর্থে ব্যবহৃত হয় তার উল্লেখ করেন; এ-স্থলেও করলে পারতেন; (৩) আমি ভুরি ভুরি ইংরেজ-লিখিত গল্প-উপন্যাসে এর ব্যবহার পেয়েছি। কিন্তু “ফ্লু” পাইনি, এবং ওয়েবস্টারেও শব্দটা নেই কারণ শব্দটা এখনো গ্রাম্য; (৪) এবং সর্বশেষ বক্তব্য, ওয়েবস্টার মার্কিন দেশগত বলে যদি তাকে অস্পৃশ্য বিবেচনা করতে হয় তবে এ-অভিধানখানি এ-দেশের গুণীজনের আশীর্বাদ লাভ করলো কি প্রকারে? কারণ গ্রন্থ-পরিচিতিতে স্পষ্ট ছাপা আছে।

Published with the assistance of Joint Indian-American Text Book Programme”

এ-বিষয়ে এতখানি লেখবার কারণ কি? গত সপ্তাহে প্রতিজ্ঞা করেছিলুম, কচর কচর আর করবো না, কিন্তু আমার কপাল মন্দ, তার দু-দিন পরেই এক সদ্য বিলেতফেরতা তরুণের সঙ্গে মোলাকাৎ। ছেলোটো ভালো, কিন্তু বিলিতি মোহ ঝেড়ে ফেলতে এখনো

তার চের সময় লাগবে। তখন হঠাৎ আমাকে স্টাইক করলো, কে যেন বলেছিল, বিলিতি স্নবারি স্বরাজ নাভের পর আদৌ কমেনি, বরঞ্চ বেড়েছে। যে-সব ছেলেছোকরারা আমার লেখা পড়ে আমাকে সম্মানিত করে অন্তত তারা যেন অস্বফর্ড বলতে ভিরমি না যায়, রকবাজি গুলমারার সময় খোদার-খামোখা বিলিতি স্নবারির “চিত্রিত গর্দভ” না হয় তাই এত সব বলতে হল, অন্যান্য—যথা “বিদেশের” বর্তমান অনুচ্ছেদ প্রধানত সেক্স নিয়ে—সেগুলো পূর্বের নিবেদন করেছি। অভিধান নিয়ে আলোচনা করে স্পষ্ট বোঝা গেল, ইংরেজ ভাষে খিঙে, বলে পটল।

ড্যাক অব বেডফোর্ড জন ভগুমি সম্বন্ধে যা বলেছেন তার অনেকখানি সর্বদেশে সর্বকালেই থাকে—তবে কোনো কোনো দেশে চক্ষুলজ্জাটার বাড়াবাড়ি কোনো কোনো দেশে কম। কোনো ফরাসী যখন সমাজে সম্মানিতা কোনো মহিলাকে প্রণয়িনীরূপে গ্রহণ করে তবে অধিকাংশ ক্ষেত্রেই সে সেটা গোপন রাখার কোনো প্রয়োজন বোধ করে না, কিন্তু বিলেতে ঠিক তার উল্টো—অর্থাৎ অধিকাংশ ক্ষেত্রেই বর্জনীয়। এবং অনেক ক্ষেত্রে ইংরেজ তার “ভাব-ভালোবাসাটা” এমনই নিরঙ্ক গোপন রাখতে সক্ষম হয় যে মহিলাটিও তার ডবল সুযোগ নেবার পথটা নিজের থেকেই দেখতে পান। জন সাহেব একটি সত্য ঘটনা বর্ণনা করতে গিয়ে বলছেন, একটি প্রখ্যাতা মহিলা (এই গোপনীয়তার সুযোগ নিয়ে) সমাজের অতি উচ্চস্থানে প্রতিষ্ঠিত দুজন অভিজাত জনের সঙ্গে একই সময়ে প্রণয়লীলা চালানেন। কথায় বলে ডান হাতের কারবার বাঁ হাত জানে না—নটবরদ্বয়ের একজনও জানতেন না, মহিলাটি দুজনার এজমালি রক্ষিতা। মহিলাটি যে-সব কেনাকাটা করতেন, তাঁর খরচাপাতি যা হত তার প্রত্যেকটি বিল তিনি দোকানীর কাছ থেকে ডুগ্নিকেটে চেয়ে নিতেন এবং আমাদের চৌকশ শেয়ালের একই কুমিরছানা দু-দুবার দেখাবার কায়দায় দুই মহাশয়ের সামনে পেশ করতেন। মাগি-ভাড়ায় ছিমছাম যে-বাড়িটিতে বাস করতেন তার ভাড়াও গুণতেন দুই হজুরই। বলা বাহুল্য, হাফাহাফি নয়, পুরোপুরিই—কারণ প্রেমের বখরাদার আছে সে তথ্যটি না জানলে ভাড়ার বখরাদার জুতো কোথেকে? কিন্তু তাবৎ কেচ্ছার মধ্যে সবচেয়ে রোমাঞ্চকর ব্যাপার : বেশ অনেক বৎসর ধরে উভয়েই কাচ্ছাবাচ্ছাগুলোর জনকরূপে গণ্য হতেন।

এখানে আমি পড়েছি বিপদে। কার কাছে গণ্য হতেন? ধরে নিচ্ছি তালেবর মহিলাটি সযত্নে দুই প্রস্থ বন্ধুবান্ধব বেছে নিয়েছিলেন যাদের এক প্রস্থ অন্য প্রস্থকে চিনতেন না। দুই প্রস্থকে দুই নাগরের নাম দিতেন। কিংবা হয়তো ড্যাকের চিন্তাধারা আদৌ সেদিকে যায়নি। তিনি বলতে চেয়েছেন, দুজনাই ভাবতেন, বাচ্ছাগুলো তাঁরই। কিন্তু তবু শেষ প্রশ্ন থেকে যায়, বাচ্ছাগুলো ভাবতো কি? তারা ঠিক যে রকম জানে, এক জোড়া জুতোতে দুটো জুতো থাকে ঠিক সেই রকম মেনে নিয়েছে একই বাড়িতে দুটো বাপ আনাগোনা করে! পাঠক জানেন, আমার কল্পনাশক্তি বড়ই অনুর্বরা। আপনারাই না হয় এ সমস্যাটি সমাধান করে নিলেন।

এবং সর্বশেষ জন বলেছেন, দু-দুজন নাগরের কাছ থেকে প্রেম, আত্মনিবেদন, প্রশস্তি-গীতি, আসঙ্গসুখ লাভ করে, সমাজের দু-দুটো হোমরাও সিং চোমরাও খানকে আশু দুটো বোকা ম্যাডার মত আঙ্গিনার খুঁটিতে বেঁধে রেখে তিনি যে তাঁর আয়ুস্মাখা বাড়িতে চেয়েছিলেন তা নয়, তিনি সব-কিছু করেছিলেন সুদ্ধুমাত্র পৌন্ড শিলিং পেলের জন্য।

ফ্রান্সে তো এসব নিত্যদিনের ডাল ভাত। রীতিমত একটা প্রতিষ্ঠান। কিন্তু এ কথা ভুললে চলবে না, জনও আমাদের বলছেন, পৃথিবীর আর সর্বত্র যা ঘটে থাকে, বিলেতে তাই ঘটে, তবে, সায়েবরা এ সব বাবদে উচ্চবাচ্য করেন না।

কিন্তু জন যে দার্শনিক দৃষ্টিভঙ্গি দিয়ে বিলেত তথা তাবৎ কন্টিনেন্টের কার্যকলাপ পর্যবেক্ষণ করেন আপন মতামত প্রকাশ করেন, কিংবা যখন নীরব থাকেন, অথবা কোনো প্রকারের উপদেশ দেওয়া থেকে নিরস্ত থাকেন, সবক্ষেত্রেই তাঁর বৈশিষ্ট্য আছে। তারই একটা পরিস্থিতির উল্লেখ তিনি করেছেন বড় বে-আক্ৰ ভাষায়। আমি সেটা মামুলী ঢঙে পেশ করি। বলছেন, “কোনো হাউস পার্টিতে (অর্থাৎ যেখানে উইক এন্ড কাটাতে হয়) যদি তুমি সুযোগ পেয়ে গৃহকর্ত্রীর সঙ্গে কিংবা কোনো বন্ধুর স্ত্রীর সঙ্গে মাত্রাধিক প্রেম করে ফেলো তবে সে-গেরো থেকে বেরিয়ে আসবার চেষ্টা করো—অবশ্য যতখানি পারো ভদ্রতা বজায় রেখে। বলা বাহুল্য, অতিশয় চতুরতাসহ। কারণ কোনো মহিলারই হৃদয়ানুভূতিতে আঘাত হানা অনুচিত। কিন্তু হয়, ইহসংসারে সব গেরো তো আর এড়াতে পারা যায় না।”

এস্থলে বিশেষভাবে লক্ষণীয়, পরিস্থিতিটা জন-এর মনঃপূত নয়। কিন্তু তিনি তাঁর দেশবাসীর তথা বিশ্বজনের মনোবৃত্তি ভালো করেই জানেন বলে লম্বা লেকচার ঝেড়ে সদুপদেশ দেন নি। তাঁর নীরবতা বহু ক্ষেত্রেই হিরণ্যয়।

॥ ৩৬ ॥

যুদ্ধ ব্যাপারটা কি তার সঙ্গে আমাদের সামান্য কিছু কিছু পরিচয় হচ্ছে। ভালোই। না হলে অবশ্য আরো ভালো হত। ভবিষ্যতে, কখনো, কন্ট্রিনকালেও হবে না সে-ভরসা যদি কার্তিকেয় দিতেন তবে হত সবচেয়ে ভালো। কিন্তু চতুর্দিকে যে হালচাল দেখছি তাতে তো মনে হয়, বর্তমান যুদ্ধটা ঝটপট শেষ হোক বা রয়ে-সয়েই শেষ হোক, এটাই শেষ যুদ্ধ নয়। আরেকটা মোক্ষমতর লাগবে। কবে লাগবে? সঠিক কেউ বলতে পারবেন না, তবে কোনো মস্তান যদি আমার কানের উপর পিস্তল বসিয়ে “না বললে নিষ্কৃতি নেই” রবে হুঙ্কার ছাড়ে তবে বলবো, বছর পঁচিশেকের ভিতর। কেন, কাতে কাতে, এসব প্রশ্নের উত্তর কিন্তু দেব না। আমি শুধু ভবিষ্যদ্বাণীটি করে রাখলুম এবং আজ-দিনের যে-সব নাবালক নিতান্ত আর কিছু না পেয়ে আমার এ-লেখাটি পড়েছে তারা যেন সেদিন আমাকে স্মরণে আনে—অবশ্যই প্রাণভরে অভিসম্পাত দিতে দিতে। কারণ, ততদিনে আমি ইহলোকের ডাঙাকে এক লাথি মেরে পরলোকের নৌকায় বসে ভরা পাল তুলে বৈতরণীর হেপারে।

যুদ্ধ প্রতিষ্ঠানটি উত্তম এ-কথা কোনো সুস্থ ব্যক্তি বলেছেন বলে শুনি নি, বরঞ্চ বহু বহু বিজয়ী বীর যুদ্ধের অজস্র নিন্দা করে গেছেন। তবে একটা বিষয়ে যুদ্ধের কি শত্রু কি মিত্র সকলেই অকুণ্ঠ প্রশংসা করে গেছেন। যুদ্ধের সময় অতি সাধারণ মানুষও প্রায়ই এমন সর্বোচ্চ পর্যায়ের স্বার্থত্যাগ, দেবদুর্লভ পরোপকার করে থাকে, পরের জন্য অশেষ ক্লেশ সহ্য করে মৃত্যু পর্যন্ত বরণ করে নেয় যে তার সামনে বহু রণের বিজয়ী বীর নেপোলিয়ন-সম্প্রদায় পর্যন্ত অবনত মস্তকে স্বীকার করেন যে ঐ সাধারণ জনের অসাধারণ কীর্তির কাছে তাঁদের লক্ষ রণজয় তুচ্ছ।

তারই একটা উদাহরণ লটে আমার সামনে পেশ করেছিল : তার উল্লেখ প্রকাশিত প্রবন্ধ বা পুস্তকে কোথাও আমি পাইনি, লটেও পায়নি।[১] কাহিনীটি পড়া সমাপ্ত করে পাঠক হয়তো কিছুটা নিরাশ হবেন। ইংরেজ এ-স্থলেই বলে থাকে : “নাথিং টু রাইট হোম এ্যাবউট”—“চিঠি লিখে বাড়িতে জানাবার মত এমন কিছু অসাধারণ ব্যাপার নয়।” আমি কিন্তু তবু জানাচ্ছি, তার কারণ প্রথমত দূশমন ইংরেজ যা করে না করে তার উল্টোটা করতে পারলে আমার জানটা বড় খুশ হয়। দ্বিতীয়ত ঘটনাটির নায়ক আমার পরিচিত। নাতিদীর্ঘ আট বছরের পরিচয়—সেটা দীর্ঘতর হবার সুযোগ কেন পেল না সেইটেই আমি “রাইটিং হোম এ্যাবউট”।

লটে বললে, “উইলিকে তো চিনতে নিশ্চয়ই ভালো করে চিনতে—তোমাদের সেমিনারের হাউসমাস্টার?”

আমি বললুম, “বন বিশ্ববিদ্যালয়ের কোন পীরমুরশিদ চিনতেন না তাকে? এস্তেক সেমিনারের বড়কর্তা প্রফেসর ডকটর পাউল কালে পর্যন্ত উইলির বাক্যস্রোত চট করে থামাবার চেষ্টা করতেন না।”

এস্থলে কাহিনীর প্রথম অংশটা আমাকেই বলতে হবে। উইলির সঙ্গে লটের পরিচয়—বরঞ্চ বলা উচিত ফ্রাউ উইলির সঙ্গে লটের পরিচয় হয় অনেক পরে। বিশেষত, অন্তত দুটি বছর তার সঙ্গে আমাকে মুখোমুখি হতে হত প্রতিদিন পাঁচ দশবার। তার পদবী ছিল “হাউস মাইস্টার”। “মাইস্টার” শব্দের অর্থ জর্মনে যদিও “মাস্টার” তবু “হাউস-মাইস্টার” বলতে “হাউস মাস্টার” বা বর্ত্তিৎ স্কুলের শিক্ষক বোঝায় না। হাউস-মাইস্টার কোনো বাড়ি বা আফিসের দেখ-ভাল করে। একে দরওয়ান বলা চলে না। বরঞ্চ ইংরিজেতে ‘হাউস-কীপার’ বলা চলে, ফরাসীতে ইনিই ‘কঁসিয়েজ’ নামে পরিচিত।

উইলি, তোলা নাম ভিলহেলম, সেমিনার বাড়িটা ফিটফাট ছিমছাম রাখত সেকথাটার বিশেষ উল্লেখ নিশ্চয়োজ্ঞান। সেন্ট্রাল হীটিঙে, উনিশ-বিশ, মূল্যবান পাণ্ডুলিপি ফোটোস্টাট করার জন্য ডার্করুমের পর্দা থেকে আরম্ভ করে সূক্ষ্মতম যন্ত্রপাতিতে এক কণা ধুলো পড়ে থাকতে কেউ কখনো দেখেনি। কোনো একটা ট্যাপের ওয়াশার বিগড়ে যাওয়াতে সেটার থেকে পিটির পিটির জলের ফোঁটা ঝরছে, এহেন গাফিলতী কেটে কখনো দেখাতে পারলে, হাউস-মাইস্টার উইলি যে তন্মূহূর্তেই এক ছুটে রাইন ব্রিজের উপর পৌছে সেখান থেকে জলে ঝাপ দিয়ে আত্মহত্যা করতো সে-সত্য সম্বন্ধে আমাদের কারো মনে ধূলিপরিমাণ সন্দেহ ছিল না।

(১)

“অসংখ্য রতনরাজি বিমল উজ্জ্বল

খনির তিমির গর্ভে রয়েছে গভীরে

বিজনে ফুটিয়া কত কুসুমের দল

বিফলে সৌরভ ডালে মধুর সমীরে।”

গ্রে-র কবিতা থেকে এই অংশানুবাদ বছর চম্বিশ পূর্বে এতই মুখে মুখে প্রচারিত ছিল যে কেউ সেটা ছাপালে পাঠক সম্প্রদায় বিরক্তিভাবে অবজ্ঞাও প্রকাশ করতো না। আজ সে যুগের পাঠক, বৃদ্ধরা পুরনো দিনের স্মরণে দু-চোখের জল ফেলছেন, তরুণরা হয়তো পড়বেনই না—আদৌ ‘মডার্ন’ নয়।

সেমিনার বাড়ির পাশে ছোটো একটি দোতলা বাড়ির উপরের তলায় ছিল মাইস্টার উইলির কোয়ার্টার। সেখানে সর্বাধিকারিণী ছিলেন তাঁর বীবি। গান্ধাগান্ধা শরীর, হাসিভরা মুখ—নসিকে টিপি কাল জর্মেন হাউস-ফ্রাউ। বয়স চল্লিশের মত হবে, কিন্তু উইলিকে দেখে ঠাহর করা যেত না তার বয়স কত হতে পারে। সেমিনারের সবচেয়ে পুরনো কর্মী বলতেন, পনেরো বছর ধরে তাকে ঐ একই চেহারায় দেখেছেন। সর্বান্তে সর্বত্র অনেকগুলো ছোট ছোট সাইজের মাসল ছড়ানো; ছোট ছোট সাইজের কারণ আর পাঁচটা জর্মেনের তুলনায় উইলি ছিল রীতিমত বঁটে।

সেমিনার পূর্ণসিদ্ধ অধিসিদ্ধ পণ্ডিতে পণ্ডিতে ভর্তি, আর জনা পাঁচেক সুপ্রাচীন অর্ধপ্রাচীন অধ্যাপক। সর্বশেষে ডক্টরেটের থিসিস লেখাতে ব্যস্ত আমরা কয়েকজন তো ছিলামই। আমার মনে মাঝে মাঝে প্রশ্ন জাগতো, এত সব পণ্ডিত আর এঁদের দিনের পর দিন একটানা বিদ্যাচর্চা—দিনে দশ ঘণ্টা খাটা সেমিনারের ডাল-ভাত—এসব দেখে দেখে পাণ্ডিত্যের প্রতি উইলির মনোভাবটা ছিল কি? কাউকে যে বড্ড বেশী একটা সমীহ করে চলতো, উইলির ধরনধারণ দেখে সেটা তো মনে হত না। তাকে কোনো দিন খবরের কাগজ পর্যন্ত পড়তে দেখি নি। আমি তার কোয়ার্টারে বহবার গিয়েছি, কারণ আশপাশের ক্যাফের তুলনায় উইলির বউ আমাদের জন্য কফি বানিয়ে দিত ঢের সস্তায়। আমাদের সময়াভাব তাই তার ব্লিৎস সার্ভিস উপেক্ষা করে খুদ ক্যাফেতে যাওয়াটা আমরা নিছক থার্ডক্লাস ন্নবারি চালিয়াতি বলে মনে করতুম। সেমিনারের জানলা দিয়ে ফ্রাউ উইলিকে শুধু আসল তুলে দেখাতে হত ক-কাপ ক-পট কফি চাই। রেকর্ড টাইমের ভিতর ফ্রাউ উইলি ডাইনে বাঁয়ে দুলতে দুলতে ট্রেতে করে কফি নিয়ে উপস্থিত। আমি কিন্তু সোজা ওদের ঘরে গিয়ে কফি খেতুম—কি হবে ওই ফুল ব্লিম (গান্ধাগান্ধার ভদ্র ইংরিজি প্রতিবাক্য) ফ্রাউকে সিঁড়ি ভাঙতে দিয়ে। সেখানে একদিন লক্ষ্য করলুম, ঘরে মাত্র একখানা বই—বাইবেল। বহু ব্যবহৃত। আমি জানতুম, ক্যাথলিক জনসাধারণ সচরাচর বাইবেল বড় একটা পড়ে না—তারা তাদের “উপাসনা পুস্তিকা” নিয়েই সমস্ত, গির্জায় যাবার সময় ঐ বই-ই সঙ্গে নিয়ে যায়। কথায় কথায় শুধালুম বাইবেলখানা পড়ে কে? উইলি। এবং একখানা বই ছাড়া অন্য কোনো কেতাব ছোঁয় না। তাই তো। সমস্যাটা একটু তলিয়ে দেখতে হয়।

সেমিনার খোলা থাকতো সকাল আটটা থেকে রাত দশটা অবধি। জ্বরদস্ত গবেষকরাও রাত আটটার সময় বাড়ি গিয়ে আর বড় একটা ফিরতেন না। কিন্তু আমার তখন “গৃহিত্বের কেশে মৃত্যুনা ধর্মমাচরেং” মৃত্যু যেন তোমার চুল পাকড়ে ধরে আছেন এই ভাবে ধর্মের আচরণ করবে। ধর্ম মাথায় থাকুন, মাথার উপরকার কেশ পাকড়ে ধরে আছেন আমার ট্যাক। সোজা বাঙলায় কইতে গেলে, ইংরেজ যে সত্যি বেনের জাত সেটা সপ্রমাণ করলো আমার শেষ কর্ম্মীনখানা কেড়ে নিয়ে একদিন বিলকুল মিন নোটিশে—গোলড স্ট্যান্ডার্ড বর্জন করে। আদাজল খেয়ে যে কড়ি কটা জমিয়েছিলুম—আরো ছটি মাস জর্মেনিতে বাস করে রয়েসয়ে আমার “গব্বয়ন্তনা” থীসিসখানা নামাব বলে, তাদের উপর বমিং হয়ে গেছে। গোলড স্ট্যান্ডার্ড নাকচ হওয়ার ফলস্বরূপ হঠাৎ একদিন দেখি আমার ট্যাকের তিনকড়ি চট্টোপাধ্যায় চটসে দুকড়ি চাটুঘোতে পরিবর্তিত হয়ে গিয়েছেন। অতএব আর মাত্র দুটি মাসের ভিতর যদি সেই লক্ষ্মীছাড়া থীসিসটা শেষ করে, তিন-তিনটি ভাইভা পরীক্ষা পাশ না করতে পারি তবে শয়নং

যত্রতত্র ভোজনং হট্টমন্দিরে—তা-ই বা কি করে হয়, এই পাথরফাটা শীতের দেশে যত্রতত্র শয়ন করলে মৃত্যু অনিবার্য এবং বন শহরের হাটবাজারে ভিখিরিকে দিনান্তে খয়রাতি এক পেলেট সুপ দেবার ব্যবস্থাও নেই—ফ্যুরার হিটলার ভিয়েতন তেবার বরাতে একদিন যমরাজকে ফাঁকি দিতে পেরে অন্য “পুণ্যভূমিতে” পরজন্ম লাভ করলেন। তাই তখন প্রাণপণ য়েস দিচ্ছি টাইমের সঙ্গে। সকাল, বিকেল পাঁচ পাঁচ দশ ঘণ্টা কাজ করার পরও মাঝে মাঝে আলুসেদ্ধ মাখম রুটি দিয়ে “ব্যানকুয়েট” সেরে রাত সাড়ে আটটায় আরেক প্রস্তুত সেমিনার যেতুম। কিন্তু আমার ওয়াটারলু ছিল অন্যত্র। সেটা এতক্ষণ পেশ করিনি, কারণ অধিকাংশ শ্যানা পাঠকই সেটা আমার লেখক-জীবনের প্রথম প্রভাতেই জেনে গিয়েছেন; নিতান্ত যঁারা জানেন না তাঁদের বলি লেখাপড়ায় আমি চিরকালই ছিলুম বিংশ শতাব্দীর এক নবকালিদাস যিনি মা সরস্বতীর কৃপালাভ কস্মিনকালেও কামনা করেননি এবং দেবীও অহেতুক তাঁকে দর্শন দেননি। সাদামাটা ভাষায় বলতে গেলে কেতাবপত্র দেখলেই আমার গায়ে জ্বর আসতো, ইস্কুল-বাড়িটা আমার কাছে শ্রাশানমশানের লাগোয়া ওয়েটিংরুমের মত মনে হত এবং ক্যুয়েশচন পেপারের উপর চোখ বুলুতে না বুলুতেই পরীক্ষার হলে কতবার যে ভির্মি গিয়েছি সেটা আমাদের শহরের এমবুলেনস তাদের রেকর্ডরূপে সযত্নে লোহার সিন্দুকে পুরে রেখেছে। কিন্তু তৎসম্বন্ধেও কি করে, কোন্ দুষ্টগ্রহের তাড়নায় যে আমি বন শহরে ডক্টরেট নেবার জন্য এসেছিলাম সেটা গোপন রাখতে চাই—পাঠক অযথা খোঁচাবেন না।

কাঁটায় কাঁটায় রাত দশটায় মাইসটার উইলি এসে আমাকে ঘনো লাগিয়ে একখানা লেকচার ঝাড়তো। রাইনল্যান্ডের গাঁইয়া ডাএলেস্টে। সে-ভাষা বোঝে কার সাধ্য? সেমিনারের নমস্যা পণ্ডিতগণ তো কানে ডবল আঙ্গুল পুরতেন। আমি যে অক্রেশে বুঝতে পারতুম তার একমাত্র কারণ আমার দিনযামিনী কটতো—এই শেষের কন্মাস ছাড়া—শহরের বেকার, ফোকটে পয়সা মারায় তালেবর, ঘাঘরা-পস্টনের তাঁবেদার মস্তানদের সঙ্গে। তারা গোটে শিলারের ভাষায় কথা কয় না। কিন্তু থাক সে পুরনো কাসুন্দো।

সে লেকচারের সারাংশ : “কি হবে, হে, ছোকরা অত নেকাপড়া করে? দুটো প্যাখনা গজাবে বুঝি? ঢের ঢের বাঘা বাঘা পণ্ডিতকে তো এই হাতের চেটোতে চটকালুম, বাওয়া, অ্যাডিন ধরে! কি পেলুম ক দিকনি, তবে বুঝি তোর পেটে কত এলেম। বলি—কান পেতে শোন, আখেরে ফয়দা হবে, তাই ভাঙিয়ে খাবি। এই যে হেথায় কেতাবে কেতাবে চতুদ্দিক ছয়লাপ, ওদেরই মত ওরা খসখসে শুকনো—বুঝলি, শুকনো। রসকষের নামগন্দো নেই। বাড়ি যা, বাওয়া বাপের সুপুন্ডুর—দু-গেলাস বিয়ার স্যাঁটস্যাঁট করে মেরে দে। গায়ে গুপ্তি লাগবে। জানটা ত-র্-র্-র্ হয়ে যাবে, চোখের সমানে গুল-ই-বাকওয়ালীর পাল ফটফট করে ফুটে উঠবে—”

আমি পকেট থেকে একটা সস্তার চেয়েও সস্তা সিগার বের করলুম। ওদেশে সেটাকে ‘রোট কিলার’ ‘মুখিক নিরোধ’ খেতাব দেওয়া হয়। কিছু না, রান্নাঘরে ওরই এক টুকরো রেখে দিন। আর দেখতে হবে না—পরের দিন গণ্ডাখানেক মড়া ইঁদুর ঘরে বাইরে পেয়ে যাবেন। ঐ “সিগারে” বার দুই ঠোঁড়ের মেরেই ওক্কা লাভ করেছেন। এই সোনার শহর কলকাতাতেও বিড়িওলার কুটুরিতে ব্রেক-আউটের মধ্যখানেও সে দিব্য মূর্তমান। আমার

এক মিত্র আকছারই ঐ মাল আমাকে রূপোর কেস থেকে বের করে সাড়স্বর প্রেজেন্ট করে—জানিনে কোন্ দুরাশায়।

উইলির দিকে এগিয়ে দিয়ে সিরিয়াস গলায় বলতুম, “পাক্সা বাকিংহাম পেলেসের সিগার। বহুকষ্টে তোমার জন্য পাচার করিয়েছি। লাও, হলো তো?”

উইলি পুনরায় সেই ধূয়ো ধরে, “কি যে হয় নেকাপড়া করে”—বিড়বিড় করতে করতে চলে যেত এক পণ্ডিতের কামরায়। সেখানে লেকচার না বেড়ে চাবির গোচ্ছাটা শুধু ঝমঝমাতো।

উইলি আর ঘণ্টা দেড়টাক তাড়া দিতে আসতো না।

কে বলে সাধু জর্মন মুন্সুক্ ঘুষের মত লুবরিকেন্ট ড্রাবধু?

তবে হ্যাঁ, বলে রাখা ভালো, উইলি সিগারটার সওগাৎ প্রতিবারে নিত না। না নিলে ও আমার ম্যাদ বাড়াতো, নিত্বি নিত্বিই।

॥ ৩৭ ॥

অধর্শিক্ষিত বহু মার্কিন যে একটিমাত্র জর্মন বিশ্ববিদ্যালয়ের খ্যাতির কথা শুনেছে সেটি বন শহরে প্রতিষ্ঠিত। এবং সে-খ্যাতির জন্য চোদ্দ আনা শিরোপা পায় ওই বিশ্ববিদ্যালয়ের যে-বিভাগ তরো-বেতোরো ভাষা শেখায়—প্রাচীন মিশরীয় বাবিলনীয়, বৈদিক সংস্কৃত থেকে আরম্ভ করে অদ্যদিনের মডার্ন জাপানী পর্যন্ত—তার নাম ওরিয়েন্টাল সেমিনার। এখানে দুনিয়ার কুস্ত্রে রকমের ধোপ থেকে নানান রঙের চিড়িয়া আসে হরেক রকমের বুলি শেখার তরে এবং মাঝে মধ্যে অধ্যাপকরা যখন সেমিনারে অনুপস্থিত, তখন যা কিচিরমিচির লাগায় তাতে ধ্বনিশাস্ত্রের জানা-অজানা কোনো আওয়াজই বাদ যায় না। ওদিকে মার্কিনদেশের বাসিন্দাদের জাত আগাপাস্তলা সাতান্ন জাতের জগাখিচুড়ি দিয়ে তৈরী। তাই তারা আসে বন শহরে, আর অনেকেই জর্মন দেশের সেরা সেই সেমিনারে বসে পড়ে আপন আপন মাতৃভাষায় খবরের কাগজ। অনেকটা সেই কারণেই সেমিনারের কাছেই ছিল একটি খবরের কাগজের হরবোলা ক্যুয়োসক্। আমরা উইলিমাষ্টারকে কাছে পেলে তার হাতে পয়সা গুঁজে দিয়ে বলতুম, “ফেরার সময় আমার জন্য সেই খবরের কাগজটা এনে দেবে তো?” “সেই” বলার কারণ ওস্তাদ উইলি পৃথিবীর তাবৎ ভাষা উচ্চারণ করতো তার আপন নিজস্ব মৌলিক গাঁইয়া রাইন উচ্চারণে। আমি স্বকর্ণে শুনেছি, সেমিনারের সর্বাধিকারী খুদ ডিরেকটর সায়েব উইলিকে বললেন একখানা “টাইমস্” নিয়ে আসতে। উইলি এক সেকেন্ড চিন্তা করে বললে, “ও! ‘টে টিমেন্স্’?” THE TIMES-এর THE জর্মন ভাষায় আইনানুযায়ী উচ্চারিত হয় ‘টে’ এবং TIMES উচ্চারিত হবে ‘টিমেন্স’। ধ্বনিতত্ত্বের বাঘা পণ্ডিত অধ্যাপক মেনজেরাটের গুরুরও সাধ্য নেই যে লাতিন অক্ষরে লেখা শব্দ তা সে জর্মন হোক, ইংরিজি হোক বা সাঁওতালীই হোক, জর্মন উচ্চারণে যদি পড়তে হয় তবে মাষ্টার উইলির উচ্চারণে খুঁৎ ধরেন। ভুরি ভুরি উদাহরণ দিয়ে ভাষা বাবদে আমার মত মূর্খও সপ্রমাণ করতে পারবে যে মাইস্টার উইলি আমাদের সেমিনারের লেকচারার হ্যারৎসিগেনশপেকের (নামটা শুনুন স্যার! শব্দার্থ ‘ছাগলের চর্বি’) যখন অতিশয় ধোপ-দুরন্ত সুমধুর উচ্চারণ সহ ‘রাজসিক’ জর্মন বলতেন তখন উইলি উপস্থিত থাকলে তার

মুখে স্পষ্ট দেখা যেত সে যেন প্রচ্ছন্ন কৌতুক অনুভব করছে। এমন কি যখন প্যারিস, ভিয়েনা, অক্সফোর্ড, হারভার্ডের ইয়া বড়াবড়া দাড়িওলা বাঘা বাঘা প্রফেসর পণ্ডিতরা আমাদের সেমিনারে এসে এ দেশের সিঙিয়ার্কা বিদ্যেবাগীশদের সঙ্গে “একটি একটি কথা যেন সদ্য-দাগা কামান” ঝেড়ে যে তুমুল বাক-বিতণ্ডার সৃষ্টি করতেন আর উইলি মেস্টার একপ্রান্তে ভূরভূরে খুশবাইয়ের ম-ম-মারা কফি সাজাতো তখন তার চেহারা দেখে দিবাক্ষ-জনও সম্যক হৃদয়ঙ্গম করতো, উইলি একটি সাক্ষাৎ পরমহংস : মিঞা-মৌলানাদের বাক্যব্যর্থণের ঝরঝর বারিধারা তার রাজহাঁসের পালকের উপর পড়ামাত্রই সঙ্গে সঙ্গে করে যেতো। পাঠকমাত্রই অবশ্য এসব শুনে বলবেন, বড় বড় পণ্ডিতদের যুক্তিতর্কে ভরা আলাপ-আলোচনা উইলি বুঝবে কি করে? কাজেই তার পক্ষে ঐ প্রতিক্রিয়াই তো স্বাভাবিক। উত্তরে বলি, প্রবাদ আছে, “কাজীর বাড়ির বাদীও দু-কলম জানে।” তা জানুক আর না-ই জানুক, এ-সব ক্ষেত্রে বহুলোক দু-পাঁচটা লবজা কুড়িয়ে নিয়ে স্নবের ন্যায় বিদ্যে জাহির করে। কিন্তু এহ বাহ্য : স্বর্গত দ্বিজেন্দ্রলাল ঠাকুরকে স্মরণে এনে তাঁরই আশ্রয়ক্যের পুনরাবৃত্তি করি : প্রকৃত সভ্যতার উপলব্ধির জন্য বিস্তার লেখাপড়া করতে হয় না, কেতাবপত্র ঘাঁটতে হয় না।...এই যে সেদিন কুঠিয়া অঞ্চল রাহুমুন্ড হল, সেই অঞ্চলের গাঁইয়া লালন ফকিরের গীত নিয়ে কবিগুরু থেকে আরম্ভ করে যে সব তত্ত্বাভ্যেয়ী সম্ভজন আলোচনা করেছেন তাঁরা সকলেই দ্বিজেন্দ্রনাথের আশ্র-বাক্যাটিকে বার বার নমস্কার জানিয়েছেন।

সে-কথা যাক। আমার মনে কিন্তু একটা ধোঁকা ছিল। উইলি যদি সত্যিই পাণ্ডিত্য বাবদে এতই উদাসীন হয় তবে সে আমাদের জন্য বই যোগাড় করার বেলা এত তুলকালাম কাণ্ড করে কেন? প্রয়োজনমত আমরা তাকে সকালবেলা যে-সব পুস্তক ধার চাই তার একটা ফর্দ দিতুম। সেইটেই নিয়ে সে যেত বিশ্ববিদ্যালয়ের লাইব্রেরিতে। এবং ফিরে এসে করিডরে ঢুকতে না ঢুকতে প্রায়ই শোনা যেত তার উচ্চ কণ্ঠস্বর,—অর্থ, কয়েকখানা বই সে পায়নি। আমাদের কেউ কেউ তাকে কখনো-সখনো বোঝাবার চেষ্টা করেছি, সব সময় সব বই পাওয়া যায় হেন লাইব্রেরি ইহসংসারে নেই। আমি স্বয়ং একদিন তাকে সাহসনা দিয়ে বলেছিলুম, “ও-বই না পেলেও আমার কাজ আটকাবে না।” উইলি মাস্টার গরগর করে বলেছিল, “আটকাবে কেন? বই না হলে কি সংসার চলে না? বই লেখা না হওয়ার আগে কি সংসার চলে নি? ইত্যাদি ইত্যাদি।”

১৯৩২-এ পরীক্ষা পাশ করে দেশে ফিরলাম। ১৯৩৪-এ ফের বন শহরের সেমিনারে উইলির সঙ্গে দেখা। এবারে আমাকে সেখানে তিনবেলা খেটে মরতে হত না। কিন্তু উইলিকে প্রাচীন দিনের কায়দা অনুযায়ী মাঝে মাঝে একটা সিগার দিতুম। হিটলার তখন দেশের কর্ণধার। তার চেলাচামুণ্ডারা গরম গরম বুলি কপচাচ্ছে। প্রধান বুলি যুদ্ধং দেহি। কিন্তু আজ এই বঙ্গদেশে এখনো বাকুদের গন্ধ যায়নি। ও-কথা থাক।

১৯৩৮-এ গরমের ছুটিতে বন শহরে পৌছেই গেলুম সেমিনারে—পথমধ্যে উইলির সঙ্গে দেখা। ততদিনে নাৎসি আদেশে প্রায় সবাই একে অন্যকে “হাইল হিটলার” বলে নমস্কার জানায়। “গুটেন মর্গেন” “গুটেন আবেনট” উঠে যাওয়ার উপক্রম। অনেকটা যেন অভ্যাসবশত উইলিকে “হাইল হিটলার” বলে প্রীতি-অভিবাদন জানালুম। চার বছর পরে দেখা। উইলি সানন্দে আমার পিঠ চাপড়ে দিয়ে কাছে এসে কেমন যেন বিষাদভরা গম্ভীর কণ্ঠে বললে, “তুমি তো, বাপু, বিদেশী। তুমি আবার ‘হাইল হিটলার’

করছে কেন?” কথাটা সত্য। বিদেশীর পক্ষে এ-আইন প্রযোজ্য ছিল না।

বুঝলুম—অবশ্য আগেই অনুমান করেছিলুম—উইলি প্রচ্ছন্ন হিটলারবৈরী।

এইবারে লটে যেন আমার কাহিনীর খেই ধরে নিয়ে বললে, উইলি রাজনীতির বড় একটা ধার ধারতো না। কিন্তু যুদ্ধ লেগে যাবার পর তখন আর কোথায় রাজনীতি কোথায় কি? গোড়ার দিকে জয়ের পর জয়। চতুর্দিকে হর্ষধ্বনি। বৃদ্ধেরা হিসেব করে দেখালেন, প্রথম বিশ্বযুদ্ধের তুলনায় এ-যুদ্ধে হতাহতের সংখ্যা নগণ্য। তাই সই। কিন্তু তখন কজন জানতো জঙ্গল থেকে পুরোপুরি বেরুবার পূর্বেই আনন্দধ্বনি ছাড়তে নেই : আরম্ভ হল জর্মনির উপর বোমাবর্ষণ। প্রথমটায় বড় বড় শহরের উপর। ওই সময় একদিন গ্ল্যাক-আউটের ঠেলায় আশ্রয় নিতে হল উইলি-পরিবারে। স্বয়ং উইলির তখন দম ফেলার ফুরসৎ নেই। হেথা-হেথা দ্রোণ খুঁড়ছে, বৃংকার বানাচ্ছে এবং তাঁর সবচেয়ে বড় কাজ হয়ে দাঁড়িয়েছে, সেমিনার বাড়িটাকে যেন হিটলারের আবাসভূমি কিংবা বাকিংহাম প্রাসাদের চেয়েও সুরক্ষিত জিব্রল্টর-দুর্গে পরিণত করে ফেলতে পারে—সে একা, তার দুখানা হাত দিয়ে। স্বয়ং লর্ড মেয়ার থেকে আরম্ভ করে ‘ভায়া’ রেক্টর হয়ে, সেমিনারে সেই একটিমাত্র নাৎসি লেকচারার শ্রোতার এস্তেক সে সঙ্কলের সঙ্গে ঝগড়া-কাজিয়া কাম্বাকাটি করে যোগাড় করেছে সেমিনারের বরাদ্দানুযায়ী প্রাপ্যের চেয়ে তিন ডবল মালমশলা; অষ্টপ্রহর বয়ে বেড়াচ্ছে বালির বস্তা, ইট সেমেণ্টের ডাঁই।

লটে বললে, হ্যার উইলি ঘরে ঢুকলে মজুরদের এপ্রন গায়ে। সর্বাপেক্ষা স্বেদসিক্ত কর্দমাক্ত। কথায় কথায় আমি বললুম, “মার্কিনরা যত বুদ্ধিই হোক, ওরা তো জানে, বন যুনিভার্সিটি-টাউন, এখানে বন্দুক কামানের কারবার নেই বললেও চলে। এখানে বোমা ফেলে ওদের কি লাভ?”

উইলি একটু শুকনো হাসি হেসে বললে, “মার্কিনরা বন শহরটাকে ভালো করেই চেনে। এই সেমিনারেই কত মার্কিন এল গেল। ডকটরেট পাশ করলো বাইবেল নিয়ে কাজ করে। আমিও তো অন্তত জনাতিরিশকে চিনি। ওরাই আমাকে বলেছে, তাবৎ মার্কিন মুন্সুকে সবচেয়ে বেশী করে নাম-করা এই বন-এর যুনিভার্সিটি। কিন্তু লড়াইয়ের ব্যাপারে ওরা আকাট। আকাশ থেকে বন শহরটাকে সনাক্ত করবে প্যারিস বলে, ভিয়েনাকে ভাববে ইস্তাম্বুল। আর হাতের তাগ তো জানো। দুনিয়ার সবকিছু একেবারে চাঁদমারীর মধ্যস্থানের বুলস-আইয়ের মত বেধড়ক হিট করতে পারে—সব হিট করতে পারে, শুধু যেটাকে হিট করতে চায়, যেটাকে তাগ করেছে সেইটে ছাড়া! তাগ করবে বার্লিনের রাইস্টগ, বোমা পড়বে বন-এর সেমিনারের উপর।”

লটে বললে, আমি জানতুম না উইলি দূরবস্থা দুর্দৈব নিয়েও পুটকারি করতে পারে। কিন্তু তার কথাই ফললো। ভগবান যে কখন কার মুখ দিয়ে কোন্ ভবিষ্যদ্বাণী করিয়ে নেন কে জানে। এবং এখনো জানিনে কোন্ নিশানা তাগ করতে গিয়ে তারা লাগিয়ে দেয় সেমিনারের পাশের বাড়িতে আগুন।

উইলি তো প্রথম আশ্রয় চেষ্টা দিল আগুনটা যাতে ছড়িয়ে না পড়ে। যুদ্ধের শেষের দিক—শত্রু জোয়ানসোমথ মন্দমানুষ কোথায় যে তাকে সাহায্য করবে; আগুন পৌছে গেল সেমিনার বাড়িতে।

তখনকার দিনের সেই হেঁড়াখোঁড়া সরকার, বিশ্ববিদ্যালয়ের সাহায্যে অনেক আগেই উইলি বিস্তার মূল্যবান পুঁথিপত্র পাণ্ডুলিপি নিরাপদ জায়গায় সরিয়ে নিয়েছিল। কিন্তু

সেমিনারের নিত্যদিনের গবেষণাকর্ম পঠন-পাঠন সীলমোহর সঁটে তো একেবারে বন্ধ করে দেওয়া যায় না—বিশেষ করে ছাত্রদের অসম্পূর্ণ ডক্টরেটের থিসিস অধ্যাপকদের পুস্তক। উইলি পাগলের মত দোতলা তেতলা উঠছে নামছে আর দু-হাতে জড়িয়ে ধরে সে-সব সেমিনারের দোরের গোড়ায় নামাচ্ছে। তার বউ সেগুলো দূরের অপেক্ষাকৃত নিরাপদ জায়গায় নিয়ে যাচ্ছে।

সেমিনার বাড়ি তখন দাউ দাউ করে জ্বলে উঠেছে। সবকিছু পুঁথিপত্র কেতাব কাগজের ব্যাপার। পুরনো কেতাবে আবার আদ্রতা একেবারেই থাকে না। বারুদ পেট্রলের পরেই বোধ হয় তারা পুড়ে মরতে জানে সবচেয়ে দ্রুতগতিতে।

উইলি তখনো ওঠানামা করছে।

উইলির বউ প্রতিবার স্বামীকে উপরে যেতে বারণ করছে। সেও প্রতিবার বলে, ‘এই শেষবার, বউ। আর যাব না।’

কি আর বলবো।

উইলির বউ বলেছিল, হঠাৎ বাড়িটা যেন একসঙ্গে হুড়মুড়িয়ে ভেঙে পড়ল।

লটে রুমাল বের করে চোখের জল মুছল।

বলে, “জানো সায়েড, উইলির বউ আমাকে দৃঢ় প্রত্যয়ের সঙ্গে বলেছিল, শেষবারের মত উইলি যখন তার বউকে বলে, এই তার শেষ স্কেপ, আর উপরে যাবে না, তখন তার গলায় এমন কিছু ছিল যার থেকে বউ বিশ্বাস করেছিল, এর পর আর সে উপরে যাবে না। সে তার কথা রেখেছিল—না? উপরে সে যায়নি—নাবেইনি যখন।

আরেকটা কথা আমার মনে বড় দাগ কেটেছে। উইলির বউ যেসব পাণ্ডুলিপি নিরাপদ জায়গায় এক ভাঁইয়ের উপর আরেক ভাঁই ডাম্প করেছিল সেগুলো পরে সরাবার সময় ধরা পড়লো উইলি ‘ফার্স্ট প্রেফারেন্স’ দিয়ে সকলের পয়লা উদ্ধার করেছিল ছাত্রদের অসমাপ্ত অসম্পূর্ণ থিসিস—তারপর অধ্যাপকদের পাণ্ডুলিপি। ...তোমাদের, আই মীন, ছাত্রদের সে খুব ভালোবাসত। না! বোধ হয় জানতো, প্রথম বাচ্চা প্রসব করার মত স্টুডেন্টদের প্রথম বই—ডক্টরেট থিসিস—বিয়োনেটা শক্ত ব্যাপার। আবার সেই বাচ্চা, আই মীন, ওই অর্ধসমাপ্ত পাণ্ডুলিপিও যদি পুড়ে গিয়ে বিনষ্ট হয়ে যায়। সে তো মারাত্মক গর্ভপাত। প্রফেসরদের তো সে ভাবনা নেই। তাঁদের কেউ কেউ তো শুনেছি, বছরবিয়েনী—বছরের এ-মোড়ে একখানা কেতাব ওই মোড়ে আরেকখানা।”

জ্বলন্ত কেতাব পুঁথির আগুনে পুড়ে মারা গেল উইলি।

আমার মনে পড়ে গেল আরব পণ্ডিত বছর উল জাহিজের কথা। [১]

মৃত্যুর তিন-চার দিন পূর্বে তাঁর স্বাস্থ্যের একটুখানি উন্নতি দেখা দেওয়াতে তিনি তাঁর স্ত্রীকে অনুরোধ করেন, তাঁকে যেন ধরে তাঁর কাজ করার তত্ত্বাপোশে নিয়ে যান। স্ত্রী আপত্তি জানালে তিনি অনুময় করে বললেন যে, তাঁর বইখানার আর মাত্র কয়েকখানি পাতা লিখলেই বইটি সমাপ্ত হয়।

(১) খাঁরা এনসাইক্লোপীডিয়া ব্রিটানিকার নামে অজ্ঞান, তাঁদের দৃষ্টি আকর্ষণ করে নিবেদন, সে কেতাবে তাঁর মৃত্যুর সন দেওয়া হয়েছে ১৮৬৯। আসলে তাঁর মৃত্যু ৮৬৯ খ্রিষ্টাব্দে।

জাহিঙ্গ যে জায়গায় বসে কাজ করতেন তার চতুর্দিকে থাকত দুচার গজ উঁচু বইয়ের ‘মিনার’। [২] তারই নিচের একখানা টেনে বের করার চেষ্টাতে সে মিনার তো ভেঙে পড়লই, তার ধাক্কাতে আর-কটা মিনারের বিস্তর বইয়ের তলায় চাপা পড়লেন জাহিঙ্গ। বই সরানো হলে দেখা গেল, বইখানা সমাপ্ত করতে গিয়ে তিনি জানটি খতম করে দিয়েছেন।

তাঁর জীবনীকার বলেছেন, “পণ্ডিতের পক্ষে পুস্তকস্তুপের নিচে গোর পাওয়ার চেয়ে শ্লাঘনীয় সমাধি আর কি হতে পারে।”

উইলি পণ্ডিত ছিল না। কিন্তু পণ্ডিতদের সেবক, পুস্তক সংরক্ষণের একনিষ্ঠ সাধক। পুস্তক সহমরণে সমাধি লাভ করলো—এর চেয়ে শ্লাঘনীয় শেষকৃত্য আর কি হতে পারে।

AMARBOI.COM

(১) “বঙ্গীয় শব্দকোষের” লেখক ঈশ্বর হরিচরণ বন্দ্যোপাধ্যায়ও এই পদ্ধতিতে কাজ করতেন। তাঁর পাণ্ডুলিপির এক ক্ষুদ্র অংশ তিনি তাঁর কাঁচা ঘরে রেখে বিদ্যালয়ে পড়াতে যান। ঘরে আগুন লাগাতে তিনি অর্ধোন্মাদ উইলির মত জ্বলন্ত গৃহে প্রবেশ করতে গিয়ে বাধা পান। হরিচরণের প্রতি নিয়তি—অন্তত উপরের দুই বিষয়ে—সদয় ছিলেন। তাঁর পরলোকগতি জাহিঙ্গ বা উইলির মত হয়নি। তিনি অন্ধ হয়ে যান।

AMARBOI.COM